

## 新五代

宋宋 徐歐 無火傷 註 撰

中 華 書 局

卷三二至卷五-一七(傳)

册

# 新五代史卷三十二

### 死節傳第二十

語曰:「世亂識忠臣。」誠哉!五代之際,不可以爲無人,吾得全節之士三人焉,作死節

## 土彦章 裝約 劉仁瞻附

{傳。

使、行營先鋒馬軍使。末帝卽位,遷濮州刺史,又徙澶州刺史。 履棘行百步。 王彥章字子明,鄆州壽張人也行。少爲軍卒,事梁太祖,爲開封府押衙、左親從指揮 持一鐵鎗,騎而馳突,奮疾如飛,而佗人莫能舉也,軍中號王鐵鎗 **彥章爲人聽勇有力,能跣足** 

分魏、相六州爲兩鎮,懼魏軍不從,遺彥章將五百騎入魏,屯金波亭以虞變。 |梁、晉爭天下爲勁敵,獨<mark>彥章心常輕晉王,謂人曰:「亞次</mark>鬭雞小兒耳,何足懼哉 魏軍果亂,

死節傳

第二

+

王

产章

間遺使者招彥章,彥章斬其使者以自絕。然曆人畏彥章之在梁也,必欲招致之,待其妻子 攻 、彥章、彥章 南走,魏人降晉。晉軍攻破澶州,虜彥章妻子歸之太原,賜以第宅,供給甚備,

愈厚。

可!」|末帝乃召||彦章爲招討使,以段凝爲副。 身不用,不如死! 見末帝,泣曰:「先帝取天下,不以臣爲不肖,所謀無不用。 討副使,而謀不見用。 兩城,號「夾寨」。而梁末帝昏亂,小人趙巖、張漢傑等用事,大臣宿將多被讒間,彥章雖爲 面 行營副 自梁失魏、博,與晉夾河而軍,彥章常爲先鋒。 招討使,又徙宣義軍節度使。是時,晉已盡有河北,以鐵鎖斷德勝口,築河南、北爲 」乃引繩將自經。 龍德三年夏,晉取鄭州,梁人大恐,宰相敬翔顧事急,以繩內靴中, 末帝使人止之,問所 |末帝問破敵之期,|彦章對曰:「三日。」左右皆 遷汝鄭二州防禦使、匡國軍節度使、 欲言。 今彊敵未滅, 翔日:「事急矣, 陛下棄忽臣言, 非彦章不 北 臣 招

時莊宗在魏,以朱守殿守夾寨,聞彥章爲招討使,驚日:「彥章驍勇, 斧,載冶者,具鞴炭, 兵舉鎖燒斷之,因以巨斧斬浮橋,而彥章引兵急擊南城,浮橋斷,南城遂破,蓋三日矣。 **彦章受命而出**, 馳兩日至滑州, 置酒大會,陰遣人具舟於楊村, 吾嘗避其鋒,非守殷敵 命甲士六百人皆持巨

**章兵已至。」比至,而南城破矣。** 舟栰相及輒戰,一日數十接。 也。 然彥章兵少,利於速戰,必急攻我南城。」即馳騎救之,行二十里,而得夾寨報者曰:「彥 **彦章至楊劉,攻之幾下。**晉人築壘博州東岸,彦章引兵攻之, 莊宗徹北城爲栰,下楊劉,與彥章俱浮于河,各行一岸,每

不克,還擊楊劉,戰敗。

迹,嚴等諷有司劾|彦章不恭,勒還第。 等從中日夜毀之,乃罷彥章,以凝爲招討使。彥章馳至京師入見,以笏畫地,自陳勝敗之 凝而不及彥章,軍士皆失色。及楊劉之敗也,凝乃上書言:「彥章使酒輕敵而至於敗。」趙嚴 凝各為捷書以聞,凝遣人告嚴等匿彥章書而上己書,末帝初疑其事,已而使者至軍,獨賜勞 人曰:「俟吾破賊還,誅姦臣以謝天下。」 邀等聞之懼,與凝叶力傾之。 其破南城也,彥章與 是時,段凝已有異志,與趙嚴、張漢傑交通,彥章素剛,憤梁日削,而嫉嚴等所爲,嘗謂

舉稍刺之,彥章傷重,馬踣,被擒。莊宗見之,曰:「爾常以孺子待我,今日服乎?」又曰:「爾 善戰者,何不守兗州而守中都。中都無壁壘,何以自固。」彥章對曰:「大事已去,非人力可 中都;又敗,與其牙兵百餘騎死戰。唐將夏魯奇素與彥章善,藏其語音,曰:「王鐵鎗也!」 騎,皆新捉募之兵,不可用,乃以屬彦章,而以張漢傑監之。彦章至遞坊,以兵少戰敗,退保 唐兵攻兗州,末帝召彥章使守捉東路。是時,梁之勝兵皆屬段凝,京師祇有保鑾五百

死

王彦

滔

何 血 曰:「汝非邈佶烈乎?我豈苟活者?」遂見殺,年六十一。 面 戰 |其於忠義,蓋 目 十餘年,今兵敗力窮,不死何待。且臣受梁恩,非死不能報,豈有朝事梁而暮事晉, 」莊宗惻然, [見天下之人乎!」|莊宗又遣明宗往諭之,彥章病創,臥不能起,仰顧明宗, 賜藥以封其創。 天性也。 莊宗愛其驍勇,欲全活之,使人慰諭彥章,彥章謝曰:「臣與陛 **彥章武人不知書,常爲俚語謂人曰:「豹死留皮,人死留** 晉高祖時, 追贈彥章太師 呼其小字 下 生

分財 州。 也! 一饗士,欲報梁仇,不幸早世。 」衆皆感泣 嗣昭卒, 與彥章同時有裴約者,潞州之牙將也。 ,其子繼韜以澤、潞叛降于梁,約召其州 今郎君父喪未葬, 莊宗以李嗣昭爲昭義軍節度使,約以裨將守澤 人泣 違背君親, 而 渝 日:「吾 吾能死于此, 1事故使 二十餘年, 不能從以 歸梁 見其

分逆順 大號 約來。」存審以五千騎馳至遼州,而梁兵已破澤州,約見殺。 ,聞繼韜叛降梁, |梁遣||董璋率兵圍之,||約與州人拒守,求救於||莊宗。 邪 」顧 符存審日 [1]:「吾不惜澤州 頗有憂色,及聞約獨不叛,喜曰:「吾於繼韜 與梁, 州易得, 是時,莊宗方與梁人戰河上,而 |約難得也。 何 薄? 於約 爾識機便, 何厚? 爲我取 而 約能

至周世宗時,又有劉仁贍者焉。

輕財 以仁贍爲淸淮軍節度使,鎭壽州。 李景使掌親軍,以爲武昌軍節度使。 仁贍以爲不可,彥貞不聽,仁贍獨按兵城守。。彥貞果敗於正陽。 重士,法令嚴肅,少略通兵書。 仁膽字守惠,彭城人也。 父金事楊行密, 李穀退守正陽浮橋,彥貞見周兵之却,意其怯,急追之。 事南唐,爲左監門衞將軍、黃袁二州刺史, 周師征准,先遣李穀攻自壽春,景遣將劉彥貞 爲濠、滁二州刺史,以驍勇知名。 所至 仁赡爲將, **拒周兵**, 一稱治。

是憤惋成疾。 金山下,爲夾道以屬城中。 周兵多死。世宗東趨濠梁,以李重進爲廬、壽都招討使。 下,而歲大暑,霖雨彌旬,周兵營寨水深數尺,淮、淝暴漲,礟舟竹龍皆飄南岸,爲景兵所焚, 屋,號爲「竹龍」,載甲士以攻之;又決其水砦入于淝河。攻之百端, 世宗攻壽州,圍之數重,以方舟載礮,自淝河中流擊其城;又束巨竹數十萬竿,上施版 而重進與張永德兩軍相疑不協,仁贍屢請出戰,景達不許,由 景亦遣其元帥齊王景達等列砦紫 自正月至于四月不能

**憬君臣亦皆震懾,奉**表稱臣,願割土地、輸貢賦,以效誠款,而仁贍獨堅守,不可下。 守將廣陵馮延魯、光州張紹、舒州周祚、泰州方訥、泗州范再遇等,或走或降,皆不能守, 明年正月,世宗復至淮上,盡破紫金山砦,壞其夾道,景兵大敗,諸將往往見擒,而景之 世宗使 雖

死節傳

第二十

王彦章

景所遣使者孫晟等至城下示之,仁贍子崇諫幸其父病,謀與諸將出降,仁贍立命斬之,監軍 使周廷構哭于中門救之,不得,於是士卒皆感泣,願以死守。

前代名臣,幾人可比!予之南伐,得爾爲多。」乃拜仁贍檢校太尉兼中書令、天平軍節度使。 仁贍不能受命而卒,年五十八。 嘆嗟久之,賜以玉帶、御馬,復使入城養疾,是日卒。制曰曰曰:「劉仁瞻盡忠所事,抗節無虧, 三月,仁赡病甚,已不知人,其副使孫羽詐爲仁贍書,以城降。 世宗命异仁瞻至帳

景聞仁贍卒,亦贈太師。 ...「吾以旌仁贍之節也。」 世宗遣使弔祭,喪事官給,追封彭城郡王,以其子崇讚爲懷州刺史,賜莊宅各一區。 壽州故治壽春,世宗以其難剋,遂徙城下蔡,而復其軍曰忠正軍,

宗實錄 力屈而降,世宗頗嗟其忠,然止於爲大將軍。 ,如彦章者, 鳴呼,天下惡梁久矣!然士之不幸而生其時者,不爲之臣可也,其食人之禄者,必死人 一哉仁赡降書,蓋其副使孫羽等所 可謂得其死哉!仁膽旣殺其子以自明矣, 爲也。 視世宗待二人之薄厚而考其制書, 乃知仁瞻 當世宗時,王環爲蜀守秦州,攻之久不下,其 豈有 重 死 而變節者乎。今周世

非降者也。自古忠臣義士之難得也!五代之亂,三人者,或出於軍卒,或出於僞國之臣,可

勝嘆哉!可勝嘆哉!

### 校勘記

鄆州壽張人 「張」, 各本原作「昌」。按薛史卷二一王彦章傳及歐陽文忠公集卷三九王彦章畫

像記均作「鄆州壽張人」,通鑑卷二六七亦稱「壽張王彥章」。考新、舊唐書地理志及太平寰宇

記,禪州惟有壽張縣,隸河南道;壽昌縣自屬沙州,隸隴右道(舊書隸河西道)。

此當是「壽張」

據改。

(三) 符存審 **薛史卷二九唐莊宗紀、卷五二裴約傳及通鑑卷二七二均作「李紹斌」。** 

(三) 復使入城養疾是日卒制日 薛史卷一二九劉仁瞻傳云:「(周世宗)復令入城養病, 尋授天平軍

節度使兼中書令,制出之日,薨於其家。」按通鑑卷二九三,劉仁贍入城養疾之日在戊申,制下

在辛亥,是日劉仁瞻卒。本史時序不清,疑有訛舛。

# 新五代史卷三十三

## 死事傳第二十一

其初無卓然之節,而終以死人之事者,得十有五人焉,而戰沒者不得與也。然吾取王淸、史 之於人也,樂成其美而不求其備,況死者人之所難乎?吾於五代,得全節之士三人而已。 荷生爲得,非徒不知愧,而反以其得爲榮者,可勝數哉!故吾於死事之臣,有所取焉。 君子 彥超者,其有旨哉!其有旨哉!作死事傳○。 不去爲當然。至於儒者,以仁義忠信爲學,享人之祿,任人之國者,不顧其存亡,皆恬然以 節而不二者,固鮮矣。於此之時,責士以死與必去,則天下爲無士矣。然其習俗,遂以苟生 嗚呼甚哉!自開平訖于顯德,終始五十三年,而天下五代,士之不幸而生其時,欲全其

○ 不能立傳者五人:馬彥超附朱守殷傳,宋令詢、李遐、張彥卿、鄭昭業見於本紀而已。

### 張源德

張 源德者,不知其世家,或日本晉人也。 少事晉,無所 稱。 從李罕之以路州叛晉降梁,

罕之遺源德見梁太祖。 太祖時,源德自金吾衛將軍爲蔡州刺史。

易 徳 源 劉 徳爲 鄰 圖 雖 恃 將 也。 梁 兵萬 劉鄭之兵,然與滄州相首尾, 事守貝州。 貞明三年(1),魏博節度使楊師厚卒,末帝分魏、相等大州爲兩鎮,懼魏軍不從,乃遣 。」乃先 人,屯于魏以虞變。 襲破德州 晉王入魏,諸將欲先擊貝州,晉王曰:「貝城 然後以兵五 魏軍果叛,迫其節度使賀德倫以魏、博二州降晉。 今德州居其 千攻源德,源德 一个而 堅守不下,晉軍塹而圍 無備, 不如先取之,則滄、 小而堅, ,攻之難卒下。 貝之勢分而 當是時. 且 源

之踰 習 瓊皆以 而鎭 年不 而 定皆 城降 मु 劉鄩 下。 晉 附于晉, 大敗于故 源德守旣堅,而具人聞晉已盡有河北,城中食且盡, 磁州 ,自河以北、 刺史靳昭、 元城, 南走黎陽, 山以東, 相州 張筠、 晉軍 攻破洺州, 四 面 滄州 千里,六鎭 戴思遠皆 數 丽 + 衞 棄城 州之地 州刺 走。 史 乃勸源德出降 皆歸晉, 來昭台、 當此 時, 汕 邢 晉已 |貝 州 源德 節度 州 使 圍

逐見殺

執兵而降, 得赦而後釋之, 如何? 源德已死,貝人謀曰:「晉圍吾久,吾窮而後降,懼皆不免也。」乃告于晉曰:「吾欲被甲 」晉軍許諾,貝人三千出降,已釋甲,晉兵四面圍而盡殺

之。

### 夏魯奇字

夏魯奇字邦傑, 青州人也。 唐莊宗時,賜姓名曰李紹奇, 其後莊宗賜姓名者, 皆復其

故。

將單廷珪、元行欽以曉勇自負,魯奇每與二將鬭,輒不能解,兩軍皆釋兵而觀之。 魯奇初事梁爲宣武軍校,後奔于晉,爲衞護指揮使。 從周德威攻劉守光於幽州,

中都,擒王彥章,莊宗壯之,賜絹千疋,拜鄭州防禦使。 奇力戰,手殺百餘人,身被二十餘瘡,與莊宗決圍而出。 忠武,河陽之人遮留不得行,父老詣京師乞留,明宗遣中使往踰之,魯奇乃得去。 晉已下魏博,梁將劉鄩軍于洹水,莊宗以百騎覘敵,遇鄟伏兵,圍之數重,幾不得脫, 遷河陽節度使,爲政有惠愛。 莊宗益奇之,以爲磁州刺史。 徙鎮 從戰 魯

唐師伐荆南,以魯奇爲招討副使,無功而還。 死 牵 僻 第二十 夏魯奇 姚 决 E 思 F 徙鎭武信,東川董璋反,攻遂州, 三五七 魯奇閉

城拒之,旬月救兵不至,城中食盡,魯奇自刎死,年四十九〇。

○ 吳巒兵猶可戰而不戰,魯奇食靈力窮而死,故取捨異。

### 姚洪

姚洪,本梁之小校也。 自董璋爲梁將,洪嘗事璋,後事唐爲指揮使。

長興中,遣洪將千人戍閬州。 董璋反,遣人以書招洪,洪得璋書,輒投廁中。 後璋兵攻

!

能從人奴以生!」障怒,然鑊于前,令壯士十人刲其肉而食, 奴,掃馬糞,得一臠殘炙,感恩不已。 破閬州,執洪,璋日:「爾爲健兒,我遇汝厚,奈何負我邪?」洪駡曰:「老賊 今天子用爾爲節度使, 何苦反邪?吾能爲國家死, 洪至死大駡。 明宗聞之泣下, 爾昔爲李七

### 王思同

錄其二子,而厚卹其家。

王思同,幽州人也。 其父敬柔,娶劉仁恭女,生思同。 思同事仁恭爲銀胡鞍指揮使,仁

|恭爲其子守光所囚,思同奔晉,以爲飛勝指揮使 (n)。 功遷神武 十軍都指揮使,累遷鄭州防禦使。 思同爲人敢勇,善騎射,好學,頗喜爲詩,輕財 梁、晉相距于幸,遣思同築壘楊劉, 以

`多禮文士,然未嘗有戰功。

而却。 宗顧 列四 西京留守。 左右曰:「人言思同不管事,能若是邪?」於是始知其材, 十餘栅以禦之。居五年,來朝,明宗問以邊事,思同指畫 明宗時,以久次爲匡國軍節度使,徙鎭雄武。 敬瑭兵罷,思同徙鎭山南 石敬瑭討董璋,思同爲先鋒指揮使,兵入劍門,而後軍不繼, 西道,已而復爲京兆尹、西京留守。 是時,吐蕃數爲寇,而秦州無亭障, 山川, ,以爲右武衞上將軍、京兆尹 陳其利 思同與璋戰, 不勝 害。 思闻去, 思同

鎭兵 侵弱宗室,動搖藩方,陳己所以興兵討亂之狀。 **珂所使推官郝翮等送京師。** 以通意。 而朝廷信用姦人,離間骨肉,我實何罪而見伐乎?」因慟哭。 「吾從先帝二十年,大小數百 圍 應 鳳翔 順元年二月,潞王從珂反鳳翔,馳檄四鄰, 是時,諸鎮皆懷嚮背,所得潞王書檄,雖以上聞,而不絕其使。 破東 西關城。 從珂兵弱而守甚堅, 戰 愍帝嘉其忠,即以思同爲 , 甲不解體, 金瘡滿身, 士卒固嘗從我矣。 外兵傷死者衆, 因遺伶奴安十十以五 言姦臣幸先帝疾病, 西面行營馬步軍都部署。 士卒聞者,皆悲憐之。 從珂登城呼外兵而泣曰: | 絃謁思同, 欲因其權 賊殺秦王而立幼嗣 獨思同執十十及從 今先帝新棄天下, 三月,會諸

死

事

儜

第二十

王思

同

張敬達

執思同。 主也 下。」從珂媿其言,乃殺之。漢高祖卽位,贈侍中曰。 同挺身走,至長安,西京副留守劉遂雅閉門不納,乃走潼關。 軍入城受賞矣!何用戰邪?」士卒解甲棄仗,聲聞數里,遂皆入城降。諸鎭之兵皆潰。 度釗攻城西,督戰甚急,士卒苦之,反兵攻虔釗,虔釗走。羽林指揮使楊思權呼曰:「潞王,吾 」乃引軍自西門入降|從珂。 從珂責曰:「罪可逃乎?」思同曰:「非不知從王而得生,恐終死不能見先帝於地 而思同未知,猶督戰。 嚴衞指揮使尹暉壓其衆曰:「城西 從珂引兵東,至昭應,前鋒追

○思同東走,將自歸于天子,與元行欽走異,故予其死。

### 張敬達

東馬步軍都指揮使,領欽州刺 張敬達字志通,代州人也,小字生鐵。少以騎射事唐莊宗爲廳直軍使。 一史,累遷彰國、大同軍節度使,徙鎭武信、晉昌。 明宗時,爲河

馬步 随有異志,乃以敬達爲北面副總管,以分其兵。 軍都 清泰 總管,屯于忻州,屯兵聚噪遮敬瑭呼「萬歲」, 二年,契丹數犯 邊, 廢帝以河東節度使石敬瑭兼大同、彰國、振武、威塞等軍蕃漢 明年夏,徙敬瑭鎭天平,遂以敬達爲大同、 敬瑭斬三十餘人以止之。 廢帝疑敬

彰國、 六月,兵圍太原,敬達爲長城連栅,雲梯飛礮以攻之,所爲城栅將成,輒有大風雨水暴至以 振武、威塞等軍蕃漢馬步軍都部署, 敬瑭因此遂反。 即以敬達爲太原四面招討使。

壞之。

斬敬達降。 不忍背唐,而救兵且至,光遠促之不已,敬達曰:「諸公何相迫邪!何不殺我而降?」光遠即 唐軍 食盡,削木篩糞以飼其馬,馬死者食之,已而馬盡。副招討使楊光遠勸敬達降晉,敬達自以 得,由是閉壁不敢復出。延壽等皆有二心,無救敬達意。 穹廬連屬如岡阜, 敬達收軍棚晉安,契丹圍之。廢帝遣趙延壽、范延光等救之。延壽屯團柏谷,延光屯遼州, 相去皆百餘里。 使者未復命,而兵已交。 敬瑭曰:「吾欲今日破敵可乎?」敬瑭報曰:「大兵遠來,而賊勢方盛,要在成功,不必速也。」 敬瑭求救于契丹。 唐軍爭馳之,契丹兵走,追至汾曲,伏發,斷唐軍爲二,其在北者皆死,死者萬餘人。 契丹耶律德光聞敬達死,哀其忠,遣人收葬之曰。 契丹兵圍敬達者,自晉安寨南,長百餘里,闊五十里,敬達軍中望之,但見 四面亙以毛索,掛鈴爲警,縱犬往來。 九月,契丹耶律德光自鴈門入,旌旗相屬五十餘里。 敬達陣於西山,契丹以羸騎三千,革鞭木韃,人馬皆不甲胄,以趨 敬達猶有兵五萬人、馬萬匹,久之 敬達軍中有夜出者,輒爲契丹所 德 光 先 遺 人 告

本紀貴其不誅光遠而諷其殺己以降賊,故不書死而書如其志。而傳錄其死者,終嘉其不降也。然己雖不屈而諷人 死 事傳第二十 張 敬 達 70 進 宗 沈 邥

降賊,故不得爲死

Ξ

### 翟進宗 張萬迪附

州 刺 暴其罪而斬之。 出帝贈進宗左武衞上將軍。 史。 翟進宗、張萬迪者,皆不知其何人也。 楊光遠反,以騎兵百脅取二刺史至靑州,萬迪聽命, 韶求進宗尸,加禮歸葬,葬事官給,以其子仁欽爲東頭供奉官。 及光遠平,曲赦青州, 初皆事唐,後事晉, 雖光遠子孫皆見慰釋,而獨不赦萬 而進宗獨不屈, 進宗爲淄州刺史, 光遠遂殺進 萬迪 爲

#### 沈斌

沈斌字安時,徐州下邳人也。 少為 軍卒,事梁爲拱辰都指揮使。 後事唐, 從魏王

破蜀,平康延孝,以功爲號州刺史,歷隨、趙等八州刺 史。

嬴乏可擊, 晉開運元年,爲祁 即以州兵邀之。 州刺史。 契丹以精騎剗門, 契丹犯塞至于榆林, 斌兵多死, 城中無備 斌以謂契丹深入晉地而歸兵 虜將趙延壽留兵急攻

之,奪其橋。 戰而死。 奪橋開路,公率諸軍繼進以入鎭州,可以守也。」重威許之,遣與宋彥筠俱前,淸與虜戰,敗 曰:「晉軍危矣!今去鎭州五里,而守死于此,營孤食盡,將若之何?請以步兵二千爲先鋒, 渡橋南,廣軍其北以相拒,而虜以精騎並西山出晉軍後,南擊欒城,斷晉餉道。 因 叛襄州,從高行周攻之,逾年不能下, 邦,斌能爲國死爾,不能效公所爲也!」已而城陷,斌自盡,其家屬皆沒于虜。 之,延壽招斌降,斌從城上駡延壽曰:「公父子誤計,陷于腥膻,忍以犬羊之衆,殘賊父母之 「請先登,遂攻破之。 開運二年多,從杜重威戰陽城,清以力戰功爲步軍之最,加檢校司徒。是多,重威軍中 王清字去瑕, 年五十三。 是時,重威已有二志,猶豫不肯進,彥筠亦退走,清日:「吾獨死於此矣!」因力 洛州曲周人也。 漢高祖立,贈淸太傅。 初事唐爲寧衞指揮使。後事晉爲奉國都虞候。 清謂行周曰:「從進閉孤城以自守,其勢豈得久邪?」 清謂重威 安從進

死

史彥超

史彥超,雲州人也。爲人勇悍聽捷。 周太祖起魏時, 彦超爲漢龍捷都指揮使, 以兵從。

以戍兵堅守月餘,太祖遣王峻救之,旻兵解去。以功遷龍捷右廂都指揮使,領鄭州防禦使。 太祖入立,遷虎捷都指揮使,戍于晉州。 劉旻攻晉州,州無主帥,知州王萬敢不能拒,彥超

周、漢戰高平,彥超爲前鋒,先登陷陣,以功拜感德軍節度使印。

世宗遣符彦卿拒之,以彦超爲先鋒,戰忻口,彦超

勇憤俱發,左右馳擊,解而復合者數四,遂歿于陣。

周兵圍漢太原,契丹救漢,出忻、代。

未決, 是時,世宗敗漢高平,乘勝而進,圍城之役,諸將議不一,故久無成功。 聞彥超戰死,遽班師,倉卒之際,亡失甚衆。 世宗旣惜彥超而憤無成功, 世宗欲解 憂忿不食者 去而

孫晟

數日。

贈彥超太師,優卹其家焉。

三六四

孫晟初名鳳,又名忌,密州人也。 好學,有文辭,尤長於詩。少爲道士,居廬山簡寂宮。

常畫唐詩人賈島像置于屋壁,晨夕事之。簡寂宮道士惡晟,以爲妖,以杖驅出之。乃儒服

北之趙、魏,謁唐莊宗于鎭州,莊宗以晟爲著作佐郎。

重誨惡晟,以謂敎守殷反者晟也,畫其像購之,不可得,遂族其家。 天成中,朱守殷鎭汴州,辟爲判官。 守殷反,伏誅,晟乃棄其妻子,亡命陳、宋之間。 安

侍,號「肉臺盤」,時人多效之。 乎?」晟事界父子二十餘年,官至司空,家益富驕,每食不設几案,使衆妓各執一器,環立而 多合意,以爲右僕射, 展爲人口吃,遇人不能道寒暄,已而坐定,談辯鋒生,聽者忘倦。 **晟奔于舆。是時,李昪方篡楊氏,多招四方之士,得晟,喜其文辭,使爲敎令,由是知** 與馮延巳並爲昪相。晟輕延巳爲人,常曰:「金椀玉盃而盛狗屎可 **昪尤愛之,引與計議,** 

諸州, 皆言 盛,壽春且危,乃曰:「願陛下寬臣五日之誅,容臣還取憬表,盡獻淮北諸州。」世宗許之,遣 學士鍾謨、文理院學士李德明奉表稱臣,不答。乃遣禮部尚書王崇質副晟奉表,謨與晟等 周 景願割壽、濠、泗、楚、光、海六州之地,歲貢百萬以佐軍。」而世宗已取滁、揚、濠、泗 欲盡取淮南乃止,因留使者不遣,而攻壽州益急。謨等見世宗英武非景敵, 世宗征准,李景懼,始遣泗州牙將王知朗至徐州,奉書以求和,世宗不答。 又遺翰林 而師 谌

死

事傳

第二十

孫晟

以暑 重進 供奉官安弘道押德明、崇質南還,而謨與晟皆見留。 書遺重進,勸其反。 與永德兩軍相疑,有隙,永德上書言重進反,世宗不聽。景知二將之相疑也,乃以蠟丸 雨 班 師, 留李重進、張永德等分攻廬、壽,周兵所得揚、泰諸州, 德明等旣還,景悔,不肯割 皆不能守, 景兵復振 地。 世宗亦

憐晟忠,悔殺之, 召拜<u>鍾</u>謨衞尉少卿。 **慢**畏吾神武,願得北面稱臣,保無二心,安得此指斥之言乎。」 亟召侍衞軍虞候韓通收<br />
愚下 南望而拜曰:「臣惟以死報國爾!」乃就刑。一晟旣死,鍾謨亦貶耀州司馬。 獄,及其從者二百餘人皆殺之。晟臨死,世宗猶遣近臣問之,晟終不對,神色怡然,正其衣冠 怒,未有以發。會重進以景蠟丸書來上,多斥周過惡以爲言,由是發怒曰:「晟來使我, 也。 召見必飲以醇酒。已而周兵數敗,盡失所得諸州,世宗憂之,召晟問江南事,晟不對,世宗 及崇質還,而晟與鍾謨俱至京師,館于都亭驛,待之甚厚,每朝會入閣,使班東省官後, 展之奉使也, 語崇質曰:「吾行必不免, 然吾終不負永陵一抔土也。」永陵者, 昪墓 景已割江北,遂遣謨還,而景聞晟死,亦贈魯國公。 其後,世宗怒解

記

鑑卷二六九俱繫在貞明元年。

(三) 來昭 薛史卷二八莊宗紀及通鑑卷二六九作「米昭」。

(三) 飛勝指揮使 南昌、鄂本及薛史卷六五王思同傳「勝」作「腾」・

(四) 威德軍節度使 **薛史卷一一四周世宗紀及卷一二四史彦超傳俱作「華州節度使」。** 

# 新五代史卷三十四

## 行傳第二十二

聞者。 況世變多故,而君子道消之時乎!吾又以謂必有負材能,脩節義,而沉淪于下,泯沒而無 自古材賢有韞于中而不見于外,或窮居陋巷,委身草莽,雖顏子之行,不遇仲尼而名不彰, 隳壞,至於如此,然自古天下未嘗無人也,吾意必有絜身自負之士,嫉世遠去而不可見者。 出於亂世,而怪當時可道者何少也,豈果無其人哉?雖曰干戈興,學校廢,而禮義衰,風俗 其父,而搢紳之士安其祿而立其朝,充然無復廉恥之色者皆是也。吾以謂自古忠臣義士多 嗚呼, 求之傳記,而亂世崩離,文字殘缺,不可復得,然僅得者四五人而已。 五代之亂極矣, 傳所謂「天地閉,賢人隱」之時歟!當此之時, 臣弑其君, 子弑

身而自得。吾得二人焉,曰鄭邀、張薦明。勢利不屈其心,去就不違其義,吾得一人焉,曰 苟利於君,以忠獲罪,而何必自明,有至死而不言者,此古之義士也,吾得一人焉,曰 行 傳第二十二 劕 遨

處

|乎山林而羣麋鹿,雖不足以爲中道,然與其食人之祿, 俛首而包羞,孰若無愧於心,

程福 迹不著,而無可紀次,獨其名氏或因見於書者,吾亦不敢沒,而其略可錄者,吾得一人焉,曰 而天理幾乎其滅矣。 五代之亂,君不君,臣不臣,父不父,子不子,至於兄弟、夫婦人倫之際,無不大壞, 於此之時,能以孝悌自脩於一鄉,而風行於天下者,獨或有之,然其事

### 鄭遨 張薦明附

李自倫。

作一行傳。

乃入少室山爲道士。 唐昭宗時,舉進士不中,見天下已亂,有拂衣遠去之意,欲攜其妻、子與俱隱,其妻不從,遨 鄭邀字雲叟,滑州白馬人也。 其妻數以書勸|邀還家,輒投之於火,後聞其妻、子卒,一慟而 唐明宗祖廟諱遨,故世行其字。 邀少好學, 敏於文辭。 非

[是聞者益高其行。 邀與李振故善,振後事梁貴顯,欲以祿邀,邀不顧,後振得罪南竄,邀徒步千里往省之,

由

道 而 :不餌,又能化石爲金,邀嘗驗其信然,而不之求也。 士李道殷、羅隱之友善,世目以爲三高士。 其後,邀聞華山有五粒松,脂淪入地,千歲化爲藥,能去三尸,因徙居華陰,欲求之。 邀種田,隱之賣藥以自給, 道殷有釣魚術, 鈎 節度使劉遂凝數以寶貨遺之,邀一不 興

年卒,年七十四。 唐明宗時以左拾遺、晉高祖時以諫議大夫召之,皆不起,即賜號爲逍遙先生。 天福四

形,玩于屋壁,其迹雖遠而其名愈彰,與乎石門、荷蓧之徒異矣。 數?然邀好飲酒弈棊,時時爲詩章落人間,人間多寫以縑素,相贈遺以爲寶,至或圖寫其 邀之節高矣,遭亂世不汚於榮利,至棄妻、子不顧而去,豈非與世自絕而篤愛其身者

以治天下。」高祖善之,賜號通玄先生,後不知其所終。 乎?其聲一而已。五音十二律,鼓無一焉,然和之者鼓也。夫一,萬事之本也,能守一者可 天地也。」高祖大其言,延入內殿講道德經,拜以爲師。薦明聞宮中奏時鼓,曰:「陛下聞鼓 召見,問道家可以治國乎。對曰:「道也者,妙萬物而爲言,得其極者,尸居袵席之間可以治 與邀同時張薦明者,燕人也。少以儒學遊河朔,後去爲道士,通老子、莊周之說。

#### 石昂

石昂,青州臨淄人也。 行傳第二十二 石 家有書數千卷,喜延四方之士,士無遠近,多就昂學問,食其門 昂 程 瀶 澄

趨出。 于庭,仰責彥朗日:「內侍奈何以私害公!」昂姓『石』,非『右』也。」廖朗大怒,拂衣起去,昂即 京師,監軍楊彥朗知留後事,昂以公事至府上謁,贊者以彥朗諱「石」,更其姓曰「右」。 下者或累歲,昂未嘗有怠色。 解官還于家,語其子曰:「吾本不欲仕亂世,果爲刑人所辱,子孫其以我爲戒! 而昂不求仕進。節度使符習高其行,召以爲臨淄令。 習入朝 ||昂趨

家不可以佛事汚吾先人。 - 昂父亦好學,平生不喜佛說,父死,- 昂於柩前誦尚書,日:「此吾先人之所欲閗也。」禁其

大亂。 卿。 郎王延等相與詣東上閤門,上昂行義可以應詔。詔昂至京師,召見便殿,以爲宗正丞。遷少 出帝卽位,晉政日壞,曷數上疏極諫,不聽,乃稱疾東歸,以壽終于家。曷旣去,而晉室 晉高 ·祖時,韶天下求孝悌之士,戶部尙書王權、宗正卿石光贊、國子祭酒田敏、兵部侍

### 程福贇

出帝時,爲奉國右廂都指揮使。 程 福贇者,不知其世家。爲人沉厚寡言而有勇。少爲軍卒,以戰功累遷洺州團練使。晉 開運中,契丹入寇,出帝北征,奉國軍士乘間夜縱火焚營,

因誣福贇與亂者同謀,不然何以不奏。出帝下福贇獄,人皆以爲冤,福贇終不自辨以見殺。 京師虛空,不宜以小故動搖人聽,因匿其事不以聞。 欲因以爲亂,福贇身自救火被傷,火滅而亂者不得發。 軍將李殷位次福贇下,利其去而代之, 福贇以爲契丹且大至,而天子在軍,

### 李自倫

敕以所居飛鳧鄉爲孝義鄉, 匡聖里爲仁和里, 准式旌表門閭。 程言等稱,自倫高祖訓,訓生樂,粲生則,則生忠,忠生自倫,自倫生光厚,六世同居不妄。」 奉敕准格。按格,孝義旌表,必先加按驗,孝者復其終身,義門仍加旌表。得本州審到鄕老 |李自倫者,深州人也。|天福四年正月,尚書戶部奏:「深州司功參軍|李自倫六世同居,

槐柳,十有五步,請如之。」敕曰:「此故事也,令式無之。 其量地之宜,高其外門,門安綽楔, 鳥頭正門,閥閱一丈二尺,鳥頭二柱端冒以瓦桶,築雙闞一丈,在鳥頭之南三丈七尺,夾樹 而易行焉。」 左右建臺,高一丈二尺,廣狹方正稱焉,圬以白而赤其四角,使不孝不義者見之,可以悛心 九月丙子,戶部復奏:「前登州義門王仲昭六世同居,其旌表有聽事、步欄,前列屏, 樹

行傳



# **新五代史卷三十五**

## 唐六臣傳第二十三

射崔遠、守太保致仕趙崇、兵部侍郎王贊、工部尚書王溥、吏部尚書陸扆皆以無罪貶, 北,掃文昌、軒轅、天市,宰相柳璨希梁王旨,歸其譴於大臣,於是左僕射裴樞獨孤損、右僕 將,不可。梁王由此大怒,曰:「吾常語|裴樞純厚不陷浮薄,今亦爲此邪!」是歲四月,彗出 年,梁王欲以嬖吏張廷範爲太常卿,唐宰相裴樞以謂太常卿唐常以淸流爲之,廷範乃梁客 賜死于白馬驛。 甚哉,白馬之禍,悲夫,可爲流涕者矣!然士之生死, 凡搢紳之士與唐而不與梁者,皆誣以朋黨, **豈其一身之事哉?初,唐天祐三** 坐貶死者數百人,而朝廷爲之 同日 西

書蘇循爲副,中書侍郎、同中書門下平章事楊涉爲押傳國寶使,翰林學士、中書舍人張策 明年三月,唐哀帝遜位于梁,遣中書侍郎、同中書門下平章事張文蔚爲册禮使,禮部尚 御史大夫薛貽矩爲押金寶使,尚書左丞趙光逢爲副。 四月甲子,文蔚等自上源驛奉

唐

六臣

傳第二十三

張文蔚

殿,進讀已,臣涉、臣策奉傳國 北 册 寶, 面 舞蹈再拜賀。 乘輅車,導以金吾仗衞、太常鹵簿,朝梁于金祥殿。 靈,臣貽矩、臣光逢奉金寶, 王衮冕南面,臣文蔚、臣循奉册升 以次升, 進讀已,降,率文武

懦 必 能 不肖、傾險獪猾、趨利賣國之徒也。不然,安能蒙恥忍辱於梁庭如此哉 存唐,然必不亡唐而獨存也。 夫一太常卿與社稷孰爲重?使樞等不死,尙惜一卿,其肯以國與人乎?雖樞等之力未 嗚呼!唐之亡也,賢人君子旣與之共盡,其餘在者皆庸 ! 作唐六臣傳。

### 張文蔚

蔚 是時,天子微弱,制度已隳,文蔚居翰林,制詔四方,獨守大體。 中書門下平章事。 力講解之,朝士 張文蔚字古華,河間人也。 多賴以全活。 柳璨殺裴樞等七人,蔓引朝士,輒加誅殺,縉紳相視以目, 初以文行知名,舉進士及第。 唐昭宗時,爲翰林學 昭宗遷洛, 拜中書侍 皆不自保, 士 承旨。 郞 同 文

瀘 北巡、留文蔚西都,以暴疾卒、贈右僕射。 梁太祖立,仍以文蔚爲相, 梁初制度皆文蔚所裁定。 文蔚居家亦孝悌。

### 楊涉

之亂 等。」唐亡,事梁爲門下侍郎、同中書門下平章事,在位三年,俛首無所施爲,罷爲左僕射,知 貢舉,後數年卒。 哀啼即位,拜中書侍郎、同中書門下平章事。涉,唐名家,世守禮法,而性特謹厚,不幸遭唐 楊涉,祖收,唐懿宗時宰相;父嚴二〕,官至兵部侍郎。 拜相之日,與家人相對泣下,顧謂其子凝式曰:「吾不能脫此網羅,禍將至矣,必累爾 涉舉進士,昭宗時爲吏部尚書。

子凝式,有文詞,善筆札,歷事梁、唐、晉、漢、周,常以心疾致仕,居于洛陽,官至太子太

保。

### 張策

居洛陽敦化里,浚井得 張策字少逸,河西燉煌人也。 古鼎,銘曰:「魏黃初元年春二月,匠吉千。」同以爲奇,策時年十三, 父同,爲唐容管經略使。 策少聰悟好學,通章句。 父同,

唐

六臣傳

第二十

Ξ

楊沙

張策

趙光逢

三七七

居同 初 元年無二月也,銘何謬邪?」同大驚異之。 側,啓曰:「漢建安二十五年,曹公薨,改元延康。 是歲十月,文帝受禪,又改黃初,是黃

部 喜曰:「張夫子至矣。」遂留以爲掌書記,薦之于朝,累拜中書舍人、翰林學士。 入唐爲膳部員外郎。 婢肩興其母東歸,行積雪中,行者憐之。梁太祖兼四鎮,辟鄭、滑支使,以母喪解職。 亂, 工部侍郎奉旨。 開平二年, 尚書,致仕,卒于洛陽。 居田里十餘年。 策少好浮圖之說,乃落髮爲僧,居長安慈恩寺。 召拜廣文館博士。 華州韓建辟判官,建徙許州,以爲掌書記,建遣策聘于太祖,太祖見而 拜刑部侍郎、同中書門下平章事,遷中書侍郎。 黃巢犯長安,策乃返初服,奉父母以避 以風恙罷爲刑 太祖卽位,遷 服除,

### 趙光逢

界尺」。 趙 昭宗時爲翰林學士 光逢字延吉,父隱,唐左僕射。 承旨、御史中丞,以世 光逢在唐以文行知名,時人稱其方直温潤, 者五六年。 謂 之「玉 柳

與光逢有舊恩,起光逢為吏部侍郎、太常卿

位, 起爲司空、 唐亡, 事梁爲中書侍郎、 同中書門下平章事, 復以司徒致仕。 同中書門下平章事 累遷左僕射, 唐 天成 中, 即其家拜太保,封齊國公, 以太子太保致仕。 末帝卽

### 薛貽矩

卒,贈太傅。

太祖 誅宦 臣 拜吏部尙書,遷御史大夫。 1拜舞 平章事,累拜司空。 揖之升階,貽矩 !者,貽矩時爲中尉韓全誨等作畫像贊,坐左遷 薛貽矩字熙用, 太祖側 身以避之。 曰:「殿下功德及人,三靈改卜,皇帝方行舜、禹之事,臣安敢違? 河東聞喜人也,仕唐爲兵部侍郎、翰林學士承旨。 贻矩爲梁相五年,卒,贈侍中。 **貽矩還,遂趣哀帝遜位。** 天祐三年,太祖自長蘆還軍, **貽矩乃自結於梁太祖,太祖** 太祖卽位,拜貽矩中書侍郎、同中書門 哀帝遣貽矩來勞, 昭宗自岐還長安, 貽矩 以臣禮 言之於朝, 」乃稱 見,

### 蘇循 杜曉附

祖 梁兵 弑 蘇 昭宗, 攻楊行密, 立 知 哀帝,唐之舊臣皆憤 何 許 大敗于渒河, 人也。 爲 入 Ϊij 太祖 佞, 惋 躁忿, 切齒 阿諛無廉恥 急於禪 長禍 惟利 代, 欲邀 是趨 或 去 唐 不仕, 九錫, 事 唐 爲 羣臣 而 禮 循 部 莫敢 特 尙 附會 古。 當 梁以希 其 是 進 太

|循

倡

三、一、梁王

一功德,

天命

所

歸,

宜

卽

一受禪。」

明年,梁太祖

卽

位

一, 循

爲

册

禮

副

使。

昭宗 範 固 前 出 之謂 本 於 有 皇 梁 梁 司 循 帝 諡 恭 客 有子 楷 日 將 先 亂 爲 恭 掌 楷 帝 而 起 靈莊 日 乾寧中 不 求 居 太常卿 損 鄓 閔 之謂 皇帝, , 名實 興 舉 柳 靈 不 進 廟號 一,武 得 璨 不 士 及第 者 稱 張 而 寒宗。」 一、公爲 不 廷 廷 遂 範 昭宗 範 之謂 等相 亦以 太常 遣 結, 學士 莊 此 卿 怨唐, 在 予史官也, 因謂 陸展覆落之, 國 逢 因 廷範 難 下 之謂 楷 日:「夫 不可 疏 ,楷常慚! 廷範 閔 以 諡 不 因 者, 言。」乃上 廷 事 恨 範 有 所 議 功 以易名 及 之謂 昭宗 疏 臣 駁 襄, 遇弑 而 聞 鲁 請 執 信 唐 改 事 而 也 諡 堅 政 狂

於 造 舊臣 河中。 宜得 梁太 循 楊 父子皆自以 涉 端 其後, 祖 、張文蔚等皆慚 土以 已即 友謙叛梁降晉, 厚 位. 風 附 一,置 俗 會梁得 酒玄 循 懼俯 父子 一德殿 所 伏 晉王將卽 皆 託 不 無 顧 能 旦夕引 行, 羣 對 臣 不可 , 獨 位、求唐故臣 自 首 循 陳 立 與張 德薄 希 於 新 見 禕 不 朝。 進 足以 在者, 用 薛 於是父子 貽 當 敬 矩 以備 翔 天命, 盛 尤 稱 惡之, 百官之闕, 皆 梁王 皆諸 勒 功 歸 謂 公推 德, 田 太 里 |友謙遺循 祖 所 越 泛力。 乃 日 以 依 順 梁 朱 天 至魏 應 室 唐 友 謙

日又獻「畫日筆」三十管,晉王益喜,因以循爲節度副使。已而病卒。 **楷,同光中爲尙書員外郞。明宗卽位,大臣欲理其駁諡之罪,以憂死。 循始至魏州,望州廨聽事即拜,謂之「拜殿」。及入謁,蹈舞呼萬歲而** 是時梁未滅, 晉諸將相多不欲晉王卽帝位。 晉王之意雖銳, 將相大臣未有贊成其議 莊宗卽位, 稱臣,晉王大悅。明 贈左僕射。

等討賊,兵大掠,曉爲亂兵所殺,贈右僕射。 開平二年,拜中書侍郎、同中書門下平章事。 曉日:「嵇康死,子紹自廢不出仕,山濤以物理責之,乃仕。 吾子忍令杜氏歲時鋪席祭其先 貞兵犯京師,昭宗殺讓能於臨皋以自解。 人同匹庶乎?」曉乃爲之起。累遷膳部郎中、翰林學士。梁太祖卽位,遷工部侍郎奉旨。 十餘年。 當唐之亡也,又有杜曉者,字明遠。 崔胤判鹽鐵,辟巡官,除畿縣尉,直昭文館,皆不起。崔遠判戶部,又辟巡官,或謂 祖審權,父讓能,皆爲唐相。 院以父死無罪,居喪哀毀;服除,布衣幅巾,自廢 友珪立,遷禮部尚書、集賢殿大學士。 昭宗時,王行瑜、李茂 袁象先

嗚呼,始爲朋黨之論者誰歟?甚乎作俑者也,眞可謂不仁之人哉!予嘗至繁城讀魏受 唐 大 臣 僔 第二十 === 蘇 循

漢、唐之末,舉其朝皆小人也,而其君子者何在哉!當漢之亡也,先以朋黨禁錮天下賢人君 子,而立其朝者,皆小人也,然後漢從而亡。及唐之亡也,又先以朋黨盡殺朝廷之士,而其 等所爲如此,未嘗不爲之流涕也。夫以國予人而自夸耀,及遂相之,此非小人,孰能爲也? 見漢之羣臣稱魏功德,而大書深刻,自列其姓名,以夸耀于世。又讀梁實錄,見文蔚

餘存者,皆庸懦不肖傾險之人也,然後唐從而亡。

譽則謂之朋黨,得善者必相薦引,薦引則謂之朋黨,使人聞善不敢稱譽,人主之耳不聞有善 朋黨罪之,則無免者矣。 于下矣,見善不敢薦,則人主之目不得見善人矣。善人日遠,而 吏,謂之朋黨可也。 親戚故舊,謂之朋黨可也;交游執友,謂之朋黨可也;宦學相同,謂之朋黨可也;門生故 者,有不可誣者,不能遍及也。至欲舉天下之善,求其類而盡去之,惟指以爲朋黨耳。故其 《然誰與之圖治安之計哉?故曰:欲孤人主之勢而蔽其耳目者,必用朋黨之說也。 ·羣小人雖衆,必有所忌,而有所不敢爲,惟空國而無君子,然後小人得肆志於無所不爲, 夫欲空人之國而去其君子者,必進朋黨之說;欲**孤**人主之勢而蔽其耳目者,必進朋黨 欲奪國而與人者,必進朋黨之說。夫爲君子者,故嘗寡過,小人欲加之罪,則 是數者,皆其類也,皆善人也。故曰:欲空人之國而去其君子者,惟以 夫善善之相樂,以其類同,此自然之理也。 小人日進,則爲 故聞善者必相稱譽,稱 人主者,假 有可誣

唐六臣傳第二十三 校勘記

則漢魏、唐梁之際是也。 故曰:可奪國而予人者,由其國無君子, 空國而無君子, 由以朋黨

而去之也。

嗚呼,朋黨之說,人主可不察哉!

傳曰「一言可以喪邦」者,其是之謂與!可不鑒哉!可不戒哉!

### 校勘記

(1) 楊涉祖收唐懿宗時宰相父嚴 舊唐書卷一七七楊收傳、新唐書卷七一下宰相世系表及卷一八四

楊收傳俱記楊遺直生發、假(太平廣記卷一五五楊收條作「嘏」)、收、嚴四子,嚴子涉、注。

**預言卷一二楊收條合。是收與嚴乃兄弟,于涉爲從父,此云「涉祖」誤。** 

# 新五代史卷三十六

# 義兒傳第二十四

作義見傳口。 矣,其可紀者九人,其一是爲明宗,其次曰嗣昭、嗣本、嗣恩、存信、存孝、存進、存璋、存賢。 往往養以爲兒,號「義兒軍」,至其有天下, **德五十年間,天下五代而實八姓,其三出於丐養。蓋其大者取天下,其次立功名、位將相,** 豈非因時之隙,以利合而相資者邪!唐自號沙陀,起代北,其所與俱皆一時雄傑虣武之士, 嗚呼!世道衰,人倫壞,而親疏之理反其常,干戈起於骨肉,異類合爲父子。開平、顯 , 多用以成功業, 及其亡也亦由焉。 太祖養子多

♡ | 李存審,后復以符氏大顯,故別自爲傳。

## 李嗣昭

異 通 ,後更名嗣 召其 嗣 昭 父 昭。 問 本 焉。父言 姓 韓 嗣 昭 氏 爲 汾州 1家適 人短 太谷縣民家子 生兒: 小,而 太祖 膽勇 因遺以 %過人。 也。 金 太祖 初喜嗜酒 帛 而 出 一獵、至 取之,命其弟克柔養 太祖嘗微戒之,遂終身不飲。 一其家, 見其 林 以 中 爲 鬱 子 鬱 有 初名 氣 進

祖愛其

謹

厚,常從用

兵,爲

衙

內指

揮

使

從 慶爲梁所敗,太祖酖殺君慶,嗣昭攻克之。三年,出山東,取梁洺州,梁太祖自將攻之,遣葛 之,嗣昭與會戰含山,執其將一人,斬首三千級,遂取澤州。 嗣 周設伏於青山口。 昭 又敗之于胡壁堡,執其將一人。光化 陝州 王珙與其兄珂爭立於河中, 遣 嗣 元年,澤州李罕之襲潞州以降梁,梁遣丁 昭 助 珂, 敗珙於猗氏, 二年,晉遣李君慶攻梁路州, 獲其 、將三人。 梁軍 會應罕 救

入于梁。 梁兵, 昭 昭 陰 乘間 地, 等敗走,友寧追之,晉遣李存信率兵迎嗣昭,存信 天復元年,梁破河中, 取慈州,降其刺史唐禮 會大雨,梁軍解去。晉汾州刺史李瑭叛降梁軍,梁軍已去,嗣昭復取汾州,斬 改梁晉、絳,戰平陽,執梁將一人。進攻蒲縣。梁朱 太祖大恐,謀走雲州,李存信等勸太祖 嗣昭聞梁太祖自來,棄城走,前遇伏兵,因大敗 執王珂, 又取濕州 取晉、絳、慈、隰,因大舉擊晉,圍太原。嗣昭日以 ,降其刺史張瓌。 奔于契丹,嗣昭力爭以爲不可,賴劉太妃 又敗。 友寧、氏叔琮以兵十萬迎擊之, 梁軍 是歲, **遂**園 梁軍西犯京師, 太原,而慈、隰、汾州 違 塘。 精騎出 鳳 翔 遂

言之,乃止。 而附梁。 晉外失大國之援,內亡諸州,仍歲之間,孤城被圍者再。 嗣昭晝夜出奇兵擊梁軍,梁軍解去,嗣昭復取汾、慈、隰。 於此時,嗣昭力戰之功爲 是時,鎭、定皆已絕晉

轉擊 李紹宏代之。 於山 之?宜以精騎撓之,因其勞乏,可以勝也。」莊宗然之。是時, 欲收兵還臨濮, 攻破夾城。 萬 文路,築夾城以圍之。梁太祖嘗遣人招降嗣昭,嗣昭斬其使者,閉城拒守, 西,晉軍從上急擊,大敗之。於是晉城德勝矣。 山 天祐三年,與周德威攻梁潞州,降丁會, [北,而自以銀槍軍趨而呼曰:「今日之戰, 嗣昭完緝兵民,撫養甚有恩意。 嗣昭將去,幽州人皆號哭閉關遮留之,嗣昭 嗣昭日:「梁軍已勝, 旦暮思歸。 梁、晉戰胡柳, 以嗣昭爲昭義軍節度使。 得山者勝! 吾若收軍,使彼休息,整而復出, 周德威死,嗣昭權知 「夜遯,乃得去。 晉軍敗, 周德威戰死。 」晉軍皆爭登山, 梁軍已登無石山,莊宗遣嗣 梁遣李思安將兵十 幽州 踰年, 莊宗始 梁軍遽下,陣 居數月,以 莊宗懼, 何以當 昭

拔矢于腦, 川 以奇兵擊之,鎭 是時,晉遣閻寶攻張文禮於鎭州,寶爲鎭人所敗,乃以嗣昭代之。 九年,從莊宗擊契丹於望都,莊宗爲契丹圍之數十重,嗣昭以三百騎決圍,取莊宗以 射殺 軍且盡,餘三人匿破垣中,嗣昭馳馬射之,反爲賊射中腦, 人,還營而卒。 鎭兵出掠 嗣昭顧箙中矢盡, 九門,嗣昭

载

兒

傳

第

事泄, 機器 貸。」由是莊宗 以 長復何爲乎? 宦官、伶人求歸 絕,楊氏之積, 聽。 語 以 因 繼韜初無 見天子? 趣 事 刨 繼韜 將走契丹,會赦至,乃已, 之, 以爲 召 嗣 斬于天津橋 監 昭 繼韜乃遣其弟繼遠 母楊 軍張居翰、節度判官任圜。 昭 諸 ※悪意 且路城堅而 義 子 」至是因丼誅之。 王, 釋繼韜。嘗從獵,寵倖無間。 蓋有助焉。 軍 、爲姦 鎭, 繼 一留後。 儔 善畜財, 莊宗不許 其二子嘗爲質于梁,莊宗破梁得之,撫其背曰:「爾幼, 長 人所悞耳。」楊夫人亦以賂謁劉皇后,劉皇后爲言:「嗣昭功臣 而懦, 倉廩實, 繼韜 至是, 平生 入梁,梁末帝卽拜繼韜同中書門下平章事 委其政於魏琢、申蒙,琢等常教繼韜反,繼韜 其弟繼韜囚之以自立, 因隨其母朝于京師,繼遠 繼韜 卽遺 不如閉 乃齎銀數十 居積行販, 陰使人告繼遠, 人斬 **琢等以謂莊宗召居翰等問繼韜** 城坐食積栗, 繼遠 李存渥 至貲百萬。 萬兩至京師,厚賂宦官、伶人,宦官、伶人皆言 以繼傳 尤切齒,數詆責之,繼韜懷不自安, 莊宗方與梁兵相持河上, 令起變於軍中,冀天子遣已往安緝之, 以延 知路州 |諫曰:「兄爲臣子,以反爲名,復何面 當嗣 (歳月, 昭爲梁 愈於往 《圍以 事, 夾城 而就戮也。」繼韜 繼韜且 居數月,莊宗 未決。 猶能佐其父反, 彌 不 見誅, 年, - 暇究其 莊宗 宜蒙恩 軍 滅梁 在 復略 · 用乏

子 誅死 而大兄不仁,利其貲財,淫其妻妾,吾所不忍也!」乃服穣麻, 召繼儔 還京師 繼儔悉取繼韜妓妾 7珍翫 Mi 不 時創 路。 其弟繼達怒曰:「吾兄父 引數百騎坐戟門,使

入殺繼儔。 節度副使李繼珂募市人千餘攻繼達,繼達走城外,自剄死。

爲援,契丹求略,高祖貸于繼忠以取足。 見殺,惟一子繼忠僅免。繼忠家于晉陽,楊氏所積餘貲猶鉅萬,晉高祖自太原起兵,召契丹 嗣昭七子。至明宗時,子繼能坐答殺其母主藏婢,婢家告變,言繼能反,與其弟繼襲皆 楊氏平生積產,嗣昭父子三人賴之。 高祖入立、甚德之、以爲沂、棣、單三州刺史、 開運

### 嗣本

蔚州 爲子。 汗。 破湯陰。 天祐十三年,從莊宗擊劉鄩於故元城,下洺、磁諸州,六月,還軍振武。 嗣本,本姓張氏,鴈門人也。 嗣本戰歿。 從擊居庸關,以功遷義兒軍使。 從莊宗破路州夾城。 累以戰功遷代州刺史、雲州防禦使、振武節度使,號威信 世爲銅冶鎭將。 從破王行瑜,遷威遠軍使。 嗣本少事太祖,太祖愛之,賜以姓名, 從攻羅弘信, 契丹入代北,攻 以先鋒兵 盯

#### 嗣恩

原。 于魏,從戰于幸。 劉鄩攻太原,兵趣樂平,嗣恩從後追之,自佗道先入太原以守。鄭兵去,嗣恩亦以兵會莊宗 |中,與||梁兵力戰,稍中其口, 使,賜姓名,以爲子。從敗康懷英於河西,遷左廂馬軍都指揮使。從李嗣昭援朱友謙於河 追贈太尉。 嗣 恩,本姓駱,吐谷渾部人也。少事太祖,能騎射,爲鐵林軍將, 遷代州刺史、石嶺關已北都知兵馬使、振武節度使。 戰不已。遷遼州刺史。從莊宗入魏,遷天雄軍馬步都指揮使。 稍以戰功遷突陣指揮 天祐十五年,卒于太

#### 存信

孝俱爲養子,材勇不及存孝,而存信不爲之下,由是交惡,存孝所爲, 從太祖起代北,入關破黃巢,累以功爲馬步軍都指揮使,遂賜姓名,以爲子。 存信,本姓脹氏,其父君政,回鶻李思忠之部人也。 存信少善騎射,能四 ,存信每沮激之,存孝卒 『夷語,『 存信 通六蕃 與存

所擊,存信敗,亡太祖子落落。 日吾醉,公不能爲我戰邪?古人三敗,公已二矣。」將殺之,存信叩頭謝罪而免。 得罪死。 而存信數從征伐,以功領郴州刺史。太祖遣將兵救朱宣,存信屯于莘縣,爲羅弘信 後從太祖討劉仁恭,大敗于安塞。 太祖大怒,顧存信日:「昨 由是大懼,

### 存孝

常稱疾,天復二年卒,年四十一。

存孝,代州飛狐人也。 本姓安,名敬思。 太祖掠地代北得之,給事帳中,賜姓名, 以爲

子,常從爲騎將。

**嘗不在兵間。|方立死,晉取三州,存孝功爲多。** 休休等以兵七千助罕之還擊河陽。 行,存孝大敗,安休休被執。 是時,晉已得澤、潞,歲出山東,與孟方立爭邢、洺、磁,存孝未 文德元年,河南張言襲破河陽,李罕之來歸晉,晉處罕之于澤州,遣存孝與薛阿檀、安 梁亦遣丁會、 牛存節等助言。戰于温縣, 梁軍先扼太

梁軍呼罕之日:「公常恃太原以爲命,今上黨已歸唐,唐兵大集,圍太原,沙陀將無穴以自 明年,路州軍亂,殺李克恭以歸唐,梁遣李讜攻李罕之于澤州,存孝以騎兵五千救之。

信、薛 還攻 |孝 州 以 食軍 攻晉州 以 浴州 待 白 公 阿檀 [1] 復 揆 令肥者 伏 等當濬 濬 聞 い 長子 唐以 恃 兵 揆見執、皆棄 而 出 出 ,西崖 孫揆爲潞州節度使,揆儒者,以梁卒三千爲衞, 不降乎? 戰, 鬭 別遣存孝 容間, 輒 」梁驍將鄧季筠引軍出 復 存 敗, 去, 同揆軍過,横擊斷之,擒揆以歸。 軍于趙城。 : 孝以精騎五百, 晉遂復取路州。 因閉壁不 敢出。存孝去, 唐軍 戦敗于 戰, 繞梁栅而呼曰:「我沙陀之求穴者, 是時, 存孝 陰地關,潛退 張濬、韓建伐晉, 攻絳州。濬、建 舞稍擒之,李讜敗走,追擊至馬 杒, 褒衣大蓋,擁節 保晉州 梁遣葛從周、朱崇節 皆 擊陰 走 韓 地關 建 走 先 待 晉 驅 见 爾 牢 守路 李存 肉以 存

嘶 反 去。 攻 孝 下 趙 不 以 負 如 自 ·得成。 兵 存孝 常常 其 存孝 釆 歸 功 山 于 萬 素與 後臂善射 初, 不 唐 存 助 裨將袁奉韜使人說存孝曰:「公所畏者晉王爾 孝 存孝 食 介信 晉 因 常爲 者 語 擊 數 取 存 有 會兵以 先鋒 路州 身被 目。 孝 隙 存信 及走張 重鎧 功爲 伐晉 存孝 下 趙臨城、 譖 多 一、秦弓 ·嬰城 溶 之日:「存孝 唐命 遷邠州 太祖 )坐矟 自 元氏。 守, 趙王 別以 太祖 手 王鎔援之。 刺 有 舞鐵檛, 趙 大將 史。 自 三心, Ŧ 一求救於 將 康 大順 兵 常避 出 君 (傅其 明 立 入 幽州 、陣中、 年, 年, 爲 趙 城 王俟塹成, 路州 不擊。」存孝 徙那 李 趙與幽州 掘 以 主 斬 留後, 威 州 兩騎 以 留 重 匡 且留 存孝 後。 自 有隙 乏, 亦 威 從 自 兵至 存孝 為 兵去, 諸將非公 是 安 戰 诗 汾 懼 酣 出 孙 而 晉 乃 晉 易騎 興晉 兵 刺 附 軍 軍 史 衝 梁通 連 輒 和 處 存 引

縛載後車,至太原,車裂之以徇。然太祖惜其材,悵然恨諸將之不能容也,爲之不視事者十 功而無過,所以至此,由存信爲之耳!」太祖叱曰:「爾爲書檄,罪我百端,亦存信爲之邪?」 言而死。」太祖哀之,遺劉夫人入城慰諭之,劉夫人引與俱來,存孝泥首請罪曰:「兒於晉有 盡,登城呼曰:「兒蒙王恩,位至將相,豈欲捨父子而附仇讎,乃存信構陷之耳。 敵也,雖塹何爲?」存孝以爲然,縱兵成塹。 塹成,深溝高壘,不可近,存孝遂窘。 願生見王一 城中食

宗時,逐段文楚,與太祖俱起雲中,蓋君立首事。 諸將博,語及存孝,流涕不已,君立以爲不然,太祖怒,酖殺君立。 康君立素與存信相善,方二人之交惡也,君立每左右存信以傾之。存孝已死,太祖 其後累立戰功,表昭義節度使,以存孝故 君立初爲雲州牙將,唐僖 興

### 存進

殺之。

餘日。

存進,振武人也,本姓孫,名重進。 太祖攻破朔州得之,賜以姓名,養爲子。 從太祖入

關破黃巢、以爲義兒軍使。

義

兒

傳第二十四

存進

存。译

遷振 都 部 署 武 從莊宗戰柏鄉,遷行營馬步軍都虞候,歷慈、沁二州刺史。 軍節度使。 ,治梁亂軍 是時,晉軍德勝,爲南北寨,每以舟兵來往,頗以爲勞,而河北無竹石,存 一切以法,人有犯者,輒梟首磔尸於市,魏 人屏息畏之。 莊宗初得魏博,以爲天雄 從戰河上,以功 軍

兵千餘逼存進栅,存進出 討使,軍 晉 討張文禮於鎭州,久不克, 于東垣渡。 東垣 「戰橋上,殺處球兵殆盡,而 土惡,築壘不能就, 而史建瑭、閻寶、李嗣昭相次戰歿,乃以存進代嗣昭爲招 存進伐木爲栅。 存進亦歿于陣。 晉軍晨出芻牧,文禮子處球以 追贈太尉

進乃以葦笮維

大艦

一爲浮梁。

莊宗大喜,解衣以賜之。

年七十餘,卒于蜀。 唐軍皆降于從珂 子 漢韶 明宗時復本姓, 獨漢韶與虔釗軍不降, 爲洋州節度使。 俱奔于蜀。 路王從珂以鳳翔 事|蜀, 反, 歷永平、興元、武信節度使。 漢韶與張虔釗會唐軍討

#### 存璋

璋與張承業等受顧命,立莊宗爲晉王, 存章 一字德璜 ,初與康君立、薛志勤等從太祖入關,破黃巢,累遷義兒軍使。 晉王以存璋爲河東馬步軍使。 晉自先王時, 太祖 病革,存 嘗優假

戰柏 入太原距守,以功遷大同軍防禦使,遂爲節度使。 軍上,軍士多犯法踰禁,莊宗新立,尤患之,存璋一切繩之以法,境內爲之淸肅。 鄉 以功遷汾州刺史。 莊宗與劉鄩戰於魏博、梁遣王檀來、乘虛襲太原、存璋以汾州兵 天祐十九年以疾卒。 追贈太尉。 從攻夾城、

#### 存賢

自距守,卒不能近。遷武州刺史、山北團練使,又遷慈州。 養爲子。 而寓居。至存賢爲刺史,曰:「徙城避敵,豈勇者所爲?」乃復城故州。 存賢,許州人也,本姓王名賢。少爲軍卒,善角觝,太祖擊黃巢于陳州,得之,賜以姓名, 後爲義兒軍副兵馬使,遷沁州刺史。先時,沁州當敵衝,徙其南百餘里,據險立栅 梁兵屢攻之,存賢力

志也。 中食少,人心多貳,諜者因謂存賢曰:「河中人欲殺子以歸梁,宜亟去。」存賢曰:「死王事,吾 天祐十八年,梁兵攻朱友謙于河中,莊宗遣存賢援友謙。 復何恨哉!」卒擊走梁兵。 是時,友謙新叛梁歸晉,而河

賢曰:「爾能勝我,與爾一鎮。」存賢博而勝之。同光二年春,幽州符存審病,莊宗置酒宮中, 莊宗卽位,拜右武衞上將軍。莊宗亦好角觝,嘗與王較而屢勝こう,頗以自矜,因顧存

莪

兒

傳第二十

四

存

ıç.

校勘記

三九六

存賢曰:「無以易卿。 歎曰:「吾創業故人,零落殆盡,其所存者惟存審耳!今又病篤,北方之事誰可代之?」因顧 角觝之勝,吾不食言。」卽日以爲盧龍軍節度使。是歲,卒于幽州,

### 校勘記

六十五。

贈太傅。

(1) 嘗與王較而屢勝 定。 處直傳,王郁與王都爲兄弟,一爲庶子,一爲養子。此處「王」下顯有脫字,然爲郁爲都,不能確 五代史纂誤續補卷三有考辨,可參。 他本「王」下有「都」字,薛史卷五三李存賢傅「都」作「郁」。 按本史卷三九王

# 新五代史卷三十七

# 伶官傳第二十五

滅,爲天下笑。夫禍患常積於忽微,而智勇多困於所溺,豈獨伶人也哉!作伶官傳。 然之理也。故方其盛也,舉天下之豪傑莫能與之爭,及其衰也,數十伶人困之,而身死國 本其成敗之迹而皆自於人歟?書曰:「滿招損,謙得益。」憂勞可以興國,逸豫可以亡身,自 散,君臣相顧,不知所歸,至於誓天斷髮,泣下沾襟,何其衰也!豈得之難而失之易歟?抑 盛,可謂壯哉!及仇讎已滅,天下已定,一夫夜呼,亂者四應,蒼皇東出,未及見賊而士卒離 旋而納之。方其係燕父子以組,函梁君臣之首,入于太廟,還矢先王而告以成功,其意氣之 除受而藏之于廟。其後用兵,則遣從事以一少牢告廟,請其矢,盛以錦囊,負而前驅,及凱 與吾約爲兄弟,而皆背晉以歸梁。此三者,吾遺恨也。與爾三矢,爾其無忘乃父之志!」莊 以知之矣。世言晉王之將終也,以三矢賜莊宗而告之曰:「梁,吾仇也;燕王吾所立,契丹 嗚呼,盛衰之理,雖日天命,豈非人事哉!原莊宗之所以得天下,與其所以失之者,可

恰官

绵

也。其小字亞子,當時人或謂之亞次。又別爲優名以自目,曰李天下。自其爲王,至於爲天 莊宗旣好俳優,又知音,能度曲,至今汾、晉之俗,往往能歌其聲,謂之「御製」者皆是

子,常身與俳優雜戲于庭,伶人由此用事,遂至於亡。

內,日:「劉山人來省女。」劉氏大怒,答繼岌而逐之。宮中以爲笑樂。 世家,而特諱其事。莊宗乃爲劉叟衣服,自負蓍囊藥笈,使其子繼岌提破帽而隨之,造其臥 皇后劉氏素微,其父劉叟,賣藥善卜,號劉山人。劉氏性悍,方與諸姬爭寵,常自恥其

不可!」因格曰其命。踰年,而伶人屢以爲言,莊宗謂崇韜曰:「吾已許周匝矣,使吾慚見此 德源之力也。願乞二州以報此兩人。」莊宗皆許以爲刺史。郭崇韜諫曰:「陛下所與共取天 賜以金帛,勞其良苦。周匝對曰:「身陷仇人,而得不死以生者,敎坊使陳俊、內園栽接使儲 下者,皆英豪忠勇之士。今大功始就,封賞未及於一人,而先以伶人爲刺史,恐失天下心。 三人。公言雖正,然當爲我屈意行之。」卒以俊爲景州刺史、德源爲憲州刺史。 其戰於胡柳也,嬖伶周匝爲梁人所得。其後滅梁入汴,周匝謁於馬前,莊宗得之喜甚,

當死!」因前請亟行刑,諸伶共唱和之,莊宗大笑,縣令乃得冤去。 子好獵邪?奈何縱民稼穡以供稅賦!何不饑汝縣民而空此地, 伶人敬新磨知其不可,乃率諸伶走追縣令,擒至馬前責之曰:「汝爲縣令, 莊宗好畋獵,獵于中产,踐民川。 中牟縣令當馬切諫,爲民請,莊宗怒,叱縣令去,將殺 以備吾天子之馳騁?汝罪 獨不知吾天

下者,一人而已,復誰呼邪!」於是左右皆笑,莊宗大喜,賜與新磨甚厚。 莊宗失色,左右皆恐,羣伶亦大驚駭,共持新磨詰曰:「汝奈何批天子頻?」新磨對曰:「李天 莊宗嘗與羣優戲于庭,四顧而呼曰:「李天下,李天下何在?」新磨遽前以手批其頻。

磨急呼曰:「陛下無殺臣!臣與陛下爲一體,殺之不祥!」莊宗大驚,問其故,對曰:「陛下開 **囓人!」莊宗家世夷狄,夷狄之人諱狗,故新磨以此譏之。莊宗大怒,彎弓注矢將射之,新** 國,改元同光,天下皆謂陛下同光帝。 新磨嘗奏事殿中,殿中多惡犬,新磨去,一犬起逐之,新磨倚柱而呼曰:「陛下毋縱兒女 且同,銅也,若殺敬新磨,則同無光矣。」莊宗大笑,乃

然時諸伶,獨新磨尤善俳,其語最著,而不聞其佗過惡。 其敗政亂國者,有景進、史彥

瓊、郭門高三人為最。

藩 中,左右皆屛退,軍機國政皆與參決,三司使孔謙兄事之,呼爲「八哥」。 鎭 ,貨賂交行,而景進最居中用事。 是時 ,諸伶人出入宮掖,侮弄縉紳,羣臣憤嫉,莫敢出氣,或反相附託,以希恩倖, 莊宗遣進等出訪民間,事無大小皆以聞。每進奏事殿 四方

|宗還洛,進載||紫子人以從,道路相屬,男女無別。 |鄴,乃遣||進等採|||鄴美女千人,以充後宮。而||進等緣以爲姦,軍士妻女因而逃逸者數千人。 問所以禳之者,因曰:「故唐時,後宮萬人,今空宮多怪,當實以人乃息。」莊宗欣然。 莊宗初入洛,居唐故宮室,而嬪御未備。 閹宦希旨,多言宮中夜見鬼物,相驚恐,莊宗 其後幸

之,天下不勝其冤。 囚 伶 而殺之。 人由此皆樂其死。 進乃讒 魏 Ĩ 繼岌已破蜀,劉皇后聽宦者讒言,遣繼岌賊殺郭崇韜。崇韜素嫉伶人,常裁抑之, 友謙曰:「崇韜且誅,友謙不自安,必反,宜丼誅之。」於是及其將五六人皆族滅 朱友謙,以梁河中降晉者,及莊宗入洛,伶人皆求賂於友謙, 進,官至銀青光祿大夫、檢校左散騎常侍兼御史大夫,上柱 皇弟存义,崇韜之壻也,進讒於莊宗曰:「存义且反,爲婦翁報仇。」乃 友謙 不能給 而辭

史彦瓊者,爲武德使,居鄰都,而魏博六州之政皆決彥瓊, 白留守王正言而下, 皆俛首

|貝州 叛亂者,由臺瓊啓而縱之也。 **彦瓊以兵登北門,聞賊** 夜馳 都巡檢使孫鐸,見彥瓊求兵禦賊,彥瓊不肯與,曰:「賊未至,至而給兵豈 友謙子廷徽爲澶州刺史(11),有詔彥瓊使殺之,彥瓊祕其事,夜半馳出城。 承事之。 崇韜殺魏王繼岌而自王於蜀矣,以故族其家。」鄴人聞之,方疑惑。 出, 人有來鄴者,傳此語以歸。 因驚傳曰:「劉皇后怒崇韜之殺繼岌也,已弑帝而自立,急召彥瓊計事。」鄴都大恐。 是時,郭崇韜以無罪見殺于圖。天下未知其死也,第見京師殺其諸子,因相傳曰: ,呼聲,大恐,棄其兵而走,單騎歸于京師。 戍卒皇甫暉聞之,由此劫趙在禮作亂。 在禮由是得入于鄴以成其 已而, 晚邪? 在禮 **鄴人見彥瓊無故** 朱友謙又見殺。 已至館陶, 」已而賊至,

温故, 見囚 馬直 而 **事覺被誅。** |激其軍士曰:「罄爾之貲,食肉而飮酒,無爲後日計也。」軍士問其故,從謙因曰:「上以王 ,從謙置 郭門高者,名從謙,門高其優名也。 `俟破鄴,盡阬爾曹。」軍士信之,皆欲爲亂 蓋親軍 莊宗戲從謙曰:「汝黨存义、崇韜負我,又教王温反。 也。 酒軍中,憤然流涕,稱此二人之冤。 從謙以姓郭,拜崇韜爲叔父,而皇弟存乂又以從謙爲養子。 雖以優進,而嘗有軍功,故以爲從馬直指揮使。 是時,從馬直軍士王温宿衞禁中,夜謀亂, 復欲何爲乎? 崇韜死, 存义 ` 」從謙恐,退 從

伶

骨,葬新安之雍陵。以從謙爲景州刺史,已而殺之。 自皇后、諸王左右皆奔走。 兵縱火焚門,緣城而入,莊宗擊殺數十百人。 亂兵從樓上射帝,帝傷重,踣于絳霄殿廊下, 謙自營中露刃注矢,馳攻興教門,與黃甲軍相射。莊宗聞亂,率諸王衞士擊亂兵出門。 殿,宰相對三刻罷。 散,倘有二萬餘人。居數日,莊宗復東幸汜水,謀扼關以爲拒。 李嗣 源兵反,嚮京師,莊宗東幸汴州,而嗣源先入。莊宗至萬勝,不得進而還,軍士離 從駕黃甲馬軍陣於宣仁門、步軍陣於五鳳門以俟。莊宗入食內殿, 至午時,帝崩,五坊人善友,聚樂器而焚之。嗣源入洛,得其 四月丁亥朔,朝羣臣於中興 從 亂

哉! [傳曰:「君以此始,必以此終。」莊宗好伶,而弒於門高,焚以樂器。 可不信哉!可不戒

校勘記

[1] 廷徽 汪本同,他本及通鑑卷二七四「廷」作「建」。

# 新五代史卷三十八

# 宦者傳第二十六

也。 雖然,不可以不戒。 嗚呼,自古宦、女之禍深矣!明者未形而知懼,暗者患及而猶安焉,至於亂亡而不可悔 作宦者傳。

## 張承業

以道意,因以爲河東監軍。其後崔胤誅宦官,宦官在外者,悉詔所在殺之。晉王憐承業,不 忍殺,匿之斛律寺。 瑜,承業數往來兵間,晉王喜其爲人。及昭宗爲李茂貞所迫,將出奔太原,乃先遣承業使晉 張承業字繼元, 唐僖宗時宦者也。本姓康, 幼閹, 爲內常侍張泰養子。 晉王兵擊王行 昭宗崩,乃出承業,復爲監軍。

晉王病且革,以莊宗屬承業日:「以亞子累公等!」莊宗常兄事承業,歲時昇堂拜母,甚 宦 者 傳 第二十 六 張 承 業 四〇三

積 親 金果 重之。 收市 莊宗 兵 在 馬, 魏 勸課農桑, 與梁戰河 而成莊宗之業者, 上十餘年,軍國之事 承業之功爲多。 ,,皆委承業,承業亦盡 Ĥ 貞 簡 太后、韓德妃、 心 不 懈 凡所 |伊淑 以畜

| 妃及諸公子在|| 晉陽者,承業一切以法繩之,權貴皆斂手畏承業。

用之, 巵謝 宗衣而泣, 曰:「臣受先王顧託之命,誓雪家國之讎。 語承業日:「和哥乏錢, 中 也。」莊宗以語侵之,承業怒曰:「臣,老敕使,非爲子孫計, 一言之忠,而 酒 使 」閻寶從 承業日 何必問臣?財盡兵散,豈獨臣受禍也?」莊宗顧元行欽曰:「取劍來 人 謝 使子繼岌爲承業起舞, 歲時自魏歸省親, [:「吾 承業日:「小兒忤公,已答之矣。」 旁解承業手令去, 反諂 杯酒之失,且得 諛自容邪 可與錢一積,何用帶、馬爲也?」承業謝曰:「國家錢, , 」太后 須錢 承業奮拳歐寶路, 罪太后。 清博、 舞罷,承業出寳帶、幣、 聞之,使召莊宗。 賞賜伶人, 而承業主藏, 願 明 公 愈 日 此, 駡曰:「**閻** 太 后 爲吾分過 今日 莊 與莊宗 宗性 馬爲贈, **惜此庫錢,佐王成霸業爾** 爲王惜庫物 寶、朱温之賊、蒙晉厚恩,不 至孝,聞太后召,甚 俱 !」承業不肯飲 公過承業 莊宗指錢積呼繼岌小字以 錢不可得。 而死, 第 !」承業起,持莊 慰勞之。 死不愧於先 莊宗乃置 非臣所得 莊宗入內 *]*5 能 若 酌 酒 지짓 有 私 庫

禮 臣請爲王殺之。」莊宗曰:「吾方招納賢才以就功業,公何言之過也!」承業起賀日 廬 晳 嚐 酒 傲 忽 自莊宗及諸 公子 多見侮 慢,莊 宗 深 、嫉之。 承業 乘間 浦 日:「盧質 谐 酒 無

能如此,天下不足平也!」質因此獲免。

敕使, 王自取之!悞老奴矣。」肩興歸太原,不食而卒,年七十七。同光元年,贈左武衞上將軍,諡 耳!誠願見大王之成功, 之。使唐之子孫在,孰敢當之?使唐無子孫,天下之士,誰可與王爭者?臣,唐家一老奴 日正憲。 唐、晉之仇賊,而天下所共惡也。今王誠能爲天下去大惡,復列聖之深讎,然後求唐後而立 非王父子之初心,且失天下望,不可!」莊宗謝曰:「此諸將之所欲也。」承業曰:「不然,梁, 王父子與梁血戰三十年,本欲雪家國之讎,而復唐之社稷。今元兇未滅,而遽以尊名自居, 天祐十八年,莊宗已諾諸將卽皇帝位。承業方臥病,聞之,自太原肩興至魏,諫曰:「大 `先王時監軍也』,豈不臣主俱榮哉?」莊宗不聽。 承業知不可諫,乃仰天大哭曰:「吾 然後退身田里,使百官送出洛東門,而令路人指而歎曰『此本朝

## 張居翰

相善。 張居翰字德卿,故唐掖廷令張從政之養子。 天復中,大誅宦者,仁恭匿居翰大安山之北谿以免。其後,梁兵攻仁恭,仁恭遣居翰 昭宗時,爲范陽軍監軍, 與節度使劉仁恭

四〇五

翰

宦

從晉王攻梁潞州以牽其兵,晉遂取潞州,以居翰爲昭義監軍。

莊宗即位,與郭崇韜並爲樞密使。 莊宗滅梁而縣,宦官因以用事,郭崇韜又專任政,居

翰默默, 荷兔而已。

詔傅柱,揩去「行」字,改爲一「家」。時圖降人與衍俱東者千餘人,皆獲免。 馳韶魏王殺之。韶書已印畫,而居翰發視之,詔書言「誅術一行」,居翰以謂殺降不祥,乃以 魏王破蜀,王衍朝京師,行至秦川台,而明宗軍變于魏。莊宗東征,慮衍有變,遣人

班宗遇弒,居翰見明宗于至德宮,求歸田里。 天成三年,卒于長安,年七十一。

以訛 足以發之,遂使泯然無傳於後世。 繆。至於英豪奮起,戰爭勝敗,國家興廢之際,豈無謀臣之略,辯士之談?而文字不 五代文章陋矣,而史官之職廢於喪亂,傳記小說多失其傳,故其事迹,終始不完,而雜 然獨張承業事卓卓在人耳目,至今故老猶能道之。

近而習,其爲心也專而忍。 自 古宦者亂人之國,其源深於女禍。女,色而已;宦者之害,非一端也。 能以小善中人之意,小信固人之心,使人主必信而親之。 蓋其用事也 待其

議可謂傑然歟!殆非宦者之言也。

旣出,而唐亡矣。 胤爲宰相,顧力不足爲,乃召兵於梁,梁兵且至,而宦者挾天子走之岐,梁兵圍之三年,昭宗 悟,捽而去之可也。宦者之爲禍,雖欲悔悟,而勢有不得而去也,唐昭宗之事是已。故曰 忠臣碩士於外,蓋其漸積而勢使之然也。夫女色之惑,不幸而不悟,則禍斯及矣;使其一 之心而後已。此前史所載宦者之禍常如此者,非一世也。夫爲人主者,非欲養禍於內而疎 「深於女禍」者,謂此也。可不戒哉!昭宗信狎宦者,由是有東宮之幽。旣出而與崔胤圖之, 而兩敗。 急之則挾人主以爲質,雖有聖智不能與謀,謀之而不可爲,爲之而不可成,至其甚,則俱傷 可恃者,乃所以爲患也。患已深而覺之,欲與疎遠之臣圖左右之親近,緩之則養禍而益深, 飲食、前後左右之親爲可恃也。故前後左右者日益親,則忠臣碩士日益疎,而人主之勢日益 孤。勢孤 已信,然後懼以禍福而把持之。 故其大者亡國,其次亡身,而使姦豪得借以爲資而起,至抉其種類,盡殺以快天下 ,則懼禍之心日益切,而把持者日益牢,安危出其喜怒,禍患伏於帷闥,則嚮之所謂 雖有忠臣碩士列于朝廷,而人主以爲去已疎遠,不若起居

韶天下訪求故唐時宦者悉送京師,得數百人,宦者遂復用事,以至於亡。此何異求已覆之 而宦者多爲諸鎭所藏匿而不殺。是時,方鎭僭擬,悉以宦官給事,而吳越最多。及莊宗立, 初,昭宗之出也,梁王悉誅唐宦者第五可範等七百餘人,其在外者,悉韶天下捕殺之,

# 車,躬駕而履其轍也?可爲悲夫!

者七 之時 邪?及明宗 也 反以情告明宗。 徒 賜 也。 姓李,頗見信用。 一十餘人,悉捕而殺之都亭驛,流 郭崇韜已破蜀,莊宗信宦者言而疑之。然崇韜之死,莊宗 莊宗未滅梁時,承業已死。 。是時,明宗自鎭州入覲,奉朝請於京師。莊宗頗疑其有異志,陰遣紹宏伺其動靜,紹宏 舉唐之精兵皆在蜀,使崇韜不死,明宗 入立,又詔天下悉捕宦者而殺之。 明宗自魏而反, 然誣殺大臣,黷貨賂,專威福,以取怨於天下者,左右狎暱,贲門內養之 其後居翰雖爲樞密使, 天下皆知禍起於魏, 血盈 庭 官者亡竄山谷,多削髮爲浮圖。 入洛, ,豈無西顧之患?其能晏然取唐而代之 孰知其啓明宗之二心者, 而不用事 不知,皆宦者爲之也。當 0 有宣徽使馬紹宏者,嘗 其亡至太原 自紹宏始 此

出 而 漢瓊遽入見明宗, 衛州 明宗 聞哭聲, 晚而 漢瓊 以謂帝崩矣, 多病,王淑妃 西迎廢帝 言秦王反,即以兵誅之, 于路, 乃謀以兵 專內以干政, 廢帝 惡 入宮者, 而 殺之。 宦 者孟漢瓊因以用事。 陷秦王大惡, 懼 不得立 也。 m 大臣 明宗以此飲恨 朱弘 秦王入視明宗疾已革, 昭 等方圖 而 終。 其 事 後愍帝 ·, 議 旣 未

浸入之。 鳴 14 明宗非佚君,而猶若此者. 人情處安樂, 自非聖 哲, 不 蓋其在位差久也。 能 久 而 無騎 息。 其餘多武人崛起,及其嗣續,世數短 官、女之禍 非一日,必伺 人之驕 怠 而

宦者傳第二十六 校勘記

而年不永,故宦者莫暇施爲。其爲大害者,略可見矣。 字以活千人。君子之於人也,苟有善焉,無所不取。吾於斯二人者有所取焉。 獨承業之論,偉然可愛,而居翰更 取其善而

戒其惡,所謂「愛而知其惡,憎而知其善」也。

故幷述其禍敗之所以然者著于篇。

### 校勘記

(1) 行至秦川 按秦川乃泛指關中,「驛」字不當省。 本史卷六三前蜀世家作「行至秦川驛」,通鑑卷二七四亦云「盡殺衍宗族於秦川驛」。

# 新五代史卷三十九

## 雜傳第二十七

### 王鎔

使。 懿,紹鼎子日景崇。 王氏。沒諾干子日末坦活,末坦活子日昇,昇子日廷凑,廷凑子日<u>元</u>逵,元逵子日紹鼎、紹 景崇官至守太尉,封常山郡王,唐中和二年卒。子鎔立,年十歲。 王鎔,其先回鶻阿布思之遺種,日沒諾干,爲鎭州王武俊騎將,武俊錄以爲子,遂冒姓 自昇以上三世,常爲鎭州騎將,自景崇以上四世五人,皆爲成德軍節度

豪傑並起而交爭。 年雖少,藉其世家以取重,四方諸鎭廢立承繼,有請於唐者,皆因鎔以聞。 是時,晉新有太原,李匡威據幽州,王處存據中山,赫連鐸據大同,孟方立據邢臺, 四 面

自晉兵出山東,已破孟遷,取邢、洛、磁三州,景福元年,乃大舉擊趙,下臨城。 | 鎔 求 教

雜

傳第二十

-남

王鎔

河,晉軍 於李匡 而 鎔 未 威 ·大敗。 臨 匡 軍, 威 來救, 明年春,晉攻天長軍,鎔出兵救之,敗于叱日嶺 遣追 風 晉軍 都 團 ·解去。 練使段亮、翦寇都團 明年, 晉會王處存攻鎔堅固、新市。 練使馬珂 等, 以兵 晉軍遂出井陘 屬 匡 晉王與處存皆自將, 威 而 已。 鎔又求救 匡 威 戰

不敢還,乃以符印歸其弟,而將奔于京師。 初,匡威悅其弟匡儔之婦美而淫之,匡儔怒,及其救鎔也,誘其軍 行至深州,鎔德匡威救己,使人邀之, 亂而自立。 館于梅子 匡威 內慚

園(三,以父事之。

於匡威,晉軍解

去

之,從缺垣中躍出,挾鎔于馬,負之而走,亂軍擊殺匡威、正抱, 燕人皆走。 匡儔雖憾其兄, 位。 Ψŋ, 而 事,是所甘心。」因叩頭以位與匡威。 **晨詣館慰,坐定,甲士自幕後出,持鎔兩袖,鎔曰:「吾國賴公而存,誠無以報厚德,今日之** 陽以大義責鎔甚急。鎔旣失燕援,而晉軍急攻平山,劫鎔以盟,鎔遂與晉和 相與登城西高閣,顧覽山川,泫然而泣,乃與匡威謀劫而代之。因詐爲忌日,鎔去衞從, 行過親事營,軍士閉門大躁,天雨震電,暴風拔木,屋瓦皆飛。屠者墨君和望見鎔,識 匡 威客李正抱者(三), 少游燕、 趙間, 匡威素少鎔,以謂無能爲也,因與鎔方轡詣府,將代其 每徘徊常山,愛之不能去。 正抱、匡威皆失國無

其後梁太祖下晉邢、洛、磁三州,乃爲書韶母鎔,使絕晉而歸梁,鎔依違不決⑤。晉將李

官周式 名,而假嗣昭以爲辭。 太祖 牽式衣而撫之曰:「吾言戲耳。」因延式於上坐,議與鎔和。 爭 乎 吾知李嗣 望見式,罵曰:「吾常以書招鎔不來,今吾至此,而爾爲說客,晚矣! 臥 嗣 興中 昭 而欲 太祖卽位,封鎔趙王。 且休民也。 怒 復取洺州 ,辨士也,對曰:「此難與力爭,而可以理奪也。」<br/>」式與梁太祖 梁軍大沮。 因移兵常山 成霸業於天下也?且霸者責人以義而 昭在城中, 梁太祖擊敗嗣昭, 昔曹公破袁紹, 梁太祖自將傅城下,焚其南關, ,顧謂葛從周曰:「得鎭州以與爾, 可使先出。」乃以所得鎔 且王氏五世六公撫有此 得魏將吏與紹書, 嗣昭棄洺州走。 與嗣昭書示式,式進日:「梁欲取一鎭州 上,豈無死士, 不私,今天子在上,諸侯守封睦 ,悉焚之,此英雄之事乎 梁獲其輜重,得鎔與嗣昭書,多道梁事, 鎔懼,顧其屬曰:「事急矣! 奈何? 爾爲我先鋒。」從周至臨城, 鎔以子昭祚為質, 而待嗣昭 有舊,因請入梁軍。 且晉吾仇也 乎? 」太祖 梁太祖以女妻 今梁知兵舉 ,而鎔附之, 鄰 7,所以 大喜, 中流 而 息 起

〇 古本作招。

〇一作訣。

雑

似

徦

王鎔

因 欲 퀎 鎔 取 祖 河北 母喪, 開平四年多,遺供奉官杜廷隱監魏博將夏諲,以兵三千襲深、冀二州,以王 諮鎭皆吊,梁使者見晉使在館 ,還言趙王有二志。 是時, 魏博 羅紹 威卒,梁

此 莊宗 爲 疆 北 以鎔父友, 北 面 破 行 幽 營 |一、||燕 招 尊禮之, 計 南幷 使。 魏博, 鎔懼,乞兵于晉。 酒酣 爲鎔歌,拔佩 鎔常以兵從。 晉人擊敗景仁於柏鄉 刀斷 |鎔徳晉 衣而盟, 湛。 許以女 明 年 タ妻 一路子 會莊宗於承天軍 梁遂失鎭、定,而 昭 莊宗 奉 由

火 誘 遽 資, 弘 府 月忘 道 爭 日:「憨王 規怒 、焚其 以爲 歸。 希蒙 開城 鍊 而 鎔為 丹 趙 宮 使其子 亂 空宫, 任 藥,求長 獨 遣親 止 者希 室, 人仁而 夜半 其政 之。 安,樂王氏之無 **遂滅** 昭祚 事 逾月不 蒙 宦者李弘 於宦 軍 親 也, 生, 不武,未嘗敢爲兵先, 干 將蘇漢 與大將張文禮族弘規、 軍 氏 與道 者。 請殺之以謝軍士 千餘 返 之族 , 使 一 夫 閉 門 不 納 宦者 規 士王若訥 衡 人踰垣而入,鎔方與道士焚香受籙,軍士斬鎔首,袖之而出 事 諫日:「今晉王 率兵 石希蒙 都 擐 人士女褒 留游 、甲露 與解詞 !」鎔不答, 西山 佗兵 刃 身自 漢衡 從者 分於帳前 衣 臥 (博帶, 攻 登王 1暴露 起。 一大王 ,收其偏將下 趙 弘規呼鎔甲士 日:「軍 天祐 母 以親 常 務夸侈爲嬉遊。 欲何歸 祠 藉 矢石 十八年多,鎔 鄰 使婦 十士勞矣 兵爲救。 獄, 乎? • 人維 而 窮 斬 ! 大王 究反 |鎔懼 希蒙首, 錦 願 鎔 當 繡 從王 自 竭 狀, 尤 是 西山 牽 促 軍 驕 時 持 歸 擲於 親軍 駕 國之用 於富 宿 而 " 希蒙 諸 上。 皆懼 鎔 弘 鎭相 貴 為游 前 規 固 每 弊於 繼 又 | 鎔惺 止之。 出 將還 文禮 酸之 而 好 進 逾 左 戰

鎔小子昭海,年十歲,其軍士有德鎔者,藏之穴中,亂定,髡其髮,被以僧衣, 遇湖南人

李震, 鎔故將符習爲宣武軍節度使,慶以歸習, 匿昭誨於茶籠中,載之湖南,依南嶽爲浮圖,易名崇隱。 習長於朝。 昭誨自稱前成德軍中軍使以見,拜考 明宗時,昭誨已長、思歸, 而

功郎中、司農少卿。

周顯德中,猶爲少府監云。

折足歸于晉。 進代之,存進 死,文禮懼,病疽卒。 納之,後知其通於梁也,遣趙故將符習與閻寶擊之。 張文禮者,狡獪人也,鎔惑愛之,以爲子,號王德明。 ,輒復戰歿,乃以符存審爲招討使,遂破之。 趙人請而醢之,磔文禮尸于市。 子處瑾祕喪拒守,擊敗習等。 以李嗣昭代之,嗣昭中流矢卒, 文禮家鬼夜哭,野河水變爲血 執文禮妻及子處瑾、處球、處琪等 鎔已死,文禮自爲留後。 以李存 , 游 莊宗初 漁皆

## 羅紹威

羅紹威字端己,其先長沙人。 祖讓,北遷爲魏州貴鄉

後,已而又殺之。牙將未 君 等帥也。」弘信狀貌 父弘信, 爲牧監卒。 一奇怪,面色青黑,軍中異之,共立爲密後。 知所立,乃聚呼曰:"孰能爲我帥者? 文德元年,魏博牙軍亂,遂曰 殺其帥樂彥貞,立其將趙文建爲留 」弘信從衆中出應 唐昭宗即位 日:「我 拜弘信節度 可爲

六

使。

### 〇 古本作逐。

以故 遣李存 太祖 之, 以爲然 · [III] ° 乃與晉絕。 太祖 北 梁太祖將攻晉, 面 信救朱宣,假道于魏。 戰于 乃發兵擊存信於幸縣 往 拜 來 前 內黃,魏兵五 燕、趙之間 受幣,謂使 太祖 **獨疑弘信有二心,乃以兄事** 乞糴于弘信 《者曰:「六兄於我有倍年之長,吾何敢慢之。」弘信 卒有 戰 Ħ. 太祖 敗 河北者, 太祖 聞, 弘信懼, 遣葛從周 遣使語 魏不爲之患也。 不與, 請盟 弘信日:「晉人志在河朔, 助之。 弘信 由是有隙。 乃止。 梁兵擒晉王 常爲 弘信死, 是時, 卑辭厚幣以聘魏。 梁兵攻魏 梁方東攻克、鄲, 紹威 子落落, 立 兵還滅 取黎陽、 大喜 送于魏, 魏 魏矣。 以爲 北敵晉 使 淇 者至梁, 弘信殺 。」弘信

求救 老鴉 故封長 於梁, 隄 紹 紹威 威 好 大 沙 學工 人敗燕軍 那王, U 故德梁 書, 紹威 於 頗 、助己。 內貴。 知 襲 屬文, 父爵! 明 長沙。 聚書數萬卷, 年,梁太祖遣葛從周會魏兵攻滄州 紹威 新立, 開館以延四方之士。 幽州 劉仁恭以兵十萬攻 ,取其德州 弘信 在唐, 魏 屠貝 以其先 州 長 於 威 沙

前 帥 史憲誠、 魏 博 自 田 何全皥、韓君雄、樂彥貞等, 承嗣 始有 牙 軍 , 牙軍歲 久 益 皆由牙軍所立, 驕, 至紹 威 時已二百 怒輒遂□殺之。 年, 父子 世相 紹威為人精悍明 婚 烟 以 自

已而 敏, 通習更事,爲政有威嚴,然其家世由牙軍所立。 牙校李公佺作亂,紹威誅之,乃間遣使告梁乞兵,欲盡誅牙軍。 天祐二年,魏州城中地陷,紹威懼有變。 梁太祖許之,爲遣李思

〇 古本作逐字。

安等攻滄州,召兵於魏,紹威因悉發魏兵以從,獨牙軍在。

盡殺之。 興 、夫入魏 ,數月,太祖爲悉平之。 是歲,太祖復攻滄州,宿兵長蘆,紹威饋給梁兵,自滄至魏五百里,起亭堠,供帳什物自 紹威子廷規娶梁女,會梁女卒,太祖陰遣客將馬嗣勳選良兵實興中,以長直軍千人雜 太祖 **詐爲助葬,太祖以兵繼其後。** 心自內黃 、馳至魏,魏兵從攻滄州者行至歷亭,聞之皆反,入澶、博諸州, 牙軍死,魏兵悉叛,紹威勢益孤,太祖乃欲奪其地,紹威始 紹威夜以奴兵數百, 會嗣勳兵擊牙軍 魏境大 大悔。

具,梁兵數十萬皆取足,紹威以此重困。

昭宗東遷洛陽,詔諸鎭繕理京師,紹威營太廟成,加拜守侍中,進封鄴王。

太祖

国滄州未下,劉守光會晉軍破梁路州。太祖

自長蘆歸,

過魏,疾作,臥府

中,諸將

朝元前殿、浮河而上、立之京師。 得見,紹威懼太祖終襲己,乃乘間入見曰:「今四方稱兵,爲梁患者,以唐在故也; 已去,不如早自取之。」太祖大喜,乃急歸。 太祖嘆日:「吾聞蕭何守關中,爲漢起未央宮,豈若紹威越 太祖 即位,將都洛陽, 紹威取魏良材爲五鳳樓、 唐家天命

千里而爲此,若神化然,功過蕭何遠矣!」賜以寶帶名馬。

「吾常攻燕不能下,今紹威折簡,乃勝用兵十萬。」太祖每有大事, 燕王劉守光囚其父仁恭, 與其兄守文有隙, 紹威馳書勸守光等降梁。 多遣使者問之,紹威時亦 太祖聞之笑日:

馳簡入白,使者相遇道中,其事往往相合。

累拜太師兼中書令,卒年三十四,贈尙書令,諡曰貞壯。 主,爲我彊飯,如有不諱,當世世貴爾子孫。今使周翰監府事,尙冀卿復愈耳。」紹威仕梁, 得梁一有功重臣臨之,請以骸骨就第。」太祖亟命其子周翰監府事,語使者曰:「亟行,語而 加 益以紹威盡忠,遣將程厚、盧凝督其役。舟未成而紹威病,乃表言:「魏故大鎭,多外兵,願 紹威自以魏久不用兵,願伐木安陽淇門爲船,自河入洛,歲漕穀百萬石,以供京師。

壽春公主,周敬亦娶末帝女,日晉安公主(即)。 馬都尉、光祿卿。 節度使,卒于官,年十四。周敬代爲宣義軍節度使,年十歲,徙鎮忠武。明年,爲祕書監、駙 二年卒,年三十二。廷規娶梁太祖二女,一日安陽公主,一日金華公主。周翰娶末帝女,日 子三人,廷規,官至司農卿卒。周翰襲父位,乾化二年八月爲楊師厚所逐,徙爲宣義軍 唐莊宗時爲金吾大將軍,明宗以爲匡國軍節度使,罷爲上將軍。晉天福

王處直字允明,京兆萬年人也。父宗,善殖財貨,富擬王侯,爲唐神策軍吏, 官至金吾

大將軍,領興元節度使,子處存、處直。

度使。黃巢陷長安,處存感憤流涕,率鎭兵入關討賊。 卽 一,勤王倡義,處存爲第一。乾寧二年,處存卒于鎭,三軍以河朔故事,推處存子郜爲留後, 拜節度使,加檢校司空、同中書門下平章事。處直爲後院中軍都知兵馬使。 處存以父任爲驍衞將軍、定州已來制置內閑廐宮苑等使。 巢敗第功,而收城擊賊,李克用爲第 乾符六年,即拜義武軍節

問出奔晉, 亂兵推處直爲留後。 梁兵圍之,處直遣人告梁,請絕晉而事梁,出絹十萬匹犒 軍,乃與梁盟。梁太祖表處直義武軍節度使,累封太原王。太祖卽位,封處直北平王。 光化三年,梁兵攻定州,郜遣處直率兵拒之,戰于沙河,爲梁兵所敗。兵返入城逐郜,

五千從,破梁軍於柏鄉。 其後梁兵攻王鎔,鎔求救于晉,處直亦遣人至晉,願絕梁以自効。晉兵救鎔,處直以兵 其後晉北破燕,南取魏博,與梁戰河上,十餘年,處直未嘗不以兵

從。

雑

第二十七

王

一處直

伏甲城 與。 神 皆用左道。 養以爲子,而處直未有子,乃以雲郞與處直,而給曰:「此子生而有異。」處直養以爲子,更名 一都,甚愛之。 使衣道 明 外,以備不虞。 好 第功行賞,因陰疏甲士姓名,自隊長已上藏于別籍,其後因事誅之,凡二十年,無 處直 士服,以爲行營司馬,軍政無大小,咸取決焉。 巫 應之由此益橫,乃籍管內丁壯,別立新軍,自將之,治第博陵坊, 而客有李應之者,妖妄人也。 將吏知其必爲患,而莫能 匡儔已去,甲士入城圍應之第,執而殺之,因詣處直請殺都, 諫也。 處直有疾,應之以左道治之而 是時 幽州李匡儔假道中山以如京師,處直 初,應之於脛邑闌得小兒劉 愈 一處直 四面 處直不 益以爲 開門,

保機舉國 禮 典梁蠟 日:「鎭 王 人 郁 寒以牽晉兵,且許 以 , 免者, 而處直終爲都所殺。 都 自 女 [入寇] 定人皆不欲|契丹之舉, 妻之,爲新州 書示處直日:「文禮負 () 定之蔽也,文禮雖有罪,然鎭 人狡佞多謀,處直以爲節度副使。 常恐處直 召 防禦使。 不容 郁 爲嗣 因因 我, 處直 此大 都聞之不說。 師不可止。」處直有 見莊宗必討文禮, 喜,以爲乘其隙可取之,乃 小吏和昭訓勸都舉事 亡定不獨存。」 張文禮弑王鎔,莊宗發兵討文禮,處直與左右 而定人皆言契丹 孽子郁,當郜之亡于晉也, 乃遣人請莊宗毋發兵,莊宗取所 益自 疑, 都因執處直 乃陰與郁 不可召,恐自 以厚略 誘 交通 契丹阿保機。 囚之西宅, 貽 使郁 郁亦 患 處直不 北 獲文 SII

留後,凡王氏子孫及處直將校殺戮殆盡。明年正月朔旦,都拜處直於西宅,處直奮起揕其 胸而呼曰:「逆賊!吾何負爾?」然左右無兵,遂欲囓其鼻,都掣袖而走,處直遂見殺。

者失其所居之象也。」已而處直果被廢死。 所致,而定人皆知其不祥,曰:「蛇穴山澤,而處人室,鵲巢鳥, 降而田居,小人竊位,而在上 初,有黄蛇見于碑樓,處直以爲龍,藏而祠之,又有野鵲數百,巢麥田中,處直以爲己德

臨刑 不復出。 指揮使鄭季璘、龍泉鎮將杜弘壽以二千人迎契丹,爲晏球所敗。季璘、弘壽被執,晏球責 曰:「吾嘗使人招汝,何故不降?」弘壽對曰:「受恩中山兩世矣,不敢有二心。」遂見殺,弘壽 五鎭不應。明宗遣王晏球討之。都復與王郁招契丹爲援,契丹遣禿餒將萬騎救都。 之計。」已而朱守殷反於汴州,都遂亦反,遣人以蠟書招青、徐、岐、潞、梓五鎮,約皆舉兵,而 |州,都供饋多闕,益不自安。|和昭訓爲||都謀曰:「天子新立,四方未附,其勢易離,可爲自安 及明宗立,頗惡都爲人,而安重誨每以法繩之,都始有異志。是時,唐兵擊契丹,數往來定 節度使。 莊宗已敗契丹于沙河,追奔過定州,與都相得權甚,以其子繼岌娶都女,以都爲義武軍 神色自若。 同光二年,莊宗幸鄴,都來朝,賜與鉅萬。莊宗以繼岌故,待都甚厚,所請無不從。 晏球屯軍望都,與都及契丹戰,大敗之曲陽,都及禿餒得數騎遯去,閉城

度使。 隰州刺史。 一次上海、與莊宗連外姻、爲人聽勇、自爲軍校、能與士卒同辛苦、明宗時、歷具、忻、密、澶、 故堅守經年。 丹二千人守城,呼禿餒爲餒王,屈身事之。諸將有欲出降者,都伺祭嚴密,殺戮無虛日,以 子之服,使巡城上,以示晏球軍,軍士識者曰:「繼陶也。」共詬之。都居城中,兵少,惟以契 初 、)莊宗軍中闌得一男子,愛之,使冒姓李,名繼陶,養於宮中以爲子。 明宗即位,安重 范延光反于鄴,晉高祖以廷胤爲楊光遠行營中軍使。破延光有功,拜彰德軍節 天成四年二月,城破,都與家屬皆自焚死,王氏途絕于中山。而處存有子鄴,

之後也。」後徙鎭海而卒〔五〕。 之。」契丹怒曰:「爾自諸侯爲天子,豈有漸乎?」高祖聞之,遽徙廷胤鎭義武, 」高祖對曰:「中國之法,自將校爲刺史,升團練防禦而至節度使,請送威歸中國,漸進 初, 處直爲都所囚,幼子威北走契丹。 契丹調晉高祖曰:「吾欲使威襲其先人爵土,如 日:「此亦王氏

#### 劉守光

蔚州。 頭。 爲瀛州景城縣令。瀛州軍亂,殺刺史,仁恭募縣中得千人,討平之,匡威喜,復以爲將,使戍 稍以功遷軍校。 仁恭爲人有勇,好大言。 劉守光,深州樂壽人也。 戍兵過期不得代,皆思歸,出怨言。 匡威為弟匡儔所逐, 仁恭聞亂, 乃擁戍兵攻幽 其父仁恭,事幽州李可舉,能穴地爲道以攻城,軍中號「劉窟 ' 可舉死,子匡威惡其爲人,不欲使居軍中,徙

留後,留其親信燕留得等十餘人監其軍,爲之請命于唐,拜檢校司空、盧龍軍節度使。 逐。」因道燕虛實,陳可取之謀,晉王益信而愛之。乾寧元年,晉擊破匡儔,乃以仁恭爲幽州 仁恭多智詐,善事人,事晉王愛將蓋寓尤謹,每對寓涕泣,自言:「居燕無罪,以讒見

|州,行至||居庸關,戰敗,奔晉,晉以爲||壽陽鎭將。

度使盧彥威,遂取滄、景、德三州。爲其子請命于唐,昭宗遲之,未即從,仁恭怒,語唐使者 燕留得等以叛。晉王自將討之,戰于安塞,晉王大敗。光化元年,遣其子守文襲滄州,逐節 日:「爲我語天子,旌節吾自有,但要長安本色爾,何屢求而不得邪!」昭宗卒以守文爲橫海 其後晉攻羅弘信,求兵於仁恭,仁恭不興,晉王以書微責誚之,仁恭大怒,執晉使者,殺

救魏,大敗守文於內黃,斬首五萬。 仁恭父子率兩鎭兵十萬,號稱三十萬以擊魏,屠貝州。 仁恭走,梁軍追擊之,自魏至長河,橫尸數百里。梁軍 羅紹威求救於梁,梁遣李思安

軍節度使。

雑

自是連歲攻之,破其瀛、漠二州,仁恭懼,復附晉。

|晉王爲之攻潞州以牽梁圍,晉破潞州,梁軍乃解去。 被圍百餘日,城中食盡,人自相食,析骸而爨,或丸墐土而食,死者十六七。仁恭求救於晉, 「定霸都」,得二十萬人,兵糧自具,屯于瓦橋。梁軍壁長蘆,深溝高壘,仁恭不能近。 |天祐三年,|梁攻滄州,|仁恭調其境內凡男子年十五已上、七十已下,皆黥其面, 文日:

莫知其處。 丹藥,冀可不死。 然仁恭幸世多故,而驕於富貴,築宮大安山,窮極奢侈,選燕美女充其中。 · 令||燕人用墐土爲錢,悉斂銅錢,鑿山而藏之,已而殺其工以滅口,後人皆 又與道士鍊

別室,既而殺之。 陽爲不忍,出於陣而呼其衆曰:「毋殺吾弟!」守光將元行欽識守文,躍馬而擒之,又囚之於 戰玉田,又敗,乃乞兵于契丹。明年,守文將契丹、吐渾兵四萬人戰于鷄蘇,守光兵敗,守文 攻大安山,執仁恭而幽之。其兄守文聞父且囚,卽率兵討守光,至于盧臺,爲守光所敗,進 , 仁恭在大安, 守光自外將兵以入, 擊走思安, 乃自稱盧龍節度使, 遺李小喜、 元行欽以兵 仁恭有愛妾羅氏,其子守光烝之,仁恭怒,答守光,逐之。梁開平元年,遭李思安攻仁

守文將吏孫鶴、呂兗等,立守文子延祚以距守光,守光圍之百餘日,城中食盡,米卧直

錢三萬,人相殺而食,或食墐土,馬相食其騣尾,竞等率城中饑民食以麴,號「宰務」,日殺以

餉軍。 久之, 延祚力窮, 遂降。

其後,此腹心之患也。」乃爲之班師。 · 夫差爭黃池之會,而越入吳;項羽貪伐齊之利,而漢敗楚。今吾越千里以伐人,而疆燕在 語動鎭、定曰:「燕有精兵三十萬,率二鎭以從晉,然誰當主此盟者?」晉人患之,謀曰:「昔 救趙,大敗梁兵於柏鄉,進掠邢、洺,至于黎陽。守光聞晉空國深入梁,乃治兵戒嚴,遣人以 我盟而背之,今急乃來歸我;且兩虎方鬭,可待之,吾當爲下莊子也。」遂不出兵。晉王果 趙之兵,先至者霸,臣恐燕軍未出,而晉已先破梁矣,此不可失之時也。」守光曰:「趙王嘗與 孫鶴切諫以爲不可。梁攻趙,趙王王鎔求救於守光,孫鶴曰:「今趙無罪,而梁伐之,諸侯救 以死,燕之士逃禍于佗境。守光身衣赭黄,謂其將吏曰:「我衣此而南面,可以帝天下乎?」 守光素庸愚,由此益驕,爲鐵籠、鐵刷,人有過者,坐之籠中,外燎以火,或刷剔其皮膚

受册,用唐册太尉禮儀,守光問曰::「此儀注何不郊天,改元?」有司曰::「此天子之禮也,尚 己河北兵馬都統,以討鎭、定、河東。梁遣閤門使王瞳拜守光河北採訪使。有司白守光,尙父 嗣昭、義武王處直、成德王鎔等,以墨制册尊守光爲尙書令、尙父。守光又遣告于梁,請授 守光以爲諸鎭畏其彊,乃諷諸鎭共推尊己,於是晉王率天德宋盛、振武周德威、昭義李

**傳第二十七** 

劉守光

殺之。 賀册尙父,至燕,而守光已僭號。 乾化元年八月,自號大燕皇帝,改元曰應天,以王瞳、齊涉爲左右相。 者稱王 父雖 伏 質, 令 軍 敢諫者死 尊,乃人臣耳。」守光怒曰:「我爲尙父,誰當帝者乎?且今天下四分五裂,大者稱帝,小 了我以二千里之<u></u>燕,獨不能帝一方乎?」乃械梁、晉使者下獄,置斧鑕于其庭, !」孫鶴進日:「滄州之敗,臣蒙王不殺之恩,今日之事,不敢不諫。」守光怒,推之 士割而啖之。 |鶴呼日:「不出百日,大兵當至!」命窒其口而醢之。|守光遂以|梁 有司迫承勵稱臣,承勳不屈,以列國交聘禮入見,守光怒 晉遣太原少尹李承勳 令日:

守光登城見晉王,晉王問將如何?守光曰:「今日俎上肉耳,惟王所爲也!」守光有嬖者李 不急人之危乎?」遣人以所乘馬易德威馬而去,因告曰:「俟晉王至則降。」晉王乃自臨軍, 温 以情告公,富貴成敗,人之常理;錄功宥過,霸者之事也。 迎降。 亂,不知其佗也。」守光益窘,乃獻絹千匹、銀千兩、錦百段,遣其將周**邈**業謂德威曰:「吾王 今其病矣,公善爲我辭焉。」德威謂遵化曰:「大燕皇帝尙未郊天,何至此邪? 予受命以討僭 下耳,豈意大國暴師經年,幸少寬之。」德威不許。 明年,晉遣周德威將三萬人,會鎭、定之兵以攻燕,自所溝關入,其澶、涿、武、順諸州皆 守光被圍經年,累戰常敗,乃遣客將王遵化致書于德威曰:「予得罪于晉,迷而不復, 。守光登城呼德威曰:「公三晉賢士,獨 守光去歲妄自尊崇,本不能爲朱

小喜,勸其毋降,守光因請俟佗日。是夕,小喜叛降于曆軍。 明旦、晉軍攻破其城、執仁恭

及其家族三百口。

之,引置下坐。飲食自若,皆無慚色。 軍,客將引守光見,晉王戲之曰:「主人何避客之遽也?」守光叩頭請死,命械守光丼其父仁 得食,遣其妻祝氏乞食於田家,田家怪而詰之,祝氏以實告,乃被擒送幽州。晉王方大饗 守光與其妻李氏、祝氏,子繼珣、繼方、繼祚等,南走滄州,迷失道,至燕樂界中,數日不

存霸執仁恭至鴈門,刺其心血以祭先王墓,然後斬之。 不赦臣使自効?」其二婦從旁駡曰:「事已至此,生復何爲?願先死! 肉,亦小喜教爾邪?」晉王怒,命先斬小喜。 者,李小喜也,罪人不死,臣將訴于地下。」晉王使召小喜,小喜瞋目曰:「囚父弒兄,烝其骨 晉王至太原, 仁恭父子曳以組練, 獻于太廟。守光將死, 泣曰: 「臣死無恨, 然教臣不降 守光知不免,呼曰:「王將復唐室以成霸業,何 一乃俱死。 晉王命李

校勘記

(1) 館于梅子園 時海子園也,鎔嘗館李匡威於此。……鎮人矜大其池,謂之『潭園』,蓋不知昔嘗謂之『海子』矣。」 「梅」,南昌、鄂本作「海」。夢溪筆談卷二四云:「鎮陽池苑之盛,冠于諸鎮,乃王鎔

疑「梅」爲「海」之形訛。

(三) 李正抱 新唐書卷二一二及舊唐書卷一八〇李全忠傳作「李抱貞」, 北夢瑣言卷一三作「李貞

抱。

3 梁兵攻魏取黎陽淇門衞縣 他本「黎陽」下均有「臨河」二字。

(2) 周敬亦娶末帝女曰晉安公主 南監、汪、南昌、鄂本及薛史卷九一羅周敬傳「晉安」作「普安」。

(至)後徙鎮海而卒 關運元年秋卒于位。」按本史卷六○職方考、太平寰宇記卷六五及卷九三,杭州日鎮海, 滄州 「鎮海」,薛史卷八八王庭胤傅云:「少帝嗣位,改滄州節度使,累官至檢校太尉。

後唐時爲橫海軍。纂誤補卷三謂「此鎭海當是橫海之誤」。

## 新五代史卷四十

### 雜傳第二十八

#### 李茂貞

李茂貞,深州博野人也。 本姓宋,名文通,爲博野軍卒,戍鳳翔。 黄巢犯京師, 

博野軍擊賊,茂貞以功自隊長遷軍校。

僖宗遣茂貞擊殺昌符,以功拜鳳翔隴右節度使。大順元年,封隴西郡王。 東歸,至鳳翔,鳳翔節度使李昌符與天威都頭楊守立爭道,以兵相攻,昌符不勝,走隴州 行瑜於大唐峯。 光啓元年,朱政反,僖宗出居興元。政遣王行瑜攻大散關,茂貞與保鑾都將李鋋等敗 明年,政遂敗死。茂貞以功自扈蹕都頭拜武定軍節度使,賜以姓名。 扈跸

乃上書言復恭父子罪皆當誅,因自請爲山南招討使。 二年,樞密使楊復恭得罪,奔於興元,興元節度使楊守亮, 復恭之養子也,納之。 茂貞 昭宗以宦者故,難之,未許。茂貞擅

雑

## 發兵攻破興元,復恭父子見殺。

**貞素與讓能有隙,因曰:「謀舉兵者非兩樞密,乃讓能也。」陳兵臨皋驛,請殺讓能。** 宰相,宰相下興而走,亡其堂印,人情大恐,昭宗意益堅。覃王率扈駕軍五十四都戰于整 「臣故先言之矣,惟殺臣可以紓國難。」昭宗泣下沾襟,貶讓能雷州司戶參軍,賜死,茂貞乃 屋,唐軍敗潰,茂貞遂犯京師,屯于三橋。 爲京西招討使。令下,京師市人皆知不可,相與聚承天門,遮宰相請無舉兵,爭投瓦石擊 謝諸侯,恐不能也。」昭宗怒曰:「吾不能孱孱坐〇 受凌弱!」乃責讓能治兵,而以覃王嗣 地大兵彊 乘興播越,自此何之?」昭宗以茂貞表辭不遜,不能忍,以問宰相杜讓能, 茂貞不奉韶,上表自論曰:「但慮軍情忽變,戎馬難羈。徒令甸服生靈,因兹受幣,未審 茂貞 了,而唐力未可以致討;<br />
鳳翔又近京師,易以自危而難於後悔,<br />
佗日雖欲誅晁錯以 表其子繼密權知興元軍府事 ,昭宗乃徙茂貞山南西道節度使,以宰相徐彦若鎭鳳 昭宗御安福門,殺兩樞密以謝茂貞,使罷兵。 讓能以謂:「茂貞 譲能日: 周

#### 〇 古本作生。

行瑜請立珙, 明年,河中節度使王重盈卒,其諸子珂、珙爭立。 昭宗不許。 茂貞等怒,率三鎭兵犯京師,謀廢昭宗 晉王 李克用請立珂,茂貞 立吉王保。 未果,而晉王 與韓建、王

機鵬與行瑜弟行實等爭劫昭宗出奔,京師大亂 昭宗出居于石門。 亦舉兵,茂貞懼,乃殺宰相韋昭度、李磎,留其養子繼鵬以兵二千宿衞而去。 茂貞以兵至鄂縣,斬繼 晉兵至河中,

鵬自贖。

已也!」

冀緩急之可恃也;且茂貞已殺其子自贖矣,乃詔罷歸晉軍。 晉兵已破王行瑜,還軍渭北,請擊茂貞。 昭宗以謂晉遠而茂貞近,因欲庇之以爲德,而 克用歎曰:「唐不誅茂貞」憂未

覲,京師大恐,居人亡入山谷。 茂貞遂犯京師,昭宗遣覃王拒之,覃王至三橋,軍潰,昭宗出 居于瞱州。遣宰相孫偓以兵討茂貞,韓建爲茂貞請,乃已。久之,加拜茂貞尙書令,封岐 昭宗自石門還,益募安聖、捧宸等軍萬餘人,以諸王將之。茂貞謂唐將討己,亦治兵請

韓全誨等,亦倚茂貞之彊,以爲外援,茂貞造其子繼筠以兵數千宿衞京師,宦者恃岐兵, 其後,昭宗爲宦者所廢,旣反正,宰相崔胤欲借梁兵誅諸宦者,陰與梁太祖謀之。中尉

騙不可制。

逾年,茂貞每戰輒敗,閉壁不敢出。城中薪食俱盡,自冬涉春,雨雪不止,民凍餓死者日以千 天復元年,胤召梁太祖以西,梁軍至同州, 全酶等懼,與繼筠劫昭宗幸鳳翔。 梁軍圍之

第

二十八

李茂

茂貞 |梁軍,梁圍解。 天子雖得出,然梁遂劫東遷而唐亡,茂貞非惟亡唐,亦自困矣。 粥,一日食不托,安能不與梁和乎?」三年正月,茂貞與梁約和,斬韓全誨等二十餘人,傳首 得而食之!」人肉斤直錢百,狗肉斤直錢五百,父甘食其子,而人肉賤於狗。 小廟,遣宮人自屑豆麥以供御,自後宮、諸王十六宅;凍餒而死者日三四。 城中人相與邀遮 ,·求路以爲生,<mark>茂貞窮急,謀以天子與梁以爲解。|昭宗謂|茂貞曰:「殷與六宮皆一日食</mark> 米斗直錢七千,至燒人屎煑尸而食,父自食其子,人有爭其肉者,曰:「此吾子也, 天子於宮中設

下令推油,因禁城門無內松薪,以其可爲炬也,有優者誚之曰:「臣請幷禁月明。」茂貞笑而 皇后,鳴梢羽扇視朝,出入擬天子而已。茂貞居岐,以寬仁愛物,民頗安之,嘗以地狹賦薄, 及梁太祖卽位,諸侯之彊者皆相次稱帝,獨茂貞不能,但稱岐王,開府置官屬,以妻爲

初,茂貞破楊守亮取興元,而邠、寧、鄜、坊皆附之,有地二十州; 其被梁圍也, 興元入 ,開平已後,邠、寧、鄽、坊入于梁,溱、鳳、階、成又入于蜀;當梁末年,所有七州而

〇二十州者:岐、隴、涇、原、渭、武、秦、成、階、鳳、邠、寧、慶、衍、鄜、坊、丹、延、梁、洋也。

脏宗已破梁,茂貞稱岐王,上牋以季父行自處。 及聞入洛,乃上表稱臣,遺其子從嚴來

朝。 莊宗以其耆老,甚尊禮之,改封秦王,韶書不名。 同光二年,以疾卒,年六十九,諡曰忠

敬。

從嚴爲人柔而善書畫,茂貞承制拜從嚴彰義軍節度使。 茂貞卒,拜鳳翔節度使。

繼岌征蜀,爲供軍轉運應接使。

蜀平,繼岌遣從曮部送王衍,行至鳳翔,監軍使柴重厚拒而不納, 從職遂東至華州, 聞

無所擾,願貸其過。 雖不許,士人以此多之。 歷鎭宣武、天平。

明宗入立,聞重厚嘗拒從職,遣人誅之。

從職上書,

言重厚守鳳翔,軍民

莊宗之難乃西歸。

從職有 田千頃、竹千畝在鳳翔,懼侵民利,未嘗省理,鳳翔人愛之。 廢帝起鳳翔、將行,

鳳翔 人叩馬乞從職 廢帝入立,復以從曮爲鳳翔節度使,卒年四十九。

#### 韓建

長安, 韓建 巢已破 字佐時,許州長社人也。 復光 亦死, 晏弘與建等無所屬, 少為蔡州 重 乃以麾下兵西迎僖宗於蜀, 校,隸忠武軍將鹿晏弘。 從楊復光攻黃巢於 所過攻劫。 行至

四三四

興元,逐牛叢 7,據 山南。 已而不能守,晏弘東走許州,建乃奔于蜀,拜金吾衞將

郭,亦善緝荆楚。 暇則課學書史。 名目以視之,久乃漸通文字。 乃 ·披荆棘,督民耕植,出入閭里,問其疾苦。 建初不知書,乃使人題其所服器皿 僖宗還長安,建爲潼關防禦使、華州刺史。 。是時,天下已亂,諸鎭皆武夫,獨建撫緝兵民,又好學。 當時號爲「北韓南郭」。 。見玉篇,喜曰:「吾以類求之,何所不得也。」因以通音韻 華州數經大兵,戶口流散,建少賤, 荆南成汭時冒姓 牀榻, 習農事 、聲偶

舉兵且至,建等懼,乃還。晉兵問罪三鎭,兵傅華州, 何爲見攻?」晉人曰:「君以兵犯天子,殺大臣,是以討也。」已而與晉和 之,行瑜、茂貞惶恐戰汗不能語,獨建前自陳述。乃殺宰相韋昭度、李磎等,謀廢昭宗。會晉 人助珂,建與王行瑜、李茂貞助珙。 大順元年,以兵屬張濬伐晉,濬敗,建自含山遯歸。 昭宗不許,建等大怒,以三鎭兵犯京師。 建登城呼日:「弊邑未常失禮於大國, 河中王重盈死,諸子珂、珙爭立,晉 昭宗見建等責

鄜州 乾寧三年,李茂貞復犯京師,昭宗將奔太原,次渭北, 建造子 九請幸華州。 昭宗又欲如 建追及昭宗於富平,泣曰:「藩臣佩疆,非止茂貞,若捨近畿而巡極塞,乘興渡河,不可

復矣!」昭宗亦泣,遂幸華州。

是時,天子孤弱,獨有殿後軍及定州三都將李筠等兵千餘人爲衞,以諸王將之。 建已

北顧 德政碑以慰安之。 中尉劉季述誣諸王謀反,以兵圍十六宅,諸王皆登屋叫呼,遂見殺。 殺建、劫天子幸佗鎮。昭宗召建,將辨之,建稱疾不出,乃遣諸王自詣,建不見、口,請送諸王 迎歸大內中?」酒酣,與從臣悲歌泣下,建與諸王皆屬和之。 得昭宗幸其鎮,遂欲制之,因請罷諸王將兵,散去殿後諸軍,累表不報。 三都衞兵、幽諸王於十六宅。 十六宅,昭宗難之。 望京師,作菩薩蠻辭三章以思歸,其卒章曰:「野煙生碧樹,陌上行人去。 建乃率精兵數千圍行宮,請誅李筠。 。昭宗益悔幸華,遺延王戒丕使于晉,以謀興復。 昭宗大懼,遽詔斬筠,悉散殿後及 建心尤不悅,因遣人告諸王謀 昭宗無如之何,爲建立 昭宗登齊雲樓 戒丕還,建與 安得有英雄,

止。光化元年,昭宗還長安,自爲建畫像,封建潁川郡王,賜以鐵券。 之禍,吾不忍見,不如先死!」因泣下歔欷。 曰:「汝陳、許間一田夫爾, 遭時之亂, 蒙天子厚恩至此, 建已殺諸王,乃營南莊,起樓閣,欲邀昭宗遊幸,因以廢之而立德王裕。 李茂貞、梁太祖皆欲發兵迎天子,建稍恐懼,乃 ,欲以兩州百里之地行大事,覆族 建辭王爵,乃封建許 其父叔豐謂

#### 國公公

降 |太祖責建背己,建日:「判官李巨川之謀也。」太祖怒,即殺巨川,以建從行。 梁太祖以兵嚮長安,遣張存敬攻同州,建判官司馬鄴以城降,太祖使鄴召建,建乃出

兩 人。」次何皇后舉觴,建躡太祖足,太祖乃陽醉去。 昭宗 東遷、 建從至洛,昭宗舉酒屬太祖與建曰:「遷都之後,國步小康, 社稷安危, 建出,謂太祖曰:"「天子與宮人眼語,幕 繋卿

下有兵仗聲,恐公不免也!」太祖以故尤德之,表建平盧軍節度使。

亦優容之。 太祖卽位,拜司徒同中書門下平章事。 太祖郊于洛,建爲大禮使。 罷相,出鎭許州, 太祖性剛暴,臣下莫敢諫諍,惟建時有言,太祖 太祖崩, 許州軍亂, 見殺,年五十

#### 李仁福

### 李仁福,不知其世家。

當唐僖宗時,有拓拔思敬者,爲夏州偏將,後以與破黃巢功,賜姓李氏,拜夏州節度使。

思敬卒,乾寧二年,以其弟思諫爲節度使。

唐患,而亦無大功。 始終。是時,興元、鳳翔、邠寧、鄜坊、河中、同華諸鎭之兵,四面並起而交爭,獨靈夏未嘗爲 自唐末天下大亂,史官實錄多闕,諸鎭因時倔起,自非有大善惡暴著于世者,不能紀其 朱玫之亂,思敬與鄜州李思孝皆以兵屯渭橋。 其後,黃巢陷京師,王重

際、李克用等會諸鎭兵討賊,思敬與破巢復京師,然皆未嘗有所可稱,故思敬之世次、 功過

不顯而無傳。

疎也。 茂貞,晉王李克用,數會兵攻仁福,梁輒出兵救之。 亂,殺弊昌。是時,仁福爲蕃部指揮使,戍兵于外,軍中乃迎仁福立之,不知其於思諫爲親 梁開平二年,思諫卒,軍中立其子彝昌爲留後,即拜彝昌節度使。 是歲四月,拜仁福檢校司空、定難軍節度使。 仁福累官至檢校太師銀中書令,封朔方 終梁之世,奉正朔而已。 明年,其將高宗益作 是時,岐王李

王。長興四年三月卒,其子彝超自立爲留後。

節度使。清泰二年卒。 |陜以西,民運斗栗束芻,其費數千,人不堪命,道路愁苦。 明宗遂釋不攻,以彝超爲定難軍 土築之,從進等穴地道,至城下堅如鐵石,鑿不能入。彝超外招党項,抄掠從進等糧道, <u>彝超果不受代,從進與彥稠以兵圍之,百餘日不克。</u> 武軍節度使,而徙彰武安從進代之。恐彝超不受代,遣邠州藥彥稠以兵五萬送從進之鎮。 自仁福時,邊將多言仁福通於契丹,恐爲邊患。明宗因其卒,乃以彝超爲延州刺史、彰 夏州城壁素堅,故老傳言赫連勃勃蒸

其弟彝興、累官檢校太師兼侍中,周顯德中,封西平王,其後事具國史。

#### 韓遜

韓遜,不知其世家。 初爲靈武軍校,當唐末之亂,據有靈鹽, 唐卽以爲節度使, m 史失

不錄,不見其事。 梁開平三年,封朔方節度使韓遜爲潁川王,始見於史。

是時,邪寧楊崇本、鄜延李周彝、鳳翔李茂貞,

皆與梁爭戰,

獨遜與夏州李思諫臣屬于

梁、未嘗以兵爭。 貞明中, 遜卒, |李茂貞嘗遺劉知俊攻遜,不能克,遜亦善撫其部,人皆愛之,爲遜立生祠。 軍中立其子涨爲留後,梁卽以爲節度使。 至莊宗時, 又以洗棄河西節

度。

宗以康福爲朔方河西節度使以代澄,由是命吏而相代矣。 天成四年,洙卒,即以洙子澄爲朔方軍留後 [三]。其將李賓作亂,澄乃上章請帥於朝, 韓氏自遜有靈武,傳世皆無所稱 明

#### 楊崇本

述,澄後不知其所終。

楊崇本,幼事李茂貞,養以爲子,冒姓李,名曰繼徽, 茂貞表崇本靜難軍節度使。

祖攻岐未下,乃移兵攻邠州,崇本迎降,太祖使復其姓,賜名崇本,遷其家於河中以爲質。

崇本妻有美色,太祖用兵,往來河中,嘗幸之。 崇本妻頗媿恥,間遣人誚崇本曰:「大丈

至永壽而卒,梁兵乃旋。崇本屯美原,太祖復遣劉知俊、康懷英等擊之,崇本大敗,自此不 岐圍,崇本妻得歸,崇本乃復背梁歸茂貞。 茂貞 (西連蜀兵會崇本攻雍、華,關西大震。 太祖以兵西至河中,遣郴王友裕擊之,友裕

乾化四年,爲其子彥魯所弒。 崇本養子李保衡、殺意魯以降梁。

復東。

#### 高萬興

許從實殺萬子,自爲延州刺史。 俱事敬璋爲騎將。 高萬興,河西人也。唐末,河西屬李茂貞,茂貞將胡敬璋爲延州刺史,萬興與其弟萬金 敬璋死,其將劉萬子代爲刺史。 梁開平二年,葬於州南,萬子在會,其將 是時,萬興兄弟皆將兵戍境上,聞萬子死,以其部下數千人

雜傳

第二十

八

高萬與

圀

盤

降梁。

使,以牛存節爲保大軍節度使。已而劉知俊叛,乃徙存節守同州,以萬金爲保大軍節度使。 許從實。 梁太祖兵屯河中,遣同州劉知俊以兵應萬興,攻丹州,執其刺史崔公實。 鄜州李彦容、坊州李彦昱皆棄城走。 梁太祖乃以萬興爲延州刺史、 進攻延州, 忠義軍節度 執

封延安郡王,徙封北平王。 梁亡,莊宗入洛,萬興嘗一 來朝。 同光三年,卒于鎭。

貞明四年,萬金卒,乃以萬興爲鄜延節度使,進

萬興累遷檢校太師 兼中書令,渤海郡王。

萬興兄弟皆驍勇,而未嘗立戰功,然以戍兵降梁, 梁取鄜、坊、丹、延自萬興始, 故其兄

萬興子允韜代立,長興元年徙鎭安國,又徙義成,淸泰中卒。

弟世

守其土。

萬金子允權,開運中爲膚施令,罷居于家。 是時,日 周密爲彰信軍節度使(三),契丹滅晉

延州軍亂,逐密,密守東城,而西城之兵以允權爲留後。 聞漢高祖起太原,遂歸漢,即拜節

度使,廣順三年卒。

溫韜

又以美原縣爲鼎州, 原縣爲耀州,以韜爲刺史。 温韜,京兆華原人也。 建義勝軍 梁太祖圍茂貞於鳳翔,韜以耀州降梁, 少爲盜,後事李茂貞,爲華原鎭將,冒姓李, 以韜爲節度使。木帝時,韜復敖茂貞降梁,梁改耀州爲崇 已而 復叛歸茂貞。 名彥韜。 茂貞以華 茂貞

州,鼎州爲裕州,義勝爲靜勝軍,卽以韜爲節度使,復其姓温,更其名曰昭圖。

見宮室制度閎麗,不異人間,中爲正寢,東西廂列石牀,牀上石函中爲鐵匣,悉藏前世圖書, | 韜在鎭七年,唐諸陵在其境內者,悉發掘之,取其所藏金寶,而昭陵最固,韜從埏道下,

|鍾、||王筆迹,紙墨如新,||韜悉取之,||遂傳人間,惟||乾陵風雨不可發。

其後朱友謙叛梁,取同州,晉王以兵援友謙而趨華原,韜懼,求徙佗鎮,遂徙忠武。

沖。 宗滅梁,韜自許來朝,因伶人景進納路劉皇后,皇后爲言之,莊宗待韜甚厚,賜姓名曰李紹 郭崇韜曰:「此劫陵賊爾,罪不可赦!」莊宗曰:「已宥之矣,不可失信。」遽遣還鎭。 明宗入洛,與段凝俱收下獄,已而赦之,勒歸田里。 明年,流于德州,賜死。

有 不能開其惑者矣!豈非富貴之欲,溺其所自私者篤,而未然之禍,難述於無形,不足以動 嗚呼,厚葬之弊,自秦漢已來,率多聰明英偉之主,雖有高談善說之士,極陳其禍福,

雜 僔 第二十八 溫 郼 校 勘 12 其心歟?然而聞温韜之事者,可以少戒也!

妾,其意丁寧切至,然實錄不書其葬之薄厚也。 遺世宗,使以瓦棺、紙衣而斂,將葬,開棺示人,旣葬, 二,其一于京師,其一于澶州 五 代之君,往往不得其死,何暇顧其後哉。 又葬其劍、甲各二,其一于河中,其一于大名者,莫能原其旨 又使葬其平生所服衮冕、通天冠、絳紗袍各 獨周太祖能鑒韜之禍, 刻石以告後世, 毋作下宫, 毋置 其將終也, 爲 書以 一守陵

#### 校勘記

也。

- 乃遣諸王自詣建不見 他本「詣」下均有「建辨之」三字。
- 遜傳 珠卒即以珠子澄爲朔方軍留後 亦稱「洙卒,朝廷以其弟澄爲朔方軍節度觀察留後」。 本史卷四六康福傳云:「韓珠死,其弟澄立。」薛史卷一三二韓 此云「洙子澄」,恐誤。
- 3 密爲三軍所逐」, 度 周 使」,又卷九九漢高祖紀載, 密 爲彰信軍節度使 與本史卷一〇漢高祖紀合。 按薛史卷八四晉少帝紀載,開運三年八月「以右龍武統軍周密爲延州節 天福十二年(即開運四年) 權延 州留後高允權奏稱「本道節度 本史卷六〇職方考,延州 使 周

明

周密實爲延

帥

叉按

後唐時為彰武軍,彰信軍後周始置於曹州。

此處「彰信」當是「彰武」之訛

## 新五代史卷四十一

### 雜傳第二十九

### **盧光稠** 譚全播

**盧光稠、譚全播,皆南康人也。** 光稠狀貌雄偉,無佗材能,而全播勇敢有識略,然全播

### 常奇光稠爲人。

木! 良帥,盧公堂堂,眞君等主也。」衆陽諾之,全播怒,拔劍擊木三,斬之,曰:「不從令者如此 乃相與聚兵爲盜。衆推全播爲主,全播曰:「諸君徒爲賊乎?而欲成功乎?若欲成功,當得 」衆懼,乃立光稠爲帥。 唐末,羣盜起南方,全播謂光稠曰:「天下洶洶,此眞吾等之時,無徒守此貧賤爲也!

m 輕進,全播成其持重,不聽,度其必敗, 是時,王潮攻陷嶺南, ,全播攻潮,取其虔、韶二州, 乃爲奇兵伏其歸路。 又遣光稠弟光睦攻潮州。 光睦果敗走,潮人追之, 光陸 全播 好勇

雑

傳第二十九

虚

光稠

譚全

審

四四三

以伏兵邀擊,大敗之,遂取潮州。

功, 於城南,告巖戰期。 之,今日非 全播悉推諸將,光稠心益賢之。 是時, 劉嚴起 公不 能守也。」全播日:「吾知劉嚴易與爾 南海, 以老弱五千出 撃走光睦, 戰, 以兵數萬攻虔州。 戰酣,僞北,嚴急追之,伏兵發,嚴遂人敗。 」乃選精兵萬人,伏山谷中, 光稠大懼, 謂全播曰:「虔 潮皆 陽治 光稠 第戦 公取 戰 地

貢 賦。 梁初,江南、嶺表悉爲吳與南漢分據,而光稠獨以虔、韶二州請命于京師,願通道 太祖爲置百勝軍,以光稠爲防禦使、兼五嶺開通使,又建鎭南軍,以爲留後 輸

好 遊 !獵,其將黎求閉門拒延昌,延昌見殺。求因謀殺全播, 開平五年,光稠病,以符印屬全播,全播不受。 光稠卒, 全播懼,稱疾不出。 全播立其子延昌而事之。 | | | | | | | | | 延昌

命于梁。

含圖 .疑之,使人覘其動靜,全播應覘爲狀以自免。 元年,拜求防禦使。 水暴病死, 其將李彥圖 彦圖死, 自立, 全播盆懼,遂稱疾 州人相率詣全播第, 篤, 杜 扣門請之, 自絕。

**上播乃起,遣使請命于梁,拜防禦使。** 

氏時,劉龑已取韶州,及全播被執,虔州遂入于吳。 全播治虔州七年,有善政, 楊隆演遣劉信攻破虔州, 以全播歸廣陵,卒年八十五。 當盧

#### 雷滿

區景思、周岳等聚諸蠻數千,獵于大澤中,乃擊鮮釃酒,擇坐中豪者, 雷满, 武陵人也。 爲人兇悍獢勇,文身斷髮。 唐廣明中,湖南饑,盜賊起, 補置伍長, 滿與同里人 號土團軍

諸蠻從之,推滿爲帥。

是時,高駢鎭荆南,召滿隸麾下,使以蠻軍擊賊。 **퇡徙淮南,滿從至廣陵,逃歸,殺刺史** 

崔翥,遂據朗州,請命于唐。 昭宗以澧、朗爲武貞軍,拜滿節度使。

外,滿亦以輕舟上下荆江,攻劫州縣。 是時,遭陽人向瓌殺刺史呂自牧據澧州, 楊行密攻杜洪于鄂州 而溪洞諸蠻宋鄴昌、師益等, 荆南成汭出兵救洪, 皆起兵剽掠湖 

溺死於君山。 滿襲破荆南,不能守,焚掠殆盡而去。

滿嘗鑿深池於府中,客有過者,召宴池上,指其水曰:「蛟龍水怪皆窟於此,蓋水府也。」

酒酣,取坐上器擲池中,因裸而入,取器嬉水上,久之乃出,治衣復坐,意氣自若

恭附于楊行密、 滿居朝州,引沅 亦嘗攻劫爲荆、湖患。 |水塹其城,上爲長橋,爲不可攻之計。 開平元年,馬殷發兵攻彥恭,恃塹爲阻,逾年不能破。 天祐中, 滿卒, 子彥恭自立。

全值

僔

三年,彥恭奔于楊行密,馬殷擒其弟彥雄等七人送于梁,斬于汴市,彥恭卒於淮南,禮、朗遂

#### 鍾傳

入于楚。

撃城、 亦據鄂州 鍾傳, 頻勝 楊行密屢攻之,洪頗倚傳爲首尾。 ``, 遂逐觀察使, 自稱留後。 洪州高安人也。 事州爲小校,黃巢攻掠江淮,所在盜起,往往據州縣。 唐以洪州爲鎭南 久之,洪敗死 軍,拜傳節 度使。 江夏伶人杜洪 傳以州兵

祭天, 能下 是時, 嚮城再 乃自率兵圍之。 危全諷 ·拜,祝曰:「全諷不降,非民之罪,顧天止火。」全諷聞之,明日乃亦聽命,請以女 、韓師德等分據撫、吉諸州,傳皆不能節度,以兵攻之,稍聽命, 城中夜火起, 諸將請急攻之,傳曰:「吾聞君子不迫人之危。」乃掃 獨 全諷 地

兵於楊屋,渥遣秦裝等攻匡時,匡時敗,被執歸廣陵。 請 命 于 傳 居江 唐。 全諷 西三十餘年,累拜太保、中書令, 日:「聽鍾郎爲節 度使三年, 吾將自爲之。」已而 封南平王。 開平三年, 天祐 三年,傳卒, 傳養子 全諷等起兵江西, 延規 子匡 與 匡 時 時 自 稱 争立, 乞 謀復鍾 留

妻傅

子

匡時

#### 趙匡凝

梁太祖攻蔡州 趙 匡凝字光儀, 宗權 屢敗,德諲乃以山南東道七州降。 蔡州人也。 其父德諲事秦宗權,爲申州刺史。 梁太祖初鎮宣武,嘗爲宗權所困 宗權反,德諲攻下襄陽。 一,聞

表爲行營副都統,河陽、保義、義昌三節度行軍司馬。

會其兵以攻蔡州

破

之,德諲功多。德諲卒,子匡凝自立。

**德**諲降,大喜,

是時,成內死,雷彥恭襲取荆南,匡凝遣其弟匡明逐彥恭,太祖表匡凝荆襄節度使,以

匡凝爲人氣貌甚偉,性方嚴,喜自脩飾,頗好學問,聚書數千卷,爲政有威惠。

李克用遺人以書幣假道于匡凝, 太祖攻兗州,朱瑾求救於晉,晉遣史儼等將兵數千救瑾,瑾敗,與儼等奔于淮南。 以聘于楊行密, 求歸儼等。晉王使者爲梁得, 太祖 大怒。 晉王

是時, 梁已破免、鄆,遣氏叔踪、康懷英等攻匡凝,叔琮取泌、隨二州, 懷英取鄧州, 匡凝懼,

請盟,乃止。

雜

傳第二

十九

趙匡凝

深,不敢妄有佗志。」太祖遣楊師厚攻之,太祖以兵殿漢北, 太祖弑昭宗, 將謀代唐, 畏匡凝兄弟不從, 造使告之, 匡凝對使者流涕答曰:「 受唐恩 匡凝戰敗, 以輕舟奔于楊行密

師厚進攻荆南,匡明奔于蜀。

熱。」諸將以爲慢,渥遷匡凝海陵,後爲徐温所殺。 密厚遇之。其後行密死,楊渥稍不禮之。渥方宴,食青梅,匡凝顧渥曰:「勿多食,發小兒 曰:「僕世爲唐臣,歲時職貢,非輸賊也。今以不從賊之故,力屈歸公,惟公生死之耳!」行 匡凝至廣陵,行密見之,戲曰:「君在鎮時,輕車重馬,歲輸于梁,今敗乃歸我乎。」匡 匡明 卒于蜀。

# 新五代史卷四十二

### 雜傳第三十

#### 朱宣弟強

指揮使。 使薛崇卒,其將崔君預自稱留後。 重 校,敬武以隸其將曹全晟。 朱宣,宋州下邑人也。 已而 全晟死,軍中推宣爲留後,唐僖宗即拜宣天平軍節度使。 少從其父販鹽爲盜,父抵法死,宣乃去事青州節度使王敬武爲 中和二年,敬武遣全晟入關與破黃巢。 全晟攻殺君預,遂據鄆州。 宣以戰功, 還過 為耶州馬步軍都 鄭州, 鄆州節度

國, 宣 官 、連既還,乃馳檄兗、鄆, 與其弟瑾以傍、鄆之兵救汴,大破蔡兵,走宗權。是時,太祖已襲取滑州, 苦戰曹、濮 梁太祖鎭宣武,以兄事宣。 間。 是時,梁又東攻徐州 言宣、瑾多誘宣武軍卒亡以東,乃發兵收亡卒,因攻之, 太祖新就鎮,兵力尚少,數爲秦宗權所困,太祖乞兵於宣。 ·西有察賊,北敵強晉,宣、與兄弟白相首尾,然卒爲 稍欲丼吞諸鎮, 遂爲敵

[75] [75]

九

雜

僔

剱

==

+

朱宜

梁所 滅

乾 寧四 年, 宣敗, 走中都、爲葛從周所執、 斬于汴橋 下令

Θ 今流 俗以宜瑾兄,於名加「王」者,非 地

瑾 ,宣從父弟也。從宣居鄆州,補軍 校。 少倜儻,有大志,兗州節度使齊克讓愛其爲

以女妻之。 **瑾行親迎,乃選壯士爲興夫,伏兵器興中。** 夜至兗州, 兵發,遂虜克讓,自

僖宗卽拜瑾泰寧軍節度使。

瑾 與宜已破秦宗權於汴州,梁太祖責瑾誘宣武軍卒以歸,遣朱珍攻瑾,取曹州 又攻濮

州 而太祖自攻鄲。 

|太祖得宣將賀瓌、何懷寳及嘩兄瓊,乃將瓊等至||克城下,告瑾曰:「汝兄敗矣!| 今瓊等

已降,不如早自歸。」」瑾僞曰:「諾。」乃遺牙將胡規持書幣詣軍門請降。 太祖大喜,至 延壽 門

騎 迎

瓊,揮手語捍日:「請瓊獨 來!」瓊前,壯士擒之,遂閉門,責瓊先降,斬之,擲其首城外。

旭度不可下, 乃留 兵圍之而去。

|瑾 嬰城自守,而與葛從周等戰城下,瑾兵屢敗,宣亦敗於鄲州, 乃乞兵於晉, 晉遣李承

嗣 度使, 間, 走海州,梁兵急追之,乃奔于淮南。 梁兵奄至, 史嚴 以爲行 等以騎兵五千救之。 軍副使。 **瑾將康懷英等以城降梁。** 其後,梁遣龐師古、葛從周等攻淮南 太祖已破宣, 楊行密聞瑾來,大喜,解其玉帶贈之, 乃急趨兗。 **運城中食盡,與承嗣等掠食豐、** 行密用強,大破梁兵於清口,斬 沂州刺史尹處賓不納。 表瑾領武寧軍節 又

師古。 行密累表瑾東南諸道行營副都統、領平盧軍節度使、同中書門下平章事。

訓 **嘗以月旦** 遗愛妾候知訓家, 行 密 死, 渥及隆演相繼立, 皆年少, 知訓強通之,妾歸自訴, 徐温與其子知訓專政,畏瑾, 瑾盆不平。 欲除之, 瑾乃謀殺知 屢勸隆演誅徐氏,以

去國患,隆演不能爲。

升堂, 矣! 中, 垣,折其足。 」隆演日:「此事 知訓入 旣 出其妻陶氏, 而 知訓 (而釋馬,使相踶鳴) |瑾 以泗州 路窮,大呼曰:「吾爲萬人去害,而以一 非 知訓方拜, 建靜淮軍,出瑾爲節度使。 吾敢知 ! | 蓮以笏擊踣之,伏兵自戶突出,殺之。 」遽起入內。 故外人莫聞 其變。 **瑾忿然以首擊柱**,提 將行, **瑾攜其首馳示隆演** 召之夜飲。 身死之! 劍而 遂 明日, 自刎 出, 刻, 日 知訓過瑾謝, 選 以 二 府門 「今日爲吳除 已闔 惡馬繁庭 因踰 延之 惠

見公矣!」陶氏收淚,欣然就戮,聞者哀之。 浬 州 徐 知誥 聞亂,以兵趨廣陵, 族瑾家。 **瑾妻陶氏臨刑而泣**, 其妾曰:「何爲泣乎?今

雜

温 墓 日:「但理之, 病 上土,以水服之,云 ,夢瑾挽 瑾 名 重 江 弓射之。 吾非以病死者。」於是果然。 淮 ,人畏之,其死也,尸之廣陵北門,路人 病輒 温 懼, 愈, 網其骨,葬 更益新土,漸 塘側 卒年五十二。 成 立 高 墳。 祠 其 上。 徐 私 温 初, 等惡之,發其尸 共壓之。 瑾嘗病疽,醫者視之,色懼 是時 , 投於雷 民多 )病瘧, 公塘。 皆取 後 其

#### 王師範

敬武 間 平盧節度使安師儒遣敬武率兵擊破之。 節度使。 師 範,青州 人也。 其父敬武, 爲 平盧 軍牙將。 敬武反兵逐師儒,自 唐廣 明 元 年,無棣 稱留後, 人 八洪霸 都統王鐸承制 郎爲盜齊、 |棣

襲青州 山。 爾 師 為牙將。」明日,洪來,師範出迎,哪於坐上斬之,伏兵發,盡殺其餘兵, 崔安潛爲平盧節度使。 洪以 敬 武 師範陽爲好辭,遣人迎語洪曰:「吾幼未能任事,賴諸將共持之爾。 師範無能爲,遂還,不爲備 卒,師範尙幼,其棣州刺史張蟾叛。 師範不受代,蟾迎安潛入棣州。 師範伏兵於道,語其 昭宗以爲師範年少,其下 、僕劉鄩日:「洪來,爲我斬之! 師範遣其將盧洪攻蟾,洪以兵返 不服從,乃拜太子少 乃急攻棣州, 破張 不然,聽公所為 用

蟾,安曆奔歸于京師。昭宗乃拜師範節度使。

其兵。 乃遣 以兵自衞 兵攻梁。 稱 召 :師範使者聘梁,因欲劫殺太祖。 居厚至華州東城,華州將婁敬思疑其有異,剖興視之,見 諸 劉鄩與其弟師魯分攻兗、密諸州。 鎭兵以擊梁。 師範 居厚遂擊殺敬思,以兵攻西城,不克而反。 頗好儒學、聚書至萬卷、爲政有威愛。 吾雖力不足,當成敗以之。」乃遣使乞兵於楊行密。 是時,梁已東下兗、鄆,師範 詔至青州,師範泣曰:「諸鎭有兵,所以藩扞天子,今天子危辱,而諸鎭反 遣張居厚以壯士二百爲興夫,伏兵興中,西馳梁軍, 梁太祖圍昭宗於鳳翔,宦官韓全海等矯詔 劉鄩逐葛從周取兗州,而平盧諸州皆起

旭 魯大敗,遂傅其城,而梁別將劉 還軍。」師範以爲然,乃遣師魯悉兵攻之,師厚拒而不戰。 師範以兵迫之,師厚陽爲怯不敢出, 請罪,太祖 其後,梁太祖自鳳翔東還,遣朱友寧攻師範, 待以客禮。 久之,表師範 重霸下其棣州 間遣 河陽 人陽言曰:「梁兵少,方乞兵於鳳翔,今糧且絕, 節度使。 師範 友寧戰死。 乃請降,太祖許之。 師魯兵却,師厚追擊至聖王山 復遣楊師厚攻之,屯于臨朐。 師範素服乘驢詣太

封王, 太祖 宴於宮中,友寧妻泣謂太祖曰:「陛下化家爲國, 諸子人人皆得封, 即位, 召爲右金吾衞上將軍,居于洛陽。 太祖 心欲誅之,未有以發。 而妾夫獨以戰死, 太祖諸子已

奈何讎 有罪乎? 至,先掘 人猶 坑於外,乃入告之。 然懼少長失序,下愧於先人。」酒半,令少長以次起,就戮於坑所, 在 朝 廷 !」太祖奮然戟手曰:「吾亦幾忘此賊!」乃遣人就洛陽族滅之。 師範設席爲具,與諸宗族飲酒,謂使者曰:「死,人之所不免,況 聞者皆哀憐之。 使者

# 李罕之

同光三年,贈師範太尉。

往皆不容。乃乞食酸棗市中,市中人皆不與,罕之擲器于地,裂其衣,又去爲盜。 李罕之,陳州項城人也。爲人驍勇,力兼數人。少學,讀書不成,去爲僧,以其無賴,所

以兵屯宋州,又表河南尹、東都留守。 罕之爲懷州刺史。巢已敗走,爽降唐,僖宗拜爽東南面招討使,以攻宗權,爽表罕之副使, 州 刺 史。歲餘,秦宗權急攻光州,罕之不能守,還走項城,收其餘衆,依諸葛爽於河陽,爽以 是時,黃巢起曹、濮,乃往依之。巢北渡江,罕之與其麾下走淮南,自歸於高駢,駢表光 秦宗權遣孫儒攻河南,罕之兵少,西走澠池,儒燒宮

闕,剽掠而去。罕之壁澠池。

歲餘,諸葛爽死,其將劉經立爽子仲方。 仲方年少,事皆任經,經慮罕之兇勇難制,以

經,與罕之合攻河陽,爲經所敗,退保懷州。 兵攻之,罕之返擊走經。罕之追至鞏縣,陳舟于汜水,將渡河,經遣張言拒之河上,言反背 已而孫儒陷河陽,仲方奔于梁。梁兵擊走儒,

罕之襲取河陽,言取河南,皆附于梁。

統,表罕之爲副。破王行瑜,加檢校太尉,食邑千戶。 東,頗倚罕之爲扞蔽。李茂貞等犯京師,克用以兵至渭北,僖宗以克用爲邠州四面行營都 陽,罕之齊晉。晉表罕之澤州刺史,使李存孝以兵三萬助罕之攻言。言求救於梁。罕之敗 人爲食。居民屯聚摩雲山,罕之悉攻殺之,立栅其上,時人號曰李摩雲。 于沈河,乃歸太原,李克用延之帳中。罕之留其子順事晉,乃之澤州,日以兵鈔懷、孟間,啖 無已,言頗苦之,不能輸,罕之召言軍吏笞責之,言益不平。罕之悉兵攻晉、絳,言夜襲河 暴,頗失士心。而言善治軍旅,敎民播殖,務爲積聚。 罕之與言皆爽叛將,事已成,乃相與交臂爲盟,暫同休戚不相忘。罕之御衆無法,性苛 罕之用兵,言嘗供給其乏。 罕之求取 是時,晉方徇地山

矣,無能爲也。若吾王見憐,與一小鎭,使休兵養疾而後歸老,幸也!」寓爲言之,克用不 「吾於罕之豈惜一鎭,然鷹鳥之性,飽則颺矣!」 佗日,諸鎭擇守將,未嘗及罕之,罕之心益怏怏。 罕之自以功多於晉,私謂蓋寓曰:「自吾脫身河陽,賴晉容我,未能有以報之,今行老 寓告克用,懼罕之有佗心,克用日

然者 ,備佗盜 光化 梁太祖遣丁會守潞州,以罕之爲河陽節度使,行至懷州,以疾卒,年五十八 元 年 耳 ! 潞州薛志勤卒,罕之遽入潞州, ·」克用· 大怒,遣李嗣昭攻之。 罕之執晉守將馬溉、伊鐔等,遺子願送于梁 使人啓晉王曰:「志勤且死,新 帥 未至, 所以

唐,歷衞、衍二州刺史,累遷右領軍衞上將軍。 以歸梁,晉王怒,欲殺頎,莊宗與之駿馬,使奔于梁。太祖得頎父子大喜,使與友倫將兵以 衞昭宗,故頎當太祖時,常掌禁兵。 末帝誅友珪,頎與其謀,拜右羽林統軍 罕之初背梁而歸晉,晉王以罕之守澤州,罕之留其子頎與莊宗遊,甚狎。後罕之背晉 天福中卒,年七十,赠太尉。 、澶州刺史。

# 孟方立

諸 葛爽于河陽,遣方立將兵出天井關爲先鋒。 盂 方立,邢州平鄉人也。少爲軍卒,以勇力選爲隊將。唐廣明中,潞州節度使高潯攻 **潯爲其將劉廣所逐,廣爲亂軍所殺。** 方立聞

亂,引兵自天井入據潞州,唐因以爲昭義軍節度使。

自 劉稹以來管逐其帥; 昭 義所節制澤、潞、邢、洛、磁 且己邢人也,因徙其軍于邢州 五. 州 而治 潞州。 方立以謂潞州山川高險,而人俗勁悍, 而 路人怨方立之徙也, 因以澤、路

雜傳第三十 孟方立 王珂

州歸于晉。 晉遣李克修爲澤路節度使,方立以邢、洛、磁三州自爲昭義軍

晉,鎔許之。 方立乃遣其將奚忠信攻晉遼州,而鎔以佗故不能出兵。 兵旣失約,忠信大敗, |方立以孤城自守,求救于梁,梁方東事兗、鄲,不能救也。|文德元年,|方立乞兵于王鎔以攻 晉數遣李存孝等出兵以窺山東, 三州之人俘掠殆盡, 赤地數千里, 無復耕桑者累年。

而晉兵乘勝攻之。

州,方立來救,可以敗也。」金俊以爲然。軍于滏水之西,方立果帥兵來救,爲金俊所敗,馳 入邢州,閉壁不復出。外無救兵,城中食且盡,方立夜出巡城,號令守者,守者皆不應,方立 知不可,乃歸飮酖而卒。 金俊厚遇之,問以攻邢之策,元佐曰:「方立善守而邢城堅,若攻之,必不得志。 宜急攻其磁 方立將石元佐者,善兵而多智,方立嘗信用之。忠信之敗也,元佐爲晉將安金俊所得,

度裕降晉。晉徙遷族于太原,以爲汾州刺史,後以爲澤路節度使。 軍中以其弟洺州刺史遷爲留後,求救於梁。梁太祖遣王虔裕將騎兵三百助遷守,遷執

軍還過路,以遷歸于梁,梁太祖惡其返覆,殺之。 天復元年,梁遣氏叔琮攻晉,出天井關,遷開門降,爲梁兵鄉道以攻太原,不克。

#### 四五八

#### 王珂

子,以其兄重簡子河爲後。 珂, 河中人也。 其仲父重榮,以河中兵破黃巢, 重榮卒,弟重盈立,重盈卒,軍中乃以珂重榮子,立之。 有功於唐, 拜河中節度使。 重榮無

易。 之。偏將字蹯因洪戰敗,殺珙,自稱留後 妻之,遣李嗣昭將兵助珂攻珙陝州。 行瑜、韓建、李茂貞爲援,行瑜等交章論列,昭宗報以重榮與晉於唐嘗有大功,業許之,不可 西討三鎭,行下絳州,斬瑤而過,至于渭北,擊破行瑜。昭宗卒以珂爲河中節度使。晉以女 小字忠兒,不應得立。阿亦求援於晉,晉人言之朝,昭宗以晉故,許之。 行瑜等怒,以兵犯京師,殺宰相李磎等而去。洪、瑤連兵攻河河中,珂求援於晉,晉兵 重盈子陝州節度使洪、絳州刺史瑤,與河爭立,洪、瑤以書與梁太祖,言珂故王氏蒼頭, 。)珙爲人慘刻,嘗斬人擲其首於前,言笑自若,其下苦 而珙、瑤亦西結王

等兵出含山,破晉、絳二州,遣何絪以兵守之,絕晉援。 梁太祖以珂在河中,懼爲患,乃顧張存敬、侯言,以一大繩與之,曰:「爲我持縛珂來!」存敬 是時,梁已下鎭、定,將移兵西,而昭宗爲劉季述所廢,京師大亂。 存敬圍河中,珂告急於晉,晉以納故 崔胤陰召梁以兵西

若 晉 不 李茂貞曰:「天子初返正,詔藩鎭無相侵以安王室。今朱公棄約以見攻,其勢不止於弊邑, 得 弊邑朝亡, **[報之曰:「梁兵爲阻,衆寡不敵,救之則丼晉俱亡,不若與王郎自歸朝廷。」珂乃爲書與** 前。 珂乃遣其妻以書告晉王曰:「賊勢如此,朝夕乞食於梁矣! 大人何忍而不救邪? 則 西北諸鎮非諸君所能守也!願與華州出兵潼關以爲應。」茂貞不報。 河計

攜 訓 乃解 家夜濟, 且爲款狀以緩梁兵,徐圖向背。」珂以爲然。 珂 衣 夜登城諭 自索而入曰:「公苟懷疑,請先斷臂 人必爭舟, 守陴者,守陴者皆不應。牙將劉訓夜入河寢白事,河叱之曰:「兵欲反邪! **夫鴟張**,大事 卽 去。 !」阿日:「事急矣!計安出乎? 不若遲明以情諭軍中,願從者猶得其半。不 .」訓日:「公若

貌,

乃治舟于河,將歸于京師。

太祖 梁王 思 至 河 何 中 梁太祖 時 以珂晉壻也, 有家世之舊,兵當退舍,俟梁王 可忘, 先之城東,哭於重榮 自同州降唐, 郎君若以亡國之禮見, 太師其謂 疑其貳己,使珂 即依重榮, 之墓而 西入覲, 後入。 一來,吾將聽 以 母王氏, 珂欲 行至 我何? 華州 命。」存敬乃退舍,使馳詣 面 故事重榮爲舅。 縛 牽 使人 珂 羊以見太祖 迎於路, 殺之傳舍。 珂乃登城呼存敬曰:「吾於 大祖 握 于 ,嘘晞, 太祖 謂 日:「太師阿舅之 於洛陽。 乃徙珂於汴。

瓚, 雜 重盈 傳 第 之諸 Ξ + 子 也,梁太祖已執珂,自領河中節度使, 王 珂 趙 浬 以瓚爲吏。 瓚事梁, 爲諸衞大將

百餘戰,瓚卒無功,末帝遣戴思遠代,瓚 時,晉已城 軍 泰寧、 鎭國 德勝, 費自黎陽渡河攻 軍節 度使。 末帝時, 澶州,不克,退屯楊村,扼河上流, 爲開封尹。 貞明五年, 代賀褒爲 與晉 北 面行營招討使。 人相持經 年, 大

復爲開封

尹

邪!」因以爲開封尹 贈太子太師。 **費開門迎降**, 「使吾保此者, 莊宗自鄭入京師,末帝聞唐兵且至,日夜涕泣,不知所爲,自持 伏地 **繋卿之畫如何耳** 講死, , 遷宣武軍節度使。 莊宗勞而起之曰:「殷與 !」唐兵已過宛朐, 已而故梁臣趙嚴、張漢傑等相次誅死, 卿家世婚姻 瓚驅率市人登城拒守。 然人臣各爲主 國寶,指其宮室謂 唐兵攻封丘 耳, 博 以 憂 卒 復何罪 瓚 門,

#### 趙犨

果,重氣義,刺史聞其材,召置麾下。 諸大兒皆聽其節度,其父<br />
叔文見之,驚日:「大吾門者,此兒也!」<br />
」及壯, 趙犨,其先青州人也。 世爲陳州牙將。 累遷忠武軍馬步軍都虞侯 犨幼與羣兒戲道中,部分行伍,指顧 善用弓劍,爲人勇 如 將帥 雖

王仙芝寇河南,陷汝州,將犯東都,犨引兵擊敗之,仙芝乃南去。 已而黃巢起,所在州

昶、珝爲將。 適當其衝矣! 往往陷城。 已而 ||巢陷長安,犫語諸將吏曰:||以吾計,巢若不爲長安市人所誅,必驅其衆東走,吾州 巢敗,果東走,先遣孟楷據項城,昶擊破之,執楷以歸。巢從後至,聞楷被執 」乃治城池爲守備,遷民六十里內者皆入城中,選其子弟,配以兵甲,以其弟 陳州豪傑數百人,相與詣忠武軍,求得犨爲刺史以自保,忠武軍表犨陳州刺

時。 會陳,擊敗巢將黃鄴于西華。 **犫語其下日:「吾家三世陳將,必能保此。** 二十萬。 馬皆洞, 陳人皆踴躍。 旣 而 陳人舊有巨弩數百,皆廢壞,後生弩工皆不識其器。 秦宗權以蔡州附巢,巢勢甚盛,乃悉衆圍犨,置春磨,糜人之肉以爲食。 以故巢不敢近。 巢栅城北三里爲八仙營,起宮闕,置百官,聚糧餉,欲以久弊之,其兵號 圍凡三百日,犨食將盡, 西華 有積栗,巢恃以爲餉,及鄴敗,巢乃解圍去。 爾曹男子,當於死中求生,建功立業,未必不因此 乃乞兵於梁。 珝創意理之, 弩矢激五百步 梁太祖與李克用皆自將 陳人恐,

權皆敗死,唐昭宗卽以陳州爲忠武軍,拜犨節度使。 已去,秦宗權復亂淮西 以梁援己恩,爲太祖立生祠, ,陷旁二十餘州,而陳去蔡最近,犨兄弟力拒之,卒不能下。 朝夕拜謁。 以其子嚴尚太祖女, 犨已病,乃以位與其弟,服,後數月卒。 是謂長樂公主。 後巢、宗 黄巢

梁太祖入陳州,

犨兄弟迎謁馬首甚恭。

然犨陰識太祖必成大事

,

乃降心屈迹,

爲自託

雜

四六二

昶 乘 大寇新 滅, 乃休兵課農, 事梁尤謹。 梁兵攻戰四方, **昶饋輓供**億, 未嘗 少解 昶

卒, 那代立。

于家,陳人爲之罷市。

祖 已降韓建,取同、華,徙琊爲同州留後。 **羽頗知** 書,乃求鄧艾故迹, 決翟王陂溉民田 入唐,爲右金吾衞上將軍。 兄弟居陳二十餘年, 歲餘,以疾免官歸,卒 陳人大賴之。

虐殺戮爲事,而末帝爲人特和柔恭謹,然性庸愚,以漢傑婦家,而嚴壻也,故親信之,大臣 **犨**次子巖,梁末帝時爲戶部尙書、租庸使,與張漢傑、漢倫等居中用事。 梁自太祖以暴

老將皆切齒,末帝獨不悟,以至於亡。

之。嚴爲末帝謀,遺人召楊師厚兵起事。嚴還西都,卒與袁象先以禁兵誅友珪,取傳國寶以 初, 友珪殺太祖自立, 以末帝爲東都留守。 嚴如東都,末帝與之飲酒,從容以誠款告

授末帝。

乃占天下良田大宅,裒刻商旅,其門如市,租庸之物,半入其私,嚴飲食必費萬錢 |末帝立, |嚴自以有功於梁, 又尙公主, 聞唐駙馬|杜悰位至將相, 自奉甚豐, 恥其不及。

二千,末帝患之。 故時,魏州牙兵驕,數爲亂,羅紹威盡誅之。太祖崩,楊師厚逐羅氏,據魏州,復置牙兵 師厚死,嚴與租庸判官邵贊議曰:「魏爲唐患,百有餘年, 自先帝時,

也。 |木帝以爲然,乃分相、澶、衞爲昭德軍。 牙兵亂,以魏博降晉,梁由是盡失河北。 齒紹威,以其前恭而後倨。 陛下不以此時制之,寧知後人不爲師厚也?不若分相、魏爲兩鎮,則無北顧之憂矣。」 今先帝新棄天下,師厚復爲陛下憂,所以然者,以魏地大而兵多

池水矣!」或曰:「下鄆、濮矣!」京師大風拔木,末帝大懼,從官相顧而泣,末帝乃還東都, 受實弊也。」末帝不聽,乃備法駕幸西京,而莊宗取楊劉,或傳:「晉兵入東都矣!」或曰:「扼 遂不果郊。 下力行之。」敬翔以爲不可,曰:「今府庫虛竭,箕斂供軍,若行郊禋,則必賞賚;是取虛名而 即位猶未郊天,議者以爲朝廷無異藩鎭,如此何以威重天下?今河北雖失,天下幸安,願陛 是時,梁將劉鄩等與莊宗相距澶、魏之間,兵數敗。嚴曰:「古之王者必郊祀天地,陛下

矣。」敬翔以爲然,嚴與漢傑皆以爲不可,乃止。其後黜王彥章用段凝,皆嚴力也。 鎭州張文禮殺王鎔,使人告梁曰:「臣已北召契丹,願梁以兵萬人出德、棣州,則晉兵憊

殿曰:「勢已如此,一下此樓,何人可保!」末帝卒死於樓上。 久,雖使入汴,不能守也。 宜幸洛陽,保嶮以召天下兵,徐圖之,勝負未可知也。」末帝猶豫, 莊宗兵將至汴,末帝惶惑不知所爲,登建國樓以問羣臣,或曰:「晉以孤軍遠來,勢難持

常殿用事 = + 許州温韜尤曲事嚴, 嚴因顧其左右曰:「吾常待韜厚,今以急投之, 必不 趙 犂 馮 行 W

幸吾爲利。」乃走投韜,韜斬其首以獻。 莊宗已滅梁, 嚴素所善段凝奏請誅嚴家屬, 乃族滅

也? 自以 福? **摩之求福於梁,蓋|老氏之所謂福也,非君子之所求也,可不戒哉** (先見之明, 深結)梁太祖, 及其子孫皆享其祿利, 惟君子之罹非禍者,未必不爲福;小人求非福者,未嘗不及禍, 嗚呼, 後世之談禍福者, 禍福之理,豈可一哉!君子小人之禍福異也。 皆以其言爲至論也。 **夫爲善而受福**, 自謂 老子日:「禍兮福所倚, 知所託矣, 焉得禍?爲惡而受禍, 此自然之理 安知其族卒與梁俱滅 也。 福兮禍所 始 焉得

# 馮行襲

襲爲州 定。」喜以爲然,乃留其兵江北,獨與行襲渡江。 民懼虜掠, 馮 校, 行襲字 乃陰選 恐其驚擾,請留兵江 正臣,均州 勇士伏 人也。 江 南, 獨 唐末,山南盜孫喜以衆千人襲均州刺史呂燁, 北,獨 乘 小舟遊喜, 與腹心數 軍吏前謁 告曰:「州人聞 人從行, 願爲 行襲擊喜仆地,斬之,伏兵發, 公至, 前導, 皆欲歸 以慰 安 矣 州 燁 ! 民, 不能禦。行 然知公兵 事 可立

殺 從行者。 餘兵在江北,聞喜死,皆潰。 山南節度使劉巨容表行襲均州刺 史。

是時,僖宗在蜀,諸鎭貢獻行在者皆道山南,盜賊多據州西長山以邀劫之,行襲盡破諸

贼。 洋州葛佐辟行襲行軍司馬,使以兵鎭谷口,通秦、蜀道,行襲由此知名。

行襲 淮,以拒太祖,行襲已附梁,乃盡殺文晏等。 太祖攻趙匡凝于襄陽,行襲遣子勗以舟兵會 節度使。 李茂貞兼領山南,遣子繼臻守金州,行襲逐之,遂據金州。 昭宗在岐, 梁太祖引兵而西,中尉韓全誨遣中官劉文晏等二十餘人召兵江 昭宗乃以金州爲戎昭軍,拜

均、房,以功遷匡國軍節度使。

知梁必興,尤盡心傾附事梁,官至司空,封長樂郡王,卒贈太傅,諡曰忠敬。 行襲爲人嚴酷少恩,而所至輒天幸,境早有蝗,則飛鳥食之,歲凶, 田中鹵穀自生。 |唐

# 新五代史卷四十三

# 雜傳第三十一

# 氏叔琮

之,使將後院馬軍,從攻徐、克,表宿州刺史。使攻襄陽,戰數敗, 氏叔宗,開封尉氏人也。 爲梁騎兵伍長,梁兵擊黃巢陳、許間,叔踪戰數有功, 降爲陽翟鎭遏使。久之, 太祖壯

遷曹州刺史。

等攻之。叔琮自太行入,取澤、潞,出石會,營于洞渦,久之糧盡,乃旋。 太祖下河中,取晉、絳,晉王遣使致書太祖求成,太祖以晉書詞嫚,乃遣叔琮與賀德倫 表晉州刺 史。

寧兵萬人會叔琮禦晉, 兵,雜行道中,何其怠,撳晉二人而歸。 晉人復取絳州, 攻臨汾, 友寧欲休兵以待, 叔踪選壯士二人深目而胡鬚者,牧馬襄陵道旁,晉人以爲晉 晉人大驚, 以爲有伏兵, 乃退屯于潚縣。 叔琮曰:「敵聞救至必走, 走則何功邪? 太祖遣友 」乃夜撃

雜

傳第三十

氏叔琮

李彦威

令曰:「病不能行者焚之。」病者懼,皆言無恙,乃以精卒爲殿而還石會,留數騎,以大將旗幟 之, 管人大敗, 逐之至于太原。太祖大喜曰:「破太原非氏老不可。」已而兵大疫, 叔琮班師,

立于高岡、晉兵疑其有伏、乃不敢追。久之、徙保大軍節度使。

昭宗遷洛,拜右龍武統軍。太祖遣叔琮與李彦威等弑昭宗,已而殺之。

## 李彦威

李彦威,壽州人也。少事梁太祖,爲人穎悟,善揣人意,太祖憐之,養以爲子,冒姓朱

氏,名友恭。歷汝、潁二州刺史。昭宗下洛,拜右龍武統軍。

欲賣 安得猶在乎?公白天子殺之。」胤奏之,昭宗不許,佗日以問太祖,太祖曰:「臣安敢及之,胤 始 封爲德王。 臣爾。」昭宗遷洛,謂蔣玄暉曰:「德王, 股愛子也, |玄暉具以白太祖,太祖益惡之。 初,劉季述廢昭宗,立皇太子裕爲天子。 昭宗自岐還,太祖見裕眉目疏秀,惡之,謂宰相崔胤曰:「德王嘗爲季述所立, 昭宗反正,以爲太子幼,爲賊所立,赦之,復其 全忠何爲欲殺之?」因泣下,囓指流

是時,昭宗改元天祐,遷于東都,爲梁所迫,而晉人、蜀人以爲天祐之號非唐所建,不復

血

邪!」太祖至洛,流彥威、叔琮嶺南,使張廷範殺之。彥威臨刑大呼曰:「賣我以滅口,其如 神理何?」顧廷範曰:「勉之,公行自及。」遂見殺。 已而還其姓名。 之,昭宗崩。計至河中,太祖陽爲驚駭,投地號哭,駡曰:「奴輩負我,俾我被惡名於後世 中,夜二鼓,以兵百人叩宮門奏事,夫人裴正一開門問曰:「奏事安得以兵入?」龍武牙官史 中,陰遺敬翔至洛〔〕,告彥威與氏叔琮等,使行弑逆。八月壬辰,彥威、叔琮以龍武兵宿禁 稱之,但稱天復。 太殺之,趨椒蘭殿,問昭宗所在,昭宗方醉,起走,太持劍逐之,昭宗單衣旋柱而走,太劍及 王建亦傳檄天下, 舉兵誅梁。 太祖大懼,恐昭宗奔佗鎮,以兵七萬如河

壓于龍興寺北,請合爲一冢而改葬之。 韶以故濮王爲首,葬以一品禮云。 莊宗時,得故唐內人景姹,言當彥威等殺昭宗時,諸王宗屬數百人皆遇害,而同爲一

#### 李振

不果行,乃西歸。過樂,以策干太祖,太祖留之。太祖兼領鄆州,表振節度副使。 李振字興緒,其祖抱眞,唐潞州節度使。振爲唐金吾衞將軍,拜合州刺史。盜起浙東,

振奏事長安,舍梁邸。 宦官劉季述謀廢昭宗, 遣其姪希正因梁邸吏程嚴見振曰:「今主

傳

**詣京師見崔胤**, 振還, 為霸者資 |邢、洛間,||季述詐爲太上皇誥告太祖,太祖獨豫,未知所爲, 上 「百歲奴事三歲主,而敢爾邪 一嚴急,誅殺 季述卒與嚴等廢昭宗,幽之東宮,號太上皇,立皇太子裕爲天子。 也。 不辜,中尉懼及禍,將行廢立, 今閹宦作亂,天子危辱,此王仗義立功之時。」太祖大悟,乃囚 謀出昭宗。 昭宗返正,太祖大喜,執振 ! 今梁王百萬之師,方仗大義尊天子,君等無爲此不祥也! 請與諸邸吏協力以定中外, 手曰:「卿謀得之矣!」 振曰:「大豎刁、伊戾之亂,所以 是時, 如何? [季述使者,遣振 振 太祖用兵在 駭然日:

豈 繡 以 與曹公爲 故怨害忠臣乎? 王 師 範 敵 以靑州降梁, 然不歸袁紹 一師範 遺振往代 洗然自釋,乃 而歸曹公者,知其志大, 師範, 西歸梁。 師範 疑懼,不知所爲, 不以私讎殺人也。 振曰:「獨不聞漢張繍 今梁王方欲成大事, 乎?

京 師 昭宗 朝廷必有貶降。 遷洛 振往 來 時 人 京 師 目 朝臣皆仄目,振 振爲鴟梟 視之若無人。 有所小怒,必加譴謫。 故振

至

等宜 如 太祖之弑 何? 振 日:「昔晉司馬 昭宗也, 遺振 至京師與朱友恭、氏叔踪謀之。 氏殺魏君 而誅成濟, 不然, 何以塞天下口? 昭宗崩, 太祖問振所以待 」 太祖 乃歸罪友恭 友恭

振嘗舉進士咸通、乾符中,連不中,尤憤唐公卿,及裴樞等七人賜死白馬驛, 振謂太祖

等而

殺之。

曰:「此輩嘗自言淸流,可投之河,使爲濁流也。」太祖笑而從之。

郭崇韜、崇韜曰:「人言李振一代奇才,吾今見之 乃常人爾!」已而伏誅。 太祖卽位,累遷戶部尚書。 友珪時,以振代敬翔爲崇政院使。 莊宗滅梁入汴, 振謁見

#### 裴迪

爲出使巡官。都統王鐸鎭滑州,奏迪汴、宋、鄲等州供軍院使。鐸爲租庸使,辟租庸招納 裴迪字昇之,河東聞喜人也。 爲人明敏,善治財賦,精於簿書。唐司空襲曠判度支,辟

自處,而以貨財獄訟一切任迪。 梁太祖鎭宣武,辟節度判官。 太祖用兵四方,常留迪以調兵賦。 太祖乃牓門,以兵事

使。

事卒不成。 立 |色動,乃屛人密詰之,具得其事。 太祖 西攻岐,王師範謀襲汴,遣健卒苗公立持書至汴,陰伺虚實。 太祖自岐還,將吏皆賜「迎鑾叶贊功臣」,將吏入見,太祖目迪曰:「叶贊之功,惟 迪不暇啓,遣朱友寧以兵巡兗、鄆,以故師範雖竊發而 迪召公立問東事、公

迪入唐,累遷太常卿。 太祖即位,召拜右僕射,居一 歲告老,以司空致仕,卒于家。

#### 韋震

列,卒俘宗權。 黃巢,獻馘而已,宗權不足俘,左拾遺徐彥樞亦疏請所在斬決。 太祖遣慶奏事京師,往復論 人也。」叢後果爲郭璠所殺。 遭騎兵三百迎慶,欲殺之,慶以計得免。還白太祖曰:「叢不足慮,爲其謀者牙將襲涉,妄庸 叢 · 執秦宗權,欲送于太祖,又欲自獻於京師,又欲挾宗權奪其兵。 太祖遣慶入蔡州視之, 叢 章震字東卿 太祖德之,表爲節度副使。 雍州萬年人也。 **璠以宗權歸于太祖,太祖欲大其事,請獻俘于唐,唐以時溥破** 初名肇。爲人彊敏,有口辯。 事梁太祖爲都統判官。

兼領 吳,大敗于淸口。 鄭州 鄭州。 昭宗幸石門,太祖遣震由虢略間道奉表行在,昭宗賜其名震。太祖已破兗、鄆,遂攻 留後。 昭宗初不許,慶彊辯,敢大言,語數不遜,昭宗卒許梁以鄆州,太祖遂兼四鎮,表 太祖懼諸鎮乘間圖己,乃諷杜洪、鍾傳、王師範、錢鏐等薦己爲元帥,且求

昭宗遷洛,震入爲河南尹、六軍諸衞副使,以病瘖,守太子太保致仕。 太祖受禪、改太

#### 孔循

爲子,乳母之夫姓趙,循又冒姓爲趙氏,名殷衡。 宣武,以李讓爲養子,循乃冒姓朱氏。 孔循,不知其家世何人也。少孤,流落於汴州,富人李讓闌得之,養以爲子。 稍長,給事太祖帳中,太祖諸兒乳母有愛之者 昭宗東遷洛陽, ,太祖盡去天子左右,悉以 梁太祖鎮 養循

|梁人代之,以||王殿爲宣徽使,循爲副使。

郊, 密 作天子可乎? 之興,必有封國,而唐所以不卽遜位者,當先建國備九錫,然後禪也。」太祖曰:「我不由九錫 封太祖魏王,備九錫,太祖拒而不受。玄暉與宰相柳璨相次馳至梁自解,璨曰:「自古王者 副使。 ,循因與王殷讒于太祖曰:「玄暉私侍何太后,與廷範等奉天子郊天,冀延唐祚。」太祖大 是時,梁兵攻壽春,大敗而歸,哀帝遣裴迪勞軍,太祖見迪,怒甚,迪還,哀帝不敢郊。 循與蔣玄暉、張廷範等共與弑昭宗之謀, 」燦懼,馳去。 太祖遣循與王殷弑何皇后, 其後循與玄暉有隙,哀帝卽位,將有事于南 因殺璨及玄暉、廷範等, 以循為樞

明宗 自魏兵反而南,莊宗東出汜水,循持兩端,遣迎明宗於北門,迎莊宗於西門,供帳牲餼 唐亡, 事梁爲汝州防禦使、左衞 大將軍、租庸使,始改姓孔, 名循。 莊宗· 時, 權 知汴州。

其禮如一,而戒其人曰:「先至者入之。」明宗先至,遂納之。

明宗卽位,以爲樞密使。明宗幸汴州,循留守東都,民有犯麴者, 循族殺其家, 明宗知

其冤,因詔天下除麴禁,許民得造麴。

**横海,卒于鎭,年四十八,贈太尉。** 宗,求女妻皇子,明宗卽以宋王從厚娶循女。 女,重誨以問循,循曰:「公爲機密之臣,不宜與皇子婚。」重誨信之,乃止。 循爲人柔佞而險猾,安重誨尤親信之,凡循所言,無不聽用。 重酶始惡其爲人,出循爲忠武軍節度使,徙鎮 明宗嘗欲以皇子娶重酶 而循陰使人白 明

# 孫徳昭

義兵千人,南攻[巢于咸陽,興平州將壯共所爲,益以州兵二千。 與破賊功,拜右金吾衞大將 孫 、徳昭, 鹽州 五原人也。其父惟最(三),有材略。 黃巢陷長安,惟最率其鄉里子弟,得

음년 REI 闕 請惟最 朱 致亂京師,僖宗幸興元, 之鎭 ,京師民數萬與神策軍復遮留不得行,改鬥南節度使,在京制置,分判神策 惟最率兵擊城。 累遷鄜州節度使, 留京師宿衞。 鄜州 將吏

軍

- ,號「扈駕都」。是時,京師亂,民皆賴以爲保。

年正 樓反正,以功拜靜海軍節度使,賜姓李,號「扶傾濟難 首 聞 中書門下平章事 陰使人求義士可共成事者,德昭乃與孫承誨〔言、董從實應胤,胤裂衣襟爲書以盟。 外諠 月朔,未旦,季述將朝,德昭伏甲士道旁,邀其興斬之日,承誨等分索餘黨皆盡。 」德昭擲其首入。已而承誨等悉取餘黨首以獻,昭宗信之。 德昭以父任爲神策軍指揮使。 一譁,大恐。 ,圖形凌煙閣,俱留京師,號「三使相」,恩寵無比。 德昭馳至,扣門曰:「季述誅矣,皇帝當反正! 光化三年,劉季述廢昭宗,幽之東宮,宰相崔胤謀反正 忠烈功臣」, 」何皇后呼曰:「汝可 德昭破鎖出昭宗, 與承誨等皆拜節度使、 御丹鳳 天復元 進 昭宗 逝

街,趣梁兵以西,梁太祖頗德其附己,以龍鳳劍、鬬鷄紗遺之。 十月,宦者韓全誨劫昭宗幸鳳翔, 是時,崔胤方欲誅唐宦官,外交梁以爲恃,而宦官亦倚李茂貞爲扞蔽,梁、岐交爭。 承誨、從實皆從, 而德昭獨與梁, 乃率兵衞胤及百官保東

遂爲 兩街制置使。 太祖 至華州 **德昭以軍禮迎謁道旁。太祖** 梁兵圍鳳翔,德昭以其兵八千屬太祖,太祖益德之,使先之洛陽,賜甲第 至京師,表同州 留後, 將行, 京師民復請留

雜

傳

區。

間, 以爲左衞大將軍。 昭宗 東遷, 拜左威衞上將軍,以疾死。 末帝立,拜左金吾大將軍以卒。 太祖卽位,以烏銀帶、袍、笏、 承誨、從實至鳳翔, 名馬賜之。 與宦者俱見殺。 疾少

# 王敬薨

王敬薨,潁州汝陰人也。 事州爲牙將。 唐末, 王仙芝等攻劫汝、潁間,刺史不能拒,敬

|驀遂代之,即拜刺史。|敬||義爲人狀貌魁傑,而沈勇有力,善用鐵槍,重三十斤。

由 是潁旁諸州民,皆保敬薨避賊。是時,所在殘破,獨潁州戶二萬。 潁州與淮西爲鄰境,數爲秦宗權所攻,力戰拒之,宗權悉陷河南諸州,獨敬薨不可下,

兵攻吳,龐師古死淸口,敗兵亡歸,過潁,大雪,士卒飢凍, 梁太祖攻淮南,道過潁州,敬薨供饋梁兵甚厚,太祖大喜,表敬薨沿淮指揮使。 其後梁 敬義乃沿淮積薪爲作糜粥餔之,

亡卒多賴以全活,太祖表敬薨武寧軍留後,遂拜節度使。

天祐三年,爲左衞上將軍。 太祖卽位,敬養以疾致仕,後卒于家。

蔣殷,幼爲王重盈養子,冒姓王氏。 梁太祖取河中,以王氏舊恩錄其子孫, 表殷牙將,

太祖尤愛之。

叩頭爲玄暉等言:「梁王禪位後,願全唐家子母。」殷乃誣玄暉嘗私侍太后,太祖斬玄暉及張 諸侯助祭者以謀興復,太祖大怒,哀帝爲改卜郊。是時,太祖將有篡弒之謀,何太后嘗泣涕 時,哀帝方卜郊,殷與樞密使蔣玄暉等有隙,因譖之太祖,言玄暉等教天子卜郊祈天,且待 廷範、柳璨等, 遺殷弑太后於積善宮。 哀帝下韶惭愧,自言以母后故無以奉天,乃卒不郊。 不受代。王瓚亦王氏子,懼爲殷所累, 唐遷洛陽,殷爲宣徽北院使。太祖已下襄陽,轉攻淮南,還屯正陽,哀帝遣殷勞軍。 庶人友珪與殷善,友珪弑太祖自立,拜殷武寧軍節度使。 乃言殷非圧氏子,本姓蔣。 末帝即位,以福王友璋代殷, 末帝詔削官爵,還其 是

姓,遺牛存節討之,殷舉族自燔死。

雅

傳

### 校勘記

- (1) 陰遺敬翔至洛 本卷李振傳云:「太祖之弑昭宗也,遣振至京師與朱友恭、氏叔琮謀之。」舊唐書
- 卷二〇上昭宗紀、新唐書卷二二三下蔣玄暉傳略同。 是至洛者乃李振,此作敬翔疑誤。
- $\Xi$ 惟最 南監、汪、殿、汲、蜀、劉校本同、貴池、南昌、鄂本作「惟最」。薛史卷一五孫德昭傳(百衲本)

作「惟政」。

- 3 孫承誨 二均作「周」。 「孫」,薛史卷一五孫德昭傳同,新唐書卷一〇及舊唐書卷二〇上昭宗紀、 通鑑卷二六
- 季述將朝德昭伏甲士道旁邀其奧斬之 姚傳云:「待旦,仲先乘肩輿造朝, 德昭等劫之, 斬東宮門外。」通鑑卷二六二亦云「王仲先入朝 薛史卷一五孫德昭傳略同。 惟按新唐書卷二〇八劉季

至安福門,孫德昭擒斬之」。 則德昭所斬乃王仲先,非劉季述。 未知孰是。

# 新五代史卷四十四

# 雜傳第三十二

# 劉知俊

劉知俊字希賢, 徐州沛人也。 少事時溥,溥與梁相攻,知俊與其麾下二千人降梁,

以爲左開道指揮使。

知俊麥貌雄傑,能被甲上馬,輪劍入敵, 勇出諸將。 當是時, 劉開道名重軍中。 歷海、

懷、鄭三州刺史,從破靑州,以功表匡國軍節度使。

康懷英等擊敗崇本,斬馘二萬,獲馬三千匹,執其偏裨百人。 是時,太祖方與諸將攻滄州,知俊不俟命,

颠

西路行營招 李思安爲夾城攻路州,久不下,太祖罷思安,拜知俊行營招討使,未至潞,夾城已破,徙 討使,敗邪、岐兵於慕谷。是時,延州高萬興叛楊崇本降梁, 太祖遣知俊會萬興,

雜傳第三十二 劉知俊

殺諸 攻下丹、延、鄜、 將,王重師 坊 無罪見殺,知俊益懼,不自安。 DŪ 州,加檢校太尉兼侍中,封大彭郡王。 太祖已下廊、坊、遺知俊復攻邠州、 知俊 功益高, 太祖性多猜忌, 知俊以 軍 屢

食不

給

未行

寒責。」知 語曰:「股 至矣,何相 來。 知俊 太 祖 俊 幸河中, 固 逐叛,臣於李茂貞,以兵攻 1負邪? 知卿 不報,以兵 以此,吾誅重師 」知俊報日:「王 使宣徽使王殷召知俊。 / 斷 潼 關 乃劉 重 師 雍 **,** 桿誤我, 不負 、華,執劉捍送于鳳翔。 陛 其弟知院爲親軍指揮使, 下而 致卿至此,吾豈不恨之邪? 族滅, 臣非背德, 太祖 使人謂 但畏死 間遣 知 人告知俊以 今捍已死 爾! 俊 」太祖 日「股待 未能 不宜 復 使 卿

茂貞 韓遜 告急 大喜,以知俊爲涇州 太 祖 遣 太祖遣 劉鄩、 牛存 康 懷英、寇彦卿 節 攻知俊, 節度使,使攻興元,取 等攻邠寧以牽之。 知俊遂奔于茂貞。 興、 鳳 茂貞 知俊 重 西縣 (地狹, 大敗懷英於昇平 無以處之, , 使之 殺梁將許從 西 攻 靈武。

而其生歲 度使 「吾老 已而 使返攻茂貞, %在丑。 茂貞左右忌知俊 吾且 死, 健之諸子,皆以「宗」、「承」爲名(1),乃於里巷構爲謠言曰:「黑牛出圈椶繩 知俊 取秦、鳳、階、成 非 爾輩 功,以事間之, 所 能 四 制, 州 不 茂貞奪其 如 建 雖 早圖 待 之! 知俊 軍 一而 甚 知俊 厚, 蜀 乃奔于蜀, 人亦共嫉 然亦陰忌其材, 之。 王建 知 以爲武信 俊爲 管調: 左 人 色黑, 右 軍節

#### 丁會

丁會字道隱, 壽州壽春人也。少工挽喪之歌,尤能悽愴其聲以自喜。 後去爲盜,與梁

太祖俱從黃巢。 梁太祖鎭宣武,以爲宣武都押衙。

在魏, 光啓四年,東都張全義襲破河陽,逐李罕之,罕之召晉兵圍河陽, ,乃遣會及葛從周等將萬人救之。會等行至河陰,謀曰:「罕之料吾不敢渡九鼎, 全義告急。 是時

吾兵少而來遠,且不虞吾之速至也。 出其不意,掩其不備者,兵家之勝策也。」乃渡九鼎,直

趨 河陽,戰于沇水,罕之大敗,河陽圍解。 軍

遭會別攻宿州,刺史張筠閉城距守, 大順元年,梁軍擊魏,會及葛從周破黎陽、臨河,遂敗羅弘信于內黃。 會堰汴水浸其東,城壞,筠降。 兗州朱瑾以兵萬餘 梁軍攻時溥於徐

擊單父,會及瑾戰于金鄉,大敗之。

光化二年,李罕之叛晉,以路州降梁。 會自河陽攻晉澤州, 下之。乃以會爲昭義軍留

後 會畏梁太祖雄猜,常稱疾者累年。

雑

傳 第 = +

T

賀

州 天復 一守光乞師于晉,晉人爲攻潞州 元年 太祖 復起會爲昭義軍節 度使。 會乃降晉 昭宗 遇弑, 晉王 以會歸于太原, 會與三軍 稿素發哀。 賜以甲第,位 梁軍 攻 燕滄 諸

脏宗立,以會爲都招討使。 天祐七年,以疾卒于太原。 唐興,追贈太師。 Ŀ

### 賀徳倫

賀 德 倫 泂 西 人也。 少爲滑州牙將。 梁太祖兼領宣義, 德倫從太祖征伐, 以功 累

盧軍節度使。

其衆日 定 戚 閱 爲節 魏 王彦章 去 兵籍, 度使; 貞 鄉 明元 里 朝 檢 以騎 生不 廷以 魏 年 校府 博、貝三 兵 魏 我 如死。」乃相 五百 庫 州楊師厚卒,末帝以魏兵素驕難制, 軍 府 1入魏州 德倫促牙兵 州 疆 仍爲 盛, 與夜攻金波亭, 設法 天姓 屯金波亭以虞變; 殘 Ŀ 軍 (破之。 道, 以德倫爲節度使。 牙 兵親戚 況 我 走出。 六 分魏牙兵之半入昭德。 和訣 州舊爲 乃分相、澶、 別 遲 明 藩 遣 哭聲 府, 劉鄩以兵六 魏兵攻牙城 盈 未嘗 衛三州建昭 塗 遠 劾 出 、萬渡 節 租 河門 殺 庸 軍 五 徳軍 河,聲言 將 使 百 張 遣 除人, 以以 彦 日 孔 攻鎭 離 謀 張 目 執 親 吏 於

**德倫致之樓上,縱兵大掠。** 

耳! 召鄭還。」戒彥勿爲朝廷生事。 曰:「傭保兒敢如是邪!」乃召羅紹威故吏司空頲曰:「爲我作奏,若復依違, 言彥狂蹶不足畏,宜促鄭兵擊之。末帝使人諭彥,以制置已定,不可復易。 朝廷負三軍,割隸無名,所以亂耳。 」末帝優韶答之,言:「王鎔死,鎭人請降,遣鄩以兵定鎭州,非有佗也,若魏不便之, 末帝遺供奉官扈異馳至魏諭彥, 但以六州還魏 許以刺史。 彥謂異日:「爲我報皇帝, 而韶劉鄩反兵, 皇帝可以高枕。」異還, 使者三反,彦怒 三軍不負朝廷, 則渡河虜之 卽

**曹廷隱奉書莊宗。** 地, 曰:「愚主聽人穿鼻, 難與共事矣! **彥乃以楊師厚鎭魏州嘗帶招討使,逼德倫論列之,末帝不許,論以詔書,彥裂詔書抵于** . 」乃迫德倫降晉,德倫惶恐曰:「惟將軍命。」乃遣牙將

殺之。 軍 節度使。 莊宗 入魏,德倫以彥逼己,遺人陰訴於莊宗, 行至太原,監軍張承業留之。 王檀攻太原,德倫麾下多奔檀,承業懼德倫爲變, 莊宗斬彥於臨淸而後入。 徙德倫爲大同

#### 四八四四

#### 閻寶

閻寶字瓊美, **鄭州人也。** 少爲朱瑾牙將,瑾走淮南,寶降於梁。 梁太祖時,爲諸軍都虞

候 常從諸將征伐,未嘗獨立戰功。 至末帝時,以寶爲保義軍節度使。

實遂 諸將上。 都指揮使張温將五 降晉。 貞明元年(三)賀德倫以魏博降晉, 晉王拜寶檢校太尉、 百騎救寶, 温至內黃,遇晉軍,乃降晉。 同中書門下平章事,領天平軍節度使、東南面 晉軍攻下洛、磁、相、衞, 晉遣温將所降梁軍 移兵圍邢州。 招討 至城下招寶 末帝遣捉生 使,位在

得,斷在不疑。 曰:「微公,幾敗 梁、晉戰胡柳,晉軍敗。 吾事。」乃整軍 今梁兵窘蹙, 其勢可破; 莊宗欲引兵退保臨濮, 復戰,遂敗梁兵。 勝而 驕怠, 寶日:「夫決勝料勢, 其情可知。 此不可失之時也。」莊宗 決戰料情, 情勢旣

疽卒 十八年,晉軍討張文禮於鎭州,以寶爲招討使。 追贈太師。 晉天福中, 追封太原王 明年三月,實戰敗,退保趙州。 慚憤發

# 康延孝

先鋒指揮使。延孝見梁末帝任用羣小,知其必亡,乃以百騎奔于唐。見莊宗于朝城,莊宗 解御衣、金帶以賜之。 拜延孝博州刺史、捧日軍使兼南面招討指揮使。 康延孝,代北人也。爲太原軍卒,有罪亡命于梁。末帝遣段凝軍于河上,以延孝爲左右

入汴,凡八日而滅梁。以功拜鄭州防禦使,賜姓名曰李紹琛。二年,遷保義軍節度使。 甚壯其言。 餘。 洛之兵掠邢洛以趨鎮定,王彥章以京師禁衞擊鄆州,段凝以河上之軍當陛下。」莊宗初聞 延孝言梁必亡,喜,及聞其大舉也,懼,曰:「其將何以禦之?」延孝曰:「梁兵雖衆,分則無 竊聞其議:期以仲冬大舉,遣董璋以陝虢、澤路之衆出石會以攻太原;霍彥威以關西、汝、 小人進任, 而忠臣勇士皆見疎斥, 此其必亡之勢也。」 莊宗又問梁計如何, 曰:「臣在梁時, 姦邪,以入金多爲大將,自其父時故將皆出其下。王彥章,驍將也,遣漢傑監其軍而制之。 臣請待其旣分,以鐵騎五千自軍趨冰,出其不意,擣其空虛,不旬日,天下定矣。」莊宗 莊宗屛人問延孝梁事,延孝具言:「末帝懦弱。趙巖婿也,張漢傑婦家,皆用事。 。後董璋等雖不出兵,而梁兵悉屬段凝于河上,京師無備,莊宗卒用延孝策,自鄲 段凝

王繼岌 餘人,遂 繕 遠 橋 軍 斷吉柏 梁,必留數日,使衍得閉關爲備,則勝負未可知也。」因與嚴乘馬浮江,軍士隨之濟者千 ·里,入人之國,利 鹿頭關 江 征 浮 蜀 橋, 以 ,下漢州,居三日, 延孝 延 孝 造舟以渡, 為先鋒排陣 在速戰。 乘衍破膽之時,但得百騎過鹿 進取綿州。 . 斬斫使,破鳳州,取固鎭,降興州 後軍始至。 衍 **衍弟宗弼果以蜀降。** 復斷綿江 . 浮橋。 延孝謂 頭關,彼將迎降不暇。 延孝屯漢州 與王衍戰三泉,衍 招撫使李嚴曰:「吾 以俟魏 若修

**俛首何門邪?」璋求哀以免。** 不可。 節度使,延孝愈怒曰:「吾冒白刃,犯險阻,以定兩川,璋有何功而得旄節!」因見崇韜言其 有軍 **俛首郭公之門,吾爲都將,獨不能以軍法斬公邪?」璋訴于崇韜,崇韜解璋軍職,表爲東川** 事,獨召璋與計議,而不問延孝,延孝大怒,責璋曰:「吾有平蜀之功,公等僕遬相從,反 蜀 崇韜曰:「紹琛反邪? 敢違吾節度!」延孝懼而退。 平, 延孝功爲多。 左廂馬步軍都指揮使董璋位在延孝下,然特見重於郭崇韜。 明年崇韜死,延孝謂璋曰:「公復

又不謁,延孝大怒,謂其下曰:「南平梁,西取蜀, 繼岌班師,命延孝以萬二千人爲殿,行至武連,聞朱友謙無罪見殺。 莊宗遣使者詔繼岌卽誅之。 繼岌不遣延孝,而遣董璋,延孝已自疑, 其謀盡出於郭公; 而汗馬之勞, 攻城破敵 友謙有子令德在 及璋過延孝軍

人,數日之間,衆至五萬。 死,我等死必矣!」延孝遂擁其衆自劍州返入蜀,自稱西川節度、三川制置等使。 孝部下皆友謙舊將,知友謙被族,皆號哭訴于軍門曰:「朱公無罪,二百口被誅,舊將往往從 者我也。 今郭公已死,我豈得存。而友謙與我俱背梁以歸唐者,友謙之禍次及我矣!」延 繼岌遣任圜以七千騎追之,及于漢州,會孟知祥夾攻之,延孝戰 馳檄蜀

東還,延孝檻車至鳳翔,莊宗遣宦者殺之。 兵不血刃而取兩川,一旦無罪,闔門受戮。 擁節旄。 | 圜置酒軍中,引檻車至坐上,知祥酌大巵從車中飮之而謂曰:「公自梁朝脫身歸命, 今平蜀之功,何患富貴,而入此檻車邪?」延孝曰:「郭崇韜佐命之臣,功在第一, 顧如延孝,何保首領,以此不敢歸朝耳!」任圜 遂

敗,被擒,載以艦車。

#### 校勘記

(二) 建之諸子皆以宗承爲名 字,椶繩者,吾子孫之名也。蓋前輩連宗字,後輩連承字爲名,椶繩與宗承音同。吾老矣,得不 條載:劉知俊流入蜀,蜀人謠曰:「黑牛無繫絆,椶繩一時斷。」王建聞之懼,曰:「黑牛者,劉之小 「諸子」,薛史卷一三劉知俊傳作「子孫」。考太平廣記卷一六三竹貍

爲子孫之患乎!

雜鄉

第三十二

校勘

E.

· 」又十國春秋卷三九王承檢傳云:「王承檢事高祖,賜姓名與諸孫齒。」是王建諸

子皆以「宗」爲名、諸孫皆以「承」爲名。此「諸子」當從蔣史作「子孫」。

(11) 貞明元年 「元」,各本原作「三」。按魏博降晉,本卷賀德倫傳、薛史卷八梁末帝紀、卷二一賀德

倫傳及通鑑卷二六九均繫於貞明元年,據改。

# 新五代史卷四十五

# 雜傳第三十三

#### 張全義

賊中。 張全義字國維,濮州臨濮人也。少以田家子役于縣,縣令數困辱之,全義因亡入黃泉 巢陷長安,以全義爲吏部尙書、水運使。巢賊敗,去事諸葛爽于河陽。 爽死,事其子

仲方。

貪暴,日以寇鈔爲事。 仲方爲孫儒所逐, 全義勤儉,御軍有法,督民耕殖。 全義與李罕之分據河陽、洛陽以附于梁,二人相得甚歡。 以故,罕之常乏食,而全義常有餘。 然罕之性

罕之仰給全義,全義不能給,二人因有隙。

于梁、梁遣牛存節、丁會等以兵萬人自九鼎渡河、擊敗罕之於沇水、晉軍解去。 罕之出兵攻晉、絳,全義襲取河陽,罕之奔晉,晉遣兵助罕之,圍全義甚急。 梁以丁會守 全義乞兵

雜

傳第三十

==

張介義

河陽, 全義還爲河南尹。全義德梁出己,由是盡心焉。

民畎畝之間,築南、北二城以居之。數年, 是時, 河南遭巢、儒兵火之後,城邑殘破,戶不滿百, 人物完盛, 民甚賴之。 全義披荆棘,勸耕殖,躬載酒食,勞 及梁太祖劫唐昭宗東遷,

忌, 晚年尤甚,全義奉事益謹,卒以自免。 全義初名言,唐昭宗賜名全義。 唐亡, 全義事梁, 又請改名,太祖賜名宗奭。 太祖猜

|理宮闕、府廨、倉庫,皆全義之力也。

夕,而 太祖 還洛, 自梁與晉戰河北,兵數敗亡,全義輒蒐卒伍鎧馬,月獻之以補其缺。 [梁兵出之,得至今日,此恩 全義 幸全義會節園避暑,留旬日, 止之日:「吾爲李罕之兵圍河陽,啖木屑以爲食,惟有一馬, 不可忘也。」繼祚乃止 全義妻女皆迫淫之。其子繼祚憤 欲殺以餉軍, 死在朝 太祖兵敗蓨縣,道 恥不自勝 ? 欲剚刃

能爲,而陛下疑之, 曰:「宗奭,種田叟爾 嘗有言全義於太祖者,太祖召全義,其意不測。 何也? ! 守河南三十年,開荒斸土,捃拾財賦,助 」太祖笑曰:「我無惡心,嫗勿多言。 全義妻儲氏明敏有口辯,遽入 陛下 創業,今年齒衰朽, 見,厲聲 已無

事、天下兵馬副元帥,封魏王 全義 事 梁,累拜中書令,食邑至萬三千戶,兼領忠武陝虢鄭滑河陽節度使、判六軍諸衛

发、皇弟<u>存</u>紀等皆兄事之。 全義因去梁所賜名,請復其故名。 家弟姪,幸復相見。」全義俯伏感涕。年老不能進趨,遣人掖扶而登,宴犒盡歡,命皇子繼 **| 義常陰遺人通問於太原。及梁亡,莊宗入汴,全義自洛來朝,泥首待罪,莊宗勞之曰:「卿** 初,全義爲李罕之所敗,其弟全武及其家屬爲晉兵所得,晉王給以田宅,待之甚厚,全 而全義猶不自安,乃厚賂劉

義爲父,改封齊王。 儀物已具。 莊宗大悅,加拜全義太師、尙書令。 不具,因改用來年二月,然不以前語責全義。以皇后故,待之愈厚,數幸其第,命皇后拜全 初,梁末帝幸洛陽,將祀天於南郊而不果,其儀仗法物猶在, 全義因請幸洛陽, 。明年十一月口,莊宗幸洛陽, 南郊而禮物 白南郊

皇后以自託。

怨,剖棺之戮,非王者以大度示天下也。莊宗以爲然,鏟去墓闕而已。 初,莊宗滅梁,欲掘梁太祖墓,斲棺戮尸。全義以謂梁雖仇敵,今已屠滅其家,足以報

巢剛後,洛陽園宅無復能守,豈獨平泉一石哉!」全義嘗在巢賊中,以爲譏己,因大怒,奏答 殺監軍者,天下冤之。其聽訟,以先訴者爲直,民頗以爲苦。 全義監軍嘗得李德裕平泉醒酒石,德裕孫延古,因託全義復求之。監軍忿然曰:「自黃

同光四年,趙在禮反於魏,元行欽討賊無功,莊宗欲自將討之,大臣皆諫以爲不可,因

傳

邻三

十 三

張

全義

朱友謙

遣也。 言明宗可將。 羣臣固請,不從;最後全義力以爲言,莊宗乃從。 是時,郭崇韜、朱友謙皆已見殺,明宗自鎭州來朝,處之私第,莊宗疑之,不欲 已而明宗至魏果反,全義以憂卒,

|珙嘗事全義有恩,乞全活之,不許,止誅||繼祚及其妻子而已。 子繼祚,官至上將軍。 晉高祖時,與張從賓反於河陽,當族誅。 而宰相桑維翰以其父 年七十五,諡日忠肅

### 朱友謙

朱友謙字德光,許州人也。 初名簡,以卒隸澠池鎮,有罪亡去,爲盜石濠、三鄉之間,商

旅行路皆苦之。久之,去爲陝州軍校。

陝州節度使王珙,爲人嚴酷,與其弟河爭河中,戰敗,其牙將李璠與友謙謀, 共殺珙,附

于梁,太祖表璠代珙。 **璠立,友謙復以兵攻之,璠得逃去,梁太祖又表友謙代璠** 

帥之力也!且幸同姓,願更名以齒諸子。」太祖益憐之,乃更其名友謙,錄以爲子。 梁兵西攻李茂貞,太祖往來過陝,友識奉事尤謹,因請曰:「僕本無功, 而富貴至此 太祖即 元

位,徙鎭河中,累遷中書令,封冀王。

太祖遇弑,友珪立,加友謙侍中, **友謙雖受命,而心常不平。** 已而友珪使召友謙入覲,

週懷英于解縣,大敗之,追至白逕嶺,夜秉炬擊之,懷英又敗,梁兵乃解去。<br />
友謙醉寢晉王 不行,乃附于晉。 友珪遣招討使韓勍將康懷英等兵五萬擊友謙。晉王出澤、潞以救之,

帳中,晉王視之,顧左右曰:「冀王雖甚貴,然恨其臂短耳!」

遭劉鄩等討之,鄰爲李存審所敗。 程全暉,因求兼鎭。末帝初不許,已而許之,制命未至, 末帝卽位,友謙復臣于梁而不絕晉也。貞明六年,友謙遣其子令德襲同州,逐節度使 晉封友謙西平王, 加守太尉, **友謙復叛,始絕梁而附晉矣。** 以其子令德爲同州節度

**券恕死罪。以其子令德爲遂州節度使,** 莊宗滅梁入洛,友謙來朝,賜姓名曰李繼麟,賜予鉅萬。 令錫忠武軍節度使,諸子及其將校爲刺史者十餘 明年,加守太師、尚書令,賜鐵

人,恩寵之盛,時無與比。

使。

談見崇韜死,謀與存义爲郭氏報冤。」莊宗初疑其事,羣伶、宦官日夜以爲言。 以爲討己,閱兵自備。」又言:「與崇韜謀反。」且曰:「崇韜所以反于圖者,以友謙爲內應。 友 蜀,友謙閱其精兵,命其子令德將以從軍。及郭崇韜見殺,伶人景進言:「唐兵初出時,友謙 是時,宦官、伶人用事,多求賂于友謙,友謙不能給而辭焉,宦官、伶人皆怒。 友識聞之大 唐兵伐

傳第 三十三

朱

脹氏入室取其纖券示<u>魯</u>奇曰:「此皇帝所賜也,不知爲何語 **度使,遣朱守殷夜以兵圍其館,驅友謙出徽安門外,殺之,復其姓名。** 爲我言者!」乃單車入朝。 二百餘口見魯奇曰:「朱氏宗族當死,願無濫及平人。」乃別其婢僕百人,以其族百口就刑 恐,將入朝 ,王思同殺令錫於許州,夏魯奇族其家屬于河中。 以自 明,將吏皆勸其毋行。 景進使人詐爲變書,告友謙反。 友謙曰:「郭公有大功於國,而 魯奇至其家, 」魯奇亦爲之慚 莊宗惑之,乃徙 以讒死, 友謙妻張氏 詔魏王繼岌殺令德 友謙: 我不 '率其宗族 義 自 成 明, 軍 節 於

友謙死,其將史武等七人皆坐友謙族誅,天下冤之。

#### 袁象先

是爲萬安大長公主。象先以梁甥爲宣武軍內外馬步軍都指揮使, **| 袁象先,宋州下邑人,唐南陽王恕己之後也。 父敬初,梁太府卿、駙馬都尉,尙太祖妹,** 歷宿、洛、陳三州刺

太祖卽位,累遷左龍武統軍、在京馬步軍都指揮使。

楊令公一言諭禁軍,則事可成。」末帝卽遣人之魏州,以謀告楊師厚, 太祖遇弑,友珪立。末帝留守康都,以大事謀於趙巖,巖曰:「此事如反掌耳, **师厚遣裨將王舜賢至** 但得招討

洛陽與象先謀,象先許諾。 是時, **龍驤軍將劉重遇戍于懷州,以其軍作亂,友珪遣霍彥威** 

杰 擊敗于鄢陵,其餘兵奔散, 召龍 |驤軍至洛而誅之。」 乃僞爲友珪詔書示之,龍驤軍恐懼,不知所爲,因告之曰: 「友 捕之甚急。 末帝即召龍驤軍在東京者告之曰:「上以重遇故,欲

**珪弑父與君,天下之賊也!爾能趨洛陽擒之,以其首祭先帝,則所謂轉禍而爲福也。」軍士** 

友珪死。末帝即位,拜象先鎮南軍節度使、同中書門下平章事、開封尹、判在京馬步軍諸軍 踴躍曰:「王言是也。」末帝卽馳奏,言:「龍驤軍反。」象先聞之,卽引禁軍千人入宮攻友珪,

事。貞明四年,爲平盧軍節度使,徙鎭宣武。

皇后等,由是內外翕然稱其爲人。莊宗待之甚厚,賜姓名爲李紹安,改宣武軍爲歸德軍, 誅斂其民,積貨千萬。莊宗滅梁,象先來朝洛陽,輦其資數十萬,路唐將相、伶官、宦者及劉 象先爲梁將,未嘗有戰功,徒以甥故掌親軍。及誅友珪,有功於末帝。 在宋州十餘年,

曰:「歸德之名,爲卿設也。」遣之還鎭。 是歲卒,年六十,贈太師。

靈武之西,吐蕃界中。 時,獻錢五萬緡,領衢州刺史。晉高祖入立,復獻五萬緡,求爲眞刺史。拜雄州刺史,州在 萬三,邸舍四千間,其卒也,不以分諸子,而悉與正辭。正辭初以父任爲飛龍副使。唐廢帝 象先二子,正辭官至刺史,義周世宗時爲橫海軍節度使。 正辭憚,不欲行,復獻錢數萬,乃得免。正辭不勝其忿,以衣帶自經, 象先平生所積財產數千

傳

第三十三

**支**象

先

朱

漢蜜

四九六

其家人救之而止。 。出帝時,又獻錢三萬緡、銀萬兩,出帝憐之,欲與一內郡,未及而卒。

求其同類爾,宜益以錢,聲必止。」聞者傳以爲笑。 正辭積錢盈室,室中嘗有聲如牛,人以爲妖,勸其散積以禳之。 正辭曰:「吾聞物之有

#### 朱漢賓

朱漢賓字績臣,亳州譙人也。其父元禮爲軍校、從梁軍戰、歿于清口。漢賓爲人有膽

力,梁太祖以其父死戰,憐之,以爲養子。

之,乃更選勇士數百人,號「落鴈都」,以漢賓爲指揮使。及漢賓貴,人猶以爲「朱落鴈」。 是時,梁方東攻克、鄆,鄆州朱瑾募其軍中聽勇者,黥雙鴈于其頰,號「鴈子都」。太祖聞 漢

賓事梁爲天威軍使,歷磁滑宋亳曹五州刺史、安遠軍節度使。

脏宗滅梁,罷漢賓爲右龍武統軍,待之頗薄。後莊宗因出遊幸其第,漢賓妻有色而惠,

因侍 ·左右,進酒食,奏歌舞,莊宗懽甚,留至夜漏二更而去,漢實自此有寵

實數寫書友謙,友謙不答,漢賓銜之。 初,漢賓在梁也,與朱友謙俱爲太祖養子,而友謙年長,漢賓以兄事之。 其後友識見族,人皆以爲漢賓有力。 其後梁亡,漢

明宗入立,以漢賓爲莊宗所厚,惡之,以爲右衞上將軍。 安重酶用事, 漢賓依附之,相

爲婚姻,由是復得爲昭義軍節度使。 重誨死,漢賓罷爲上將軍,遂以太子少保致仕。

漢賓爲將,未嘗有戰功,而臨政能守法,好施惠,人頗愛之。 清泰二年卒, 年六十四。

晉高祖時,贈太子少傅,諡曰貞惠。

#### 段凝

段凝, 開封人也。 初名明遠,後更名凝。爲澠池主簿。 其父事梁太祖,以事坐徙。 後

|凝棄官,亦事|太祖,爲軍巡使。 又以其妹內|太祖,妹有色,後爲美人。

凝爲人憸巧,善窺迎人意,又以妹故,太祖漸親信之,常使監諸軍。 爲懷州刺史,梁太

太祖怒,思安因以得罪死。 旭 北征,過懷州,凝獻饋甚豐,太祖大悅。 遷凝鄭州刺史,使監兵於河上。李振亟請罷之,太祖曰:「凝未 過相州,相州刺史李思安獻饋如常禮,比凝爲薄,

有罪。」振曰:「待其有罪,則社稷亡矣!」然終不罷也。

趙嚴、 莊宗已下魏博,與梁相距河上。梁以王彥章爲招討使,凝爲副。 張漢傑等用事, 凝依附嚴等爲姦。 **彦章爲招討使,三日,用奇計破唐德勝南城。** 是時,末帝昏亂,小人 而

雜

傳

第三十三

段

凝

凝 與彥章各自上 **其功**, 嚴等從中匿彥章功狀, 悉歸其功於凝 凝因納 金巖等, 求代彥章

帝惑嚴等言,卒以凝爲招討使,軍于王村。

由 亡,凝率精兵五 汴 侮 萬 弄權 兵悉已屬凝, 是時,唐已下鄭州 以求 終釋之。 有 柄, 司 請責 恩寵。 残害生靈 京師 其 萬 償 莊宗 降唐,莊宗賜以錦 i 無備, ,請皆族之。」 莊宗釋之。 甚親愛之,賜姓名日 ,凝乃自酸棗決河東注鄆, 乃遣張漢 凝出 郭崇韜固 袍、 倫 入 馳馹召凝于河上,漢倫 御馬。明日 唐朝 李紹 請, 無媿色, 以爲 欽 以隔絕唐軍, ,凝奏:「故梁姦 以爲泰 不 見唐 可, 將 寧 莊宗怒曰:「朕爲 軍節度 中道 相 號「護駕水」。莊宗自鄆趨汴 若 倡 墜 人趙嚴、張漢傑等十餘 使。 優, 馬,傷不能 因 伶· 居月餘, 卿所 人景 進。 制, 用 進 都 庫 納 已 錢 不 賂 而 數 劉 梁

裨 以 爲不 皆其故黨, 莊宗遣李紹宏監 可 遷武 莊宗疑之,乃止。 勝 軍 節 諸將備 度使。 契丹, 趙 明宗 即位, 在 凝 禮 軍瓦 反, 紹宏 橋 勒歸田 關 満以 以諂 里。 凝 事 招討, 紹宏, 明年 , 莊宗 長流 紹宏數 使凝 遼州 薦凝 條 賜死 奏 可 方 大 略 用, 郭 凝 崇鉛 所 請 偏 句

#### 劉玘

梁太祖鎭宣武,田以軍卒補隊長,稍以戰功遷

牙將,爲襄州都指揮使。

酒半,擒爲亂者殺之。會梁遣陳暉兵亦至,襄州平,以功拜復州刺史,徙亳、安二州。 山南節度使王班爲亂軍所殺,亂軍推迅爲留後,迅僞許之,明日饗士于庭,伏甲幕中,

疾卒于道中,贈侍中。 遂以爲節度使,徙鎭安遠。 |末帝時,爲|晉州觀察留後,凡八年,日與|晉人交戰。|莊宗滅梁,| 田來朝,|莊宗勞之曰: 天成元年,以史敬鎔代之,田還京師,未至,拜武勝軍節度使,以

#### 周知裕

文。 守光又攻殺守文, 乃與張萬進立守文子延祚而事之。守光又殺延祚, 周知裕字好問,幽州人也。爲劉仁恭騎將,仁恭爲其子守光所囚,知裕去事守光兄守 以其子繼威代

。萬進殺繼威,與知裕俱奔于梁。

梁太祖得知裕喜甚,爲置歸化軍,以知裕爲指揮使,凡與|晉戰所得,及兵背|晉而歸梁 僔 第三十 Ξ 劉 玘 周 知 裕 哒 思 61 四九九

TI.

皆以隸知裕 晉相拒河上十餘年, 其摧堅陷陣, 歸化一軍爲最, 然知裕位不 過刺

爲右 母有疾,置之佗室,以竹竿繋飲食委之,至死不近。 時,歷絳、淄二州刺史,遷宿州 寵待之,諸將嫉其寵, 神武統軍。 莊宗入汴,知裕與段凝軍河上,聞梁已亡,欲自殺,爲賓客故人止之, 應順中卒,贈太傅。 因獵射之, 知裕走以免。 團練使、 安州留後。 莊宗爲殺射者, 所居皆有善政。 知裕深患之, 以知裕爲房州 加以教道, 安州近淮 乃降唐。 由是稍革。 ,俗惡病者 刺史。 莊宗尤 明宗

#### 陸思鐸

陸思鐸, 澶州臨黃人也。 少事梁爲宣武軍卒,以善射知名。 累遷拱辰左廂都指揮

領恩州刺史。

武右廂都指揮使。

姓名,奇之。 梁、晉相 其後滅梁,思鐸謁見,莊宗出其矢以示之,思鐸伏地請死,莊宗慰而起之,拜龍 拒河上,思鐸鏤其姓名於箭筈以射晉軍,而矢中莊宗馬鞍, 莊宗拔矢, 見思鐸

晉高祖時,爲陳、蔡二州刺史。卒年五十四。思鐸在陳州,有善政,臨終戒其子曰:「陳人

愛我,我死則葬焉。」遂葬于陳州。

#### 校勘記

(二) 明年十一月 按通鑑卷二七二載: 同光元年十一月戊申, 張全義請幸洛陽, 甲子,

唐莊宗發

大梁;十二月庚午, 至洛陽。群史卷三〇唐莊宗紀記離汴至洛年月日與通鑑合。 「明年」二字

疑行。

(11) 象先平生所積財產數千萬 「千」,他本均作「十」。

# 新五代史卷四十六

## 雜傳第三十四

### 趙在禮

之;乃攜二首詣在禮。 之二首,日:「不從我者如此首! 軍士皇甫暉作亂,推其將楊仁晟爲首(1),仁晟不從,殺之,又推一小校,小校不從,又殺 |文爲其弟||守光所殺,在禮乃奔于||晉。||莊宗時,爲効節指揮使,將魏兵戍瓦橋關。還至貝州, 趙在禮字幹臣,涿州人也。少事劉仁恭爲軍校,仁恭遣佐其子守文襲取滄州。 在禮聞亂,衣不及帶,方踰垣而走,暉曳其足而下之,環以白刃,示 」在禮從之,遂反。 其後守

**吏已奔散,正言猶不知,方據案大怒,左右告曰:「賊已市中殺人,吏民皆走,欲誰呼邪?** 在禮自見州還攻魏,縱軍大掠。是時,興唐尹王正言年老病昏,聞在禮至,呼吏草奏, 雜 僔 第 Ξ + 四 趙 在 醴 霍 彦 威 压

五〇四

出 府門,見在禮,望而 下拜,在禮呼正言曰:「公何自屈之甚邪!此軍士之情,非予志也。」在

禮卽自稱兵馬留後。

都留守、興唐尹。久之,皇甫暉等皆去,在禮獨在魏,思魏軍之驕,懼及禍,乃求徙鎭橫海。 明宗兵反嚮京師,在禮留于魏。明宗卽位,拜在禮義成軍節度使,在禮不受命,遂拜鄴 莊宗遣元行欽討之,行欽攻魏不克,乃遣明宗代行欽。明宗至鄴,軍變,因入城與在禮

歷鎭泰寧、匡國、天平、忠武、武寧、歸德、晉昌,所至邸店羅列,積貲互萬。

苦之;已而罷去,宋人喜而相謂曰:「眼中拔釘,豈不樂哉!」旣而復受詔居職,乃籍管內, 晉出帝時,以在禮爲北面行營馬步都虞候,以擊契丹,未嘗有戰功。在禮在宋州,人尤

口率錢一千,自號「拔釘錢」。

責貨 財,在禮不勝其憤。行至鄭州,聞晉大臣多爲契丹所鎖,中夜惶惑,解衣帶就馬櫪自經 晉亡,契丹入汴,在禮自宋馳至洛陽,遇契丹拽刺等,拜於馬首,拽刺等兵共侵辱之,誅

#### 霍彦威

而卒,年六十二。 漢高祖立,贈中書令。

從存戰,中矢,眇其一目。 霍彦威字子重,洛州曲周人也。 '後事梁太祖,太祖亦愛之,稍遷左龍驤軍使、右監門衞上將軍。 少遭兵亂,梁將霍存掠得之,愛其儁爽,養以爲子。

預誅友珪,以功拜洛州刺史,遷邠寧節度使。

不復攻。 李茂貞遣梁叛將劉知俊攻邠州,彦威固守踰年,每獲知俊兵,必縱還之,知俊德之,後 徙鎭義成,又徙天平,兼北面行營招討使,與晉軍相持河上,彥威屢敗,降爲陝州

留後。

宗擊契丹,明宗愛其爲人,甚親厚之。 宗酒酣,指彥威等舉酒屬明宗曰:「此皆前日之勍敵,今侍吾飲,乃卿功也。」彥威等惶恐伏 地請死,莊宗勞之曰:「吾與總管戲爾,卿無畏也。」賜姓名曰李紹眞。 莊宗滅梁,彥威自陝來朝,莊宗置酒故梁崇元殿,彥威與梁將段凝、袁象先等皆在。 明年,徙鎮武寧,從明

軍,某等初無叛心,直畏死耳!今宜與城中合勢,擊退諸鎭之兵,請天子帝河南,令公鎭河 之人何罪,戍卒思歸而不得耳!天子不垂原宥,志在勦除。 贼城破在旦夕,乃爾輩立功名、取富貴之時。 況爾天子親軍,返効賊邪! 軍 |吏張破敗率衆殺將校,縱火焚營譟呼,明宗叱之曰:「自吾爲帥十有餘年,何負爾輩!今 其後,趙在禮反,彥威別討趙太於邢州,破之,還以兵屬明宗討在禮。明宗軍變,從馬直 且聞破魏之後,欲盡坑魏博諸 」軍士對日:「城中

卑! 置酒 明宗復出,得彥威兵,乃之魏縣,謀欲還鎭州,彥威、重誨勸明宗以兵南向 大會,而部兵在外者聞明宗反,皆潰去,獨彥威所將五千人營城西北隅不動。 」
彦威 明宗涕泣諭之, 亂兵環列而呼曰:「令公不欲帝河北, 與安重 海勸明宗許之,乃擁兵入城,與<u>在禮合,</u>彥威獨不入。 則佗人有之, 我輩狠 明宗入城, 虎, 與在禮 豈識拿

以死。 自彥威爲偏裨時已從之。彥威嘗戰敗脫身走,麾下兵無從者,獨晏徒步以一劍從之榛棘間 臣皆不知禮,動多此類。 夷狄之法,起兵令衆,以傳箭爲號令,然非下得施於上也。明宗本出夷狄,而彥威武人,君 韜 恩信示人,豈公報仇之時?」彥威乃止。 有隙,因擅捕凝、韜下獄,將殺之,安重誨曰:「凝、韜之惡,天下所知,然主上方平內難,以 **彦威徙鎭平盧。朱守殷反,伏誅,彦威遣使者馳騎獻兩箭爲賀,明宗賜兩箭以報之。** 莊宗崩,彥威從明宗入洛陽,首率羣臣勸進,內外機事,皆決彥威。 彦威高其義,所歷方鎭,常辟以自從,至其家事無大小,皆決於晏, 彦威以故得少過 然彥威客有淳于晏者,登州人也,少舉明經及第,遭世亂,依彥威 明宗卽位,乃赦凝、韜,放歸田里,已而卒賜死。 彦威素與段凝、

宮,輟朝,仍終其月不舉樂,贈彥威太師,諡曰忠武 天成三年冬, 彦威卒于鎭。是時, 明宗方獵于近郊, 青州馳騎奏彦威卒, 明宗涕泣還

當時諸鎭辟召寮屬,皆以晏爲法。

#### 房知溫

軍 指 揮 房 使。 知温 学伯玉 莊宗取魏博,得知温,賜姓|李氏,名曰紹英, 人也。 少 以勇 力爲 赤甲都官健, 以爲澶州刺 後隸 魏州 史,歷曹、貝二州刺史, 馬 鬭 軍, 稍遷 親

戍

橋

關

梁患。 軍也。 梁而 作亂, 皆此 使, 明宗 厚賞。 軍 明宗自魏反兵南向, 劫德倫叛梁而降晉,梁遂失河北。 于盧臺。 也。 魏州自 師厚卒,以賀德倫代之。 幟 乃以皇子從榮代在禮,而 明宗入立,在禮鎭天雄軍,以 及梁亡,魏軍雖數賜與,而 以 羅紹威誅衙軍,楊師 表 明宗遣烏慶往代知温還鎭,其戍卒劾節軍將龍晊等攻震殺之。 隊 伍 軍 士頗自疑惑。 知温首馳赴之。 末帝思魏軍疆難制, 厚爲節度使,復置銀槍劾節軍。 遺魏効節 驕縱無厭, 明年 魏 莊宗自得魏兵,與梁戰河上, 天成 軍 九指揮北 ·素驕,常懼禍,不 **公元年**, 明宗遣烏震代知温 常懷怨望, 與趙嚴等謀分相、魏爲兩鎮,魏軍 拜泰寧軍節度使。 戍盧臺。 皇甫暉之亂, 皇居,陰遣人訴 軍發之日, 成, 當梁末帝時, 而 數有功, 知 明年, 温意尤不樂。 不給兵甲, 劫趙在禮入魏 于明宗,求解 許其軍以滅 効節, 爲北面招討 師厚 惟以 由 幾爲 魏州 此

雜

傳

第

家數萬 躍 出。亂軍擊殺震,執轡留知温, 臺 而 不問 一
戊
軍 馬登舟渡河入西寨,以騎軍 一、徙鎮 夾 水 驅至潭水上殺之,潭水爲之變色。 東 武 西 【寧,加兼侍中,歷鎭天平、平盧 爲 兩 :寨,震初至,與知温會東寨,方博,効節軍亂,噪于門外,知 ·盡殺亂者。 知温給曰:「騎兵皆在西寨,今獨 明宗下韶, 魏之驕兵,於是而盡。 悉誅其家屬于 少軍, 魏州 明宗 恐無能 知變自知温起,釋 凡 九指揮三千餘 爲 心。」 温 卽 知 乘馬 卽 而

請下 廢帝 厚。 図 表 簿 m 因 兵部、 知温 起兵鳳翔 西以覘之。」及沖至京師, l 時建義、 初 鼓吹、輅車、法物不出都城, 明宗 還鎭,封 太常、 爲 功必有 北 愍帝出奔, 太僕 東平王。 面 招討使,而知温爲副 給 成。」沖曰:「今天子孱弱,上下離心, 鹵 簿、 太常上言:「策拜王 知温 鼓吹 廢帝已入立, 乘間有窺覦之意 考之故事 八、輅車、 使,廢帝時以裨將事知温甚謹,後因杯酒失意 法 無 沖卽 物赴 が明文。 公, 奉 Ξ, 本道 皇帝臨 謂其司馬李沖曰:「吾有錢 表稱 今北平王 禮 賀, 軒 路王兵威甚盛, 畢還有司 造策。 還勸 一德鈞、 知温 其 東平 在 入朝 外者 主 事 知 未 廢帝 數屋, 温 Ē 可 受 衙 知 慰勞之甚 封 命 養 冲 使,而 遣 兵數 請 及 懷

元 年 卒于 知 温 官, 在 鎭 赠 常 太 尉 厚 斂 其民,積貲鉅萬,治第青州 南城 出入以聲妓, 游嬉不恤 政事

知 温 | 卒後,其子彥牖獻其父錢三萬絡、絹布三萬匹、金百兩、銀千兩、茶千五百斤、絲十

#### 王晏球

子都指揮使。太祖卽位,爲右千牛衞將軍。友珪立,龍驤戍卒反,自懷州趣京師,遣晏球擊 敗之于河陽,以功遷龍驤第一指揮使。 氏。梁太祖鎭宣武,選富家子之材武者置之帳下,號「廳子都」。晏球爲人倜儻有大節,爲廳 王晏球字瑩之,洛陽人也。少遇亂,爲盜所掠,汴州富人杜氏得之,養以爲子,冒姓杜

宮城,而責臣破賊。」遲明盡殺之,以功拜澶旦州刺史。 稍却。|末帝登樓見之,呼曰:「此非吾龍驤軍邪!」|晏球奏曰:「亂者,|李霸一都爾,陛下嚴守 入,縱火大躁,以長竿縛布沃油,仰燒建國門。。晏球聞亂,不俟命,率龍驤五百騎擊之,賊勢 末帝即位,遷龍驤四軍指揮使。梁遣捉生軍將李霸將千人戍楊劉,霸夜作亂,自水門

D 古本作單。

雜

**傳第三十四** 

王

要班

聞末帝已崩,即解甲降唐, 際、晉軍河上,以晏球爲行營馬步軍都指揮使。 莊宗賜姓名日李紹虔,拜齊州防禦使,戍瓦橋關 莊宗入汴, 晏球以兵追之,行至封丘,

自 求 擊延 隱 壓 中國 契丹 馬項 晏球 皆橐弓矢、用短兵,回顧者斬。符彥卿以左軍攻其左,高行珪以右軍 而 浸球 敗 歸惕隱等,辭甚卑遜,輒斬其使以絕之。於是時,中國之威幾於大震,而契丹少衰伏矣, 與數十騎走至幽州 都衆掩至,晏球與左右十餘人連矢射之,都衆稍却,而後軍 禿餒, 多故,疆於北方,北方諸夷無大小皆畏伏,而中國之兵遭契丹者,未嘗 又遭惕隱以七千騎益 馳 朝 爲招 聞 明宗 入都軍 始 禿餒等兵 軍 近朝 也 討 兵 又走惕隱,其餘衆奔潰投村落,村落之人以鋤耰白 使, ,都遂大敗,自曲陽至定州,橫尸棄甲六十餘里。 自鄴 大敗,收餘兵會晏球趨曲陽, 與宣徽南院使張 (且來) 而 西,爲趙德鈞擒送京師。 南、遺 留張延朗屯新樂,自逆於望都。 都,晏球遇之唐河, 人招晏球,晏球從至洛陽, 延朗等討之。 都乘勝追之。 追擊至滿城,斬首二千級,獲馬 明宗下韶責消契丹。 都遣人北招契丹, 而契丹從他道入定州, 拜歸德軍 晏球先至水次, 方坐胡床指麾 一亦至。 梃所在擊殺之,無復遺類 都與禿餒入城, 節度使。 契丹遣秃餒 ·攻其右(三,中軍 契丹後數遣使至中國, 晏球立 少得 定州 高 千 將萬 岡 志。 匹。 與都出不意 王都 不敢復出 號 騎 自晏球 契丹自 令諸 反,以 救都 上抱 將

到等宣言曰:「**晏球怯耳!」乃驅兵以進,兵果敗,殺傷三千餘人,由是諸將不敢復言攻。** 球 攻定州,久不克,明宗數遣人促其破賊,晏球 以謂未可急攻。 其偏將朱弘昭、張虔

先出其民萬餘人,數與禿餒謀決圍以走,不果,都將馬讓能以城降,都自焚死。 球乃休養士卒,食其三州之賦,悉以俸祿所入具牛酒,日與諸將高會。久之,都城中食盡,

返, 破都功,拜天平軍節度使。 ,獨不動,卒以持久弊之。自天成三年四月都反,明年二月始克之,軍中未嘗戮一人。以 晏球爲將有機略,善撫士卒。其擊禿餒,旣因敗以爲功,而諸將皆欲乘勝取都,晏球 又徙平盧,累官至兼中書令。是歲卒,年六十二,贈太尉。

#### 安重霸

恐,以問重霸,重霸曰:「劍門天下之險,雖有精兵,不可過也。 度使,重霸爲其副使。 深結承休以自託。 了重霸立承休馬前,辭曰:「秦、隴不可失,願留爲公守。」承休業已上道,無如之何。 與公俱西。」承休素親信之,以爲然。承休整軍將發,秦人送之,帳飮城外。 安重霸,雲州人也,初與明宗俱事晉王。重霸得罪奔于梁,又奔于蜀。 重鬍爲人狡譎多智,善事人。蜀王建以爲親將。王衍立,少年,宦者王承休用事,重霸 梁末,蜀取李茂貞秦、成、階三州,重霸勸承休求鎭秦州,衍以承休爲節 重霸與承休多取秦州花木獻衍,請衍東遊。 。然公受國恩,聞難不可不赴, 唐魏王兵伐蜀,承休大 。酒罷,承休上

道

雜

傳第三十四

安 重

额

Ŧ.

建立

願

五二二

久之,以爲匡國軍節度使。 唐軍已破蜀 重霸亦以秦、成、 廢帝時,爲京洮尹、西京留守,徙鎭大同,以病罷還,卒于潞州。 階三州降唐, 明宗以爲閬州團練使。 罷爲 左 衞大將軍

#### 王建立

宗益愛之。明宗卽位,以爲成德軍節度副使,已而拜節度使、檢校太尉、同中書門下平章 犯京師,曹皇后、王淑妃皆在常山,建立殺常山監軍并其守兵,明宗家屬因得無患,由是明 祭墓,女奴侵擾代人,建立捕而笞之。莊宗怒,欲殺之,明宗爲庇護之以免。明宗自魏反, 王建立,遼州楡社人也。唐明宗爲代州刺史,以建立爲虞侯將。莊宗嘗遣女奴之代州

平盧節度使,又徙上黨。 識文字,願解三司,明宗不許。 久之,建立稱疾,明宗笑曰:「人固有詐疾而得疾者。」乃出爲 明宗 左 右 諷 不欲傷建立,亟召還京師。建立入見,亦多言重誨過失。明宗大怒,欲亟罷重誨,羣臣 <u>建立與安重誨素不協,定州王都有二志,數以書通建立,約爲兄弟,重誨知之以爲言。</u> 解之,乃止。然卒以建立爲右僕射、同中書門下平章事、判三司事。 建立快快不得志,遂求解職,乃以太子少保致仕。 居歲餘,自言不

曰:「汝爲節度使,不作好事,豈獨重誨讒汝邪!」賜以茶藥而遣之。 建立數請朝見,不許,乃自詣京師,闌至後樓見明宗,涕泣言己無罪,爲重誨所擯,明宗 廢帝立,復起爲天平軍

節度使。

興入朝,給二宦者掖而升殿,宴見甚渥。 又徙昭義,賜以玉斧、蜀馬。 **晉高祖時,徙鎭平盧。 天福五年來朝,高祖勞之曰:「三十年前老兄,可毋拜!」賜以肩** 累封韓王。

<u>健</u>立好殺人,其晚節始惑浮圖法,戒殺生,所至人稍安之。 卒年七十,贈尚書令。

去,守恩因剽劫從恩家貲,以潞州降漢。 昭義節度使張從恩與守恩姻家,乃以守恩權巡檢使,以守潞州,而從恩入見契丹。 子守恩,以蔭補,稍遷諸衞將軍。 建立已卒,家于路,守恩自京師得告歸,而契丹滅晉。 漢高祖卽位,以守恩爲昭義軍節度使,徙鎭靜難 從恩旣

西京留守,加同中書門下平章事。

客次以俟見,而吏馳報新留守視事於府矣。 以使相自處,肩興出迎。 守恩性貪鄙,人甚苦之。時周太祖以樞密使將白文珂等軍西平三叛,還過洛陽, 太祖怒,即日以頭子命文珂代守恩爲留守,而守恩方詣館謁,坐於 。守恩大驚,不知所爲,遂罷去,奉朝請于京 守恩 師。

睡覺矣。」聞者皆縮頸。 後隱帝殺史弘肇等,召羣臣上殿慰諭之,羣臣恐懼,無敢言者,獨守恩前對曰:「陛下始 顯德中,爲左金吾衞上將軍以卒。

之際是 法 制 既極而 蓋其 Mi 是時, 而 鳴 漢 已。 後亂從之。 呼 (廷君臣亦置而不問,其上下安然而不怪者,豈非朝廷法制綱紀壞亂 《習爲常事,故特發於喜怒頤指之間,而文珂不敢違,守恩不得拒。 ! 至於此歟!是以善爲天下慮者,不敢忽於微,而常杜其漸也, 太祖與漢未有間隙之端, 若文珂、守恩皆位無將相,漢大臣也,而周太祖以一樞密使頭子易置之,如更戍 道德仁義,所以爲治,而法制綱紀,亦所以維持之也。自古亂亡之國,必先壞其 亂與壞相乘,至蕩然無復綱紀,則必極於大亂而後返,此勢之然也,五 其無君叛上之志, 宜未萌于心, 而其所爲如此者, 可不戒哉 太祖旣處之不 相乘, 其來也 何

#### 康福

自魏 福 狀 貌類胡 反 兵過相 康 福 蔚州 人而 州 人也, |豐厚,胡宜羊馬。|乃令||福牧 福以小坊馬二千匹歸命,明宗 世爲軍校。 福以騎射事晉王爲偏將。 馬 于相 軍勢由 州 爲小 是益盛。 馬坊使, 莊宗嘗日,「吾家以羊馬爲生, **明宗入立**, 逾 年馬· 大蕃滋。 拜飛龍使, 领

磁

州

刺史、襄州兵馬都監。從劉訓討荆南,

無功而

還。

福爲將無佗能,善諸戎語,明宗嘗召入便殿,訪以外事,福輒爲蕃語以對。 樞密使安重

|誨惡之,常戒||福曰:「無妄奏事,當斬汝!」||福懼,求外任。

所擠。 宗怒,謂福曰:「重誨遣汝,非吾意也。吾當遣兵護汝,可無憂。」乃令將軍牛知柔以兵衞福。 夷境,爲帥者多遇害,乃拜區凉州刺史,朔方、河西軍節度使。 福入見明宗, 涕泣言爲重誨 吐蕃數千帳,不覺福至,福分其兵爲三道,出其不意襲之。吐蕃大駭,棄車帳而走,殺之殆 行至方渠,而羌夷果出邀福,福以兵擊走之。至青岡峽,遇雪,福登山望見川谷中煙火,有 盡,獲其玉璞、綾錦、羊馬甚衆,由是威聲大振。 靈武韓洙死,其弟澄立,而偏將李從賓作亂。澄表請朝廷命帥,而重誨以謂靈武深入 明宗召重誨爲福更佗鎮,重誨曰:「福爲刺史無功効而建節旄,其敢有所擇邪!」明

朝廷。 福居靈武三歲,歲常豐稔,有馬千駟,蕃夷畏服。 明宗遣人謂福曰:「我何少汝而欲負我!」福言:「受國恩深,有死無二。」因乞還朝, 福章再上,卽隨而至,明宗不之罪,徙鎭彰義。 歷靜難、雄武,充西面都部署。 言事者疑福有異志,重誨亦言福必負

晉高祖時,徙鎭河中,代還,卒于京師,贈太師,諡曰武安。

**衾**,相顧竊戲曰:「錦衾爛兮! |福世本夷狄,夷狄貴沙陀,故常自言沙陀種也。||福嘗有疾臥閣中,寮佐入問疾,見其錦 .」福聞之,怒曰:「我沙陀種也,安得謂我爲溪?」聞者笑之。

雑

傳第三十四

康福

郭延智

#### 郭延魯

郭延魯,沁州綿上人也。 父饒,以曉勇事晉,數立軍功,爲沁州刺史者九年,爲政有惠

愛,州人思之。

道攀號。 爲刺史,其敢忘吾先君之志! 軍都指揮使,累遷復州刺史。 延魯以善槊爲將,累遷神武都知兵馬使。 天福中, 拜單州刺史, 卒于官。 一由是益以廉平自勵,民甚賴之。 延魯歎曰:「吾先君爲心州者九年,民到于今思之。 吾今幸得 朱守殷反,從攻汴州,以先登功爲汴州馬步 秩滿,州人乞留,不許,皆遮

刺 史任武夫,恃功縱下, 當是時,刺史皆以軍 爲害不細。 小功拜, 言事者多以爲言,以謂方天下多事,民力困敝之時,不宜以 而延魯父子,特以善政著聞焉。

之事稍作, 鳴 呼,五代之民其何以堪之哉!上輸兵賦之急,下困剝斂之苛。自莊宗以來,方鎭進 至於晉而不可勝紀矣。其「添都」、「助國」之物,動以千數計。至於來朝、奉使、買 獻

雑傳第三十四 校勘記

宴、贖罪,英不出於進獻。 大州善地。 蓋自天子皆以賄賂爲事矣,則爲其民者其何以堪之哉!於此之時,循康之吏如 而功臣大將,不幸而死,則其子孫率以家貲求刺史,其物多者得

校勘記

延魯之徒者,誠難得而可貴也哉!

(二)楊仁晟 薛史卷九○趙在禮傳作「楊晸」,通鑑卷二七四作「楊仁晸」。

高行珪以右軍攻其右 鄂本「珪」作「周」。 按薛史卷一二三高行周傳載,天成中,高行周從王晏

|球圍定州, 敗王都事與此合, 疑當從鄂本。

# 新五代史卷四十七

## 雜傳第三十五

### 華溫琪

堂堂,非常人也!」乃匿于家。後歲餘,聞濮州刺史朱裕募士爲兵,乃往依之。 以温琪爲供奉官都知。巢敗,温琪走滑州,顧其狀貌魁偉,懼不自容,乃投白馬河, 里,不死,河上人援而出之。又自經于桑林,桑輒枝折。 華温琪字德潤,宋州下邑人也。世本農家。温琪身長七尺。 乃之

作縣,有田父見之曰:「子狀貌 少從黃巢爲盜,巢陷長安, 流數十

爲定昌軍,以温琪爲節度使。 朱友謙以河中叛附于晉,末帝拜温琪汝州防禦使、河中行營排陣使。遷耀州觀察留後。 以避之,民賴其利。 後事梁,爲開道指揮使,累以戰功爲絳、棣二州刺史。 歷齊、晉二州。 坐掠部民妻,爲其夫所訟,罷爲金吾衞大將軍、左龍武統軍。 莊宗攻晉州,踰月不能破,梁末帝嘉温琪善守,升晉州 |棣州苦河水爲忠、温琪徙于新州

頯

使, 曰:「温琪舊人,宜與一重鎭。」重誨意不欲與,對以無員闕。 「可代者惟樞密使耳。」明宗曰:「可。」重誨不能答。 徙鎭雄武。 莊宗滅梁,見温琪,曰:「此爲梁守平陽者也!」嘉之,因以耀州爲順義軍 明宗時來朝, 願留闕下,以爲左驍衞上將軍。 温琪聞之懼,稱疾不出者累月。已而以 佗日, 明宗語又及之, 踰年, 明宗謂樞密使安重誨 拜温其節度 重海日:

天福元年卒,贈太子太傅。

爲鎭國軍節度使。

廢帝時,以太子太保致仕

宗惜之,不許。 城, 旗出入陣間者,莊宗登高丘望見之,歎曰:「彼猛士,誰能爲我取之者?」從簡因前請往,莊 從簡多爲梯頭,莊宗愛其勇,以功累遷步軍都指揮使。 **長從簡,陳州人也。 萇從簡** 從簡潛率數騎,馳入梁軍,奪其旗而還,軍中皆鼓噪,莊宗壯之,賜與甚厚。 世本屠羊。從簡去事鬥爲軍校,力敵數人,善用槊。 工無良藥,欲鑿其骨,人皆以爲不可。 莊宗與梁軍對陣, 梁軍 莊宗用兵攻 ·有執大

one of the control o 而從簡言笑自若。 然其為

從簡嘗中流矢,鏃入髀骨,命工

一 取 之。

從簡

速使

夜入其家殺而取之。卒夜踰垣,隱木間,見其夫婦相待如賓,二卒歎曰:「吾公欲奪其寶,而 左金吾衞上將軍。 卒年六十五,贈太師。 簡曰:「事主不敢二心。」廢帝釋之,拜潁州團練使。晉高祖起兵太原,廢帝將親征,召爲招 計副使,從至河陽,拜河陽三城節度使。 明宗嘗戒之曰:「富貴可惜,然汝不能守也。先帝能貸爾,吾恐不能。」從簡性不可悛,明宗 人剛暴難制,莊宗每屈法優容之。累遷蔡州防禦使。 從簡好食人肉,所至多潛捕民間小兒以食。 廢帝舉兵於鳳翔,從簡與諸鎭兵圍之,已而兵潰,從簡東走,被執。 廢帝還洛陽,從簡即降晉。 許州富人有玉帶,欲之而不可得,遣二卒 明宗時,歷麟、汝、汾、金四州防禦使。 歷鎭忠武、武寧,入爲 廢帝責其不降,從

害斯人,吾必不免。」因躍出而告之,使其速以帶獻,遂踰垣而去,不知其所之。

## 張筠

**筠,愛其辯惠,以爲四鎭客將、長直軍使,累拜宣徽使。** 張筠,海州人也。世以貲爲商賈。<br />
筠事節度使<br />
時溥爲宿州刺史。梁兵攻溥取宿州, 末帝分相、澶、衞三州爲昭德軍,以

雜

傳 第

三十

Ħ.

張 筠

筠 為節 度 使 由 是 魏 博軍 叛附于晉。 晉王 攻 相 州 筠棄城 走。 後以爲 永平 車 節 度

守, 筠 元 怒, 戒守者不內,筠至 筠嘗 梁 命左 亡事 有疾, 右收彦琳 唐 仍 不見將吏,副 為 ~ 京兆 下獄, |長安不得入,乃朝京師,以爲左驍衞上 尹 以其反聞。 使符彦琳 從郭崇韜伐蜀 入問疾, 明宗知彥琳無反狀,召彥琳釋之,陽徙筠爲 「爲劍 筠又辭不 南 兩 川 見。 安撫 一將軍 **彦琳** 使 疑筠已死 蜀 平, 拜河 南 卽 請 尹,徙鎭興 出 西京留 陣印

兆 蜀 筠 `弟籛,當筠爲京兆尹時,以爲牙內指揮使、三白渠營田 平, 魏王 繼岌班師,至興平,而明宗自魏起,京師大亂, **鑊乃斷咸陽浮橋以拒繼岌,** 制置使。 **筠西伐蜀**,留籛守京 繼

发

乃自

萬。 刺 中 死 玉 史。 渭 玢 然筠 寶。 南 有 初 偏 晉 筠 錢 明宗 將 出 爲 悉 代 帝 人 侯莫陳威者,嘗 取其行 康 即位 好 時 懷英爲永平軍節度使,而懷英死,筠 施子 以 將 橐。 卽 遣 以 軍 其富 市 人 而 馬 與温 捕 王 於回 一, 故 衍 誅 宦 韜發唐 自 所 鶻 者 蜀 至 行 不爲聚 坐 延嗣亡命 諸 至 馬 秦川 陵, 不 中式, 斂 分得 莊宗遣宦者向 民賴以安。 而 寶貨, 有 即掠其家貲。 蜀 司 之珍 理其 筠 寶錢 因以 價直 而 延嗣 籛 又 事殺威而 嗒 叉 錢 取之。 殺之, 於唐故宮掘地, 酒 性 貪 晶 鄙 延 由 取 因 之。 是 嗣 鬱 歷 兄弟 因 沂、 鬱 虚 魏 而 密二 貲 多得 得 王 卒。 皆 衍 繼 州 蜀 发 鉅 金

簉

居洛陽

摊其貲

以酒

色聲妓自

娛足者

十餘年,

人謂之「地仙」。天福

二年,

徙居長安。

是歲,張從實作亂,入浴陽,筠遂以免。卒,贈太子少師。

橋,而繼岌得以兵東,明宗未必能自立。 深以爲德, 亡,於張籛無所利害,錢何爲而拒之不使之東乎?豈其有所使而爲之乎?然明宗於符彥超 繼岌以元子握重兵,死于外而不得立,此大事也,而前史不書其所以然。 嗚呼,五代反者多矣,吾於明宗獨難其辭!至於魏王繼岌薨,然後終其事 而待籛無所厚, 此其又可疑也。 則繼岌之死,由廢之拒,其所繫者豈小哉! 不然,好亂之臣,望風而響應乎?使踐不斷浮 也。 夫繼岌之存 莊 宗 遇

#### 楊彥詢

彦詢爲 博叛梁入于晉,彥詢因留事晉。 楊彥詢字成章,河中寶鼎人也。 人聰悟,遂見親信。 師範降梁,後見殺,彥詢無所歸, 莊宗滅梁,以彥詢爲引進副使,奉使吳、閩,常稱旨。 少事青州王師範,師範好學,聚書萬卷,使彥詢掌之。 乃之魏,事楊師厚爲客將。 歴|徳 魏

晉高祖鎭太原, 雑 傳 第 三十 Ŧī. 廢帝疑其有貳志, 楊 彦 韵 李 周 擇諸將之謹厚者佐之, 乃以彥詢爲太原節度副使。 五三三

州刺史、羽林將

軍。

否?公其審計之!」高祖反意已決,彥詢亦不復敢言。 其後晉高 祖以疑見徙,欲拒命不行,以問彥詢,彥詢不敢正言,因曰:「太原之力,能與唐敵 高祖左右以彥詢異議,欲殺之,高祖

遽止之, 曰:「惟副使一人, 我自保之。」乃免。

節度使。 年七十四,赠太子太師。 數往來虜帳中,德光亦愛其爲人。明年,拜感德軍節度使〔〕,復入爲宣徽使,又拜安國 天福七年,徙鎭鎭國,遭歲大饑,爲政有惠愛。 以病風罷爲右金吾衞上將軍。 軍

#### 李周

李周字通理,邢州内丘人,唐昭義軍節度使抱眞之後也。父矩,遭世亂不仕,嘗謂周

日:「邯鄲用武之地,今世道未平,汝當從軍族以興吾門。」

嶽, 衞。 `中其馬,周大呼曰:「吾在此,孰敢爾邪? 內丘人盧嶽將徙家太原,舍逆旅,傍偟不敢進,周意憐之,爲爰至西山。 周 至十六爲內丘捕賊將,以勇聞。是時,梁、晉兵爭山東,羣盜充斥道路,行者必以兵 」盜聞其聲,曰:「此李周也。」因各潰去。 有盜從林 周送

|嶽至||太原,||嶽謂之曰:「吾少學星曆,且工相人。 子方頤隆準, 吾占天象,晉必有天下,子宜留事晉,以圖富貴。」周以母老辭歸。 眉目疏徹, 身長七尺, 

|宗以巨栰積薪沃油,順流縱火焚梁艦,梁兵解去。||莊宗見||馬勞曰:「微公,諸將爲梁擒矣!| 宗遣佗將代周守,幾爲梁兵所破,莊宗遽追周還守之,乃得不破。 其後梁人已破德勝,因東 晉王 至多善政。 歷相、蔡二州刺史。 爲我守,何憂!」日行六十里,且行且獵,曰:「周非梁將可敵也。」比至,周已絕糧三日。 擊楊劉,以互艦絕河,斷晉餉援。周遣人馳趨莊宗求救,請日行百里以赴急,莊宗笑曰:周 爲將甚勇,其於用兵,善守,能與士卒同甘苦。梁兵攻周,周堅守。 以周爲萬勝黃頭軍使。後從征伐常有功。從戰怕鄉,先登,遷匡霸指揮使,守楊劉。 是時,梁遣葛從周攻下邢、洛,晉王栅兵青山口,周未知所歸,乃思獻言,至青山歸晉, 明宗時,拜武信軍節度使,徙鎭靜難,歷武寧、安遠、永興、宣武四鎭,所 久之,周聞母喪奔歸,莊

太師。 晉高祖時,復鎭靜難,罷還。 出帝幸澶淵,以周留守東京,還,拜開封尹。 卒年七十四,

贈

劉處讓

劉 處 譲 字德謙,滄州 人也。 少爲張萬進親吏,萬進入梁,爲泰寧軍節度使,以處讓爲牙

將。 讓乃於軍門截耳而訴曰:「萬進所以見圍者,以附晉故也,奈何不顧其急?苟不出兵,願請 進 叛梁附晉,梁遣劉鄩討之。 萬進遣處讓求救于晉,晉王方與梁相拒,未能出兵,處

死! |晉王壯之,日:「義士也! 」爲之發兵。未渡河,而萬進爲梁兵所敗,處讓因留事晉。

帝時 魏州軍亂,逐其帥劉延皓,遣范延光招討,以處讓爲河北都轉 運使。

莊宗卽位,爲客省使,常使四方,多稱旨。

天成中,

遷引進使,累遷左

聽衛大將軍。

廢

晉 高 旭 立,歷宣徽南院使。 范延光反, 高祖命楊光遠爲招討使,以處 護參其 軍 已

有 而 路 副 意 招 而 討 使張從實叛于河陽,處讓分兵擊破從實。還,與光遠攻鄴,逾年不能下。 遲 疑,處讓 入城, 醬以禍福, 延光 乃出 降。 其後 延光

時 以宰相 唐 制 桑 樞 維 密 翰 使常以宦者爲之,自梁用敬翔、李振, 、李崧兼樞密使, 處讓 與諸官 者心不平之。 至莊宗始用武臣, 光遠之討 延光也, 而權重將 以晉

己掌握.

,舉動多驕恣,共所求請,高祖頗裁抑之。處讓爲光遠

言:「此非上意,皆維翰、松等嫉

相

旭

重

兵 在

公耳! 」光遠大怒。 及兵罷,光遠見高祖,訴以維翰等沮己,高祖不得已,罷維翰等,以處讓

爲樞密使。

太師。 廢其職。 處讓在職, 處讓居喪期年,起復爲彰德軍節度使、右金吾衞上將軍 凡所陳述,多不稱旨。 處讓丁母憂,高祖遂不復拜樞密使,以其印付中書而 以疾卒,年六十三,累贈

### 李承約

爲其子守光所囚,承約以其騎兵奔晉,晉王以爲匡霸指揮使。 李承約字德儉,薊門人也(三)。 少事劉仁恭,爲山後八軍巡檢使,將騎兵二千人。 從破夾寨,戰臨淸,以功累遷

洛汾二州刺史、潁州團練使。

璋, 爲左衞上將軍,改左龍武統軍,拜昭義軍節度使,復爲左龍武統軍 恩信撫諸夷落,勸民農桑,興起學校。 諭以禍福。 天成中, 邠州節度使毛璋有異志, 後明宗遣人代障, 璋卽時受代。 居數年,當代, 明宗拜承約涇州節度副使,使往伺璋動靜。 明宗大喜, 黔南 人詣京師乞留,爲許留一年。 即拜承約黔南節度使。 承約 承約 召 見

天福二年 ·,遷左聽衞上將軍。 數請老,不許。 卒年七十五,赠太子太師。

### 張希崇

**鷼、瓜、沙皆遣使入貢。** 乃開 歸。 灰。 去虜 歲餘,虜將 時, 懼 偏 將 不得脱, 盧文進自平州亡歸, 明宗 明日 屯田 帳 張希崇字德峯,幽州薊人也。少好學,通左氏春秋。劉守光不喜儒士,希崇因事軍 將兵戍平州。 千餘里,使其聞亂而 ,教士耕 嘉之,拜汝州 · 廣將謁希崇,希崇飲之以酒,殺之穽中,兵皆潰去,希崇率其麾下, 因勸希崇獨去。希崇曰:「虜兵守我者三百騎爾, 喜其爲人,監兵稍怠,希崇因與其麾下謀走南歸。 種,軍以足食, 其後契丹攻陷平州,得希崇,知其儒者也,以爲盧龍軍行軍 防禦使。 居四 契丹因以希崇代文進爲平州節度使, 呼兵,則吾與汝等在漢界矣!」衆皆日善。 歲, 上書 而省轉饋,明宗 遷靈武節度使。 求還內地, 下韶 。徙鎮 靈州 邠 褒美。 地接戎狄,戍兵餉道,常苦抄掠, 寧。 希崇撫養士卒,招輯夷 烹其將, 其兵必散 其麾下皆言兵多,不 遣其親將以三百騎監之。 乃先爲穽, 得生口二 走。 司 馬。 可俱亡, 寘 且 希崇 明宗 一中爲 自 戸州 萬 回 南 居

晉 祖入立, 復拜靈武節度使 希崇歎曰:「吾當老死 邊微, 豈非命邪! 」希崇事母至

月掩畢口大星,希崇歎曰:「畢口大星,邊將也,我其當之乎!」明年正月卒,贈太師。 孝,朝夕母食,必侍立左右,徹饌乃敢退。 爲將不喜聲色。 好讀書, 頗知星曆。 天福三年,

相里金

相里金字奉金,丼州人也。爲人勇悍,而能折節下士。 事晉王爲五院軍隊長。

戰柏鄉、胡柳,皆有功,遷黃甲指揮使。

同光中,拜忻州刺史。是時,諸州皆用武人,多以部曲主場務,漁蠹公私,以利自入,金

獨禁部曲不興事,厚其給養,使掌家事而已。遷隴州防禦使。 廢帝起兵鳳翔,馳檄四隣,四隣未有應者,獨金首遣判官薛文遇見廢帝,往來計事。

帝即位,德之,拜保義軍節度使。<br />
晉高祖起太原,廢帝以金爲太原四面步軍都指揮使。

廢

高祖入立,徙鎭建雄,罷爲上將軍。 天福五年卒, 贈太師。

### 五三〇

### 張廷蘊

戰, 在魏,以劉皇后從行,劉氏多縱其下擾人爲不法,人無敢言者,廷藴 金瘡滿體,莊宗壯之,以爲帳前黃甲二十指揮步軍都虞候、魏博三城巡檢使。是時,莊宗 張廷蘊:開封襄邑人也。 少爲宣武軍卒,去事晉,稍遷軍校。 輒收而斬之。 常從莊宗 征伐, 先登力

絳四州防禦團練使、左監門衞上將軍。 使, 旦,明宗與行欽後至,明宗心頗慊之。 將兵爲前鋒。 李繼韜叛于潞州〔〕,莊宗遣明宗爲招討使,元行欽爲都部署 廷蘊至路,日已暮,即率兵百餘踰濠登城,城守者不能禦, 廷蘊以功遷羽林都指揮使、申懷沂三州刺史、金潁隨 開運 中,以疾卒。 廷蘊爲馬步軍都指揮 **遂破路** 州 明

安重 吾視汝貌 廷藴 重 武人,所識不過數字, 誨 屢言之,明宗以廷蘊破踏之隙,終恨之,故終不秉髦節。 必儒 人,可無隱也。」鳳以實對, 丽 平生重文士。 延藴 **嘗從明宗破梁鄆州**, **巫薦於明宗**。 後鳳貴為 延蘊素廉,歷七州 獲判官趙鳳, 相 數薦 延蘊於 廷蘊謂 卒

之日,家無餘貲。

### 馬全節

節爲馬步軍指揮使。明宗卽位,歷博單郢沂四州刺史、金州防禦使。 馬全節字大雅,大名元城人也。唐同光中,全節爲捉生指揮使。 廢帝時,蜀人攻金州, 趙在禮反鄴都,以全

州兵纔數百,全節散家財,與士卒堅守,蜀人去,廢帝召全節,以爲滄州留後。

裕,斬首三千級,生擒千餘人。承裕棄城去,審暉追至雲夢,執承裕及其兵二千人,全節斬 之矣。吾見天子,必訴此而後就刑。」全節懼,因殺承裕,高祖置而不問,徙全節鎭昭義。 千五百人,以其餘兵幷承裕獻于京師。承裕謂全節曰:「吾掠城中,所得百萬計,將軍皆取 兵三萬,使全節與安審暉討之,金全南奔。昇將李承裕守安州,全節與承裕戰州南,大敗承 晉高祖入立,卽拜全節橫海軍節度使,徙鎭安遠,代李金全。。金全叛附于李昪,高祖發

徙安國。從杜重威討安重榮,以功徙鎮義武。

月,契丹敗于戚城,引兵分道而北,全節敗之于定豐,執其將安暉。七月,徙廣晉尹,留守鄴 <u>距澶、魏之間,全節別攻白團城,破之,虜七百人。 克泰州,虜二千人,降其守將晉廷謙。</u> 自出帝與契丹交惡,全節未嘗不在兵間。開運元年,爲行營部虞候,契丹與晉大軍相 几

雜

傳

第三十

Ŧī.

馬全節

皇市四

Ħî.

都。 十月,杜重威爲招討使,以全節爲副,大敗契丹于衞村。

全節爲人謙謹 一,事母至孝,其臨政決事,必問法如何。 初,徙廣晉, 過元城,衣白襴謁其

縣令,州里以爲榮。

開運二年,徙鎭順國,未至而卒,年五十五,贈中書令。

### 皇甫遇

皇甫遇,常山眞定人也。 爲人有勇力,虬髯善射。 少從唐明宗征伐, 事唐爲武勝軍節

度使,所至苛暴,以誅斂爲務,賓佐多解官逃去,以避其禍

高行周爲北面行營都部署,遇爲馬軍右廂排陣使。 晉高祖時,歷義武、昭義、建雄、河陽四鎮,罷爲神武統軍。 是時, 青州楊光遠據城反, 契丹入寇,陷貝州 出帝 出帝以 乃遣李

節度使、馬軍都指揮使。

守貞及遇分兵守鄆州。

遇等至馬家渡,

契丹方將渡河助光遠,遇等擊敗之,以功拜義成軍

**欒城、柏鄉等九縣,南至邢州。** 開運二年,契丹寇西山,造先鋒趙延壽圍鎭州, 是時歲除,出帝與近臣飲酒過量,得疾,不能出征,乃遣北面 杜重威不敢出戰。 延壽分兵大掠, 攻破

收軍而南,契丹亦皆北去。是時,契丹兵已深入,人馬俱乏,其還也,諸將不能追,而從恩率 遇等退保黎陽,虜因得解去。 見天子! 疑報者詐,不欲往,審琦曰:「成敗天也,當與公共之,雖虜不南來,吾屬失皇甫遇,復何面目 與諸將怪遇視虜無報,皆謂遇已陷虜矣。已而有馳騎報遇被圍,安審琦率兵將赴之,從恩 戒彥超曰:「今日之勢,戰與走爾,戰尙或生,走則死也。 等死,死戰,猶足以報國。」張從恩 即與彥超躍馬入虜,取之而還。虜兵與遇戰,自午至未,解而復合,益出生兵,勢甚盛。遇 踣,得其僕杜知敏馬,乘之以戰。 **彦超率數千騎前視虜。** 行營都監張從恩會馬全節、安審琦及遇等禦之。從恩等至相州,陣安陽河南,遣遇與慕容 . 」卽引騎渡河,諸軍皆從而北,拒虜十餘里,虜望見救兵來,卽解去。 遇與審琦等 。遇渡漳河,逢虜數萬,轉戰十餘里,至楡林,爲虜所圍,遇馬中箭而 知敏爲虜所擒,遇謂彥超曰:「知敏,義士也,豈可失之!」

次自畫其名,卽麾兵解甲出降。。契丹遣遇與張彥澤先入京師,遇行至平棘,絕吭而死。 丹,伏兵幕中,悉召諸將列坐,告以降虜,遇與諸將愕然不能對。」重威出降表,遇等冤首以 三年多,以杜重威爲都招討使,遇爲馬軍右廂都指揮使,屯于中渡。」重威已陰送款契

嗚呼,梁亡而敬翔死,不得爲死節;晉亡而皇甫遇死,不得爲死事,吾豈無意哉!梁之

中, 備 矣,雖死不能贖也,豈足貴哉!君子之於人,或推以恕,或責以備。恕,故遷善自新之路廣,, 廣也,士卒初不知,及使解甲,哭聲震天,則降豈其欲哉!使遇奮然攘臂而起, 篡唐,用翔之謀爲多,由子佐其父而弑其祖,可乎?其不戮於斧鉞,爲幸免矣。 『則難得,難得,故可貴焉。 然知其所可恕,與其所可貴,豈不又難哉! 雖不幸不免而見害,猶爲得其死矣,其義烈豈不凛然哉!旣俛首聽命,相與亡人之國 殺重威 方晉兵之降 於坐

### 安彦威

鎭 揮使。 天平、宣武、成德,以彦威常爲牙將,以謹厚見信。 安彥威字國俊,代州崞縣人也。少以軍卒隸唐明宗麾下。 以從榮判六軍,彥威遷捧聖指揮使,領寧國軍節度使。 明宗入立, 皇子從榮鎭鄴,彥威爲護聖 彦威善射,頗知兵法。 明宗

民治隄。 丁母 晉高 憂 遷 祖入立,拜彥威北京留守,徙鎭歸德。是時,河決滑 哀毀過制。 西京留守,遭歲大饑,彥威賑撫饑民,民有犯法,皆寬貸之,饑民愛之,不忍流 出帝與契丹隳盟,拜彥威北面行營副都統,彥威悉以家財佐軍用。 州,命彦威塞之,彦威出私錢募

以疾卒于京師。

**彦威與安太妃同宗**, 出帝事以爲舅,彥威未嘗以爲言。 及卒,太妃臨哭,人始知同宗

也,當時益稱其愼重。

### 李瓊

之,又以所乘馬與高祖,而步護之,走十餘里,乃得免。 |祖衣與俱遯,至||劉李河而追兵且及,瓊浮水先至南岸,高祖至河中流, 馬踣,瓊以長矛援出 出 [涿州,遇契丹,與戰不勝,諸將各稍引去,而晉高祖獨戰不已,契丹漸合而圍之。 瓊引高 李瓊,滄州饒安人也。少爲騎將,與晉高祖隸唐明宗麾下。同光二年,契丹犯塞,明宗

揮使。 申二州刺史。出帝時,爲棣州刺史。楊光遠反,以書招瓊,瓊拒而不納。 明宗兵變于魏而南,瓊從高祖以三百騎先趨汴州。 高祖建國,以爲護聖都虞候,賜與金帛甚厚,而不與之官爵,瓊亦鬱鬱。 久之,拜相、 高祖爲保義軍節度使,以爲牙隊指 遷洺州團練使,又

爲護聖右廂都指揮使。

晉亡,契丹入京師,以瓊爲威州刺史,行至鄭州,遇盜見殺。

### 劉景巖

**晉高祖起兵太原,唐廢帝調民七戶出一卒爲義兵。** 行,景巖遣人激怒之,義兵亂,殺漢章,迎景巖爲留後。 劉景巖,延州人也。 其家素富,能以貲交游豪俊。 延州節度使楊漢章發鄉民赴京師, 晉高祖卽位,即拜景巖節度使 事高萬金爲部曲,其後爲丹州刺史。

奏皦隱己玉帶,皦坐貶商州上津令。皦懼景巖邀害之,道亡,匿山中。 景巖邠州,皦入拜補闕,而景巖又徙鎮保義,居未幾,又徙武勝。 景嚴信之,歲餘,其獲甚多。景嚴使皦朝京師,皦乃言:「景嚴不宜在邊,可徙之內地。」乃移 謂 邊地不可以久安,爲陳保名享利之策,言哪、涇多善田,其利百倍,宜多市田射利以自厚。 景巖從事熊皦,爲人多智,陰察景巖跋扈難制,懼其有異心,欲以利愚之,因語景巖,以 。景巖乃悟皦爲賣己,遂誣

日:「高郎一縣令,而有此州,其可保乎?」允權益惡之,而心又利其田宅,乃誣其反而殺之, 盛,党項司家族畜牧近郊,尤富疆,景巖與之往來,允權頗患之。允權妻歲時歸省,景巖謂 乃還故里。而州人逐密,立高允權,允權妻劉氏,景嚴孫女子也。 開運三年,景嚴罷武勝,以太子太師致仕,居華州。契丹犯京師,以周密鎭延州, 景嚴良田甲第、僮僕甚 景巖

### 年八十餘。

長子行踪,德州刺史,罷,留京師,亦被誅

次子行謙、允權婦翁也、爲奏言非劉氏子、遂免不誅。

### 校勘記

(1) 拜感德軍節度使 「感德軍」,貴池、南監、汪、南昌本同,汲、殿、蜀、鄂、劉校本作「威德軍」。 按

本史卷六〇職方考無此二軍。纂誤補卷三云:「考薛史本傳:『天福二年,出爲鄧州節度。』鄧州

于時爲威勝軍,此當是『威勝』之誤。」

 $\exists$ ) 薊門 貴池、汪本同、汲、殿、南昌、蜀、鄂、劉校本及薛史卷九○李承約傅作「薊州」。

(三) 李繼韜叛于潞州 薛史卷三五唐明宗紀載:同光二年四月,「潞州小將楊立叛,帝受詔討之」。通

《鑑卷二七三略同。 按|李繼韜已先一年誅死,此當是|楊立。

# 新五代史卷四十八

# 雜傳第三十六

### 盧文進

擊郭。 雖與,心常歉之也,因與亂軍殺存矩反。攻新州,不克,攻武州,又不克,遂奔于契丹,契丹使 行,行至祁溝關,聚而謀爲亂。 莊宗以屬其弟存矩。 盧文進字大用, 存矩募山後勁兵數千人,課民出馬,民以十牛易一馬,山後之人皆怨,而兵又不樂南 范陽人也。 存矩為新州團練使,統山後 文進有女幼而美,存矩求之爲側室,文進以其大將不敢拒, 爲劉守光騎將。 八軍。 唐莊宗攻范陽,文進以先降拜壽州刺史, 莊宗與劉鄰相拒於幸,召存矩會兵

守平州。

徙鎭 威勝,加同平章事, 明宗卽位,文進自平州率衆數萬歸唐,明宗得之,喜甚, 入爲上將軍,出鎭昭義,徙安遠。 以爲義成軍節度使。 居歲餘

雜傳第三十六 處文進 李金

全

自 杜 至 重 貴 營中別其將士,告以避契丹之意,將士皆再拜爲訣,乃南奔。 ,送款於李昪,昪遣兵迎之。文進 祖 立,與契丹約爲父子,文進懼不自安。 居數鎭,頗有善政,兵民愛之。 天福元年多,殺其行軍司馬馮知兆、副使 **昪以文進爲天雄統軍、宣** 其將行也,從數騎,

潤節

度使、

論 餘年、皆文進爲之也。 丹以中國 人無寧歲。 ,近代朝廷儀制、臺閣故事而已,未嘗言兵。 文進 織紅 身長七尺,狀貌偉然。 唐兵屯涿州, 工 一作無不備, 及其南奔,始屈身晦迹, 歲時饋運, 契丹由此益 自其奔契丹也,數引契丹攻掠幽、薊之間,虜其人民, 自瓦橋關 遭。 同光中, 後以左衞上將軍 至幽州 務爲恭謹, 契丹數以奚騎出入塞上, 嚴兵斥候, 禮接 文 卒于金陵 士, ,常苦鈔奪, 謙謙若不足, 其所談 爲唐 攻掠瀌、趙, 患者十 教契

### 李金全

獻, 爲 刺 明宗謂曰:「卿患馬多邪,何進獻之數也。且卿在涇州治狀如何,無乃以馬爲事乎。」途 史。 李金全, 天成中,為彰義軍 其先出 於吐谷渾。 節度使口,在鎭務爲貪暴。 金全少爲唐明宗廝養,以曉勇善騎 罷歸, 獻馬數 射, 常從明宗 + 匹, 居 數 戰 日, 伐,以功 又以

全慚不能對。徙鎭橫海。久之,罷爲右衞上將軍。

全未至,襄州安從進意暉必走江南,以精兵遮其要路。暉聞金全來,果南走,爲從進兵所 招暉曰:「暉降,以爲唐州刺史。」又以信箭諭安州,不戮一人,且戒金全曰:「無失吾信。」金 晉高 祖時,安州屯防指揮使王暉殺節度使周瓌,高祖遣金全將騎兵千人以往,下詔書

將軍違韶而殺降,亦將不免也!」高祖不能詰。 曰:「王暉首亂,猶賜之信誓,以爲刺史;我等何罪,反見殺邪?若朝廷之命,何以示信?苟 ||**暉**之亂也,大掠城中三日,金全利其所掠貲,因擒其將武克和等十餘人殺之,克和呼 。即以金全爲安遠軍節度使。

金全後至,得暉餘黨數百人,皆送京師。

者乎?宜納仁沼而遣漢榮。」漢榮聞之,夜使人殺令圖而耽仁沼,仁沼舌壞而死。 凡所賜與甚厚,悉以分故人、親戚之貧者,此天下之廉士也。爲人如此,豈有爲人謀而不善 晏球求其人,欲厚賞之,仁沼退而不言,此天下之忠臣也。都敗,晏球遣仁沼獻捷于京師, 晏球攻王都於中山,都遣善射者登城射晏球,中兜牟,仁沼從後引弓,射善射者,一發而斃, 賈仁沼代之,且召漢榮。漢榮教金全留己而不遣,金全客龐令圖諫曰:「仁沼昔事王晏球, 金全左都押衙明漢榮用事(11),所爲不法,高祖患之,不欲因漢榮以累功臣,爲選廉吏

|天福五年夏,高祖以馬全節代金全。 而仁沼二子欲詣京師訴其父冤, 漢榮大懼, 給金

停

第三十

六

李金全

楊思樹

裕入安州, 金全遂南奔, 行至汉川, 引頸北望, 涕泣而去。 全 召公對獄也。」金全信之,遂叛,送款于李昪。 曰:「前 日天子召漢榮,公違詔而不遣。 仁沼之死, 其二子將訴于朝。 高祖發兵三萬授 昇以金全為天威統 全節討之。 今以全節 軍 昇遣其將李承 代公, 是

諸將皆銳於攻取, 漢隱帝時,李守貞反河中,乞兵於昪,金全爲昪潤州節度使,與查文徽等出沭陽。 金全獨以謂遠不相及,不可行,乃止。 其後亦不復用,不知其所終。

### 楊思權

之,以其事聞。 思權曰:「公有甲士,而思權在,何患也 容語從厚之善,以諷勉之。從榮不悅,告思權曰:「天下共賢河南而非我,我將廢矣,奈何?」 素驕,所爲多不法。 明宗 楊思權, 時,秦王從榮爲河東節度使,以馮贇爲副, **邠州新平人也。** 明宗召思權還京師,以從榮故,亦不之責也。 是時,宋王從厚爲河南尹。 事梁爲控鶴右第一軍使。 一. 」乃勸從榮招募死士、增利器械 以 爲 思權爲北京步軍都指揮 從厚年少,謙恭好禮。 唐莊宗滅梁,以爲夾馬都指揮使。 後爲右羽林都指揮使,將兵戍 使以佐佑之。 明宗陰遣人從 備。 馮贇 .患

「臣以赤心奉殿下,殿下事成,願不以防禦、團練使處臣。」乃出一紙於懷中曰:「願志臣姓名 之,而虔釗督戰甚急,軍士反兵逐虔釗,思權因呼其衆曰:「路王眞吾主也!」即擁軍士入城 使 尹暉攻城東,破其兩關城。 暉聞思權已降,亦壓其軍使解甲,由是諸鎭之兵皆潰。 路王從珂反鳳翔,與元張虔釗會諸鎭兵討賊。 從珂登城呼外兵,告以己非反者,其語甚哀,外兵聞者皆悲 諸鎭兵圍鳳翔, 思權與暉入見從珂,思權前日: 思權攻城西,嚴衞指揮

師, 廢帝入立, 拜思權靜難軍節度使。後爲右龍武統軍、左衞上將軍。 天福八年, 卒于京 以爲驗。」從珂卽書曰:「可邪寧節度使。

贈太傅。

州節度使。 指 揮 ·使,恃先降功,不爲<u>高</u>祖屈, 尹暉者、魏州大名人也。 晉高祖入立,罷爲右衞大將軍。 從廢帝入洛陽,而晉高祖來朝,與暉遇于道。 馬上橫鞭揖之,高祖怒, **范延光反,以書招暉,暉懼,** 白廢帝暉不可 與名藩。 出奔淮南,爲人所 暉時猶爲嚴衞 乃以 為應

有子勳。

### 王弘贄

宗愛子,公,愛壻也,公於此時不能報國,而反問大臣、國寶所在,公亦助賊反邪? 旭 以 旭 刀刺高祖, 寶、乘輿、法物從乎?」曰:「無也。」弘贄歎曰:「所謂大木將顚,非一繩所維。 吾戚屬也,何以圖全?」弘贄曰:「天子避狄,自古有之,然將相大臣從乎?」曰:「無也。」「國 祖 卽 上謁於驛舍。 百騎出奔,而將相大臣無一人從者,則人心去就可知也。 日:「衞州刺史王弘贄,宿將也,且多知時事,請就圖之。」即馳騎前見弘贄曰:「主上危迫, 下馬慟哭, 謂敬瑭曰:「路王反, 將朝于京師,騶呵前導者不避, 潞王從珂反於鳳翔,擁兵東至陝。 王弘贄,不知其世家何人也。 高祖親將陳暉扞之,守榮與暉戰死,弘進亦自刎。 高祖且以弘贄語白愍帝。 愍帝遣左右叱之,對曰:「成德軍節度使石敬瑭也。」愍帝 康義誠等皆叛我,我無所依,長公主教我逆爾于路。」高 唐明宗時,爲合階二州刺史、右千牛衞將軍、衞州 愍帝懼,夜以百餘騎出奔,至衞州 弓箭庫使沙守榮、奔弘進前謂高祖曰:「主上,明 雖欲興復,其可得乎!」卽從高 高祖因盡殺帝從兵,獨留帝于 東七八里,遇晉高 今萬乘之主, 」乃抽佩 刺史。

驛而去。

衞州 酒以慰無憀。」愍帝受之,由是日獻一觴。及巒持酖至,因使酒家獻之,愍帝飮而不疑,遂崩。 ,弘贄令市中酒家獻酒,愍帝見之,大鷲,遽殞于地,久而蘇,弘贄曰:「此酒家也,願獻 弘贄奉帝居于州廨。 弘贄有子巒,爲殿直, 廢帝入立,造巒持鴆與弘贄。 杒, 愍帝在

<u>臥贄後事晉爲鳳翔行軍司馬,以光祿卿致仕,卒,贈太傅。</u>

### 劉審交

僭號,以審交爲兵部尚書,守光敗,歸于太原,唐莊宗以爲從事。 劉審交字求益,幽州文安人也。 少略知書,通於吏事,爲唐興令,補范陽牙校。 其後趙德鈞鎭范陽, 劉守光 北面

轉運使馬紹宏辟審交判官。

史,以母老去官。母喪,哀毀過禮,不調累年。 王晏球討王都,以爲轉運供軍使。 定州平,拜遼州刺史。復爲北面轉運使,改慈州

租,審交曰:「租有定額,而天下比年無閑田,民之苦樂,不可等也。」途止不檢,而民賴以不 鹽鐵爲三使,歲餘,三司益煩弊,乃復合爲一,拜審交三司使。 晉高祖即位,楊光遠討范延光於魏州, 審交復爲供軍使。 議者請檢天下民田,宜得益 是時,晉高祖分戶部、度支、

**涼第** 

擾。 遷右 衞上將軍、 陳州防禦使。 出視民田, 見民耕器薄陋, 乃取河北耕器爲範, 爲民更

安從進 平,徙審交襄州,又徙青州,皆有善政。 罷還。

兵在 罷審交不用。 守城,當爲燕謀,然事勢不可爲也。 起義太原,從益召高行周以拒高祖,行周不至。 |京師者猶數千,可以城守而待行周,淑妃不從,議未決。 契丹犯京師,留蕭翰而去,翰復以審交爲三司使。 太妃語是。」從益乃罷不設備,遺人西迎高祖。 從益 母王淑妃與羣臣謀迎高祖,或以謂燕 已而翰召許王從益守京師。 審交進日:「余燕人也、 高祖至, · 今爲 燕 漢高 궲

近郊, 隱帝時,爲汝州防禦使,有能名。 使民得歲時祠祭。 韶特贈太尉, 起祠立碑。 乾祐三年卒,年七十四。 州人聚哭柩前,上疏乞留葬

### 王周

王周,魏州人也。 少以勇力從軍,事唐莊宗、 明宗,爲裨校,以力戰有 功拜 刺史。

涇州節度使。 晉 福中,從楊光遠討范延光於魏州 涇州張彥澤爲政苛虐,民多流亡,周乃更爲寬恕,問民疾苦,去其苛弊二十餘 又從杜重威討安重榮於鎭州, 皆有 功。 歷貝州、

事,民皆復歸。 歷遷武勝、保義、義武、成德四鎮, 皆有善政。 定州橋壞,覆民租車, 周 日:

「橋梁不修,刺史過也。」乃償民粟,爲治其橋。

以周爲武勝軍節度使。 城降,何面目南行見人主興士大夫乎!」乃劇飲,求刀欲自引決,家人止之,迫以出降。契丹 杜重威降契丹,契丹兵過鎭州,臨城呼周使出降,周泣曰:「受晉厚恩,不能死戰而以

漢高祖入立,徙鎭武寧。卒于鎭,贈中書令。

## 高行周 行建附

弟某爲後軍都指揮使,高氏兄弟分掌燕兵。 克用臨決謂仁恭曰:「思繼兄弟,勢傾一方,爲 皆叛,乃棄城走。克用以劉仁恭守幽州,以其兄某爲先鋒都指揮使,思繼爲中軍都指揮使, 幽州節度使李匡威戍將。 有兵三千,此後患也,不如遣人招之。思繼爲吾用,則事無不成。」克用遣人招思繼兄 燕俗重氣義,思繼等聞晉兵爲匡威報仇,乃欣然從之,爲晉兵前鋒。匡儔聞思繼兄弟 高行周字份質,嬀州人也。 世爲懷戎戍將。父思繼。 思繼兄弟皆以武勇雄於北邊,爲

雜

傳

滅患 者 克用 ,必高氏 以責仁恭,仁恭以高氏爲訴, 也, 宜善爲防。」克用留晉兵千人爲仁恭衞。 由是晉盡誅思繼兄弟 而晉兵多犯法, 思繼等數誅殺

守也,今劉公救兵不至,奈何? 何顧 「吾所憚 馬山 職 在 也。 武 當從我行,不然, 州 後, 仁恭 莊 吾子耶 者行珪 聞 卽 時,歷朔忻 被 以其兄某之子行珪爲牙將, 守光 夜縋 囚, 一一行欽 也。」乃遣人之懷戎, 守光立, 行周 且見圍 嵐 即以兵圍 馳入晉見莊宗, 且殺公子。」行 三州 以行珪為武州 即率所牧馬赴援, 刺 史、大同軍 行珪。 可殺吾以降晉。」父老皆泣 珪 得行珪子繁之。 莊宗因遣明宗救武州 月餘, 謝曰:「與君俱劉公將, 而思繼子行周 刺 節 史。 度使。 mi 行珪城中 麾下兵扳于道, 其後守光背晉, 明宗入立,徙鎮 年十餘歲, 食盡, 兵過武州, 一,願以 召其州人告曰:「吾非不爲父老 比至, 而忍叛之。吾當爲劉氏 推 晉兵攻之。 死守。 亦收之帳下, 行欽爲幽 招行珪 威勝、 行欽 是時, 日:「守光 已解去, 州留後, 守光將元行 行周 稍長, 行珪 適 可取 行欽 從行 補以 也, 欽 乃 而 尙 代 珪 牧 軍

兵 M 有 殺 之。 謀 行珪 叛 者 性 因 ,行珪先覺之,因潛徙庫兵于佗所。 貪鄙,所爲 誣 奏延策 同反,丼其子皆見殺,天下 多不法,副 使范延策 ,爲人剛直, ·冤之。 戍兵叛, 數規諫之,行珪 行珪卒于鎮 趨庫劫兵 、無所 鮰 得 不聽, 太 川 乃潰 銜之。 已而 追 戍

當 行珪之降晉也, 行周隸明宗帳下, 初爲裨將, 趙德鈞識之,謂明宗曰:「此子貌厚而

軍中皆欲止不進,行周曰:「此天贊我也!即人恃雨,不備吾來,宜出其不意。」卽夜馳涉濟 小心,佗日必大貴,宜善待之。」梁、晉軍河上,莊宗遣明宗東襲鄆州, 行周將前軍, 夜遇雨,

入其城,鄆人方覺,遂取之。莊宗滅梁,以功領端州刺史,遷絳州。

明宗時,從平朱守殷,克王都,遷潁州團練使、振武軍節度使。歷鎭彰武、昭義。

晉高祖時,爲西京留守,徙鎭天雄。 安從進叛,以行周爲襄州行營都部署,討平之,徙

鎭歸德。 契丹滅晉,留蕭翰守汴,翰又棄去,召唐故許王從益入汴。 出帝時,代景延廣爲侍衞親軍都指揮使。是時,李彥韜、馮玉等用事,乃求歸鎭。 而漢高祖起太原,從益遣人

召行周,將以拒漢,行周歎曰:「衰世難輔,況兒戲乎 '!」乃不從。

漢高祖入京師,加行周守中書令,徙鎭天平軍, 封臨清王。 周太祖入立,封齊王。

卒,

贈尙書令,追封秦王。有子懷德。

### 白再榮

**| 榮從契丹北歸,至鎭州,契丹留麻荅守鎭州而去,晉人從者多留焉。** 白再榮,不知其世家何人也。少爲軍卒。唐、晉之間,爲護聖指揮使。 居未幾,李筠、何福進 契丹犯京師,再

傳第三十

六

白再榮

安叔千

名次最高,乃推爲留後。

等謀逐麻荅,使人召再榮,再榮遲疑不欲往,軍士迫之,乃往,共攻之。 麻荅走,諸將以再榮

攻再榮於第,悉取其財。 已而前啓曰:「士卒嘗事公隸麾下,一旦無禮如此,亦復何面見公 所爲,非獨公力也。 相何在,何以對之?」再榮默然,乃止。 而悉拘嘗事麻荅者取其財,鎭人謂之「白麻荅」。 而求物,又欲害拯取其貲。李穀謂曰:「公等親被契丹之苦,憂死不暇,然逐麻荅者,乃衆人 `」乃斬之,攜其首而去,家人以帛贖而葬之。 漢高祖卽位,拜再榮爲留後,遷義成軍節度使。罷還京師。 再榮出於行伍,貪而無謀。 今纔得生路,而遽殺宰相,此契丹尙或不爲,然它日至京師,天子問宰 是時,李崧、和凝等皆隨契丹留鎭州, 周太祖以兵入京師,軍士 再榮以兵環其居,迫

### 安叔千

安國、建雄四鎮。 ,拜秦州 安叔千字胤宗,沙陀三部落人也。少善騎射,事唐莊宗,以爲奉安指揮使。明宗時與討 刺史。 叔千狀貌堂堂,而不通文字,所爲鄙陋,人謂之「沒字碑」。 從擊契丹,爲先鋒都指揮使,以功拜昭武 (軍節度使(三)。 歷 一靜難、横海

夷言,德光勞曰:「是安沒字否?汝在邢州,已通誠款,吾今至此,當與汝一喫飯處。」叔千再 晉出帝時,爲左金吾衞上將軍。 契丹犯京師, 晉百官迎見耶律德光于赤岡, 叔千出班

拜。乃以爲鎭國軍節度使。

漢高祖入立,罷歸京師,自以常私附契丹,頗懷媿懼。以太子太師致仕。

歸于洛陽,卒,年七十二。 周太祖兵入京師,軍士大掠,叔千家貲已盡,而軍士意其有所藏者,箠掠不已。傷重,

### 校勘記

(二)為彰義軍節度使 「彰義」,各本原作「彰武」,通鑑卷二七八作「彰義」。 薛史卷九七李金全傳謂

州」,則彰武當是彰義之誤。」今按薛史下文亦有「卿在涇州」之語,此是彰義無疑。據改。 「天成中授涇州節度使」。纂誤補卷三云:「按職方考,延州彰武,涇州彰義。 此傳下云『卿在涇

 $\Xi$ 明漢榮 卷四三八及通鑑卷二八一均作「胡漢筠」。 汪本同,他本及馬令南唐書卷一二李金全傳作「胡漢榮」,薛史卷九七李金全傳、冊府

在利州 以功拜昭武軍節度使 蜀地,為唐命所不及; 振武在朔州,屬唐境。 薛史卷一二三安叔千傳「昭武」作「振武」。 此當作「振武」。 按本史卷六〇職方考,

雅

傳第三

十六

校

勘

J<sub>n</sub>

# 新五代史卷四十九

# 雜傳第三十七

### 翟光鄴

邑人守永定驛,晉人攻之,踰年不能下,景珂卒戰死。 翟光鄴字化基,濮州鄄城人也。 其父景珂,倜儻有膽氣。 光鄴時年十歲,爲晉兵所掠,明宗愛 梁、晉相距于河上,景珂率聚

其穎悟,常以自隨。

光遠,以光鄴爲靑州防禦使。光鄴招輯兵民,甚有恩意。契丹滅晉,遣光鄴知曹州。 光鄴事唐,官至耀州團練使。 晉高祖時, 歷棣沂二州刺史、西京副留守。 出帝已破楊 許王

從益入汴,以爲樞密使。漢高祖入京師,改右領軍衞大將軍、左金吾大將軍,充街使。

祖入立,拜宣徽使、樞密副使,出知永興軍,卒于官。

雜

**傳第三十七** 

翟光鄴

馮

m

光鄴爲人沈默多謀,事繼母以孝聞。 雖貴,不營財產,常假官舍以居,蕭然僅蔽 風雨。

寛靜 雍 立祠,不許。 陸 親族、粗衣 休息爲意 公糲食, 病亟,戒其左右,氣絕以尸歸洛,無久留以煩軍府。 與均有無,光鄴處之晏然,日與賓客飲酒聚書爲樂。其所臨政, 既卒,州人上書乞留葬 務以

### 馮暉

蜀,累遷變、興二州刺史。 董璋反東川,暉從晉高祖討璋,軍至劍門,劍門兵守,不得入,暉 從佗道出其左,擊蜀守兵殆盡。會晉高祖班師,拜暉澶州刺史。 亡入梁軍,王彥章以暉曉勇,隸之麾下。 馮 暉, 魏州 人也。 爲効節軍卒,以功遷隊長。 。梁亡,莊宗赦暉不問。從明宗討楊立、 唐莊宗入魏,與梁相距于河上,暉以隊長 魏王繼岌平

必以兵。 餘區,多出俸錢,民不加賦,管內大治,晉高祖下韶書褒美。 萬,自關以西,轉輸供給,民不堪役,而流亡甚衆。青岡、土橋之間,氐、羌剽掠道路,商旅行 節度使,徙鎭靈武。 天福中, 范延光反魏州, 遣暉襲滑州, 不克, 遂入于魏, 爲延光守。 暉始至,則推以恩信,部族懷惠,止息侵奪,然後廣屯田以省轉餉,治倉庫、亭館千 靈武自唐明宗已後,市馬糴栗,招來部族,給賜軍士,歲用度支錢六千 已而出降,拜義 成軍 皇

闸

睴

晉見暉馬多而得夷心,反以爲患,徙鎭靜難,又徙保義。 起第於城中,賜予豐厚,務足其意。彥超旣留,而諸部族爭以羊馬爲市易,期年有馬五千匹。 党項拓拔彥超最爲大族、諸族嚮背常以彥超爲去就。 歲中,召爲侍衞步軍都指揮使,領 暉之至也,彥超來謁,遂留之,爲

河陽節度使,暉於是始覺晉有患己意。

至中書令,封陳留王。廣順三年卒,追封衞王。子繼業。 族求戰,即與之戰而敗走,諸族遂不敢動。「暉至靈武,撫綏邊部,凡十餘年,恩信大著。 恃也,吾能殺之,其餘豈敢動哉! 皆殺之。裨將藥元福曰:「今去靈武尙五六百里,奈何?」暉笑曰:「此夷落之豪,部族之所 劍邪?吾聞王氏劍天下利器也。」俯而取諸腰間,若將玩之,因擊殺首領者,其從騎十餘人 衞。」乃募得兵千餘人,行至悔戍,蕃夷稍稍來謁,暉顧首領一人,指其佩劍曰:「此板橋王氏 靈武,失夷落心,大爲邊患。 暉卽請曰:「今朝廷多事,必不能以兵援臣,願得自募兵以爲 是時, 出帝昏亂,馮玉、 李彥韜等用事, 暉曲意事之, 」已而諸族皆以兵扼道路,暉以言譬諭之,獨所殺首領一 因得復鎭靈武。時王令温鎭 官

### 皇甫暉

卒擢拜陳州刺史,終唐世常爲刺史。 萬家足矣。」又盡殺之。及明宗入魏,遂與在禮合謀,莊宗之禍自暉始。 州以入于魏,在禮以暉爲馬步軍都指揮使。暉擁甲士數百騎,大掠城中, 姓,曰:「姓國。」暉曰:「吾當破國!」遂盡殺之。 又至一家,問其姓,曰:「姓萬。」嘽曰:「吾殺 疆,遂斬之,推一小校爲主,不從,又斬之,乃攜二首以詣裨將趙在禮, 在禮從之, 乃夜焚貝 上,天下一家,精甲銳兵,不下數十萬,公等各有家屬,何故出此不祥之言?」軍 俱行。不幸天子怒吾軍,則坐據一州,足以起事。」 仁晟曰: 「公等何計之過也! 「唐能 天下已定,而天子不念。魏軍久戍之勞,去家咫尺,不得相見。今將士思歸不可遏,公當與我 失政,天下離 破梁而得天下者,以先得魏而盡有河北兵也。 甫 暉 魏州 |暉爲人聽勇無賴 人 也。 爲魏軍卒,戊瓦 、,夜博軍中,不勝,乃與其徒謀爲亂,劫其都將楊仁晟曰: 橋關,歲滿當代歸,而留屯貝州。是時, 魏軍甲不去體、馬不解鞍者十餘年,今 明宗卽位,暉自軍 至一民家, 十士知不 唐莊宗已 今英主在 問其 回

千與之,而飮以酒,暉飮自若,不謝而去。久之,爲密州刺史。 |陂,卒成大事,然由我發也,公今富貴,能卹我乎? 不然,禍起坐中!」|在禮懼,遽出器幣數 晉天福中, 以衞將軍居京師。 在禮已秉旄節, 罷鎭來朝, 暉往候之曰:「與公俱起甘

契丹犯闕,暉率其州人奔于江南,李景以爲歙州刺史、奉化軍節度使,鎭江州。 周師征

暉金瘡被體,哀之,賜以金帶、鞍馬,後數日卒。 准 景以暉爲北面行營應援使,屯淸流關, 爲周師所敗, 拜鳳左屯衞上將軍。 井其都監姚鳳皆被擒 世宗召見,

### 唐景思

伐蜀 出帝時,契丹攻陷貝州,景思爲趙延壽所得,以爲壞砦使。 漢高祖時,爲鄧州行軍司馬,後爲沿淮巡檢。 唐景思,秦州人也。 景思為蜀守固鎖 幼善角觝,以屠狗爲生。 繼岌兵至,景思以城降, 拜興州 後去爲軍卒, 刺史。 契丹滅晉,拜景思亳州防禦 累遷指揮使。 晉高 祖時,爲貝州行 唐魏王繼岌 軍司

聞景思被告,乃見<u>弘</u>肇,願先下獄明景思不反,<u>弘</u>肇憐之,送知權獄中, 驗,景思曰:「我家在此,請索之。有錢十千,爲受外路。 則殺之,不然將失之也。」吏至, 景思與李景交通,而私畜兵甲。 衣笥,軍籍、糧簿而已。 漢法酷,而史弘肇用事,喜以告訐殺人。 吏閔而寬之, 景思迎前,以兩手抱吏呼冤,請詣獄自理。 弘肇遣吏將三十騎往收景思, 景思請械送京師以自明。景思有僕王知權在京師 景思有奴, 嘗有所求不如意, ' 有甲一屬,爲私畜兵。」 吏索之,惟 奴謂吏曰:「景思勇者也, 日勞以酒食。 即馳見弘肇, 吏引奴與景思 景思 得

雑

傳第三

既械就道,潁、亳之人隨至京師共明之。 弘肇乃鞫其奴,具伏,即奏斬奴而釋景思。

周 師伐淮南,以功領饒州刺史,遷濠州刺史,兵攻濠州,以戰傷重卒,贈武淸軍節度使。 後從世宗戰高平, 世宗以所得漢降兵數千爲効順指揮, 以景思爲指揮使, 復戍淮上。

### 王進

都指揮: 指揮。 京師,往返不過五六日,由是愈親愛之,累遷奉國 招置麾下。 王 使。 進, 漢高祖爲侍衞親軍指揮使,以進爲軍校。 幽州良鄉人也。 歷汝、鄭二州防禦使、彰德軍節度使。 **彥超鎭安遠軍,軍中有變,遣進馳奏京師,明宗怪其來速,嘉其足力,以** 爲人勇悍,走及奔馬。 軍都指揮使。 高祖鎭河東,因以之從,每有急,遣 顯德元年秋日,以疾卒,贈太師 少聚徒爲盜,鄉里患之,符查超遣人以路 從周太祖 起魏,遷虎捷右廂 進 隸 寧衞 馳

〇 一本作初

其所與俱勇夫悍卒,各裂土地封侯王,何異豺狼之牧斯人也!雖其附託遭遇,出於一時之 鳴 呼 ļ 予述舊史, 至於王進之事, 未嘗 不廢書而數曰:甚哉, 五代之君, 皆武 入崛起;

軍卒,未嘗有戰功,徒以幸會漢興,遂秉旄節。 漢高祖爲河東節度使,以思爲牢城指揮使。高祖入立,領武勝軍節度使,徙鎭昭義。 賢人君子之在下者,可勝道哉!可勝道哉! 人常相上下,視在上者如進等,則其在下者可知矣。 予書進事,所以哀斯人之亂,而見當時 國,如更戍長無異,蓋其輕如此,況其下者乎!如進等者,豈足道哉!易否泰消長,君子小 者歟?當此之時,爲國長者不過十餘年,短者三四年至一二年。天下之人,視其上易君代 而輕歟?抑因緣僥倖,未始不有,而尤多於亂世,旣其極也,遂至於是歟?豈其又有甚於是 節,何其甚歟!豈非名器之用,隨世而輕重者歟?世治則君子居之而重,世亂則小人易得 然獨必皆橫身陣敵,非有百夫之勇,則必一日之勞。 常思字克恭,太原人也。初從唐莊宗爲卒,後爲長劍指揮使。歷唐、晉爲六軍都虞侯。 初,思微時,周太祖方少孤無依,食于思家,以思爲叔,後思與周太祖俱遭漢以取富貴。 常思 在路州五年,以聚斂爲事,而性鄙儉。 至如進者,徒以疾足善走而秉旄 思起

周太祖已卽位,每呼思爲常叔,拜其妻,如家人禮。廣順三年,徙鎭歸德,居三年來朝行〕,

雜

傳

第三十

-6

常 思

孫 方 頼

五六〇

又徙 韶宋州悉蠲除之。 平盧,思因啓曰:「臣居宋,宋民負臣絲息十萬兩,願以劵上進。」太祖頜之,卽焚其劵, 思居青州,踰年得疾,歸于洛陽,卒,贈中書令。

### 孫方諫

爲尼族人,卽繼行其法,堡人推以爲主。 中,以佛法誘民,民多歸之。 孫方諫, 鄭州清苑人也。 。後尼死,堡人言其尸不朽,因奉而事之。尼姓孫氏,方諫自以 初,定州西北有狼山堡,定人常保以避契丹,有尼深意居其

求不得,乃北通契丹。 晉出帝時,義武軍節度使惡方諫聚徒山中,恐爲邊患,因表以爲遊奕使。方諫因有所 契丹後滅晉,以方諫爲義武軍節度使。 已而徙方諫於雲中,方諫不

受命,率其徒復入狼山。

漢高祖起,契丹縱火燒定州,虜其人民北去。 方諫聞之,自狼山入,據之以歸漢,

嘉之,卽拜方諫義武軍節度使。

至洛得疾,徙鎮匡國,卒于洛陽,年六十二,赠太師。 周太祖時,徙鎭鎭國,以其弟行友爲定州留後。 世宗攻太原,方諫朝于行在,從還京,

(1) 廣順三年徙鎮歸德居三年來朝 按廣順盡三年,「居三年」,則爲顯德三年。而據薛史卷一二九

常思傳, 思於廣順二年來朝, 顯德元年死。 又考本史卷一一及薛史卷一一三周太祖紀, 周太祖

亦死于顯德元年。

此處紀年顯誤。

雜

傳 箏 Ξ + -1:

校

坳 38

# 新五代史卷五十

# 雜傳第三十八

#### 王峻

之。 方用事,筠因以峻遺嚴。 梁亡,嚴族誅,峻流落民間。 晉高祖滅唐,殺延期,是時漢高祖從晉起兵,因悉以延期貲產賜之,峻因得事漢高祖。 高祖 王峻字秀峯,相州安陽人也。父豐,爲樂營將。 鎭河東,峻爲客將。 高祖卽位,拜峻客省使。 租庸使趙嚴過筠家,筠命峻歌佐酒,嚴見而悅之。 峻少以善歌事梁節度使張筠。 久之,事三司使張延朗,延朗不甚愛 漢遣郭從義討趙思綰,以峻監其軍。 是時巖 唐莊宗

累遷宣徽北院使。

71

傳

第

=

十八八

王峻

等遂與太祖 周 太 祖 奉兵 鎭天雄軍,峻爲監軍。 (犯京 師。 太祖監國,以漢太后命拜峻樞密使。 漢隱帝已殺大臣史弘肇等, 又遺人殺周太祖及峻等, 太祖將兵北出, 至澶州 返 峻

耵

嚮京 THE THE 時 太祖已遺 馮道迎湘陰公贇于徐州, 而漢宗室蔡王信在許州。 峻與王殷

遺侍衞馬軍指揮使郭崇率兵之宋州、 前申州刺史馬鐸之許州以何變,

信

分兵扼之,使吾過此,可知其必敗也。」峻軍去晉州一舍,旻聞周兵大至,卽解去。 待之?」守素馳還,具道峻言。是時,太祖已下詔西幸,聞峻語,遽自提其耳曰:「幾敗吾 德以加之,豈宜輕舉!而兗州慕容彥超反迹已露,若陛下出汜水,則彥超入京師,陛下何以 劉旻兵銳亦未可當,臣所以留此者,非怯也,蓋有待爾。 追之,峻猶豫不決。 行營都部署,得以便宜從事。 . 」乃止不行。|峻軍出自絳州,前鋒報過|蒙院,|峻喜,謂其屬曰:「蒙院,晉、|絳之險也,|旻不 太祖遣使者翟守素馳至陝州,諭峻欲親征。峻屛左右謂守素曰:「晉州城堅不可近,而 太祖 入立,拜峻右僕射、門下侍郎、同中書門下平章事,監修國史。 明日,遣騎兵追旻,不及而還。 別遣陳思讓、康延沼自烏嶺出絳州與峻會。 且陛下新卽位,四方藩鎮,未有威 劉旻攻晉州, 峻至陝州, 諸將皆欲

從討慕容彥超,爲隨駕都部署,率衆先登。

,不如志,言色輒不遜,太祖每優容之。 峻 與太祖俱起于魏, 自謂佐命之功,以天下爲己任。 |峻年長於|太|祖二歲,往往呼峻爲兄, 凡所論 請,事無大小,期於 或稱其字, 必得,

外所知,懼以漏 雜 傳 第 = 落得罪。 + 八 王 峻 Ŧ. 舣 π

不出,吾當自往候卿。」峻曰:「車駕若來,是致臣有不測也。」然殊無出意。 居數日,諸鎭皆馳騎上峻書,太祖大駭。峻連章求解,因不視事,太祖遣近臣召之曰:「卿若 心忌之。 由是益 自破慕容彥超還,即求解樞密以探上意,太祖慰勞之。峻多發書諧鎭,求爲保薦, 横。 鄭仁誨、李重進、向訓等,皆太祖故時偏裨,太祖初卽位,豫抑未欲進用,而峻 樞密直學士陳同

|峻必出矣。」太祖僶俛從之。|峻聞太祖且來,遙馳入謁。

與峻相善口,太祖卽遣同召峻。

同還奏曰:「峻意少解,然請陛下聲言嚴駕,若將幸之,則

曰:「宮室已多,何用此爲?」太祖曰:「樞密院屋不少,卿亦何必有作? 峻於樞密院起廳事,極其華侈,邀太祖臨幸,賜予甚厚。 太祖於內園起一小殿,峻輒奏 ?」峻慚不能對。

從之。 曰:「峻凌朕,不能忍 論請不已,語漸不遜。 峻乃退。 峻爲樞密使兼宰相,又求兼領平盧。 又請用顏衎、陳同代李穀、范質爲相,太祖曰:「進退宰相,豈可倉卒?當徐思之。」峻 太祖遂不能忍,明日 ! 」即貶商州 日亭午,太祖未食,峻爭不已,是時寒食假,太祖曰:「俟假開,當爲 司 馬,卒于貶所。 御便殿、召百官皆入,即幽峻於別所。 已受命,暫之鎭,又請借左藏庫綾萬匹,太祖皆勉 太祖見馮道, 卿

峻 已被黜 ,太祖以峻監修國史,意其所書不實,因召 峻貶後,李瀔監修,因請命近臣錄禁中事付史館,乃命樞密直學士 史官取日曆讀之,史官以禁中事非

新 Ħ. 代 史 卷 五 +

就 樞密院錄送 之史館 自 此

#### 王殷

王殷,大名人也。 少爲軍卒,以軍功累遷靈武馬步軍都指揮使。 唐廢帝時, 從范延光

討 張令昭于魏,以功拜祁州刺史。 晉天福中,徙原州刺史。

母責之,殷卽取杖授婢僕,自答於母前。母亡服喪,晉高祖詔殷起復,以爲憲州刺史,殷乞 殷事母以孝聞,欲與人游,必先白母,母所不可者,未嘗敢往。 及爲刺史,政事有小失,

終喪。 服除,出帝以爲奉國右廂都指揮使。

後從漢高祖討杜重威,先登力戰,矢中其腦,鏃自口出而不死, 高祖嘉之,以爲侍衞步

軍 都指揮使,領寧江軍節度使。

州 仍領親軍,自河以北皆受殷節度。 祖,遂起兵反。 又韶郭崇殺周太祖于魏。 契丹犯邊, 太祖入立,拜侍衞親軍都指揮使,出爲天雄軍節度使、同中書門下平章事 漢遣殷以兵屯澶州。 韶書至澶州,弘義恐事不果,反以告殷,殷遣人馳至魏告周太 殷頗務聚斂,太祖聞而惡之,遣人謂之曰:「吾起魏時,帑 隱帝已殺楊邠等, 詔鎮寧軍節度使李弘義殺殷于澶

廩儲畜豈少邪? 汝爲國家用,足矣。」殷不聽。

御滋德殿,殿入起居,即命執之,削奪在身官爵, 兵柄,職當警衞,出入多以兵從,又求兵甲,以備非常。是時,太祖臥疾,疑殷有異志,乃力疾 壽(三),太祖許之,而懼其疑也,復遣使止之。 明年,太祖有事于南郊。 殷與王峻俱從太祖起自魏,後峻得罪,殷不自安。 長流登州。 **廣順三年秋九月永壽節**, 已而殺之, 徙其家屬于登州。 是冬, 殷來朝, 殷求入爲 殷握

#### 劉詞

劉詞字好謙,大名元城人也。少事楊師厚,以勇悍知名。 唐莊宗下魏博,與梁戰夾河,

**詞以軍功爲効節軍使,遷長劍指揮使,坐事左遷汝州十餘年。** 

撓,人頗便之。 詞居暇日,常被甲枕戈而臥、謂人曰:「我以此取富貴,豈可一日輒忘之。 且 州刺史。 人情易習,若一墮其筋力,有事何以報國!」 遷奉國第一軍都虞候。從馬全節破安州,以功遷指揮使。從杜重威破鎭州,以先登功拜泌 廢帝時,詔諸州鎭選驍勇者充禁軍,詞得選爲禁軍校。從破張從賓、楊光遠(三),以功 晉軍討安從進,爲襄州行營都虞候,以功遷泌州團練使。 徙房州,歲餘,爲政不苛

猚

漢 高 祖 時 復爲 奉國右廂都指揮使。 漢軍討李守貞于河中, 詞以侍衞 步 軍 都指揮使領

寧江軍節度使,爲行營都虞候,以功拜鎭國軍節度使。

部署 敗 南 走, 周 及班師 太祖 遇詞而 入立, 以 止之曰:「 爲 加同 河東行營副都部署,徙鎭永興。 中書門下平章事 軍 敗矣,可無前 也。一 歷鎮安國、 詞 不聽, 明年卒于鎮,年六十五, 河陽三城。 輒趣兵以進 世宗戰高平, 世宗嘉之, 贈侍中, 樊愛能 以爲 隨 等軍 諡 駕 忠 都

#### 王環

惠。

王 環,鎭州 眞定人也。 以 勇 力事 孟 知祥 爲 御 者, 及知祥僭號于蜀, 使典衛兵。 晉開 運

之亂,秦、鳳、階、成入于蜀,孟昶以環爲鳳州節度使。

欲 糧 千當谷口、別遣裨將以勁兵千人出其後,伏堂倉以待其歸。 道 頗 天下以爲家,而聲教不及秦、鳳,今兵 周世宗即位 艱 昶遣兵五 一,明年,遣王景、向訓 千出堂倉抵黃花谷以爭糧道。 攻秦、 已出, 鳳州, 無功而 數爲環所敗,大臣皆請罷兵。 景、 訓 返, 先 吾有慚焉。」乃 知 蜀兵前遇建雄,戰不勝, 其 來, 命 排 決意 陣 使張建雄 攻之。 世宗日 以 周 兵 兵

堂倉,伏發,盡殪之,由是蜀兵守諸城堡者皆潰。

世宗召見環,歎曰:「三州已降,環獨堅守,吾數以書招之,而環不答,至於力屈就擒,雖不能 閉城不內,處儔遂奔成都,玭乃以城降,成、階二州相繼亦降,獨環堅守百餘日,然後克之 死,亦忠其所事也,用之可勸事君者。」乃拜環右驍衞將軍。 初,昶遣其秦州節度使高處儔以兵援環(四),未至,聞堂倉兵敗,亦潰歸,處儔判官趙毗

卒,教之水戰。 明年,世宗再征淮,使環將水戰卒數千,自蔡河以入淮。環居軍中,未嘗有戰 文縝、邊鎬等皆被擒,世宗悉以爲將軍,與環等列第京師,歲時賜與甚厚。明年又幸淮南, 功。蜀卒與環俱擒者,世宗不殺,悉以從軍,後多南奔於景,世宗待環益不疑。已而景將許 淮,舟楫甚盛,周師無水戰之具,世宗患之,乃置造船務於京城之西,爲戰艦數百艘,得景降 又以環從,遇疾,卒于泗州。 是時,周師已征准,卽以環佐侯章爲攻取賊城水砦副部署。 初,周師南征,李景陳兵於

## 折從阮

折從阮字可久,初名從遠,避漢高祖名,改爲阮,雲中人也。 傳 第 三十八 折 從 阮 校 勘 記 其父嗣倫,爲麟州刺史。

五七〇

帝與 從阮爲人,温恭長者,居父喪,以孝聞。 契丹敗盟 從阮 以兵攻契丹,取其城堡十餘,遷本州團練使,兼領朔州 唐莊宗鎭太原,以爲牙將, 後以爲府州刺史。 刺 史、安北 都護 晉出

漢高 祖 入立,於府州建永安軍,以從阮爲節度使。 明年,以其族朝京師, 徙鎮武勝, 卽

拜從阮子德扆爲府州團練使。

振

武

軍節度使、契丹西南

面行營馬步軍都虞候。

周 太祖 入立,從阮歷徙宣義、保義、靜難三鎭。 顯德二年,罷還京師,行至洛陽卒,贈中

書令。

### 校勘記

樞密 直 學 士 陳同與峻相 善 薛史卷一 三〇王峻傳及通鑑卷二九一「陳同」作 陳 觀

 $\Xi$ 廣 順三年秋 九月永壽節般 求 入爲壽 按薛史卷一一〇周太祖紀及五代會要卷 <del>\_\_\_</del>, 周太祖: 生于

天祐 元年七月二十八日。 薛史卷一一一周太祖紀云:「百寮上表, 請以七月二十八日皇帝 降 聖

日爲 永 壽節。」又卷一一三周太祖紀及通鑑卷二九一並載:廣順三年秋七月,王殷三次上表乞朝

觐。此作「九月」 恐誤。

從破張從實楊 光遠 按薛史卷九七張從賓傳及通鑑卷二八一,天福二年六月范延光反,晉高祖

高膩遺楊光遠討范延光事,是楊光遠爲討叛者而非叛將。此處「楊光遠」疑爲「范延光」之誤。 命楊光遠、張從賓討之,而從賓與延光同反。本史卷五一及薛史卷九七范延光、楊光遠傳亦載晉

(四) 高處儒

皆作「高彦儔」。

本史卷六四後獨世家、九國志卷七後獨臣傳、通鑑卷二九二及宋史卷四七九西蜀世家

# 新五代史卷五十一

# 雜傳第三十九

# 朱守殷

果悞予事 遷蕃漢馬步軍都虞候,使守德勝。王彥章攻德勝,守殷無備,遂破南城,莊宗駡曰:「駑才, 爲長直軍,以守殷爲軍使,故未嘗經戰陣之用。然好言人陰私長短以自結, 朱守殷,少事唐莊宗爲奴,名曰會兒,莊宗讀書, 」明宗請以守殷行軍法,莊宗不聽。 會兒常侍左右。 莊宗卽位, 以其廝養 莊宗以爲忠,

動舊,與伶人景進相爲表裏。 圍其第而殺之。 同光二年,領鎭武軍節度使(1)。是時,莊宗初入洛,守殷巡檢校京師,恃恩驕恣,凌侮 魏王繼岌已殺郭崇韜, 進誣朱友謙與崇韜謀反,莊宗遣守殷

是時,明宗自鎭州 來朝,居于私第。 莊宗方惑羣小,疑忌大臣,遣守殷伺察明宗動靜。

竹

傳輸

三十九

朱守骏

旗獅

守殷陰使人告明宗曰:「位高人臣者身危,功蓋天下者不賞,公可謂位高而功著矣。 宜自圖

歸藩,無與禍會也!」明宗曰:「吾洛陽 一匹夫爾,何能爲也 !」既而明宗卒反于 魏。

殷等軍,守殷按軍不動。 莊宗東討,守殷將騎軍陣宣仁門外以俟駕。 莊宗獨與諸王宦官百餘人射賊, 郭從謙作亂,犯興教門以入,莊宗 守殷等終不至,方移兵憩北邙山 ~ 亟召守

下,聞莊宗已崩,卽馳入宮中,選載嬪御、寶貨以歸,縱軍士劫掠,遣人趣明宗入洛

明宗即位,拜守殷同中書門下平章事、河南尹、判六軍諸衞事。 明年,遷宣武軍節

度

使。 城,汴人開門納延光,守殷自殺其族,乃引頸命左右斬之。 |殷尤不自安,乃殺指揮使|馬彥超,閉城反。 九月,明宗詔幸汴州,議者喧然,或以爲征吳,或以爲東諸侯有屈照者,將制置之。 明宗行至京水, 明宗至汴州, 聞守殷反, 遣范延光馳兵傅其 命鞭其尸,梟首于

市 七日,傳徇洛陽

守殷之將反也,召都指揮使馬彥超與計事,彥超不從,守殷殺之。 明宗憐彥超之死,以

承祚爲洺州長史。

#### 董璋

武 養讓爲子, 董璋, 不知其世家何人也。 是爲朱友讓。 其僮 少與高季與、 友讓 敌, ,皆得事 孔循俱爲汴州富人李讓家位。 梁太祖,璋以 軍 功爲指揮 使。 梁太祖鎮 晉 李緞

| 韜以路州 叛降梁, 末帝遺璋攻下澤州, 即以璋爲刺史。

候, 安重海居中用事,議者多言知祥必不爲唐用, 軍事大小,皆與參決。 梁亡,璋事唐爲邠寧節度使, 蜀平,以爲劍南東川 與郭崇韜相善。 而能制知祥者璋也,往往稱璋忠義,重誨以爲 節度使,孟知祥 崇韜伐蜀, 鎭 以璋爲行營右廂馬步軍都虞 西川 其後,二人有異志。

然,頗優寵之,以故璋益橫

籠 扼劍門 川,璋益倨慢,使者還, 衞, 及 訴不肯出,秖出十萬而 知祥覺唐疑己,且削其地,遂連謀以反。 一、火炙之,或刲 姚洪,皆殺之。 分布其諸州。 天成四年,明宗祀天南郊,詔兩川貢助南郊物五十萬,使李仁矩賫安重誨書往諭璋, 關爲 七砦, 內 又分閬州置保寧軍,以仁矩爲節度使,遺姚洪將兵千人從仁與戊閬州。 於關北 釘 面, Ë 多言璋欲反狀。 割心而啖。 增置關, 又因事欲殺仁矩, 號永定。 長興元年九月, 重酶患之, 璋因爲其子娶知祥女以相結。 凡唐戍兵東歸者,皆遮留之,獲其逃者,覆以 仁矩 涕泣 乃稍擇將吏爲 知祥攻陷遂州, 而 死, 歸言璋必反。 爾川 璋攻陷閬州, 刺史,以精兵爲其牙 又遣其將李彦 其後使者至東 執李仁 璋 釗

雑

第

謝之有!」璋由 祥遺人告璋, 遂得罪死, 等,兵久無 唐陵州刺史汪暉代還過璋,璋邀留之。 初 璋等 功,而關以 敬 反,唐獨誅章家屬,知祥妻子皆在成都,其疏 欲與俱謝 塘 此 亦還。 疑知祥 西饋 明宗 過自歸, 賣己。 運 乃遣西川 不給,遠近勞敝,明宗惠之。 三年四月,以兵萬人攻知祥, ·璋曰:「唐不殺孟公家族, 進奏官蘇愿、東川 至是,暉執璋殺之,傳其首於知祥 軍將劉澄 於西川恩厚矣。我子 安重誨自往督軍,敬瑭 屬留京師者皆 戰于彌牟, 璋大敗, 西歸, 諭 不誅。 璋等使改 石敬瑭 孫何在? 不納, 還走梓州。 過。 重海 計 何 知 瑄

宗使延光間行求兵,夜至河上,爲梁兵所得,送京師,下延光獄,搒掠數百,脅以白刃, 終不肯言晉事。 盛,未可圖也,不如築壘馬家口以通汝陽。」莊宗以爲然。壘成,梁遣王彥章急攻新壘。 郸州 光輒自請行,乃懷延孝蠟丸書,西見莊宗致之,且曰:「今延孝雖有降意,而梁兵扼楊劉者甚 |范延光字子瓌,相州臨潭人也。 梁兵方扼楊劉,其先鋒將康延孝陰送款於明宗。 范延光 繫之數月,稍爲獄吏所護。 唐明宗爲節度使,置延光麾下,而未之奇也。 脏宗入汴,獄吏去其桎梏,拜而出之。莊宗見延 明宗求可以通延孝款於莊宗者, 明宗破 延光 明 延

光,喜,拜檢校工部尙書。

|汴兵望見天子乘興,乃開門,而延光先入,猶巷戰,殺傷甚衆,守殷死,汴州 以 神 緩 ·速駭之。」乃以騎兵五百,自暮疾馳至半夜,行二百里,戰于城下。 之使得爲計,則城堅而難近。 明 宗 時 ',爲宣徽南院使。 明宗行幸汴州, 故乘人之未備者,莫若急攻,臣請騎兵五百, 至滎陽, 朱守殷反, 延光日: 「守殷 遲明, 明宗亦馳至, 平。 馳至城下 反迹始見,

原時, |宗問 五萬兵之食也。」明宗曰:「肥戰馬而瘠吾人,此吾所媿也 下,吾老矣,馬多奈何 延光馬數幾何?對曰:「騎軍三萬五千。」明宗撫髀歎曰:「吾兵間四十年,自太祖在太 明 馬數不過七千,莊宗取河北,與梁家戰河上,馬纔萬匹。 年 - ,遷樞密使,出爲成德軍節度使。 !」延光因日:「臣嘗計,一馬之費,可養步卒五人,三萬五千匹馬, 安重誨死, 復召延光與趙延壽並爲樞密使。 今有馬三萬五千而不能一天

得綏 所惜者朝 之,久不克。 史以招降之。 延光日:「王師問罪,本在彝超,夏州已破,綏、銀豈足顧哉!若不破夏州, 、銀,不能守也。」遂凝 夏州李仁福卒, 延大體也。」是時, **隰州刺史劉遂凝馳驛入見獻策,言經、銀二州之人,皆有內嚮之意,請除二刺** 其子彝超自立而邀旄節。 又請自馳入說彝超使出降, 王淑妃用事,遂凝兄弟與淑妃有舊,方倚以蒙恩寵,所言無不 明宗遣安從進代之, 延光曰:「一遂凝,萬一失之不足惜, <u>彝超不受代。以兵攻</u>

貀

你

ŢŞ

<u>≓</u>

聽,而大臣以妃故,多不敢爭,獨延光從容沮止之。

勸 延光以嚴法制之,延光曰:「制動當以靜,宜少待之。」已而明宗疾少間,京師乃定。 明宗 有疾,不能 視朝,京師之人,詾詢異議,藏竄 山谷,或寄匿於軍營,有司不能

度使。天雄軍亂,逐節度使劉延皓,遣延光討平之,即以爲天雄軍節度使。 崩,路王反,殺愍帝,唐室大亂,弘昭、贇皆及禍以死。 不得已,乃皆罷之,延光復鎭成德,而用朱弘昭、馮贇爲樞密使。 延壽陰祭延光有避禍意,亦遽求罷。 是 **、時,秦王握兵驕甚,宋王弱而且在外,議者多屬意於潞王。** 明宗再三留之,二人辭益懇至,繼之以泣 末帝復韶延光爲樞密使,拜宣武軍節 已而秦王舉兵見誅, 延光懼禍之及也,乃求罷 明宗 明宗

遂以其言爲然,由是頗畜異志。 也,入腹內,王者之兆也。」張生自延光微時,言其必貴,延光素神之,常置門下,言多輒中, 延光常夢大蛇自臍入其腹,半入而掣去之,以問門下術士張生,張生贊曰:「蛇,龍類

獨 不降。 當晉高祖起太原,末帝遺延光以兵二萬屯遼州,與趙延壽掎角。 高祖卽位,延光賀表又頗後諸侯至,又其女爲末帝子重美妃,以此遂懷反側。 既而延壽先降,延光

祖封延光臨清王以慰其心。

平山人祕瓊者,爲成德軍節度使董温其衙內指揮使,後温其爲契丹所虜,瓊乃悉殺

出于魏。 温其家族,瘞之一穴,而取其家貲鉅萬計。 延光陰遣人以書招之,瓊不納,延光怒,選兵伏境上,何瓊過,殺之于夏津,悉取其 晉高祖入立,以瓊爲齊州防禦使, 橐其貲裝, 消

貲,以戍邏者悞殺頃。 由是高祖疑其必爲亂,乃幸汴州

蓋 而擊之,兵多溺死,銳、暉退走入魏,閉壁不復出。 高祖以楊光遠爲招討使,引兵自滑州渡胡梁攻之。 |操扇,酣歌飮食自若,軍士苦大熱,皆不爲用。 天福二年六月,延光遂反,遣其牙將孫銳、澶州 光遠得諜者,詢得其謀,誘銳等渡河, 刺史馮暉,以兵二萬距黎陽, 掠滑、衞。

高祖 非我敵,況銳等兒戲邪?行取孺子爾!」乃決意討之。 聞延光用銳等以反,笑曰:「吾雖不武,然嘗從明宗取天下, 初,延光反意未決,而得暴疾不能興,銳乃陰召暉入城,迫延光反,延光惶惑,遂從之。 攻堅破彊多矣。 如延光已

軍節度使,賜鐵券。 入 者。 延光又附楊光遠 流 而降之。 然魏城堅難下,攻之逾年不克,師老糧匱,宗正丞石昂上書極諫, 延光初無必反意,銳等敗,延光遣牙將王知新資表自歸, 高祖 一表請降,不報,延光途堅守。 亦悔悟。 居數月來朝,因慚調老,以太子太師致仕。 三年九月,使謁者入魏赦 晉以箭書二百射城中,悉赦魏 [延光,延光乃降,册封東平郡王、天平 高祖不見,以知新屬武 請赦延光, 人,募能斬 願以單車 、德司。 延光

太傅。 浮橋, 則南 爲中國 兵脅之使自裁。 河陽,其行 「楊光遠留守河南,吾之仇也。 高 副 上遺處讓來時,適有契丹使至,北朝皇帝問晉魏博反臣何在? 使李式 刚 初, 走吳越,請拘之洛陽。」高祖獨豫未決。 待之與羣臣無間, 推墮水溺死,以延光自投水死聞,因盡取其貲。 初 水運軍使曹千獲其流尸于繆家灘,詔許歸葬相州,已葬,墓輒崩,破其棺槨,頭顱皆 「後患。」延光聞之泣 秘瓊殺董温其取其貲,延光又殺瓊而取之,而終以貲爲光遠所殺,而光遠亦不能免 高 輜 式 祖 重盈路,光遠利其貲,果圖之。 日:「主上敦信明義,許之不 赦 降 延光日:「天子賜我鐵劵,許之不死,何得及此?」乃以壯士驅之上馬,行至 延光, 然心不欲使在京 **、語使者謂之曰:「許卿不死矣,** 下,莫知所爲。 吾有田宅在 即。 庣, 處讓 光遠銀鎭河陽,其子承勳知州事,乃遣承勳以 河陽,可以往乎。」處讓曰:「可也。」乃挈其帑歸 因奏曰:「延光反覆姦臣, 若不圖之, 非北 歲餘, 則 日:「當且之洛陽, 不. 死矣。」乃降。 使宣徽使劉 高祖以適會其意,不問,爲之輟朝,贈 若降而殺之, 忍晉 處讓 及致仕 以避契丹使者。」延光日: 不能制,當鎖 載 何以享國 酒夜過延 居京師 光, 歲時宴見, 以來, 謂 走胡 免

于一魏 當 延光以為步軍都監,使之守城。 延光反時,有李彦珣者,爲河陽行軍司馬,張從賓反河陽,彥珣附之,從賓敗,彥珣奔 招討使楊光遠知彥珣邢州人也,其母尚在,乃遣人之

也。

州刺史行,大臣言彥珣殺母當誅,高祖以謂赦令已行,不可失信。後以坐贓誅。 邢州,取其母至城下,示彦珣以招之,彦珣望見,自射殺之。及延光出降,晉高祖拜彥珣原

哀哉!若彥珣之惡,而恬然不以爲怪,則晉出帝之絕其父,宜其舉世不知爲非也。 也,豈非積習之久而至於是敷!語曰:「性相近,習相遠。」至其極也,使人心不若禽獸,可不 不孝,然彥珣彎弓射其母,高祖從而赦之,非徒彥珣不自知爲大惡,而高祖亦安焉不以爲怪 之間,自相賊害。五代之際,其禍害不可勝道也。夫人情莫不共知愛其親,莫不共知惡於 骨肉不能相保,蓋出于不幸,因之禮義日以廢,恩愛日以薄,其習久而遂以大壞,至於父子 民漸習而自趨之,至於久而安以成俗也。然民之無知,習見善則安於爲善,習見惡則安於 嗚呼,甚哉,人性之愼於習也!故聖人於仁義深矣,其爲敎也,勤而不怠,緩而不迫,欲 五代之亂,其來遠矣。自唐之衰,干戈飢饉,父不得育其子,子不得養其親。其始也,

# 婁繼英

**婁繼英,不知何許人也。 邻** + 九 女 機 英 歷梁、唐,爲絳、冀二州刺史、北面水陸轉運使、耀州團練使。 安 重 燊

五八二

晉高祖時,爲左監門衞上將軍。

恐不自安,乃出奔許。高祖下詔招慰之,使復位,繼英懼不敢出。 度使甚從簡以延光之反,疑有應者,爲備甚嚴。。延沼未及發,延光蠟書事泄於京師,繼英惶 反,繼英有弟爲魏州子城都虞候,延光遣人以蠟書招繼英,繼英乃遣延沼入魏見延光,延光 **人喜,與之信箭,使陰圖許。** 繼英子婦,温延沼女也,自明宗時誅其父韜,延沼兄弟廢居于許,心常怨望。 延沼與其弟延濟、延衮募不逞之徒千人,期以攻許。 而許州節 及范延光

繼英爲杜重威所殺。 俱投從賓於汜水。 温氏兄弟謀殺繼英以自歸,延沼以其女故不忍。張從賓反於洛陽,延沼兄弟乃與繼英 繼英知温氏之初欲殺己也,反譖延沼兄弟於從實,從實殺之。從實敗

# 安重榮

安重榮,小字鐵胡,朔州人也。 祖從義, 利州刺史。 父全,勝州刺史、振武馬步軍都指

揮使。

重榮有力,善騎射,爲版武巡邊指揮使。 晉高祖起太原,使張穎陰招重榮,其母與兄皆

以爲不可,重榮業已許潁,母、兄謀共殺潁以止之,重榮曰:「未可,吾當爲母卜之。」乃立一 鬶, 中。」一發又中,其母、兄乃許,重榮以巡邊千騎叛入太原。 百步而射之,曰「石公爲天子則中。」一發輒中;又立一 箭而射之,曰:「吾爲節度 高祖即位,拜重榮成德軍節度 使則

後射殺之。 之,其父泣曰:「不忍也!」其母從傍詬駡,奪其劍而逐之,問之,乃繼母也, 重榮叱其母出, 重榮雖武夫,而曉吏事,其下不能欺。 有夫婦訟其子不孝者,重榮拔劍授其父,使自殺

使。

課民種稗,食馬萬疋,所爲益驕。 對使者鞠躬俯首,受責愈謹,多爲好辭以自解,而姑息重榮不能詰。 是時,吐渾白氏役屬契丹,苦其暴虐,重榮誘之入塞。契丹數遣使責高祖,幷求使者, 邪?兵強馬壯者爲之爾!」雖懷異志,而未有以發也。 二千搜索并、鎭、忻、代山谷中吐渾,悉驅出塞。 世恥也!」數以此非誚高祖。 甚,高祖奉之愈謹,重榮憤然,以謂「詘中國以尊夷狄,困已敝之民,而充無厭之欲,此晉萬 重榮起於軍卒,暴至富貴,而見唐廢帝、晉高祖皆自藩侯得國,嘗謂人曰:「天子寧有種 契丹使者往來過鎭州,重榮箕踞慢駡,不爲之禮,或執殺之。 因怒殺指揮使賈章, 誣之以反, 章女尚幼, 欲捨之, 女曰: 吐渾去而復來, 重榮卒納之, 因招集亡命, 是時,高祖與契丹約爲父子,契丹驕 乃遣供奉官張澄以兵

难 傳第三

是高賈女之烈,而知重榮之必敗也。 「吾家三十口皆死於兵,存者特吾與父爾,今父死,吾何忍獨生,願就死!」遂殺之。 重榮旣僭侈,以爲金魚袋不足貴,刻玉爲魚佩之。娶 鎭人於

二妻,高祖因之並加封爵

勞,久居富貴,沒身虜塞,酷虐不勝,企足朝廷,思歸可諒,苟聞傳檄,必盡倒戈。」其表數千 曰:「前世與虜和親,皆所以爲天下計,今吾以天下臣之,爾以一鎭抗之,大小不等,無 以諸蕃不招呼而自至,朔州不攻伐而自歸,雖繫人情,盡由天意。又念陷蕃諸將等,本自勳 款,皆號泣告勞,願治兵甲以報怨。又據朔州節度副使趙崇殺節度使劉山,以城來歸。 壯 車帳、甲馬七八路來奔,具言契丹殘害,掠取生口羊馬,自今年二月已後,號令諸蕃,點閱疆 可十萬。又據沿河党項、山前後逸越利諸族首領皆遣人送契丹所授告身、敕牒、旗幟來歸 自應州來奔,又據生吐渾、渾、製苾、兩突厥三部南北將沙陀、安慶、九府等各領其族、牛羊、 幽州南境之民,處之博野。上表曰:「臣昨據熟吐渾白承福、赫連功德等領本族三萬餘帳 了辦具軍裝,期以上秋南向。 諸蕃部誠恐上天不祐,敗滅家族, 願先自歸,其諸部勝兵衆 」重榮謂晉無如我何,反意乃決。 又爲書以遺朝廷大臣、四方藩鎮,皆以契丹可取爲言。高祖患之,爲之幸鄴,報重榮 天福六年夏,契丹使者拽剌過鎭,重榮侵辱之,拽剌言不遜,重榮怒,執拽剌,以輕騎掠 重榮雖以契丹爲言,反陰遣人與幽州節度使劉晞相 自辱

從進

契丹亦利晉多事,幸重榮之亂,期兩敝之,欲因以窺中國,故不加怒於重榮。

爲前驅。 之後潭。 「吾有天下則中之。」一發而中,其母乃許。 饒陽令劉巖獻水鳥五色, 重榮曰:「此鳳也。」畜 重榮將反也, 其母又以爲不可, 重榮曰:「爲母卜之。」指其堂下幡竿龍口仰射之, 曰: 鎖之城門抱關鐵胡人,無故頭自落,鐵胡,重榮小字,雖甚惡之,然不悟也。 又使人爲大鐵鞭以獻,誑其民曰:「鞭有神,指人,人輒死。」號「鐵鞭郎君」,出則以

御樓受馘,命漆其首送于契丹。 引官軍以入,殺守城二萬餘人。 與十餘騎奔還,以牛馬革爲甲,驅州人守城以待。 降晉,大懼,退入于輜重中,其兵二萬皆潰去。是多大寒,潰兵飢凍及見殺無孑遺, 際,臨陣卷旗以奔晉軍,其鎧甲鞍轡皆裝以銀,晉軍不知其來降,爭殺而分之。 重榮聞彥之 以 響鄂,聲言入覲。行至宗城破家堤,高祖遣杜重威逆之,兵已交,其將趙彥之興重榮有 其多,安從進反襄陽,重榮聞之,乃亦舉兵。是歲,鎭州大旱、蝗,重榮聚飢民數萬,驅 改成德軍爲順德,鎭州日恆州,常山日恆山云。 重榮以吐渾數百騎守牙城,重威使人擒之,斬首以獻,高祖 重威兵至城下, 重榮裨將自城西水碾門 重榮獨

## 安從進

翔, 迎于 州 都 指 從進 從進 揮 安 使 從 巡檢京城,殺樞密使馮贇,送款於從珂。 管一 清泰中,徙鎮 領 貴 以兵 振 州 武 往, 刺 索 史。 葛 卒亦無功。 山南東道。 部人也。 明宗 時 ٠, 祖、父皆事唐爲騎將。 爲保養、彰武 晉高 愍帝 祖 即位, 卽 位, 徙領 軍節度使, 加同中書門下平章 愍帝出奔, 順化, 從進 未嘗 爲 侍衞 從珂 初從莊宗 | 將兵征 馬軍 將至 ·都指 伐。 京師 於兵間 揮 李 彝超 從進 使。 爲護 路王 率百官班 自 立 駕 反鳳 於 馬 夏 軍

與令謙 在漢江南,臣卽赴任。」高祖亦優容之。其子弘超爲宮苑副使, 立 皆黥以充軍。 進已畜異志,恃江爲險,招集亡命, 所為 來朝,願還 王令謙、潘知麟者,皆從進牙將也, 高祖 謂舉可 遊南山,酒酣,令人推墮崖死 取天下不順,常以 鄉里,已徙上黨。 `成事,故在位七年,而反者六起,從進最後反,然皆不觅也。 與安重榮陰相結託,期爲表裏。 此 慚,藩鎭多務, 股虚青州以待卿,卿誠樂行,殷即降制。」從進報曰:「移青州 益置 軍兵。 常從從進最久,知其必敗, 過爲姑息,而藩鎭之臣,或不 高祖患之,謀徙從進,使人謂曰:「東平王建 南方貢輸道出襄陽者,多擅留之,邀遮商族, 居京師,從進請賜告歸,遂不 切諫之。 ·自安, 自范延光反鄴,從 從進遣子弘超 或心慕高祖

凝日:「陛下且北,從進必反,何以制之?」高祖日:「卿意奈何?」凝日:「臣聞兵法,先人者 天福六年,安重榮執殺契丹使者,反迹見,高祖爲之幸鄴,鄭王重貴留守京師。 宰相和

奪人,願爲空名宣敕十數通授鄭王,有急則命將以往。」

鄧州 京師,高祖御樓受俘,徇于市而斬之。降寒陽爲防禦,贈令識忠州刺史,知鱗順州刺史。 奔還襄陽。 ,不克,進至湖陽,遇建崇等,大駭,以爲神速,復爲野火所燒,遂大敗。從進以數十騎 從進聞高祖北,遂殺知麟以反。鄭王以空名敕授李建崇、郭金海等討之,從進引兵攻 高祖遣高行周圍之,踰年糧盡,從進自焚死。執其子弘受及其將佐四十三人送

## 楊光遠

也? 萴 威 刺等, 「病禿折臂,不通文字,然有辨智,長於吏事。 明宗時,爲嬀、瀛、瀺、易四州刺 戰契丹於新州,折其一臂,遂廢不用。久之,以爲幽州馬步軍都指揮使,戍瓦橋關。光遠爲 且居此久,熟知中國事,歸之豈吾利也!」明宗曰:「蕃人重盟誓, 」光遠曰:「臣恐後悔不及爾! 初, 楊光遠字德明,其父曰阿噔啜,蓋沙陀部人也。光遠初名阿檀,爲唐莊宗騎將,從周德 明宗與大臣議,皆欲歸之,獨光遠不可,曰:「剪剌皆北狄善戰者,彼失之如去手 唐兵破王都於中山,得契丹大將廁刺等十餘人。已而契丹與中國通和,遣使者求 .」明宗嘉其說,卒不遣廁劇等。 光遠自易州 已與吾好,豈相負 史,以治稱。 刺史拜振武

雜

傳第

三 十

九

楊光遠

軍 節度使。 清泰二年,徙鎭中山,兼北面行營都虞候,禦契丹於雲、應之間

問之, 忠, 侍 將 非惡漢兒邪 契丹 惡漢兒。」光遠 衞 入蕃。」德光曰:「吾國無土地官爵以居汝,汝等勉事晉。」晉高祖以光遠爲宣武軍節度使、 頗親信之。 馬步 、圍之數月,人馬食盡,殺馬而食,馬盡,乃殺敬達出降。耶律德光見之,斬曰:「爾輩大是 晉高 對曰:「臣於富貴無不足也,惟不及張生鐵死得其所,此常爲愧爾! 軍 祖 ·都指揮使。光遠進見,佯爲悒悒之色,常如有所恨者,高祖疑其有所不足,使人 起太原,末帝以光遠佐張敬達爲太原四面招討副使,爲契丹所敗,退守晉安寨。 · 」<u>光遠等大慚伏,德光問曰:「懼否?」皆曰:「甚懼。」曰:「何懼?」曰:「懼皇帝</u> 與諸將初不知其誚已,猶爲謙言以對,德光曰:「不用鹽酪,食一萬匹戰馬,豈 」由是高祖以爲

皆超 |福五年, 制。 兵 在 陰以 拜 外 高 范 祖 官爵 延光反, \ 寶貨 謂高 徙鎭平盧,封東平王 不得已,罷出維翰於相州,亦徙 恩寵 奉 祖 畏己, 契丹,訴己爲晉疏斥。 以爲魏府都招討使,久之不能下,高祖卒用佗計降延光。 無 比。 ,始爲 樞密使桑維翰惡之, 恣横。 光遠請其子以行,乃拜承祚單州刺史, 高 加 所養部 每優容之,爲選其子承祚尚長安公主,其次子 光遠 曲 西京留守, 數以爲言。 千人, 撓法 兼鎭 光遠自魏來朝, 犯禁河、洛之間, 河陽 奪其兵職 承勳萊州防禦使, 屢指維 丽 甚 光遠自以 光遠 於寇盜。 翰 承信等 始大怨 擅 權 握 難 重

子 ,俱東, 車騎連屬數十里。 出帝即位, 拜太師, 封壽王。

刺史,遣使者賜以玉帶、御馬以慰安之,光遠益驕,乃反。召契丹入寇,陷貝州。 先帝賜我,安得復取,是疑我反也!」遂謀爲亂。 是時 ·晉馬少,括天下馬以佐軍,景延廣請取光遠前所借官馬三百匹,光遠怒曰:「此馬 而承祚自單州逃歸,出帝即以承祚爲淄州 博州刺史

周儒亦叛降契丹。

光遠隔絕。 遇以兵萬人沿河而下。儒果引契丹自馬家渡濟河,方築壘,守貞等急擊之,契丹大敗,遂與 兵大將守博州渡,使儒得引契丹東過河與光遠合,則河南危矣!」出帝乃遣李守貞、皇甫 是時,出帝與耶律德光相距澶、魏之間,鄆州觀察判官竇儀計事軍中,謀曰:「今不以重 德光聞河上兵大敗,與晉決戰威城,亦敗。

羣臣皆以爲不可, 承祚皆詣闕自歸,而光遠亦上章請死。 出帝以其二子爲侍衞將軍,賜光遠韶書,許以不死, 可,乃殺節度判官丘濤、親將杜延壽、楊瞻、白延祚等,劫光遠幽之,遣人奉表待罪。承信、 在 光遠北望契丹,稽首以呼德光曰:「皇帝悞光遠邪!」其子承勳等勸光遠出降,光遠曰:「我 [代北時,嘗以紙錢祭天池,投之輒沒,人言我當作天子,宜且待時,毋輕議也。]承勳知不 契丹已北,出帝復遣守貞、符彥卿東討,光遠嬰城固守,自夏至多,城中人相食幾盡。 乃敕李守貞便宜處置。 守貞遣客省副使何延祚殺之于其家。 延祚至其

维

傳

第

三十九

楊光

遠

校勘記

第,光遠方閱馬于廐,延祚使一都將入謂之曰:「天使在門,欲歸報天子,未有以藉手。」光遠 世 曰「何謂也?」曰:「願得大王頭爾!」光遠駡曰:「我有何罪?昔我以晉安寨降契丹,使爾家 1世爲天子,我亦望以富貴終身,而反負心若此!」遂見殺,以病卒聞。

使刻石于青州。 信爲平盧節度使。 承勳 事晉爲鄭州防禦使,德光滅晉,使人召承勳至京師,責其劫父,臠而食之,乃以承 碑石旣立,天大雷電,擊折之。 漢高祖贈光遠尙書令,封齊王,命中書舍人張正撰光遠碑銘文賜承信,

餘年,皆光遠爲之也 瘡天子、跛脚皇后邪? 偏 傍者皆易之,乃賜名光遠云。 阿噔 啜初非姓氏,其後改名城而姓楊氏。 」相傳以爲笑。 光遠旣病禿, 然而召夷狄爲天下首禍,卒滅晉氏,瘡痍中國者三十 而妻又跛其足也,人爲之語曰:「自古豈 光遠初名檀,清泰二年,有司言明宗廟諱犯 有禿

### 校勘記

- 同 光二年領鎮 武 軍 節 度使 鎮 武軍」,貴池、汪本同,南監、汲、殿、南昌、鄂、蜀、劉桉本作「振武
- 軍 薛史卷七 四朱守殷傳亦 云「同 光二年爲 振武 節 度 使

「房州」,薛史卷九四李彥珣傳及通鑑卷二八一作「坊州」。

 $\Xi$ 

晉高

祖拜彦珣房州刺史

# 新五代史卷五十二

# 雜傳第四十

# 杜重威

州 從高祖攻降延光,徙領忠武,加同平章事。又徙領天平,遷侍衞親軍都指揮使。 刺史,以典禁兵。從侯益攻破張從賓於汜水,以功拜潞州節度使。 杜重威,朔州人也。 其妻石氏,晉高祖之女弟,高祖卽帝位,封石氏爲公主,拜重威舒 范延光反於鄴

兵擊其中軍,重榮將趙彥之來奔,重榮遂大敗,走還鎭州,閉壁不敢出。 |重胤曰:「兩兵方交,退者先敗。」乃分兵爲三,重威先以左右隊擊其兩翼,戰酣,重胤以精 安重榮反,重威逆戰于宗城,重榮爲偃月陣,重威擊之不動。 重威欲少却以伺之,偏將 重威攻破之, 以功

重威出於武卒,無行而不知將略。 破鎭州,悉取府庫之積及重榮之貲,皆沒之家,高祖

拜重威成德軍節度使。

雜

傳等四十

杜重

威

知 而 不 問 及 出 帝 與契丹絕好,契丹連歲入寇, 重威閉城自守, 屬州 城 邑多所 屠戮。 胡 騎

驅其人民千萬過其城下,重威登城望之,未嘗出救。

北 還兵擊之,重威等 開 運 元 年, 加重威 南走, 北 面 至陽城,爲虜 行營招 討 使。 所 明年 困 賴符彦卿、張彥澤等因 , 引兵 攻泰州,破滿城、 遂城。 大 風奮擊, 契丹已去至古 契丹大潰。

諸將欲追之,重威爲俚語曰:「逢賊得命,更望複子乎?」乃收馬馳

廷莫能 錄以 聞 重 「給絹 止 威 居鎭州, 即拜重 數萬匹以償之,重威大怒曰:「吾非反者,安得籍沒邪 一威爲鄴都留守。 重斂其民,戶口 彫敝,又懼契丹之至,乃連表乞還京 而鎭州 所留私栗十餘萬斛, 殿中監王欽祚和市軍儲, 師 未報, 귮 上 道 乃 朝

夾滹沱 愁苦。 李瀔教重威以三脚木爲橋,募敢死士過河擊賊,諸將皆以爲然,獨重威不 六十餘日, 三年秋,契丹高牟翰詐以瀛州降,復以重威爲北面行營招討使。 重威 河而 飢殍盈路,居民拆木以供爨,剉藁席以秣馬牛,重威兵行泥潦中,調發供饋 軍 至瀛州, 偏將宋彥筠、王淸渡水力戰,而 年翰已棄城去,重威退屯武彊。 重威按軍 契丹寇鎮、定,重威西趨中渡橋, 不動,彥筠遂敗,清戰死 是秋, 天下大水, 轉 與虜 遠近 運 霖 雨

契丹請降 契丹遣騎兵夜並 契丹大悅,許以中國與重威爲帝, 西 山 摩灓城,斷重威 軍後。 是時, 重威信以爲然,乃伏甲士,召諸將告以降 重威已有異志,而糧道 「隔絕,乃陰遺

威將吏,而錄其私帑,以重威歸京師。 祖 許之。重威素服出見高祖,高祖赦重威,拜檢校太師、守太傅、兼中書令。

虜。 猶喜躍以爲決戰,重威告以糧盡出降,軍士解甲大哭,聲震原野。 諸將愕然,以上將先降,乃皆聽命。 重威出降表使諸將書名,乃令軍士陣于栅外,軍士 契丹賜重威赭袍,使衣以

示諸軍,拜重威太傅。

訴於契丹曰:「臣以晉軍十萬先降,乃獨不免率乎?」契丹笑而免之,遣還鄴都。 北歸,重威與其妻石氏詣虜帳中爲別。 重威俛首不敢仰顧。 契丹犯京師,重威以晉兵屯陳橋,士卒凍餓,不勝其苦。 契丹據京師,率城中錢帛以賞軍,將相皆不免,重威當率萬緡,乃 重威出入道中,市人隨而詬 明年,契丹

丹留燕兵千五百人在京師,高祖自太原入,告者言其將反,高祖悉誅於繁臺,其亡者奔于 招陣等,璉登城呼曰:「繁臺之誅,燕兵何罪?旣無生理,請以死守!」 | 燕將張璉先以兵二千在| 鄰,聞| 燕兵見殺,乃勸| 重威固守。| 高祖已殺| 燕兵,悔之,數遣人 漢高祖定京師,拜重威太尉、歸德軍節度使,重威懼,不受命。 遣高行周攻之,不克,高

高 重威食盡,屑麴而食,民多逾城出降,皆無人色。重威乃遣判官王敏及其妻相次請降, 悉誅璉及重

74 傳 绑 70 + 杜 A 威 4 守 口

燦、弘璲尸於市,市人蹴而詬之,吏不能禁,支裂蹈踐,斯須而盡。 高 祖 病甚,顧大臣曰:「善防重威! 」高祖崩,祕不發喪,大臣乃共誅之,及其子弘璋、弘

### 李守貞

李守貞,河陽人也。 晉高祖鎭河陽, 以爲客將, 其後嘗從高祖, 高祖卽位, 拜客省使。

監馬全節軍破李金全於安州,以功拜宣徽使。

颜 医守貞所,詔取顏殺之,守貞大怒,乃與維翰有隙 類。 寶貨、名姬、善馬獻之守貞,守貞德之,陰置顏麾下。是時,凡出師破賊,必有德音赦其餘 百匹,裨將七十餘人。徙領泰寧軍節度使,以兵二萬討之。 幸澶州。 而光遠黨與十餘人皆亡命,捕之甚急,樞密使桑維翰緩其制書,久而不下。 出帝卽位,楊光遠反,召契丹入寇。守貞領義成軍節度使,爲侍衞親軍都虞候,從出帝 麻荅以奇兵入鄆州,渡馬家口,栅於河東。守貞馳往破之,契丹兵多溺死,獲馬數 光遠降,其故吏宋顏悉取光遠 言事者告

首也。」守貞以功拜同平章事,賜以光遠舊第,守貞取旁官民舍大治之,爲京師之甲。 賊平行賞,守貞悉以黦茶染木給之,軍中大怒,以帛裹之爲人首, 梟於木間, 曰:「守貞

臨幸,燕錫恩禮,出於諸將。

與重威等攻下泰州,破滿城,殺二千餘人。還,爲侍衞親軍都指揮使,領天平軍節度使,又 錢」,及班師,又加賞勞,曰「卸甲錢」,出入之費,常不下三十萬,由此晉之公私重困。 守貞 **為將皆無節制,行營所至,居民豢圉一空,至於草木皆盡。其始發軍也,有賜賚,曰「掛甲** 契丹入寇,出帝再幸澶州,杜重威爲北面招討使,守貞爲都監。晉兵素驕,而守貞、重威

額歸德。

守貞等軍於中渡,遂與重威降于契丹。契丹以守貞爲司徒。契丹犯京師,拜守貞天平軍節 臣者。」因請與重威俱北。於是卒以重威爲招討使,守貞爲都監,屯于武彊。契丹寇鎭、定, 帛奉之。出帝嘗謂守貞曰:「卿常以家財散士卒,可謂忠於國者乎!」守貞謝曰:「皆重威與 **酢以瀛州降,出帝以爲然,命杜重威等將兵應之。**初,晉大臣皆言重威不忠,有怨望之心, 不可用,乃用守貞。是時,重威鎭魏州,守貞嘗將兵往來過魏,重威待之甚厚,多以戈甲金 是時,出帝遣人以書招趙延壽使歸國,延壽詐言思歸,願得晉兵爲應,而契丹高牟翰亦

以謂漢室新造,隱帝 漢 高 祖 入京師,守貞來朝,拜太保、河中節度使。高祖崩,社重威死,守貞懼,不自安, 初立,天下易以圖,而門下僧總倫以方術陰干守貞,爲言有非常之相,

第

四

李守貞

亚.

發兵 丹,使出兵以牽漢 翔 乃決 西據潼關, 景崇與思縮遣人推守貞爲秦王,守貞拜景崇等官爵。 反。 招誘草寇,所在竊發。 而趙思綰先以京兆反,遣人以赭黃衣遺守貞,守贞大喜,以爲天人皆應,乃 漢遣白文珂、常思等出軍擊之。 又遺人間以蠟丸書遺吳、蜀、契 已而王景崇又以鳳

主,守貞先敗,則思綰、景崇可傳聲而破矣。 于前,則漢兵屈矣。」威以爲然,遂先擊守貞。 請先擊思綰、景崇,威計未知所向。 文珂等攻景崇、思綰等久無功, 行至華州,節度使扈彥珂謂威曰:「三叛連衡,以守貞 隱帝乃遣樞密使郭威率禁兵將文珂等督攻之。 若捨近圖遠,使守貞出兵于後,思綰、景崇拒戰 諸將皆

輒 將分爲三栅,栅其城三面,而闕其南,發五縣丁去築長城以 者,勢也。今合諸將之兵以攻一城,較其多少,勝敗 博,以爲道譏之,艴然而怒。 補其所壞, 是時, 威曰:「可矣。」乃爲期日,督兵四面攻而 馮道罷相居河陽,威初出兵,過道家問策,道曰:「君知博乎?」 威少無賴, 守貞輒出爭之,守貞兵常失十三四,如此逾年,守貞城中兵無幾,而食又盡,殺 道曰:「凡博者錢 【多則多勝,錢少則多敗, 非其不善博, 破之。 可知。」威大悟, 連三棚。 謀以遲 守貞 出其兵壞長城,威 久困之, 所以 乃與諸 好蒲 敗

初,守貞召總倫問以濟否,總倫曰:「王當自有天下,然分野方災,俟殺人垂盡, 則王事

之,將吏皆拜賀,守貞益以自負。 濟矣。」守貞以爲然。嘗會將吏大飲,守貞指畫虎圖曰:「吾有天命者中其掌。」引弓一發中

城破,守貞與妻子自焚,漢軍入城,於煙燼中斬其首,傳送京師,梟於南市,其餘黨皆

磔之。

### 張彥澤

請殺之,其掌書記張式不肯爲作章,屢諫止之。<br />
彥澤怒,引弓射式,式走而免。<br />
式素爲彥澤 聖右廂都指揮使、曹州刺史。 有光,顧視如猛獸。以善射爲騎將,數從莊宗、明宗戰伐。與晉高祖連姻,高祖時,已爲護 爲政暴虐,常怒其子,數笞辱之。子逃至齊州,州捕送京師,高祖以歸彥澤。彥澤上章 張彥澤,其先突厥部人也。 與討范延光,拜鎭國軍節度使,歲中,徙鎭彰義。 後徙居陰山,又徙太原。 **彥澤爲人廳悍殘忍,目睛黃而夜** 

**拨之邠州,節度使李周留式,馳騎以聞,詔流式商州。 彥澤遣司馬鄭元昭詣闕論請,期必** 彦澤遣指揮使李興以二十騎追之,戒曰:「式不肯來,當取其頭以來!」式至衍州,刺史以兵 所厚,多任以事,左右小人皆素嫉之,因共讒式,且迫之曰:「不速去,當及禍。」式乃出奔。

Ħ

傳第四十

張彦澤

足而斬之。

得式, 且曰:「彥澤若不得張式,息在不測。」高祖不得已,與之。「彥澤得式,剖心、決口、斷手

然彥澤止削階、降虧而已。 不得已,召式父鐸、弟守貞、子希範等,皆拜以官,爲蠲涇州民稅,免其雜役一年,下詔罪己, 其不死。」濤厲聲曰:「彥澤罪若可容,延光鐵券何在!」高祖怒,起去,濤隨之諫 濤、王禧伏閣上疏,論彥澤殺式之冤,皆不省。。濤見高祖切諫,高祖曰:「彥澤功臣, 高 祖遣王周代彦澤,以爲右武衞大將軍。 於是國珍等復與御史中丞王易簡率三院御史詣閣門連疏論之, 諫議大夫鄭受益、曹國珍,尚書刑部郎中李濤、張麟, 周奏彥澤所爲不法者二十六條,幷述涇人殘 不已,高 員外郎 吾嘗許

出其不意。」彥澤卽拔拒馬力戰,契丹奔北二十餘里,追至衞村,又大敗之,契丹遯去。 謂彥澤曰:「今軍中飢渴已甚,若待風回,吾屬爲虜矣!且逆風而戰,敵人謂我必不能,所謂 「今虜乘上風,而吾居其下,宜待風回乃可戰。」[彥澤以爲然。 諸將皆去,偏將樂元福獨留 水、鑿井輒壞,又天大風,契丹順風揚塵奮擊甚銳,軍中大懼。 河北,彥澤在兵間,數立戰功,拜彰國軍節度使行。與契丹戰陽城,爲契丹所圍,而軍中無 出帝 時,彥澤爲左龍武軍大將軍,遷右武衞上將軍,又遷右神武統軍。 彦澤以問諸將,諸將皆曰: 自契丹與晉戰

惶惑不知所之,而彥澤適至,言虜可破之狀,乃與重威等西趨鎭州。 定之間,敗契丹于泰州,斬首二千級。重威、守貞攻瀛州不克,退及武彊,聞契丹空國入寇, 開運三年秋,杜重威爲都招討使,李守貞兵馬都監,彥澤馬軍都排陣使。彥澤往來鎭 **彥澤爲先鋒,至中渡** 

橋,已爲虜所據,彥澤猶力戰爭橋,燒其半,虜小敗却,乃夾河而寨。

書入,乃滅火。大內都點檢康福全宿衞寬仁門,登樓覘賊,彥澤呼而下之,諸門皆啓。彥澤 日:「臣無面目見陛下。」復使召之,彥澤笑而不答。 **頓兵明德樓前,遣傅住兒入傳戎王宣語,帝脫黃袍,素服再拜受命。 使人召彥澤,彥澤謝** 中火發,出帝以劍擁後宮十餘人將赴火,爲小吏薛超所持。。彥澤自寬仁門傳德光與皇太后 騎先入京師,彥澤倍道疾驅,至河,銜枚夜渡。 壬申夜五鼓,自封丘門斬關而入。 有頃,宮 十二月丙寅、重威、守貞叛降契丹,彥澤亦降。耶律德光犯闕,遣彥澤與傅住兒以二千

**德光渡河,帝欲郊迎,彦澤不聽,遣白德光,德光報曰:**「天無二日,豈有兩天子相見於道路 躁,飮之有不測之虞,所以不敢進。」帝姑烏氏公主私賂守門者,得入與帝訣, 揮使李筠以兵監守,內外不通。 ,主者曰:「此非帝有也。」不與。 又使求酒於李崧,崧曰:「臣家有酒非敢惜,慮陛下憂 明日,遷帝於開封府,帝與太后、皇后肩興,宮嬪、宦者十餘人皆步從。 帝與太后所上德光表章,皆先示彥澤乃敢遣。 ,歸第自經死。 **彥澤遣控鶴指** 帝取內庫帛

雜

邪!」乃止。

初. 彥澤至京師,李濤謂人曰:「吾禍至矣!與其逃於溝竇而不免,不若往見之。」濤見

**彦澤,爲俚語以自投死,彦澤笑而厚待之。** 

太后,太后遲疑未與,即劫取之。。彥澤與閤門使高勳有隙,乘醉入其家,殺數人而去。 **视**之,出三手指,軍士卽驅出斷其腰領。 皇子延煦母楚國夫人丁氏有色, **彦**澤使人求於皇 迫遷<u>出帝,遂輦內庫,輸之私第,因縱軍士大掠京師。軍士邏獲罪人,彥澤醉不能問,</u> |彥澤自以有功於契丹, 晝夜酣飲自娛,出入騎從常數百人,循題其旗幟曰「赤心爲主」。 瞋目

然後用刑,勵剖其心祭死者,市人爭破其腦,取其隨,劈其肉而食之。 殺士大夫子孫,皆**接**絰杖哭,隨而詬詈,以杖朴之,**彦**澤俛首無一言。 人,問:「彥澤當誅否?」百官皆請不赦,而都人爭投狀疏其惡,乃命高勳監殺之。 彥澤前所 耶律德光至京師,聞彥澤劫掠,怒,鎖之。高勳亦自訴於德光,德光以其狀示百官及都 行至北市, 斷腕出鎖

叛以降虜,亦未必不亡,然開虜之隙,自一景延廣,而卒成晉禍者,此三人也。 嗚呼,晉之事醜矣,而惡亦極也!其禍亂覆亡之不暇,蓋必然之理爾。 使重威等雖不 視重威、彦

澤之死,而晉人所以甘心者,可以知其憤疾怨怒於斯人者,非一日也。 此,而終以不悟,豈非所謂「臨亂之君」各賢其臣」者歟? 兵皆在北面,國之存亡,繫此三人之勝敗,則其任可謂重矣。 其肉,剔其髓而食之,撦裂蹈踐,斯須而盡,何其甚哉!此自古未有也。然當是時,舉晉之 蓋天下惡之如彼、晉方任之如 至於爭已戮之尸,臠

# 校勘記

(二) 拜彰國軍節度使 之訛。 卷二八五稱「彰德節度使」。按安陽屬相州,爲彰德軍;彰國軍爲應州。此「彰國」當是「彰德」 薛史卷八四晉少帝紀稱「相州節度使」,卷九八張彥澤傳謂「出鎮安陽」,通鑑

# 新 五代史卷五十二

# 雜 傳第四十

# 王景崇

以求用。 累拜左金吾衞大將軍,常快快人主不能用其材。 隸麾下。 王景崇,邢州人也。爲人明敏巧辯,善事人。 已而翰北歸,許王從益居京師,用景崇爲宣徽使、監左藏庫。 明宗卽位,拜通事舍人,歷引進閤門使,馳詔方鎭、監軍征伐,必用景崇。 晉亡, 蕭翰據京師, 唐明宗鎮邢州,以爲牙將,其後嘗從明宗, 景崇厚路其將高车翰 後事晉,

策,甚有辯,高祖乃奇其材。 祖攻鄴,景崇不得從,乃求留守起居表,詣行在日見高祖, 漢高祖起太原,景崇取庫金奔迎高祖,高祖至京師,拜景崇右衞大將軍,未之奇也。 願留軍中効用,爲高祖畫攻戰之

高

# 一本作宮。

雜 傳 第 四 + 王 景 鋭

得漢 蜀兵,追至大散關而還。 善矣,若循遲 人為 兵爲援,高祖遣景崇以兵迎回鶻。 助 是 高 時 祖 漢 方新造 思之。 疑,則以便宜圖之。」景崇行至陝,趙贊已東入朝, 及已破鄴,益等懼,皆請 鳳翔侯益、永興趙贊皆嘗受命契丹,高祖立,益等內顧自 高祖乃詔景崇兼鳳翔巡檢使。 景崇將行,高祖已疾,召入臥內戒之曰:「益等已來 入朝。 會回 鶻 入貢 而燭兵方寇南山, 言爲党項 所隔不得通 疑,乃陰召蜀 景崇擊破

行及矣!非吾,誰爲子言之。」於是景崇頗不欲殺益,益乃亡去,景崇大悔失不殺之。 不過賓佐,而子已貴矣,奈何欲以陰狡害人而取之乎?侯公父子爪牙數百,子毋妄發,禍 主莫知,獨豫未決。 景崇至鳳翔,侯益未有行意,而高祖崩,或勸景崇可速誅益,景崇念獨受命先帝而少 益從事程渥,與景崇同鄕里,有舊,往說景崇曰:「吾與子爲故人, 吾位

精兵 景崇 翔節 兵至矣,須臾塵起,景崇以爲然,乃令數千人潰圍而出以爲應。 開 封 (挑戰) 度使。 西招蜀人為助,蜀兵至寶鷄,為暉將藥元福、李彥從所敗。 尹,景崇心不自安,諷鳳翔將吏求已領府事。 盆 至京師,隱帝新立,史弘肇、楊邪等用事,益乃厚略邪等,陰以事中景崇。 景崇不出。 景崇乃飯,盡殺侯益家屬,與趙思綰共推李守貞爲秦王,隱帝卽以趙暉討之。 |暉乃令千人潛之城南一舍, 偽爲圖兵旗幟, 循南 朝廷患之,拜景崇邠州留後,以趙暉爲鳳 暉攻鳳翔,塹而圍之,數以 暉設伏以待之,景崇兵大 山而下, 聲言蜀救 已而益 拜

敗,由是不敢復出。

成而死,猶勝於東手也。」璨等皆然之。 乎?吾聞趙暉精兵皆在城北,今使公孫輦等燒城東門偽降,吾以牙兵擊其城北兵,脫使不 今皆敗矣,何所恃乎?不如降也。」景崇曰:「誠累君等,然事急矣, 吾欲爲萬有一得之計可 明年, 守貞、思綰相次皆敗,景崇客周璨謂景崇曰:「公能守此者,以有河中、 遲明,釐燒東門將降,而府中火起,景崇自焚矣,釐 京兆也。

# 趙思綰

乃降暉。

趙思綰、魏州人也。爲河中節度使趙贊牙將。漢高祖即位,徙贊鎭永興,贊入朝京師,

聲請先黥以率衆,齊藏珍惡之,竊勸景崇殺思綰,景崇不聽,與俱西。 俱西,然以非己兵,懼思綰等有二心,意欲黥其面以自隨,而難言之,乃稍微風其旨。思綰厲 留思縮兵數百人於永與。 景崇至永興,贊雖入朝,而其所召蜀兵已據子午谷,景崇用思結兵擊走之。遂與思結 高祖遣王景崇至永興,與齊藏珍以兵迎回鶻,陰以西事屬之。

高祖遺使者召思縮等,是時侯益來朝,思縮以兵從益東歸〔〕。 思館謂其下常彥卿日:

儜

第四十

趙思

綰

興副 挈其家屬。」益信之以爲然。 ·趙公已入人手,吾屬至,丼死矣,奈何?」<br/>>>>>順日:「事至而變,勿預言也。」<br/>>|益 使安友規出 迎益,飲于郊亭,思綰前曰:「兵館城東,然將士家屬皆居城中,頗縱兵入城 思縮與部下入城,有州校坐於城門,思縮歐之,奪其佩刀斬之, 行至 永興,永

丼斬門者十餘人,遂閉門劫庫兵以叛。

虚 至千,則勇無敵矣!」 以思維爲晉昌軍節度使。 「殺人而食,每犒宴,殺人數百,庖宰一如羊豕。 高 ·祖遣郭從義、王峻討之,經年莫能下,而王景崇亦叛,與思綰俱送款於李守貞, 隱帝遣郭威西督諸將兵,先圍守貞於河中。 思縮取其膽以酒吞之,語其下曰:「食膽 居數月,思綰城中食 守貞

壯夫所恥,幸少假之。」從義許之,父子俱斬於市 拜思縮鎭國軍留後,趣使就鎭,思縮遲留不行。 若坐守窮城,待死而已。」思縮然之,乃遣教練使劉珪詣從義乞降,而遣其將劉筠奉表朝廷。 之,乃遣人白郭威,威命從義圖之。從義因入城召思綰, 趣之上道, 至則擒之。思綰問曰: 而爲此爾!今國家用兵三方,勞敝不已,誠能翻然効順,率先自歸,以功補過,庶幾有生; ·何以用刑?」告者曰:「立釘也。」思縮厲聲曰:「爲吾告|郭公,吾死未足塞責,然釘磔之醜, 思縮計窮,募人爲地道,將走圖,其判官陳讓能謂思縮曰曰三二公比於國無嫌, 蜀陰遣人招思綰,思綰將奔蜀,而從義亦疑 但懼死

事 唐明宗爲軍校、累遷刺史。唐、晉之間、歷磁、單、濮、棣四州,坐濮州造麴受財,法當死, 慕容彥超,吐谷渾部人,漢高祖同產弟也。 嘗冒姓閻氏,彥超黑色胡髯,號閻崑崙。 小

漢高

祖自太原上章論救,得減死,流于房州。

周 以事凌辱行周,行周不能忍,見宰相涕泣,以屎塞口以自訴。 持重 周以女故,惜賊城而不攻,行周大怒。 以 ,召彥超責之,又遣詣行周謝過,行周意稍解。 天平軍節度使高行周爲都部署以討之,以彥超爲副。彥超與行周謀議多不協,行周用兵 一,兵至城下,久之不進。 契丹滅晉,漢高祖起太原,彥超自流所逃歸漢,拜鎭寧軍節度使。杜重威反於魏,高祖 彦超欲速進戰,而行周不許。 行周有女嫁 重威子, 彦超揚言行 高祖聞二人不相得,懼有佗變,由是遽親征。 高祖知曲在彦超,造人慰勞行 彦超數

行周爲天雄軍節度使, ,高祖以爲然,因自督士卒急攻,死傷者萬餘人,由是不敢復言攻。 雅 净 第 + 行周辭不敢受,高祖遣蘇逢吉諭之曰:「吾當爲爾徙彥超。」行周乃 後重威 出降, 高祖以

79

慕 容 彦

超

是時,漢兵頓魏城下已久,重威守益堅,諸將皆知未可圖,方伺其隙,而彥超獨言可速

# 受,而彥超徙鎭泰寧。

州, 歸營。」又謂隱帝曰:「官家宮中無事,明日 里,隱帝出勞軍 此 在 懦 至克,彥超方食,釋匕箸而就道。 隱帝遇弑于北郊。 京 夫之計也。」隱帝乃遣彦超副益,將兵于北郊。 師 帝已殺史弘肇等,又遣人之魏殺周太祖及王峻等,懼事不果, ,宜閉門以挫其銳,遣其妻子登陴以招北兵, ,太后使人告彥超善衞帝,彥超大言報曰:「北兵何能爲?當於陣 周兵犯京師,開封 可出觀臣戰。」明日隱帝復出勞軍,彥超 周兵至,益夜叛降于周。 尹侯益謂隱帝曰:「北兵之來,其家屬 可使解甲。」彥超誚益日:「益 召諸將入衞京師。 彦超 2戦敗 上 力戦 喝 老矣 奔廃 坐使 于七 使

敗, 反者。 晉、絳,太祖 手詔許之。 而 周太祖入立,彦超不自安,數有所獻,太祖報以玉帶,又賜詔書安慰之,呼彦超爲弟而 劉旻攻晉、絳不克,解去。 太祖 又造翰林學士魯崇諒往 彦超 殿其 遣王峻用 印 復稱管內多盜 文僞, 兵西方, 以書示行周。 彦超 慰諭之(三), 而 太而乃遣侍衞步軍指揮使曹英、客省使向訓討之,彥超閉 茈 乘間亦謀反, 又爲高行周所與書以進, 彦超 彦超心益 又遣人 遣押衙鄭麟至京 南結李昇, 一疑懼。 已而 異爲出 其辭皆指斥周 劉旻自立于 師求入朝 兵攻沭陽,爲周 太原, 過失, 知其詐, 若欲共 出兵攻 兵所

城自

雜傳第四十一 慕容彦超 校勘記

贖出弘魯,彥超大怒,遺軍校笞弘魯夫婦肉爛而死,遂斬周度于市。 隱。 家僮與周度斸掘搜索無所得。彥超又遺鄭麟持刃迫之,弘魯惶恐拜其妻妾,妻妾皆言無所 度,乃令周度監括弘魯家。周度謂弘魯曰:「公命之死生,繫財之多少,願無隱也。」弘魯遣 中民貲以犒軍,前陝州司馬閻弘魯懼其鞭扑,乃悉家貲以獻。 彥超以爲未盡,又欲并罪周 河中、安襄陽、鎭陽杜令公,近歲之龜鑑也。」彥超大怒,未有以害之。 已而見圍,因大括城 義守之而長世者多矣。今公英武,一代之豪傑也,若量力相時而動,可以保富貴終身。李 周度入白彥超,彥超不信,下弘魯及周度于獄。弘魯乳母於泥中得金纏臂獻彥超,欽 初,彥超之反也,判官崔周度諫曰:「魯,詩書之國也,自伯禽以來未有能霸者,然以禮

里 致祭,迎於開元寺,塑像以事之,日常一至,又使民家立黃幡以禳之。 是歲鎭星犯角、亢,占曰:「角、亢,鄭分,兗州當焉。」彥超卽率軍府將吏步出西門三十

曰:「此鐵胎爾,復何用哉!」皆不爲之用。 包以銀,號「鐵胎銀」。其被圍也,勉其城守者曰:「吾有銀數千鋌,當悉以賜汝。」軍士私相謂 之,民皆爭以所質物自言,已而得質僞銀者,寘之深室,使敎十餘人日夜爲之,皆鐵爲質 彦超陰教主吏夜穴庫垣,盡徙其金帛于佗所而以盜告。 **彥超爲人多智詐而好聚斂,在鎭嘗置庫質錢,** 有奸民爲僞銀以質者, 主吏久之乃覺。 **彦超即膀于市,使民自占所質以償** 而

明年五月,太祖親征,城破,彥超夫妻皆投井死,其子繼勳率其徒五百人出奔被擒, 忿

滅其族。 克州平,太祖韶贈閻弘魯左驍衛大將軍、崔周度祕書監。

# 校勘記

是時侯益來朝思緒以兵從益東歸 薛史卷一〇九趙思維傳云「遺供奉官王益部署思維等赴

闕」。按通鑑卷二八七及卷二八八,侯益來朝在乾祐元年二月,趙思縮從王益東歸在乾祐 元 年三

東襄追、資也、臣以司,南益、及、安、南、月,兩不相涉。疑此處侯益爲王益之誤。

 $\Xi$ 陳讓能 貴池、汪本同,南監、汲、殿、南昌、 蜀、鄂、 劉校本及薛史卷一〇九趙思維傳、 通鑑卷

二八八「陳」作「程」

3 魯崇諒 汪、南監本同、貴池、汲、殿、南昌、蜀、鄂、劉校本及通鑑卷二九○「魯」作「魚」。

# 新五代史卷五十四

# 雜傳第四十二

敗亡,亦無所不至,況爲大臣而無所不取不爲,則天下其有不亂,國家其有不亡者乎!予讀 之大法;廉恥,立人之大節。 傳曰:「禮義廉恥,國之四維;四維不張,國乃滅亡。」善乎,管生之能言也!禮義,治人 蓋不廉,則無所不取;不恥,則無所不爲。人而如此,則禍亂

豫、任人之國者多矣,然使忠義之節,獨出於武夫戰卒,豈於儒者果無其人哉? 豈非高節之 邑,必有忠信。」豈虚言也哉! 士惡時之亂,薄其世而不肯出歟。抑君天下者不足顧,而莫能致之歟。孔子以謂:「十室之 馮道長樂老敍,見其自述以爲榮,其可謂無廉恥者矣,則天下國家可從而知也。 予於|五代得全節之士三,死事之臣十有五,而怪士之被服儒者以學古自名,而享人之

不得見也。 予嘗得五代時小說一篇,載王凝妻李氏事,以一婦人猶能如此, 凝家青、齊之間,爲虢州司戶參軍,以疾卒于官。 凝家素貧,一子尚幼,李氏攜 則知世固嘗有其人而

雜

傳第

四十二

馮道

指,或爲之泣下。 手爲人執邪?不可以一手抖汚吾身!」卽引斧自斷其臂。 |李氏顧天已暮,不肯去,主人率其臂而出之。 其子,負其遺骸以歸。 開封尹聞之,白其事于朝, 東過開封,止旅舍,旅舍主人見其婦人獨攜一子而疑之,不許其宿。 官爲賜藥封瘡,厚卹|李氏,而笞其主人者。 李氏仰天長慟日:「我爲婦人,不能守節,而此 路人見者環聚而嗟之,或爲彈 鳴

#### 馮道

`土不自愛其身而忍恥以偷生者,聞李氏之風宜少知愧哉

東軍 ,以爲巡官,以其文學薦之晉王,爲河東節度掌書記。 馮道字可道,瀛州景城人也。 事劉守光爲參軍,守光敗, 莊宗卽位,拜戶部侍郎, 去事宦者張承業。 承業監河 充翰林

耕于野,躬自負薪。 却,寘之別室,訪其主而還之**。 獨而已**。所得俸祿, 道爲人能自刻苦爲儉約。 有荒其田不耕者,與力不能耕者,道夜往,潛爲之耕。 與僕廝同器飲食,意恬如 其解學士居父喪于景城,遇歲飢, 當晉與梁夾河而軍,道居軍中,爲一茅庵,不設牀席,臥一 也。 諸將有掠得人之美女者以遺道, 悉出所有以賙 其人後來媿謝 鄉里, 道不能 而退 束

師。孔循勸道少留以待,道曰:「吾奉詔赴闕,豈可自留!」乃疾趨至京師。 道 殊不以爲德。 服除, 復召爲翰林學士。 行至汴州,遇趙在禮亂,明宗自魏擁兵還,

也。 」明宗曰:「吾素知之,此眞吾宰相也。」拜道端明殿學士,遷兵部侍郎。 莊宗遇弑,明宗卽位,雅知道所爲,問安重誨曰:「先帝時馮道何在?」重誨曰:「爲學士 歲餘,拜中書侍

郎、

同中書門下平章事

誦。 貴餓農,穀賤傷農。」因誦文士聶夷中田家詩, 前世有形之寶爾,王者固有無形之寶也。」明宗問之,道曰:「仁義者,帝王之寶也。 而獲全,居安者患生於所忽,此人情之常也。」明宗問曰:「天下雖豐,百姓濟否?」道曰:「穀 山 大寶日位,何以 過井陘之險,懼馬蹙失,不敢怠於銜轡,及至平地,謂無足慮,遽跌而傷。 水運 天成、長興之間,歲屢豐熟, 軍將於臨河縣得一 分守位 日仁。』」明宗武君,不曉其言,道已去,召侍臣講說其義,嘉納之。 玉杯,有文曰「傳國寶萬歲杯」,明宗甚愛之,以示道,道曰:「此 中國無事。 其言近而易曉。 道嘗戒明宗曰:「臣爲河東掌書記時,奉使中 明宗顧左右錄其詩, 凡蹈危者慮深 常以自 故曰:

道爲同州節度使,踰年,拜司空。 晉滅唐,道又事晉,晉高祖拜道守司空、同中書門下平章

王入,

雜 傳

第 四

+

馮

道

是爲廢帝,遂相之。

廢帝卽位,愍帝猶在衞州

後三日,愍帝始遇弑

崩。

已而

廢帝出

道相明宗

十餘年(1),明宗崩,相愍帝。

路王反於鳳翔,

愍帝出奔衛州,

道率百官迎路

太師 徙鎮 又問曰:「何以來朝?」對曰:「無城無兵,安敢不來。」德光誚之曰:「爾是何等老子?」對曰: 加司徒,兼侍 威勝。 奉朝請。 無德癡 契丹滅晉, | 頑老子。」 德光喜,以道爲太傅。 周滅漢,道又事 中,封魯國公。 道又事契丹, 周,周太祖拜道太師,兼中書令。 高祖崩,道相出帝,加太尉,封燕國公,罷爲匡國軍節度使, 朝耶律德光於京師。 **德光北歸**, 從至常山。 德光責道事晉無狀, 漢高祖立,乃歸漢,以 道 不能對。

當世之士 道少能 無賢愚皆仰道爲元老,而喜爲之稱譽。 !矯行以取稱於世,及爲大臣,尤務持重以鎭物,事四姓十君, 益以舊德自處。 然

道視 至澶州 太祖 帝教得。」人皆以謂契丹不夷滅中國之人者,賴道一言之善也。 太祖意少沮,知漢未可代,遂陽立湘陰公贇爲漢嗣,遣道迎贇于徐州。 謂漢大臣必行推戴,及見道,道殊無意。 喪君亡國亦未嘗以屑意 耶 律德光嘗問道曰:「天下百姓如何救得?」道爲俳語以對曰:「此時佛出救不得,惟皇 ,擁兵而反,遂代漢。 議者謂道能沮太祖之謀而緩之,終不以晉、漢之亡責道也。 太祖素拜道, 因不得已拜之,道受之如 周兵反,犯京師,隱帝 灣未至,太祖 將兵北 ~時,

更事四姓及契丹所得階勳官爵以爲榮。 當 是時 `,天下大亂,戎夷交侵,生民之命, 自謂:「孝於家,忠於國,爲子、爲弟、爲人臣、 急於倒懸, 道方自號「長樂老」,著書數百言,

中,聞者哀憐之。 以爲太祖山陵使。葬畢而道卒,年七十三,諡曰文懿,追封瀛王。 擊旻,果敗旻于高平。世宗取淮南,定三關,威武之振自高平始。其擊旻也,鄙道不以從行, 世宗曰:「吾見唐太宗平定天下,敵無大小皆親征。」道曰:「陛下未可比唐太宗。」世宗曰: 有大喪,必不能出兵以戰。且善用兵者出其不意,吾當自將擊之。」道乃切諫,以爲不可。 自樂,何樂如之?」蓋其自述如此。 爲師長、爲夫、爲父,有子、有孫。 時開一卷,時飮一杯,食味、別聲、被色,老安於當代,老而 「劉旻烏合之衆,若遇我師,如山壓卵。」道曰:「陛下作得山定否?」世宗怒,起去,卒自將 其兄珽,唐末舉進士及第,爲監察御史。丁內艱,貧無以葬,乞食而後葬。 李琪字台秀,河西燉煌人也。 |道旣卒,時人皆共稱歎,以謂與孔子同壽,其喜爲之稱譽蓋如此。 道前事九君,未嘗諫諍。世宗初卽位,劉旻攻上黨,世宗曰:「劉旻少我,謂我新立而國 服除,還拜御史。 荆南成汭辟掌書記。吳兵圍杜洪,梁太祖遣汭與馬殷 道有子洁。 珽飢臥廬

雜傳第四

+ =

李琪

誅之。 出出 下黄, 襲怒 甚, 間 即 許州 州 爲敵 書記也。」太祖卽位, 解矣。」汭不聽,果敗,溺死。 等救洪。 齊 以 曹州尤甚,太祖 欲使人 所廢 授珽。 討 馮行 曹州 人縻之,則武陵、武安必爲公之後患。 故此 誣以贓下獄, 賊 召拜左 ·襲病,行襲有牙兵二千,皆故蔡卒,太祖懼爲變。行襲爲人嚴酷,從事魏峻切諫,行 素劇難理,前刺史十餘輩, |汭以大舟載兵數萬,|珽爲||汭謀曰:「今一舟容甲士千人,糗糧倍之,緩急不 今在 珽 名內黃。」太祖 、代受韶, 英曰:「東首加朝服,禮也。」乃卽臥內見行襲,道太祖語, 行襲感泣 ) 瑛乃理峻冤,立出之,還報太祖,太祖喜曰:「 英果辦吾事 爲 諫議 剣 陳留。」太祖平生不愛儒者, 兵 大夫。 復遣既治之。既至索賊,得大校張彥珂、既甥李郊等,及牙兵百餘人,悉 欲誅之。乃遣既代行襲爲留後。 所殺 除考功員外郎、 曰:「外黄、下黄 太祖 趙匡凝鎭襄陽, 幸河北 知制誥。 皆坐廢, ,至內黃,顧珽曰:「何謂 何在? 不若以勁兵屯巴陵,壁不與戰,吳兵糧盡 聞珽語大喜。 又辟掌書記。 **珽**至,以治聞。 」珽曰:「秦有外黃都 **珽至許州,止傳舍,慰其將吏,行襲病** 友珪立,除右散騎常侍,侍 太祖破匡凝,得珽,喜曰:「此 遷兵部郎中、崇政院直學士。 內黃?」珽曰:「河南 尉,今在 ,。」會歲 飢, 強丘; 盗劫汴、宋 有外黃 可動 下黄為 一, 則 岩岩 解 袁 眞 重

唐亡,事梁太祖爲

吏當得試官,)) ) ] ) ] ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( ) | ( 尚書左丞,拜同中書門下平章事, 與蕭頃同爲宰相。 翰林學士。 二人多所異同。琪內結趙巖、張漢傑等爲助,以故頃言多沮。頃嘗掎摭其過。 |梁兵征伐四方,所下詔書,皆||琪所爲,下筆輒得||太祖意。 頃性畏愼周密,琪倜儻負氣,不拘小 末帝時,爲御史中丞、 

明宗以爲然,乃發喪成服,而後卽位。以與爲御史中丞。 世,今興兵向闕,以赴難爲名,而欲更易統號,使先帝便爲路人,則斃然梓宮, 宜改號以自新。」明宗疑之,下其事羣臣,羣臣依違不決。 說,問何謂改號,對曰:「莊宗受唐錫姓爲宗屬,繼昭宗以立,而號國曰唐。 勸進,有司具儀,用柩前卽位故事。 漫然無足取,而莊宗獨稱重之,遂以爲國計使。 光三年秋,天下大水,京師乏食尤甚,莊宗以朱書御札詔百僚上封事。 琪上書數千言,其說 唐莊宗滅梁,得琪,欲以爲相,而梁之舊臣多嫉忌之,乃以爲太常卿。 霍彥威、孔循等請改國號,絕土德。 方欲以爲相,而莊宗崩。 | 琪議日:「殿下宗室之賢, 立功三 明宗武君,不曉其 明宗入洛陽,羣臣 今唐天命已絕, 遷吏部尙書。 何所依往!」 同

聞不 ·坐卽退,獨大臣奏事,日一見便殿,而侍從內諸司,日再朝而已。 自唐末喪亂,朝廷之禮壞,天子未嘗視朝,而入閤之制亦廢。 常參之官日至正衙者,傳 明宗初卽位,乃詔羣

雅將第

рц

李琪

居,朔望一出御文明殿,前殿也,反謂之入閤,琪皆不能正也。」琪又建言:「入閤有待制、次 宴見也,其事殺。自乾符已後,因亂禮闕,天子不能日見羣臣而見朔望,故正衙常日廢仗, 明宗曰:「五日起居,吾思所以數見羣臣也,不可罷。而 喚仗,由閤門而入,百官俟朝于衙者,因隨以入見,故謂之入閤。然衙,朝也,其禮尊;閤, 臣,五日一隨宰相入見內殿,謂之起居。以問非唐故事,請罷五日起居,而 殿見羣臣, 然有司不能講正其事。 `,前殿也,謂之衙,衙有仗。 紫宸,便殿也,謂之閤。 其不御前殿而御紫宸也,乃自正衙 日常參; 朔望薦食諸陵寢,有思慕之心,不能臨前殿,則御便殿見羣臣,曰入閤。 凡羣臣五日一入見中興殿,便殿也,此入閤之遺制,而謂之起 至出御前殿,猶謂之入閤,其後亦廢,至是而 朔望入閤可復。」然唐故事,天子日御 朔望入閣。

書右僕射。 猶 延 宣政 對官論事,而內殿起居,一見而退,欲有言者,無由自陳,非所以數見羣臣之意也。」明宗乃 韶起居日有言事者,許出行自陳。 又韶百官以次轉對 而朔望入閣有仗,其後習見,遂以入閣爲重。 而 **|依違不敢正言其事。|豆盧革等罷相,任圜議欲以與爲相,而孔循、鄭珏沮之,乃止。** 後奏。琪爲中丞,畏重酶不敢彈糾,又懼諫官論列,乃託宰相任圜先白重誨而後糾,然 是時,樞密使安重誨專權用事,重誨前騶過御史臺門,殿直馬延誤衝之,重誨即臺門斬 **| 琪以狀申中書,言開元禮「僕射上事日,中書、門下率百官送上」。中書下太常,禮** 

院言無送上之文,而與已落新授,復舉上儀,皆不可。

「敗契丹之兇黨,破眞定之逆城」,坐誤以定州爲眞定,罰俸一月。霍彥威卒,詔踑撰神道碑 彦威故梁將,而<u></u>
西棋故梁相也,敍彦威在梁事不曰僞,爲馮道所駁。 明宗討王都,已破定州,自汴還洛,琪當率百官至上東門,而請至偃師奉迎。其奏章言

鄉 · 貢進士|李琪」,常置之坐側。爲人少持重,不知進退,故數爲當時所沮。以太子少傅致仕, 

#### 鄭珏

卒,年六十。

諸 士數不中,全義以珏 大臣 鄭廷 [以]全義故數薦之,累拜中書舍人、翰林學士奉旨。 ,唐宰相繁之諸孫也。 屬有司,乃得及第。 其父徽,爲河南尹張全義判官。 昭宗時,爲監察御史。 末帝時,拜中書侍郎、同中書門下 梁太祖卽位,拜左補闕。 珏少依全義居河南, 舉進 梁

### 平章事。

雑

傳

第四十二

**政** 廷

李

唐莊宗自鄆州入汴,末帝聞唐兵且至,惶恐不知所爲,與李振、敬翔等相持慟哭, 因召

寶馳入唐軍,以緩其行,而待救兵之至。」帝曰:「事急矣,寶固不足惜,顧卿之行,能了事 |珏問計安出,||珏曰:「臣有一策,不知陛下能行否?」||末帝問其策如何,||珏曰:「願得陛下傳國

否?」压俛首徐思曰:「但恐不易了。」於是左右皆大笑。

密使孔循。循嘗事梁,與珏善,因言珏故梁相,性謹愼而長者,乃拜珏平章事 a、復召爲太子賓客。 明宗卽位,欲用任圜爲相,而安重誨以圜新進,不欲獨相之,以問樞 莊宗入汴,珏率百官迎謁道左。貶萊州司戶參軍,量移曹州司馬。 張全義爲言於郭崇

切諫,乃詔罷其行。 而| 珏又稱贊之,以爲宜罷。 不省,上下洶洶,轉相動搖,獨压稱贊,以爲當行。」趙鳳極言於安重酶,重誨驚懼,入見明宗 明宗幸汴州,六軍家屬自洛遷汴,而明宗又欲幸鄴都,軍士愁怨,大臣頗以爲言。 明宗

之,压章四上,乃拜左僕射致仕,賜鄭州莊一區。卒,贈司空。 |珏在相位旣碌碌無所爲,又病聾,孔循罷樞密使,珏不自安,亟以疾求去職。 |明宗數留

#### 李愚

李愚字子晦,渤海無棣人也。 **愚爲人謹重寡言,好學,爲古文。** 滄州節度使盧彦威以

東,與李延光相善,延光以經術事梁末帝爲侍講,數稱薦愚,愚由此得召。 久之,拜左拾遺、 其言甚壯。 愚 爲安陵主簿,丁母憂解去。 建不能用,乃去之洛陽。 後遊關中,劉季述幽昭宗於東內,愚以書說韓建, 。舉進士、宏詞,爲河南府參軍。 白馬之禍,愚復去之山 使圖興復,

坐 卿 ||言事忤旨,罷爲鄧州觀祭判官。 **'獨揖,可乎?」 愚曰:「陛下以家人禮見之,則拜宜也。臣於王無所私,豈宜妄有所屈?」** <u>衡王友諒,末帝兄也,梁大臣李振等皆拜之,獨愚長揖,末帝以責愚曰:「衡王</u>朕拜之,

崇政院直學士。

見利 爲然,而所至迎降,遂以滅蜀。 发伐蜀 曰:「王衍荒怠,亂國之政,其人厭之。 則進,知難 唐莊宗滅梁,愚朝京師,唐諸公卿素聞愚學古,重之,拜主客郎中、翰林學士。 ,辟愚都統判官。 則止。今大軍 蜀道阻險,議者以謂宜緩師待變而進,招討使郭崇韜以決於愚,愚 ·涉險,人心易搖,正可斬之以徇。」由是軍 初,軍行至寶鷄,招討判官陳乂稱疾請留, 乘其倉卒,擊其無備,其利在速,不可緩也。」崇韜以 中無敢言留者。 愚厲聲曰:「陳乂 魏王

館以居。 愚有疾,明宗遣宦官視之,見其敗氈敞席,四壁蕭然,明宗嗟嘆,命以供帳物賜之。 借延賓

辭

罷爲太常卿。

任圜

[罷相,乃拜愚

中書侍郎、

同平章事(三)。

愚爲相,

不治第宅,

明宗卽位,累遷兵部侍郎承旨。

明宗

祀天南郊,愚爲宰相馮道、趙鳳草加

恩制,道鄙其

雜

傳

第

四

+

\_

乃相與出迎。廢帝入立,罷道出鎭同州,以劉昫爲相(計)。 死,愚欲至中書候太后進止,道曰:「潞王已處處張牓招安, 反,犯京師,愍帝夜出奔。 明日愚與馮道至端門, 今卽至矣, 聞帝已出, 何可俟太后旨也?」 而朱弘昭、馮贇皆已

| **昫與馮道姻家,愚數以此誚朐,兩人遂相諠詬,乃俱罷。** 

愚守左僕射

終日,而無所用心也。清太二年以疾卒。 職 而以愚爲迂,未嘗有所問。廢帝亦謂愚等無所事, ,州縣貢士,作鄉飲酒禮,時以其迂闊不用。一愍帝卽位,有意於治,數召學士,問以時事 是時,兵革方興,天下多事,而愚爲相,欲依古以創理,乃請頒唐六典示百司,使各舉其 常目宰相曰:「此粥飯僧爾! 」以謂飽食

#### 盧導

盧 導字熙化,范陽人也。 唐末舉進士,爲監察御史。 唐亡事梁、累遷左司郎中、侍御史

知雜事,以病免。

衛州 唐 明宗時,召拜右諫議大夫,遷中書舍人。 宰相馮道、李愚集百官于天宮寺,將出迎路王于郊,京師大恐,都人藏竄,百官久而 路王從珂自鳳翔以兵犯京師,愍帝出奔于

爲太府少卿。 導終不草牋。 言下榻,詬曰:「鈍漢辱我!」顧書吏問誰可草奏者,吏卽言頤羅王時書記,乃馳騎召之。 頲 正言草奏詆斥梁君臣,正言素不能文辭,又爲兵刃所迫,流汗狹背,不能下筆。 彥怒,推正 取太后進止。」 語未終,有報曰:「潞王至矣。」 京城巡檢使安從進催百官班迎,百官紛然而 |王守節不回,以忠義見責,其將何辭以對?且上與潞王,皆太后子也,不如率百官詣宮門, 事,豈可輕議哉!」道曰:「勸進其可已乎?」導曰:「今天子蒙塵于外,遽以大位勸人, 若腦 不集,惟導與舍人張昭先至。 路王止于正陽門外,道又促導草牋,導對如初。 司空願,貝州淸陽人也。唐僖宗時,舉進士不中,後去爲羅紹威掌書記。紹威卒,入梁 司空頲 楊師厚鎭天雄,頲解官往依之。師厚卒,賀德倫代之。張彥之亂,命判官王 馮道請導草牋勸進,導曰:「潞王入朝,郊迎可也,若勸進之 李愚曰:「吾輩罪人,盧舍人言是也。

雜

傳第四

十 二

司空質

校勘記

六二三

**晚**,甚喜,即給以衣服僕馬,遂以爲德倫判官

家奴召之,裕擒其家奴,以謂通書于梁。 **頲爲郭崇韜**所惡,崇韜數言其受路。 德倫以魏博降晉, 晉王 兼領天雄, 都虞候張裕多過失, 莊宗族殺之。 仍以頲爲判官。 梁、晉相距河上,常以頲權軍府事。 類 屢以 法 繩 之。 )類有姪在梁, 遭

## 校勘記

- (1) 道相明宗十餘年 按唐明宗在位僅八年,此誤。
- 任國罷相乃拜愚中書侍郎同平章事 趙鳳 三月趙鳳罷,以太常卿李愚爲中書侍郎、同平章事。薛史卷六七李愚傳云:「長興初除太常卿,屬 出鎮邢臺,乃拜中書侍郎平章事。」任圜罷相至李愚入相已經五年。纂誤卷下疑「史之所書 本史卷六唐明宗紀載:天成二年六月任圜罷,長興二年

本謂趙鳳,而觀爲任園也」。

3 馮道 罷道 七 月,以太常卿盧文紀爲中書侍郎、同平章事;十月, 了、李愚同列。又本史卷七及薛史卷四六唐廢帝紀載,清泰元年五月,馮道罷爲同州節度使; 出鎮同州以劉昫爲相 按本史卷六及薛史卷四四唐明宗紀,劉昫於長興四年正月爲相,與 李愚、劉昫罷相。 此云廢帝罷馮道出鎮而

以

劉昫爲相誤

# 新五代史卷五十五

# 雜傳第四十三

#### 劉昫

後爲定州王處直觀察推官。處直爲子都所囚,昫兄暄亦爲怨家所殺,昫乃避之滄州 劉昫,涿州歸義人也。 | 晌爲人美風儀, 與其兄|喧(I)、弟嗥, 皆以好學知名|燕、| 蒯之間。

事, 昫 **?而愛其風韻,遷端明殿學士。長興三年 (11),拜中書侍郎兼刑部尙書、同中書門下平章** 唐莊宗卽位,拜昫太常博士,以爲翰林學士, 明宗時, 累遷兵部侍郎居職。明宗素重

榮。廢帝入立,遷吏部尙書、門下侍郎,監修國史。

廢帝大怒,罷政,命昫兼判三司。 初,廢帝入,問三司使王政:「帑廩之數幾何?」」政言:「其數百萬。」及責以賞軍而無十 **晌性察,而嫉三司蠹敝尤甚,乃句計文簿,覈其虚實,** 

雑

傳第四

+ =

劉昫

残 租 積 負 悉 蠲 除 之。 往時 東幸積年之負蓋而不發, 因以把持州縣求賄路, 及购一 切蠲除

民間歡然以爲德,而三司吏皆沮怨。

岡 以 直, 消 晌日:「此公親家翁所爲也!」<u>晌性少容恕,而愚特剛介,遂相詆詬。相府史東惡此兩人</u> 先 因共揚言,其事聞, 是 ,馮道與昫爲姻家而同爲相,道罷,李愚代之。愚素惡道爲人,凡事 廢帝並罷之, 以昫 爲右僕射。是時,三司諸吏提印聚立月華門外 有稽失者, 必指

聞 宣 Hic 罷 晌相,皆歡呼相賀曰:「自此我曹快活 矣

射 皆 僕 司 胎 班 不 射 軱 自 能 次 易日「有 昫 以 入朝 亦 道 知 在 由 改居儉祕書監, 相位,不習 皆 丵 遇雨,移班廊 是時 相 不 恥且格」。居儉訴曰:「名諱 能 罷 與道 馮道罷 知,由是不 典故。 同,乃 下,御 相爲司空。 居儉 初, 入朝堂, 隨 史臺吏引僕射立 怏怏失職。 道出 明宗崩,太常卿崔居儉,以故事當爲禮儀使, 自隋、 一人,有司不能彈正 俟臺官、兩省入而後入, 有令式, 唐以 中書舍人李詳爲居儉誥詞, 中丞御 來,三公無職 予何 一,而 史下, 罪也? 議者 事 」當 昫詰. 多 宰 不不 竊 柏 時聞者皆傳以 吏以 特置,及道 笑之。 出 則 故 有「開 隨 事 丽 名心 居儉辭以祖諱 自 出 爲 爲笑。 宰 冒 懼」之語, 至 空, 相 昫 至 爲僕 問 一臺省 有

同中書門下平章事,復判三司 音 高 加 時 張 從賓 反 一、殺 皇 子 重 又於洛陽 契丹犯京師, 响以目疾罷爲太保. 乃以 昫 爲 東都 留 守 判 是歲卒 年六十。 鹽 鐵 開 運 中, 拜

### 盧文紀

吾法官!」皆杖而遣之。文紀又請悉復中外官校考法,將相天子自書之,詔雖施行,而官卒 相趙鳳:「進奏更比外何官?」鳳日:「州縣發遞知後之流也。」明宗怒曰:「乃吏卒爾,安得慢 密使安重海。 重海曰:「吾不知故事,可上訴于朝。」即相率詣閣門求見以狀訴。 明宗問宰 奏官奮臂諠然欲去,不得已入見,文紀據牀端笏,臺吏通名贊拜,旣出,恚怒不自勝,訴於樞 名,勞以茶酒而不相見,相傳以爲故事。」文紀曰:「吾雖德薄,敢隳舊制?」因遣吏諭之。進 子微弱,諸侯彊盛,買奉不至,朝廷姑息方鎮,假借邸吏,大夫、中丞上事,進奏官至客次通 賀,文紀問:「當如何?」吏對曰:「朝廷在長安時,進奏官見大夫、中丞如胥史。自唐衰,天 爲刑部侍郎、集賢殿學士。唐明宗時,爲御史中丞。初上事,百官臺參,吏白諸道進奏官 盧文紀字子持,其祖簡求,爲唐太原節度使,父嗣業,官至右補闕。文紀舉進士,事梁

上,文紀不見之,因請連假。 文紀素與宰相崔協有隙,協除工部郎中于鄴,文紀以鄴與其父名同音,大怒,鄴赴省參 雑 傳 第 7. + . = 成文 已而鄴奉使未行,文紀卽出視事,鄴因醉忿自經死;文紀坐貶 紀 胤 孫

馬

不考。歲餘,遷工部尙書。

石州司馬。

望。」廢帝因悉書淸望官姓名內琉璃瓶中,夜焚香呪天,以筯挾之,首得文紀,欣然相之,乃 拜中書侍郎、同中書門下平章事。 偉、語音琅然,廢帝奇之。後廢帝入立,欲擇宰相,問於左右,左右皆言:「文紀及姚顗有人 **久之,爲祕書監、太常卿。** 奉使于蜀,過鳳翔,時廢帝爲鳳翔節度使, 文紀爲人形貌魁

何必延英。 容奏議天下事。 是時,天下多事,廢帝數以責文紀。 因韶宰相有事,不以時詣閤門請對。 廢帝以謂五日起居,明宗所以見羣臣也,不可罷,而便殿論事,可以從容, 文紀因請罷五日起居,復唐故事,開延英,冀得從

待,自卿爲相,詢于輿議,皆云可致太平,今日使吾至此,卿宜如何?」<u>文</u>紀皇恐謝罪。 至河陽,文紀勸帝扼橋自守,不聽。 晉高祖起太原,廢帝北征,過拜徽陵,休仗舍,顧文紀曰: [吾自鳳翔識卿,不以常人爲 周太祖入立,卽拜司空于家。卒,年七十六,贈司徒。 晉高祖入立,罷爲吏部尚書,累遷太子太師,致仕。

### 馬胤孫

屬,而先帝新棄天下,臨喪赴鎭,臣子之忠也。」左右皆笑其愚,然從珂心獨重之。 廢帝入 胤孫告之曰:「受命移鎭,路出京師,何向爲便?」胤孫曰:「君命召,不俟駕。今大王爲國宗 尹 從珂河中觀察支使。 ,, 徙鎭鳳翔,胤孫常從之,以爲觀察判官。 踏王將舉兵反,與將吏韓昭胤等謀議已定,召 馬胤孫字慶先,棣州商河人也。 從珂爲楊彦温所逐, 爲人懦暗,少好學,學韓愈爲文章。 罷居于京師里第,胤孫從而不去。 。舉進士,爲唐潞王 從珂爲京兆

立,以爲戶部郞中、翰林學士。 久之,拜中書侍郞、同中書門下平章事。

其不開口 語人也!且僕射師長百寮,中丞、大夫就班脩敬,而常侍在南宮六卿之下,況僕射乎?四序 常侍在前。」胤孫卽判臺狀施行,劉昫大怒。崔居儉揚言于朝曰:「孔昭序解語,是朝廷無解 昭序建言:「常侍班當在僕射前。」胤孫責御史臺檢例,臺言:「故事無所見,據今南北班位, 紀獨以謂司空之職,祭祀掃除而已。胤孫皆不能決。時劉昫亦罷相爲僕射,右散騎常侍孔 特拜者,有司不知故事,朝廷議者紛然,或曰司空三公,宰相職也,當參與大政,而宰相虛文 ,豈識事體?」朝士聞居儉言,流議稍息。 胤孫不通世務,故事多壅塞。是時,馮道罷匡國軍節度使,拜司空。 以論議,不開印以行事,不開門以延士大夫也。 胤孫臨事多不能決,當時號爲「三不開」,謂 司空自唐已來無

晉兵起太原,廢帝幸河陽,是時勢已危迫,胤孫自洛來朝行在,人皆冀其有所建言,胤 왞 傳 绑 γц +  $\equiv$ 馬 胤 孫 姚 顗

孫獻綾三百匹而已。晉高祖入立,罷歸田里。

人,而常誦傳奕之論,今反佞佛,是佛佞公邪,公佞佛邪? 時人誚之曰:「佞清泰不徹,乃來佞佛。」清泰,廢帝年號也。 胤孫旣學韓愈爲文,故多斥浮屠氏之說,及罷歸,乃反學佛,撰法喜集、佛國記行于世。 · 」胤孫答曰:「豈知非佛佞我也?」 。 人有戲胤孫曰:「公素慕韓愈爲

協爲明宗相, 後以太子賓客分司居于洛陽,周廣順中卒。 在位無所發明,旣死,而有降語其家,胤孫又然。時人嘲之曰:「生不能言,死 胤孫卒後,其家婢有爲胤孫語者。 初,

# 而後語」云。

姚顗

時人傳以爲笑。

爲 奇 以爲左散騎常侍兼吏部侍郎、尙書左丞。 文紀及質,乃拜頗中書侍郎、同中書門下平章事。 姚顗字百眞,京兆長安人也。少惷,不修容止,時人莫之知,中條山處士司空圖一 ,以其女妻之。舉進士,事深爲翰林學士、中書舍人。 廢帝欲擇宰相,選當時清望官知名於世者,得虛 唐莊宗滅梁,貶復州 司馬,

資、長定舊格,歲久多舛,因增損之。 選人多不便之,往往邀遮宰相,喧訴不遜, 顯等無如 之何,廢帝爲下詔書禁止。 中,馮道爲相,建言:「天下未一,選人歲纔數百,而吏部三銓分注,雖曰故事,其實徒繁而無 益。」始詔三銓合爲一,而尙書、侍郎共行選事。至顗與盧文紀爲相,復奏分銓爲三。而循 **尙書一人日尙書銓,侍郎二人日中銓、東銓。每歲集以孟多三旬,而選盡季春之月。**|天成 **顗爲人仁恕,不知錢陌銖兩之數,御家無法,在相位龊龊無所爲。唐制吏部分爲三銓,** 

能斂,聞者哀憐之。 晉高祖立,罷順爲戶部尙書。卒,年七十五,卒之日家無餘貲,尸不能斂,官爲賵贈乃

#### 劉岳

好學,敏於文辭,善談論。舉進士,事梁爲左拾遺、侍御史。末帝時,爲翰林學士,累官至兵 劉岳字昭輔,洛陽人也。唐民部尚書政會之八代孫,崇龜、崇望其諸父也。 岳名家子,

部侍郎。

傳

一 十 三

劉

梁亡,貶此州司馬。復用爲太子詹事。 唐明宗時,爲吏部侍郎。 故事, 吏部文武官告

|代之亂,因以爲常,官卑者無復給告身,中書但錄其制辭,編爲敕甲。 |岳建言,以謂「制辭或 任其材能,或褒其功行,或申以訓誡,而受官者旣不給告身,皆不知受命之所以然,非王言

所以告詔也。 請一切賜之」。由是百官皆賜告身,自岳始也。

宰相馮道世本田家,狀貌質野,朝士多笑其陋。道旦入朝,兵部侍郎任贊與岳在其後,

牧子之所誦也,故岳舉以誚道。道聞之大怒,徙岳秘書監。其後李愚爲相,遷岳太常卿。 道行數反顧,贊問岳:「道反顧何爲?」岳曰:「遺下冤園册爾。」冤園册者,鄉校俚儒教田夫

用之。 後亡失,愈不可究其本末,其婚禮親迎,有女坐婿鞍合髻之說,尤爲不經。公卿之家,頗遵 損 用於死者可乎?」乃詔岳選文學通知古今之士,共删定之。岳與太常博士段顒、田敏等增 起復、冥昏之制,歎曰:「儒者所以隆孝悌而敦風俗,且無金革之事,起復可乎。婚,吉禮也、 '其書,而其事出鄙俚,皆當時家人女子傳習所見,往往轉失其本,然獨時有禮之遺制。 其 初,鄭餘慶嘗採唐士庶吉凶書疏之式,雜以當時家人之禮,爲書儀兩卷。明宗見其有 至其久也,又益訛謬可笑,其類甚多。

| 岳卒于官,年五十六,贈吏部尚書。子,温叟。

雜傳第四十三 馬縞

皆取岳書以爲法,而十又轉失其三四也,可勝歎哉! 意使民知禮。 佝拳拳而行之。 五代干戈之亂,不暇於禮久矣!明宗武君,出於夷狄,而不通文字,乃能有 嗚呼,甚矣,人之好爲禮也!在上者不以禮示之,使人不見其本,而傳其習俗之失者, 而岳等皆當時儒者,卒無所發明,但因其書增損而已。然其後世士庶吉凶,

#### 馬縞

事。 曰:「五帝不相襲禮,三王不相沿樂,惟皇與帝,異世殊稱。 爰自嬴秦, 明宗下其議, 旭 「漢諸侯王入繼統者,必別立親廟,光武皇帝立四廟于南陽,請如漢故事,立廟以申孝享。」 而 解嬻亭侯淑爲孝元皇〔三〕,父萇爲孝仁皇,請下有司定諡四代祖考爲皇,置園陵如漢故 累遷中書舍人、刑部侍郎、權判太常卿。明宗入立,繼唐太祖、莊宗而不立親廟。寫言: 無帝,惟吳孫皓尊其父和爲文皇帝, 事下太常,博士王丕議漢桓帝尊祖爲孝穆皇帝,父爲孝崇皇帝。 馬縞,不知其世家,少舉明經,又舉宏詞。事梁爲太常少卿,以知禮見稱于世。唐莊宗 禮部尚書蕭頃等請如縞議。宰相鄭珏等議引漢桓、靈爲比,以謂靈帝尊其 ,不可以爲法。 右僕射李琪等議與縞同。 已兼厥號, 朕居九五 稿以謂孝穆、孝崇有 明宗詔

一可行,有損有 李琪 原武昭王爲與聖皇帝,皆立廟京師,此唐家故事也。 爲億兆之尊, 、等請 尊祖 益。 禰爲皇帝,曾高爲皇。 今議者引古,以漢爲據,漢之所制,夫復何依。開元時, 奈何總二名於眇躬,惜一字於先世。」乃命宰臣集百官於中書,各陳所 宰相 鄭珏合羣議奏曰:「禮非天降而本人情, 臣請四代祖考皆加帝如韶旨,而 尊皋陶爲德明 可

**立廟京師。」詔可其加帝,而立廟應州** 

奪制 定,下太常具五服制度,附于令。」令有五服,自腐始也。 司封 也。 是。」 日:「令於 可同 之不 嫂無 郎中曹琛, 以名則兄子之妻疏, ,推恩引 如 同者五 廢帝下其議,太常博士段顒議「嫂服給假以大功者,令文也,令與禮異者非 服,推而遠之也。 劉岳脩書儀,其所增損,皆決於縞。 此」。右贊善大夫趙咸又議曰〔四〕:「喪, 喪服無正 義、各有 禮,姨舅皆服 請下其議,幷以禮、令之違者定議。 文,而嫂服給 所當。 唐太宗時,有司議爲兄之妻服小 因尊則嫂非卑,嫂服 小功,令皆大功。 據禮爲兄之子妻服大功,今爲兄之子母服小功,是輕重失 大功假,乃假寧附令,而敕無年月,請凡喪服皆以開元禮爲 [編又言:「穣麻喪紀,所以別親疏, 大功,其來已久。令, 與其易也, 妻父母壻外甥皆服總,令皆小 韶尙書省集百官議。 功五月,今有司給假爲大 寧戚。 儀禮 國之典,不可滅也至。」 一五服,或以 左僕射 功。 辨嫌 一,而 名加,或因 禮、令之不 '功九月,非 疑。 劉 晌 禮,叔 八其倫 等議 喪服

相,以其迂儒鄙之,改國子祭酒。卒,年八十,贈兵部尙書。 明宗時嘗坐覆獄不當,貶綏州司馬。 復爲太子賓客,遷戶部、兵部侍郎。 盧文紀作

以其过儒品之 改國子祭河 一卒 年八,

# 崔居儉

**催居儉,淸河人也。祖蠡、父薨皆爲唐名臣。居儉美文辭,風骨淸秀,少舉進士。** 梁貞

**明中,爲中書舍人、翰林學士、御史中丞。**唐莊宗時,爲刑部侍郎、太常卿。

**崔氏自後魏、隋、唐與盧、鄭皆爲甲族,吉凶之事,各著家禮。 至其後世子孫,專以門望** 

**儉爲秘書監。居儉歷兵、吏部侍郎、尙書左丞、戶部尙書。晉天福四年卒,年七十,贈右僕射。** 自高,爲世所嫉。明宗崩,居儉以故事爲禮儀使,居儉以祖諱盡,辭不受,宰相馮道卽徙居 居儉拙於爲生,居顯官,衣常乏,死之日貧不能葬,聞者哀之。

## 崔梲

崔锐字子文, 深州安平人也。 父涿,唐末爲刑部郎中。 悦少好學, 頗涉經史, 工於文

왞

傳第四十

Ξ

程居儉

崔

梲

辭。 遭世 亂,寓居于滑臺,不遊里巷者十餘年,人罕識其面。 梁貞明三年,舉進士甲科

對尹王瓚辟掌奏記。

監察御史,不拜,踰年再命,乃拜。 客問疾者, 梲輒 |悦性至孝,其父|涿病,不肯服藥,曰:「死生有命,何用藥爲?」|悦屢進醫藥,不納。 迎拜門外,泣涕而告之,涿終不服藥而卒。 累遷都官郎中、翰林學士。 悦居喪哀毀, 服除, 唐明宗以爲 每賓

會朝崇元殿,廷設宮縣,二舞在北,登歌在上。文舞郞八佾,六十有四人,冠進賢,黃紗袍, 亡失已久,稅與御史中丞寶貞固、刑部侍郎呂琦、禮部侍郎張允等草定之。其年冬至,高祖 意,以謂維翰以孔英爲言,乃考英及第,物議大以爲非,卽罷學士,拜尙書左丞,遷太常卿。 爲當時所惡。 少專於文學,不能涖事,維翰乃命悅知貢舉,悅果不能舉職。時有進士孔英者,素有醜行, 相 桑維翰所改。 五年,高祖詔太常復文武二舞(4),詳定正、多朝會禮及樂章。 自唐末之亂,禮樂制度 晉高 ?祖時,以戶部侍郞爲學士承旨,權知天福二年貢舉。 **, 枕旣受命,往見維翰,維翰素貴,嚴尊而語簡,謂稅曰:「孔英來矣。」稅不諭其** 脫以唐故事學士草制有所改者當罷職,乃引經據爭之,維翰頗不樂。 初, 战爲學士, 嘗草制, 而稅

六十有四人,服平巾贖,緋絲布大袖、繡襠甲金飾,白練醬,錦騰蛇起梁帶,豹文大口袴,鳥

,右秉翟。執纛引者二人。武舞郞八佾,

白中單,白練醬襠,白布大口袴,革帶履。左執籥,

雜傳第四十三 李懌 校勘記

坊伶人、百工商賈、州縣避役之人,又無老師良工教習。明年正旦,復奏于廷,而登歌發聲 風痺改太子賓客分司西京以卒。 悲離煩慝,如薤露、虞殯之音,舞者行列進退,皆不應節,聞者皆悲憤。其年高祖崩。 嗟歎之。然禮樂廢久,而制作簡繆,又繼以龜兹部霓裳法曲,參亂雅音,其樂工舞郎,多敎 (文同),舉食,文舞舞昭德,武舞舞成功之曲。禮畢,高祖大悅,賜悅金帛,羣臣左右觀者皆 葆鼓一,大鼓一,金錞一。歌、簫、笳各二人。王公上壽,天子舉爵,奏玄同;三舉,登歌奏 左執干,右執戚。執旌引者二人。加鼓吹十二按,負以熊豹,以象百獸率舞。按設羽 | | | | | |

奉迎,樂工教習鹵簿鼓吹,都人聞者爲之流涕焉。 開運二年,太常少卿**陶穀奏廢二舞。明年,契丹滅晉,耶律德光入京師,太常請備**法駕

#### 李懌

少卿。 亡,事梁爲監察御史,累遷中書舍人、翰林學士。梁亡,責授懷州司馬,遇赦量移,稍遷衞尉 李懌,京兆人也。少好學,頗工文辭。唐末舉進士,爲祕書省校書郎、集賢校理。 天成中,復爲中書舍人、翰林學士,累遷尚書右丞承旨。

體。後遷刑部尙書分司洛陽,卒,年七十餘。 生可畏,來者未可量,假合予復就禮部試,未必不落第,安能與英俊爲准格?」聞者多其知 格,學士寶夢徵、張礪等所作不工,乃命懌爲之,懌笑曰:「年少舉進士登科,蓋偶然爾。後 時右散騎常侍張文寶知貢舉,所放進士,中書有覆落者,乃請下學士院作詩賦爲貢舉

# 校勘記

- (二) 與其兄暄 「暄」,汪本同,他本及薛史卷八九劉昫傅均作「晅」。
- (ii) 長興三年 按本史卷六及薛史卷四四唐明宗紀、通鑑卷二七八、劉昫拜相在長興 四年。
- 靈帝尊其祖解瀆亭侯淑爲孝元皇 祖爲孝元皇」。 又云「祖淑,父萇,世襲解資亭侯」。李賢注:「淑以河間王子封爲解濟亭侯 「靈帝」,各本原作「桓帝」。按後漢書卷八靈帝紀云「追尊皇
- **父封。」此當爲「靈帝」,據改。**
- (国) (至) 不可滅也 右營善大夫趙咸叉議曰 「滅」,汪本同,他本作「減」。 「又」,汪本同,他本作「乂」,五代會要卷八作「又」。
- (代) 五年高祖詔太常復文武二舞 「五」,各本原作「八」。 晉高祖死于天福七年,不可能有八年詔復 二舞之事。按"本史卷八及薛史卷七九晉高祖紀均謂天福五年冬至始用二舞,薛史卷一四四樂

# 新五代史卷五十六

# 雜傳第四十四

# 和凝

秀發。 義之士也,後必富貴,爾其謹事之!」因妻之以女。 |凝隨之,反顧見||凝,麾之使去。||凝曰:「丈夫當爲知己死,吾恨未得死所爾,豈可去也!」已 而一騎追壞幾及,凝叱之不止,卽引弓射殺之,壞由此得免。壞歸,戒其諸子曰:「和生,志 b. 性嗜酒,不拘小節,然獨好禮文士,每傾貲以交之,以故**凝得與之游**。 和凝字成績,鄆州須昌人也。其九世祖逢堯爲唐監察御史,其後世遂不復宦學。 舉進士,梁義成軍節度使賀瓌辟爲從事。瓌與唐莊宗戰于胡柳,瓌戰敗,脫身走,獨 而凝幼聰敏,形神 凝父

浮薄 ,喜爲諠譁以動主司。 |天成中,拜殿中侍御史,累遷主客員外郎,知制誥;翰林學士,知貢舉。 主司每放膀,則圍之以棘,閉省門,絕人出入以爲常。 是時,進士多 凝徹棘開

雜

傳第四十四

和凝

六四〇

門,而士皆肅然無譁,所取皆一時之秀,稱爲得人。

稱旨。 晉初,拜端明殿學士,兼判度支,爲翰林學士承旨。 天福五年, 拜中書侍郎、同中書門下平章事 高祖數召之,問以時事,凝所對皆

左僕射。 鄴,從進果反,鄭王卽以宣敕命騎將李建崇、焦繼勳等討之。 何? 之速也, 王,有急則命將擊之。」高祖以爲然。 」高祖曰:「卿將何以待之?」|凝曰:「先人者,所以奪人也。 高祖將幸鄴,而襄州安從進反迹已見。凝曰:「陛下幸鄴, 行至花山,遇建崇等兵,以爲神,遂敗走。 是時,鄭王爲開封尹,留不從幸,乃授以宣敕。 出帝卽位,加右僕射,歲餘,罷平章事,遷 從進謂高祖方幸鄴,不意晉兵 從進必因此時反, 請爲宣敕十餘通,授之鄭 則將奈 髙 祖

漢高祖時,拜太子太傅,封魯國公。 顯德二年卒,年五十八,贈侍中。

時第五 好 凝好飾車服,爲文章以多爲富,有集百餘卷,嘗自鏤板以行于世,識者多非之。 稱道後進之士。 一,後 知舉,選范質爲第五。 唐故事, 知貢舉者所放進 後質位至宰相,封魯國公,官至太子太傅,皆與凝同, 士,以已及第時名次爲重。 凝舉進士 然性樂 一及第

時以爲榮焉

王

# 趙瑩

趙瑩字玄輝,華州華陰人也。 爲人純厚,美風儀。 事梁將康延孝爲從事。 晉高祖爲保

義軍節度使,以瑩掌書記,自是徙鎮常以瑩從。

令。 用其言,心甚愛之。。高祖卽位,拜翰林學士承旨、戶部侍郎、同中書門下平章事。 出爲晉昌軍節度使、開封尹。 高祖 將起兵太原,以問諸將吏,將吏或贊成之,瑩獨懼形于色,勸高祖 是時,出帝童昏,馮玉、李彥韜等用事,與桑維翰爭權,乃 切反。 累拜· 高祖 中書 雖

共譖去之,以瑩柔而易制,故復引以爲相。

從俱,而易則留事漢,官至刑部郞中。 及卒,遣易從護其喪南歸。 左丞 田敏使于契丹,遇瑩于幽州,瑩見敏悲不自勝。 契丹滅晉,瑩從出帝北徙虜中,瑩事兀欲爲太子太保。 |太祖憐之,贈瑩太傅,葬于||華陰。 後瑩病將卒, 告于契丹, **瑩子易則、易從。** 周太祖時,與契丹通好,造尙書 願以尸還中國, 當其徙而 北也, 契丹許之。 與易

#### 馮玉

士、戶部侍郎,遷樞密使、中書侍郎、同中書門下平章事。 史, |玉不知書,而與殷鵬同爲舍人,制誥常遣鵬代作。頃之,|玉出爲潁州團練使,拜端明殿學 緊遷禮部鄓中,爲鹽鐵判官。<br />
晉出帝納<br />
玉姊爲后(こ)<br />
玉以后戚知制誥, 馮玉字璟臣,定州人也。少舉進士不中。馮贇爲河東節度使,辟爲推官。 拜中書舍人。 入拜監察御

維翰有隙,維翰由此罷相。 不敢除授,以俟玉決。」玉除中書舍人盧價爲工部侍郎,桑維翰以價資望淺爲不可,由是與 是時,出帝童昏,馮皇后用事,軍國大務,一決於玉。 玉嘗有疾在告,自刺史已上,宰相

压從入契丹,契丹以爲太子太保。周廣順三年,其子傑自契丹逃歸,压懼,以憂卒。 夕而盡。明日見彥澤,獨諂笑,自言願得持晉玉璽獻契丹,以冀恩獎。彥澤不納。出帝之北, |玉爲相,四方賄,積貲鉅萬。|契丹滅晉,張彥澤先以兵入京師,兵士爭先入||玉家,其貲||

# 盧質

丁母憂,解職。後去遊太原,晉王以爲河東節度掌書記。 **盧質字子微(三),河南人也。父望,唐司勳郎中。** 質幼聰惠, 善屬文。 事唐爲秘書郎,

林學士。從平梁,權判租庸,遷兵部尙書,後爲學士承旨,仍賜「論思匡佐功臣」。天成元年, 即位,欲以質爲相。質性疎逸,不欲任責,因固辭不受。拜太原尹、北京留守,遷戶部尙書、翰 拜匡國軍節度使。三年,拜兵部尙書,判太常卿事。 質與張承業等定議立莊宗爲嗣。莊宗將卽位,以質爲大禮使,拜行臺禮部尙書。 歷鎭河陽、横海。 莊宗

且 謂輝王不幸爲賊臣所立,而昭宗、何皇后皆爲梁所弒,遂以亡國,而「昭宣光烈」非所宜稱, |孝皇帝,廟號||景宗。||天成四年八月戊申,明宗御文明殿,遣質奉册立廟于||曹州。 曹太后崩,乃止。因其故壠,稍廣其封,以時薦饗而已。質乃建議立廟追諡,諡曰昭宣光烈 一立廟稱宗而不人太廟,皆非是。 初,梁已篡唐,封哀帝爲濟陰王,旣而酖殺之,瘞于曹州。 共以此非質,大臣亦知其不可,乃奏去廟號。 同光三年,莊宗將議改葬,而 而議者以

秦王從榮坐謀反誅,質以右僕射權知河南府事。 廢帝反鳳翔、愍帝發兵誅之,竭帑藏

第四十四

魔質

呂琉

滿 以厚賞,而兵至鳳翔皆叛降。 財以佐用。乃使質與政等共議配率,而貧富不均,怨訟並起,囚繫滿獄。 司獻籍數甚少,廢帝暴怒。 一萬。 廢帝患之,乃命質等借民屋課五月,由是民大咨怨。 自諸鎭至刺史,皆進錢帛助國用,猶不足, 廢帝悉將而東,事成許以重賞,而軍士皆過望。 三司使王玫請率民 六七日間, 所得不 廢帝入立,有

|晉高祖入立,|質以疾分司||西京,拜太子太保。 卒,年七十六,贈太子太師,諡曰文忠。

#### 呂琦

道,以死。 監者信之,縱琦去。」玉與琦得俱走,琦足弱不能行,玉負之而行,逾數百里,變姓名,乞食于 殺。守光怒虎,幷族其家。琦年十五,見執,將就刑,兗故客趙玉給其監者曰:「此吾弟也。」 兵相攻,守文敗死,其吏民立其子延祚而事之,以兗爲謀主。已而延祚又爲守光所敗,兗見 呂琦字輝山,幽州安次人也。父克,爲橫海軍節度判官。 節度使劉守文與其弟守光以

後爲橫海趙德鈞節度推官,入爲殿中侍御史。 **琦爲人美風儀,重節概,少喪其家,游學汤、晉之間。** 唐莊宗鎭太原,以爲代州軍事推 帛所以養士而扞國也,又輸以資虜,可乎?」「崧等惶恐拜謝,拜無數,琦足力乏不能拜而先 求利於中國也。」帝卽發怒曰:「卿等佐朕欲致太平而若是邪?朕一女倘幼,欲棄之夷狄,金 語問樞密直學士薛文遇,文遇大以爲非,因誦戎县「社稷依明主,安危託婦人」之詩,以誚琦 之以女,使彊藩大鎭顧外無所引援,可弭其亂心。」||熬以琦語語三司使張延朗,延期欣然日: 中國,契丹由此數欲求和。琦因言:「方今之勢,不如與契丹通和,如漢故事,歲給金帛,妻 師。其後契丹數遣使者求萴刺等, 與李崧俱備顧問,多所裨畫。琦言:「太原之患,必引契丹爲助,不如先事制之。」自明宗時 與,琦請不已,訓懼自殺,獄乃辨,蒙活者甚衆。歲餘,遷禮部郎中、史館脩撰。 王都反定州,契丹遣秃餒、剪刺等助都,而爲趙德鈞、王晏球所敗,秃餒見殺,剪刺等皆送京 拜知制誥、給事中、樞密院直學士、端明殿學士。是時,晉高祖鎭河東,有二志,廢帝患之,琦 納路反其獄,其冤家訴于朝,下御史臺按驗,得訓贓狀,奏攝訓赴臺。 「苟能紓國患,歲費縣官十數萬緡,責吾取足可也!」因共建其事。 廢帝大怒,急召松、琦等問和戎計如何。琦等察帝色怒,亟曰:「臣等爲國計,非與契丹 明宗 長興中,廢帝失守河中,罷居淸化坊,與琦同巷,琦數往過之。後廢帝入立,待琦甚厚, 時,爲駕部員外郎,兼侍御史知雜事。 其解甚卑恭, 河陽主藏更盜所監物,下軍巡獄,獄吏尹訓 明宗輒斬其使者不報。而東丹王又亡入 廢帝大喜, 佗日以琦等 訓爲安重誨所庇,不

僔

第四十四

呂琦

静融

丹爲助,遂以亡唐。 之,其議遂寢。 定,奏曰:「陛下以臣等言非,罪之可也, 帝曰:「呂琦彊項,肯以人主視我邪!」、埼曰:「臣素病羸,拜多而乏,容臣少息。」頃之喘 因遷琦御史中丞,居數月,復爲端明殿學士。 雖拜何益?」帝意稍解,曰:「勿拜。」賜酒一 其後晉高祖起太原, 果引契 巵 而 遣

琦事晉爲秘書監,累遷兵部侍郎。 天福八年卒。

文度幼孤,琦敎以學,如己子,後舉進士及第云。 趙玉仕至職方員外郎,琦事之如父,玉疾,親嘗藥扶侍,及卒,爲其家主辦喪葬。

琦有子餘慶、端。

## 薛融

不敢言,融獨從容對曰:「融本儒生爾,軍旅之事,未嘗學也,進退存亡之理,豈易言哉!」高 融爲觀察判官。高祖徙鄭,欲據太原拒命,延見賓佐,問以可否,而坐中或贊成之,或恐懼 薛融,汾州平遙人也。少以儒學知名,唐明宗時爲右補闕,直弘文館。晉高祖鎭太原,

祖不之責也。

僔

第 四 + 74

何 法

王 椹

辭 遷御史中丞,改尙書右丞,分司西京。卒,年六十。 非臣所 高祖入立,拜吏部郎中, 長也。」遂辭不拜。 時韶修洛陽大內,融上疏切諫, **棄侍御史知雜事**。 累拜左諫議大夫, 高祖褒納其言,即韶罷其役。 遷中書舍人。 融日:「文

# 何澤

令。 部與中。 民耕?陛下不聽臣言,願賜臣死於馬前,使後世知陛下之過。」莊宗大笑,爲之止獵。 兵,而暴斂疲民以給軍食。今田將熟,奈何恣畋游以害多稼?使民何以出租賦,吏以何督 何澤,廣州人也。父鼎,唐末爲容管經略使。澤少好學,長於歌詩。 唐莊宗好畋獵,數踐民田,澤乃潛身伏草間同莊宗,當馬諫曰:「陛下未能一天下以休 舉進士,爲洛陽 拜倉

以笏叩顙,北望而呼曰:「明主,明主!」聞者皆哂之。 明宗嘉之,拜吏部郎中、史館脩撰。 明宗時,數上書言事。明宗幸汴州,又欲幸鄴,而人情不便,大臣屢言不聽,澤伏閤切 澤外雖直言,而內實邪佞,嘗於內殿起居,班退,獨

五代之際,民苦於兵,往往因親疾以割股,或旣喪而割乳廬墓,以規免州縣賦役。 戶 部

歲給獨符,不可勝數,而課州縣出紙,號爲「獨紙」。澤上書言其敝,明宗下詔悉廢戶部獨紙。

請立秦王爲皇太子。秦王素驕,多不軌,遂成其禍,由澤而始。 法。」乃以太僕少卿致仕,居于<u>河</u>陽。 先知之, 即稱新官上章自訴。章下中書, 鳳等言:「澤未拜命而稱新官, 澤與宰相趙鳳有舊,數私于鳳,求爲給諫。鳳薄其爲人,以爲太常少卿。敕未出而澤 澤時年已七十,尙希仕進,卽遣婢宜子詣匭上章言事 輕侮朝廷, 蒲坐以

|晉高祖入立,召爲太常少卿,以疾卒于家。

#### 王權

卒,年七十八,贈左僕射。 馬。 唐亡、事經爲職方員外郎、知制誥、翰林學士,累遷御史中丞。 起爲 |權字秀山,太原人也。|唐左僕射起之會孫。父薨,官至右司 治庶子,累遷 安能稽顙於穹廬乎?」因辭不行,坐是停任。 戶部尙書。 晉高祖 時爲兵部尙書。 是時, 高祖以父事契丹, 郎中。 唐莊宗滅梁,貶權 踰年以太子少傅致仕。 權舉進士,爲右 權當奉 隨 州 補

## 史圭

升殿侍立。 士職雖清,而承領文書,**多**掌庶務,與判官無異。 郭崇韜鎭成德,辟爲從事。 史圭,常山石邑人也。 樞密直學士升殿自圭始。 明宗時,爲尙書郎。安重誨爲樞密使,薦|圭直學士。 故事, 爲人明敏好學。 改尙書右丞, 判吏部銓事。 爲寧晉、樂壽縣令,有善政,縣人立碑以頌之。 重酶素不知書,倚崖以備顧問,始白許圭 重酶敗死,圭出爲貝州刺 直學

|晉高祖立,召拜刑部侍郎、鹽鐵副使,遷吏部侍郎,分知銓事,有能名。 以疾罷,卒于常 史。罷歸常山,閉絕人事,出入閭里乘輜輧車。

गि

# 龍敏

調。 敏素善馮道,道爲唐莊宗從事,乃潛往依之。 龍敏字欲訥,幽州永淸人也。少仕州,攝多軍。劉守光亂,敏避之滄州,遂客於梁,久不 監軍張承業謂道曰:「聞子有客,可與俱

雜

傳第

7<u>4</u> -1-

史主

龍嫩

道以敏見承業,承業辟敏監軍巡官,使掌奏記。 莊宗即位,召拜司門員外郎

閗。 敏父咸式(三),年七十餘,而其王父年九十餘,皆在鄴,敏乃求爲興唐尹, 丁母憂,去職。 趙在禮反,逼敏起視事。 明宗卽位,在禮鎭滄州, 敏乃復得居喪。 事祖、父以孝 服

除,累拜兵部侍郎。

官砦,且戰且行,得其半達,則事濟矣!」懿爲言之廢帝,廢帝莫能用。然人皆壯其大言。 聞 |德鈞爲將,守城嬰塹,篤勵健兒而已。 使其當大敵,奮不顧身,非其能也。 況有異志乎? 今 |丹且有內顧之憂,何暇助晉。|晉失||契丹,大事去矣。| 又謂||李懿曰:「혮,||燕人也,能 <u>敏日:「晉所恃者契丹也。東丹王失國之君,今在京師,若以兵送東丹自幽州而入西樓,契</u> 兵契丹。 駕 前之馬,猶有五千,願得壯者千匹,健兵千人,與勇將郞萬金,自平遙沿山冒虜中而趨 歷曆爲太常卿,使于吳越。 是時,使吳越者,見吳越王皆下拜, 箘獨揖之。 唐廢帝在懷州,趙德鈞父子有異志,張敬達屯于晉安,勢甚危急。 是時,晉高祖起太原,乞 廢帝問計從臣, 還,遷工部 知德鈞。

侍郎。陇酤元年,瘍發於首卒,贈右僕射。

記

# 校勘記

(1) 晉出帝納玉姊爲后

馮玉爲后兄、疑「玉姊」當作「玉妹」。

按本史卷一七出帝皇后馮氏傳、薛史卷八九馮玉傳及通鑑卷二八三均謂

(三) 盧質字子徵 汪本同。他本「黴」作「黴」。

(三) 敏父咸式 「咸」,南監本同,汪本作「威,他本均作「盛」。

# 新五代史卷五十七

# 雜傳第四十五

州節度使,以推官李薨掌書記。「崧謂掌書呂柔曰:「魏王皇子,天下之望,書奏之職,非薨所 李崧,深州饒陽人也。 李崧 

殺崇韜,人情不安。崧入見繼岌曰:「王何爲作此危事?誠不能容崇韜,至洛誅之何晚?今 乃召書吏三四人,登樓去梯,夜以黃紙作詔書,倒用都統印,明旦告諭諸軍,人心乃定。 遠軍五千里,不見咫尺之詔殺大臣,動搖人情,是召亂也。」繼岌曰:「吾亦悔之,奈何?」 繼岌與郭崇韜伐蜀,以崧掌書記。繼岌已破蜀,劉皇后聽讒者言,陰遣人之蜀,教繼岌

師還,繼岌死於道。

傳 绑 四 -}-五

李

惄

當。」柔私使崧代爲之,以示盧質、馮道,道等皆以爲善。乃以崧爲興聖宮巡官,拜協律郞。

唐魏王繼岌爲興聖宮使,領鎭

非石 時, 춢 殿 拜 明宗怒甚, 欲使燃終始成己事也。其後晉高祖以兵入京 契丹入鴈門,明宗選將以捍太原,晉高 沱 書侍 敬瑭 延光居鎮州 郎、同中 不可也!」由是從崧議。 長興中,明宗春秋高,秦王 責延 /壽等,延壽等惶恐,欲以康義誠 書 ,辟崧掌書記。 門下平章事 兼樞密使。 延光爲樞密使,崧拜拾遺,直樞密院。累遷戶部侍郎、端明 晉高 從榮多不法,晉高 祖深德之,陰遣 祖欲之。 丁內艱, 應選, 師 松竀匿 樞密使范延光、 起復 崧獨曰:「太原, 祖爲六軍 人謝崧曰:「爲浮屠者, 伊闕民家,晉高祖召爲戶部侍郎 ·副使, 趙延壽等議將,久不決, 國之北門, 懼 禍 及,求 必合其尖。 出 宜得重臣 外藩。是

詐 原,重威代爲侍衞使,崧亦數稱重威之材,於是漢高 壽 重 以爲然,卒以重威將大兵,其後敗于中渡,晉遂以亡。 威 在 幽州 同 高 制加平章事,漢高祖 祖 崩, 詐言思歸以誘晉兵,<br />
崧等信之。 出帝卽位,以拯棄判三司, 恥之,怒不肯謝,晉高 與馮玉對掌樞密。 初,漢高祖在晉,掌親 祖遣和凝諭之,乃謝。 祖以崧爲排己,深恨之。 是時, 軍,爲侍衞都指揮使,與杜 晉兵敗契丹於陽城, 其後漢高 |松又信延壽之 温出 居太 趙

與馮道等得還。 人而 契丹耶律德光犯京師,德光素聞延壽等稱崧爲人,及入京師,謂人曰:「吾破南朝,得崧 !」乃拜崧太子太師。 高祖素不悅處,又爲怨者譖之,言處爲契丹所厚,故處遇漢權臣,常惕惕爲 契丹北還,命盛以族俱行,留之鎭州。 其後麻荅棄鎭州,

謙謹,莫敢有所忤。

乃以幼女託逢吉。逢吉送崧侍衞獄。崧出乘馬,從者去,無一人,崧恚曰:「自古豈有不死之 王凝謀因山陵放火焚京師,又以蠟丸書通守貞。 逢吉遣人召 崧至第,從容告之, 崧知不免, 曲李澄家,以情告澄。是時,高祖將葬睿陵,河中李守貞反。 澄乃敎延遇告變,言崧與其甥 楊那、史弘肇多濫刑法。嶼僕葛延遇爲嶼商賈,多乾沒其貲,嶼笞責之。延遇夜宿逢吉部 逢吉子弟同舍,酒酣,出怨言,以爲奪我第。||崧又以宅劵獻逢吉,逢吉尤不喜。||漢法素嚴, 人,然亦豈有不亡之國乎!」乃自誣伏,族誅。 漢高祖入京師,以崧第賜蘇逢吉,崧家遭亂, 多埋金寶,逢吉悉有之。 而松弟嶼、義與

數經赦宥,難之。樞密使王峻聞之,多台符有義,乃奏誅延遇。 

# 李磷

間, 自稱淸海軍掌書記,謁定州王處直,處直不爲禮。乃易其綠衣,更爲緋衣,謁常山李弘 李鳞,唐宗室子也。 其伯父陽事唐行,咸通間爲給事中。鳞少舉進士,累不中,客河朔

傳第四十五

李

鲱

規 口 弘規進之趙王 敢言,乃陰爲莊宗畫文禮可破之策。後文禮敗,莊宗以鱗爲支使 王鎔,鎔留爲從事。其後張文禮弒鎔自立,遺鏻聘唐莊宗於太原

非 決,以聞。 上言:「獻祖宣皇帝建初陵, 唐 宗正 莊宗即位,拜鱗宗正卿,以李瓊爲少卿。 無譜諜"莫能考按。 爲令。 **|鳞不學無知,不足以備九卿。」坐貶司農少卿,** 莊宗下公卿博士, 民卽持絳幡招置部曲,侵奪民田百餘頃,以謂陵園壖地。 問故唐諸帝陵寢所在。公卿博士言:「丹陽在今潤州 有民詣寺自言世爲丹陽竟陵臺令,厚賂宗正吏,鳞、瓊不復詳 懿祖光皇帝啓運陵,請置臺令。」縣中無賴子自稱宗子者百餘 戲祖、懿祖墓在趙州昭慶縣,唐國初建,鋒、瓊 出爲河中節度副使。 民訴于官,不能 而 竟陵

安重 才較業, 久而 宗室皆 施 明宗 日「楊溥欲 無効 何後衆 即位 爲宰相。 由 一,以鳞故 人? 是 足鳞 歸 m 今天祚中興,宜按舊典,磷雖 國 久寅 人,召還, **兗州** 久矣, 若朝 班 行 行,於諸君安乎? 軍 聚遷戶部尚書。鳞意頗希大用,嘗謂 司 廷遣使諭之, 馬 」道等惡 可以召也。」重酶信之,以玉帶與諜者 不才, 嘗 其言。 事莊宗霸府, 後楊溥諜者見鏻 馮道、趙鳳日:「唐家故 識今天子於藩 事 , |鏻 邸, 使爲 謂 論

荆 南, 鏻 謂高從誨曰:「士固有否泰,吾不爲時用久矣。 與廢帝 有 舊 愍帝 時,為兵 部 尙 書, 奉 使 湖南 今新天子即位,我將用矣!」乃就從海 聞 廢帝 立,喜,以謂 必用己爲相 還過

右,取進奏官報狀示鱗, ) ) 與文紀皆拜平章事矣。 鳞慚失色。 還,遂獻其皮、拂,廢帝終不 之臣,孰有公輔之望?」承翰曰:「尚書崔居儉、左丞姚顗,其次太常盧文紀也。」從誨笑顧左 求實貨入獻以爲賀,從誨與馬紅裝拂二、猓然皮一,因爲鳞置酒,問其副使馬承翰:「今朝廷

初, 李愚自太常卿作相,而盧文紀代之,及文紀作相,鳞乃求爲太常卿。 及拜命,中謝

曰:「臣叨入相之資。」朝士傳以爲笑。

用。

|鳞事||青累遷太子太保。 漢高祖卽位,拜鏻司徒,居數月卒,年八十八,贈太傅。

賈緯,鎭州獲鹿人也。 少舉進士不中,州辟參軍。 唐天成中,范延光鎭成德,辟趙州軍

事 判官,遷石邑令。

當唐之末。 緯長於史學。 王室微弱, 唐自武宗已後無實錄,史官之職廢,緯采次傳聞,爲唐年補錄六十五卷。 諸侯疆盛,征伐擅出,天下多事,故緯所論次多所闕誤。 而喪亂之

際,事迹粗存,亦有補於史氏。 徻 脚 第 維

四 + 五

义

败 希 堯

六五八

(唐書) 晉 天 福 T 內艱,服除,知制誥。 中,爲太常博士,非其好也,數求爲史職,改屯田員外郎、起居郎、史館脩撰,與脩 累遷中書舍人、諫議大夫、給事中, 復爲修撰

爲人,待之甚薄。 漢隱帝時, 詔與王伸、竇嚴等同脩晉高祖、出帝、漢高祖實錄。 緯爲維翰傳,言「維翰死,有銀八千鋌」。翰林學士徐台符以爲不可, 初,桑維翰爲相,常惡緯

非緯,緯不得已,更爲數千鋌

當時大臣過失,峻見之,怒曰:「賈給事子弟仕宦亦要門閥, 何以仕進?」言之太祖〔三〕,貶平盧軍行軍司馬。 廣順元年實錄成,緯水遷官不得,由是怨望。是時,宰相王峻監脩國史,緯書日曆,多言 明年卒于青州 奈何歷詆當朝之士, 使其子孫

# 段希堯

高祖 賓佐謀,希堯以爲不可,高祖雖不聽,然重其爲人,不責之也。 呼萬歲者,高祖惶惑,不知所爲。希堯勸高祖斬其亂首,乃止。 段希堯,河內人也。晉高祖爲河東節度使,以希堯爲判官。 高祖軍屯忻州,軍中有擁 高祖將舉兵太原,與其

高祖入立,希堯比諸將吏,恩澤最薄。 久之,稍遷諫議大夫,使于吳越。 是時,江、淮不

欺, 東、西銓事,累遷禮部尙書。 通, 凡使吳越者皆泛海,而多風波之患。希堯過海,遭大風;左右皆恐懼,希堯曰:「吾平生不 汝等恃吾,可無恐也!」已而風亦止。歷萊、懷、棣三州刺史。 卒,年七十九,贈太子少保。 出帝時,爲吏部侍郎,判

# 張允

禮 水部員外郎,知制誥。 敗,乃出之爲魏州功曹。 張允,鎭州人也。少事州爲張文禮參軍。 罷,遷左散騎常侍。 廢帝皇子重美爲河南尹,掌六軍,以允剛介,乃拜允給事中,爲六軍 趙在禮辟節度推官、歷滄、克二鎭掌書記。 唐莊宗討張文禮,允脫身降,莊宗繫之獄,文 入爲監察御史,累遷

其禍 罪,若有罪者見捨,則無罪者銜冤。 陛下無赦爾! **音而宥過,開狴牢而出囚,冀感天心以救其災者,非也。假有二人之訟者,一有罪而一** 1,無赦者小害而大利,久而不勝其福。』又漢之吳漢疾篤,帝問漢所欲言。 晉高祖卽位,屢赦天下,允爲駁赦論以獻曰:「管子曰:『凡赦者小利而大害,久而不勝 』蓋行赦不以爲恩,不行赦不以爲無恩,罰有罪故也。 此乃致災之道,非救災之術也。至使小人遇天災,則皆 自古皆以水旱則降德 漢曰:『惟願 無

傳第

四十

五

張尤

王松

善而 欲,務勤儉,恤鰥寡,正刑罰而已。」是時,晉高祖方好臣下有言,覽之大喜。 喜而相勸以爲惡,曰:『國將赦矣,必捨我以救災。』如此,則是敎民爲惡也。 夫天之爲道,福 禍淫。 若捨惡人而變災爲福,則是天又喜人爲惡也。凡天之降災,所以警戒人主節嗜

|祖以兵入京師,||沈匿于佛殿承廛,墜而卒,年六十五。 |允事漢爲吏部侍郎,隱帝誅戮大臣,京師皆恐,允常退朝不敢還家,止于相國寺。

#### 王枢

陳,高祖憐之(11),但使解職而已。|松有田城東,歲時往來京師,以疾卒。 鎭太原,辟松節度判官。晉高祖卽位,拜右諫議大夫,累拜工部尚書。出帝北遷,蕭翰立許 二十四考中書令也。」聞者笑之。 勿自疑,由是御史臺悉斂百官僞敕焚之。。松以手指其胸,引郭子儀自誚, 王從益於京師,以松爲左丞相。 王松,父徽、爲唐僖宗宰相。松舉進士,後唐時,歷刑部郎中,唐末,從事方鎭。晉高祖 漢高祖入洛,先遣人馳詔東京百官管授僞命者皆焚之,使 後松子仁寶爲李守貞河中支使,守貞反,松以子故上書自 以語人曰:「此乃

雅

墫 第 [74 + 五

裴 싫

Œ

仁裕

#### 裴皞

議,每陳朝廷闕失,多斥權臣。改太子賓客,以老拜兵部尚書致仕。晉高祖起爲工部尚書, 復以老告,拜右僕射致仕。卒,年八十五,贈太子太保。 眷」,居河東者號「中眷」。據出於名家,而容止端秀,性剛急,直而無隱。少好學,唐光化中 舉進士,拜校書郎、拾遺、補闕。 裴皞字司東,河東人也。 裴氏自晉、魏以來,世爲名族,居燕者號「東眷」,居涼者號「西 事梁爲翰林學士、中書舍人。事後唐爲禮部侍郎。 皞喜論

引新進士詣皞,皞喜作詩曰:「門生門下見門生。」世傳以爲榮。 迎不送。人或問之,皞曰:「我見桑公於中書,庶寮也;桑公見我於私第,門生也。 **皞以文學在朝廷久,宰相馬胤孫、桑維翰,皆皞禮部所放進士也。後胤孫知舉,放牓,** 。維翰已作相,嘗過皞, 何送迎

# 王仁裕

之有?」人亦以爲當。

秀, 以文辭知名秦、 一仁裕字 德鳌 随間口。 天水人也。 秦帥辟爲秦州節度判官。 少不知書, 以狗馬彈射爲樂, 秦州入于蜀, 年二十五始就學, , 仁裕因事 蜀爲中書舍 而爲人儁

(、翰林學士。

〇 撫本有此三字。

書,罷爲兵部尚書、太子 立,罷職 事,至其入立,馳檄諸鎭,詔書、告命皆仁裕爲之。久之,以都官郎中充翰林學士。晉高 以爲判官。 唐莊宗平蜀,仁裕事唐,復爲秦州節度判官。 爲 鄓 中,歷司封左司 廢帝舉兵鳳翔, 少保。 郎中、諫議大夫。 顯德三年卒,年七十七,贈太子少師 思同戰敗,廢帝得仁裕, 漢高祖時, 王思同鎭興元, 聞其名不殺, 寘之軍中。 復爲翰林學士承旨 辟爲從事。 累 思同留守西 遷 自廢帝起 戸部尚 旭 入

平生所作詩 少也 無 和 「嘗夢剖其腸胃,以西江 聲,當有爭者起 仁裕性曉音律,晉高 萬 餘首 爲 於禁中。」已而 百卷,號西江集。 祖初定雅樂,宴羣臣於永福殿, 水滌之,顧 兩 軍 校鬭昇龍門外, 見江中沙石皆爲篆籀之文,由是文思益 聲聞于內, 奏黃鍾,仁裕聞之曰:「音不 人以爲神。 進。 喜爲 乃集其 純肅 其 而

相, 時稱其得人。 裕 與和凝 於五代時皆以文章知名,又嘗知貢舉,仁裕門生王溥,凝門生范質,皆至宰

裴羽

**裴羽字用化,其父贄,相唐僖宗,官至司空。** 羽以一品子爲河南壽安尉。 事梁爲御史

臺主簿,改監祭御史。

復通於中國。|羽護|崇喪至京師,及其橐裝還其家,士人皆多|羽之義。 錢鏐與安重誨有隙,唐方絕鏐朝貢,羽等被留經歲,而崇以疾卒。 與俱歸。醪初不許,羽以語感動醪,醪惻然許之,因附羽表自歸。明宗得醪表大喜,由是吳越 唐明宗時,爲吏部郎中,與右散騎常侍陸崇使于閩,爲海風所飄至錢塘。 後鏐遣羽還,羽求載崇尸 是時,吳越王

羽,周太祖時爲左散騎常侍,卒,贈戶部尚書。

#### 王延

令。 **馮道作相,與延故人,召拜左補闕。遷水部員外郎,** 王延字世美,鄭州長豐人也。 少好學, 嘗以賦謁梁相李琪,琪爲之稱譽,薦爲卽墨縣 知制誥。 拜中書舍人;權知貢舉。

雜

**傳第四十五** 

裁羽

王延

馬重接

遂及其子邪!」明年,選屆甲科,人皆稱其公。 累遷刑部尚書,以太子少保致仕。 卒,年七 之,則曰:『其父善泅,子必能之。』若是可乎?」延退而笑曰:「盧公之言,爲崔協也,恨其父 貢舉選士,當求實効,無以虚名取人。<br />
昔有<br />
越人善泅,生子方降,其母浮之水上。<br />
人怪而問 吏部尚書盧文紀與故相崔協有隙。是時, 協子順方舉進士, 文紀謂延曰: 「吾嘗譽子于朝,

延爲人重然諾,與其弟規相友愛,五代之際,稱其家法焉。

# 馬重績

大曆,居于太原。 馬重績字洞徽,其先出於北狄,而世事軍中。 唐莊宗鎭太原,每用兵征伐,必以問之,重績所言無不中,拜大理司直。 重績少學數術,明太一、五紀、八象、三統

明宗時,廢不用。

者焉。 健而 離明。 晉高祖以太原拒命,廢帝遣兵圍之,勢甚危急,命重績筮之,遇同人,曰:「天火之象,乾 易曰:『戰乎乾。』乾,西北也。又曰:『相見乎離。』離,南方也。 健者君之德也,明者南面而嚮之,所以治天下也。同人者人所同也,必有同我 其同我者自北而南

木,木不自續,虛而動之,動隨其覆。 歲將秋矣,無能爲也!」七月而從實敗。 高祖大喜,賜 下。拜重績太子右贊善大夫,遷司天監。明年,張從賓反,命重績筮之,遇隨,曰:「南瞻析 乎?乾,西北也,戰而勝,其九月十月之交乎?」是歲九月,製丹助晉擊敗唐軍,晉遂有天

以良馬、器幣。

皆合無舛。」乃下詔班行之,號調元曆。行之數歲輒差,遂不用。 首。」詔下司天監趙仁錡、張文皓等考覈得失。仁錡等言:「明年庚子正月朔,用重績曆考之, 多,差闊愈甚。臣輒合二曆,創爲新法,以唐天寶十四載乙未爲上元,雨水正月中氣爲氣 審多差,宣明氣朔正而星度不驗,崇玄五星得而歲差一日,以宣明之氣朔,合崇玄之五星, 二曆相參,然後符合。自前世諸曆,皆起天正十一月爲歲首,用太古甲子爲上元,積歲愈 天福三年(四),重績上言:「曆象,王者所以正一氣之元,宣萬邦之命。而古今所紀,考

夜昏曉,皆失其正,請依古改正。」從之。 四刻十分爲正,此自古所用也。今失其傳,以午正爲時始,下侵未四刻十分而爲午。 由是畫 重績又言:「漏刻之法,以中星考晝夜爲一百刻,八刻六十分刻之二十爲一時,時以

重績卒年六十四。

# 趙延義

國, 監 ,得罪而幾死者數矣!子孫能以佗道仕進者,不必爲也。」 然延義少亦以此仕蜀爲司天 每爲建占吉凶,小不中, 趙延義字子英, 秦州人也。 輒加詰責。 會祖省躬通數術, 温珪臨卒, 戒其子孫曰:「數術,吾世業,然吾仕亂 避亂于蜀。 父温珪, 事蜀王建爲司天

監。 蜀亡,仕唐爲星官。 延義兼通三式,頗善相人。 契丹滅晉,延義隨虜至鎭州。

李筠、白再榮謀逐麻答歸漢,

猶豫未決,延義假述數術贊成之。

下, 圍蘇逢吉、劉銖第,欲誅其族,聞延義言悚然,因貸其族,二家獲全。 當以仁恩德澤,而漢法深酷, 周太祖自魏以兵入京師,太祖召延義問:「漢祚短促者,天數邪? 刑罰枉濫,天下稱冤,此其所以亡也!」是時,太祖方以兵 延義事周爲太府卿、判 」延義言:「王者撫天

司天監,以疾卒。

# 校勘記

(1) 其伯父湯事唐 「陽」,薛史卷一〇八李鏻傅作「湯」。 按新唐書卷七〇下宗室世系表,陽昆弟有

濟、深、泊,名皆從水。疑「陽」爲「湯」傳寫之誤。

(三) 言之太祖 「太祖」,各本原作「高祖」,薛史卷一三一賈緯傳作「太祖」。按薛史卷一一〇周太祖

紀及通鑑卷二九〇,周太祖於廣順元年正月卽位改元,同月加王峻同平章事。

今賈緯被貶旣在

廣順中王峻爲相之時,則此「高祖」爲「太祖」之訛無疑,據改。

3 高祖憐之 按本史卷一〇漢本紀及薛史卷一〇一漢隱帝紀,漢高祖死於乾祐元年正月,同年三

月李守貞反。 王松上書當守貞反時,則此「高祖」當作「隱帝」。

(日) 天福三年 本史卷八晉高祖紀載:天福四年三月「丙辰頒調元曆」,薛史卷七八晉高祖紀及五代

**澮要卷一○亦繫在四年。此疑誤。** 

雜

